

يوسف السباعي

■ أمّ رتيبة

■ جمعية قتل الزوجات



أَمْرِيَّة

مؤلفات
يوسف السباعي



■ أمّ رتيبة

■ جمعية قتل الزوجات

الأمك

إلى أمي العزيزة :

« الست أم يوسف »

أهدى مسرحية « أم رتية » .

لا أحاول أن أرد بها جميلا سابقا ، فجميلها أجلّ من
أن يرد .

ولكنني أرجو أن أهب لها لحظات ضحك تسري بها
عن نفس بكية . فياضة الدمع . هامية المآقي ..

(يوسف السباعي)

مقدمة

هذه محاولة في كتابة المسرحية ..
لقد أمتعتني كتابتها ، إذ كنت أشعر وأنا أغلق باب الحجرة لأخلو بنفسى للكتابة .
أنى لم أخل بها وأنى لم أكن فردا ، بل كنت محوطا بمجموعة أبطالها المضحكين
الهازلين .

كنت أضحك وأنا أكتب ..
وقد أكون مجنونا .. وقد أكون مغرورا ..
ولكنى أؤكد لكم أننى أحيتها وأحييت أبطالها ، وأن كتابتها لم تكلفنى أى جهد
ولا مشقة ، بل كنت فى كتابتها كالسامر فى جلسة سمر .
ولقد سألتى بعض الأصدقاء أن أعرضها للتمثيل على المسرح ، ولكن فضلت أن
أضعها أولا فى كتاب .. لأنى أثق فى كتيبى وأحب قرائى ، وأشعر بينهم بالطمأنينة
والغبطة ، لأن بينى وبينهم رابطة أقوى مما بين كاتب وقارئ .. بينى وبينهم انسجام
وصداقة وحب .

وثمة شئ أريد أن أقدم له .. وهو أنى كتبتها باللغة العامية .. إن من الجنون أن
أحاول إنطاق أبطالها بالعربية .. فأرجو من أنصار اللغة العربية أن « يصهينوا شويه »
ويتسامحوا معى قليلا .. فالمسامح كريم .
وأرجو بعد كل هذا ألا تخذلنى « أم رتييه » فضحك القارئ كما أضحكتنى ..
فإذا فشلت فليعذرنى .. لأن إيكاءه قد يكون يسيرا .. أما إضحাকে فهو أمر جد
عسير .

(يوسف السباعى)

الفصل الأول

المنظر : صالة في بيت عبد الصبور أفندى بها منضدة للأكل وأريكة وبوفيه .. في المواجهة شباك يطل على حارة ضيقة ويقابله شباك المنزل المقابل وهو منزل سيد أفندى . وعلى اليمين بابان يؤديان إلى غرف النوم وعلى اليسار باب يؤدي إلى السلم وباب يؤدي إلى المطبخ .
تفتح الستار على أم رتبية وقد جلست على الأريكة وأطلت بنصفها الأعلى من الشباك وأمسكت بيدها حبل تدلى منه سبت ، وسنية تجلس أمام طبلية وتحرق الملوخية .

المشهد الأول

أم رتبية : (للبائع في الطريق) يا راجل اختشى على عرضك وحط كان بطاطايه .. هو إيه يا اختى ده .. هو انت بتوزن دهب ، الله يرحم زمان كانت الواحدة تشتري حمل البطاطاه بتلاته ابيض .. اوعى بقى شيل إيدك خلينى اطلع السبت .. ما أنت أصلك كده دايمًا وشك عكر ، وكل ما احلف ما اشتري منك .. أرجع برضه أقول يابت نفعية دا راجل غلبان (تأخذ في جذب الحبل ورفع السبت) .

سنية : (منهمكة في الخروط .. تلوك لبانة بين شدقيها وتغنى) سايقه عليك النبي تسمع وتحصنى يا عبده ، لا والنبي يا عبده .

أم رتبية : (تفحص البطاطا وتصيح بالبائع) مش بقول لك انك راجل غشاش وضلالى .. خد غير لى البطاطايه المعفنه دى .. طيب بس انكتم وانسد مانيش مغيره حاجه .. خد آدى صاغ حار ونار في جتتك (تضع النقود في

ورقة وتغذف بها من النافذة) .

سنية : (مستمرة في غنائها) سايقه عليك النبي تسمع وتقرصني يا ...
أم رتية : (ملتفتة إليها مقاطعة غنائها) هس اخرسي يا بت بلاش مسخره وقلة
حيا . ايه الكلام اللي بتقوله ده . مين داللي عايزاه يقرصك ؟
سنية : يوه . دا عبده يا ستي .

أم رتية : اخرسي جاكي قطع لسانك من جوا اللغاليغ .. هوا سيدك عبده بتاع
حاجات من دى .

سنية : وهوه يا ستي يعنى ما فيش حد اسمه عبده غير سيدى عبد الصبور .. أهو فيه
عبده المكوجي ، وعبده اللبان .

أم رتية : وكان لك عين تقولى كله يا بجمحه .. يا قليلة الحيا .

سنية : يا ستي اهو كلام .. احنا خسرانين حاجه ، أنا بقالى سبع سنين سايقة
عليهم النبي .. لا حد حضن ولا حد قرص .

(يفتح الشباك الذي في الليت المقابل وتبدو فيه أم سيد) .

المشهد الثاني

(سنية تعاود الحزط ، والغناء ، ومضغ اللبانة) ..

أم سيد : العواف يا ست ام رتية .

أم رتية : يعافيكى ويعافى بدنك .

أم سيد : ازاي بسلامته سى عبد الصبور افندى .. مش بخير ؟

أم رتية : بخير يا اختى الحمد لله ، وازاي سى سيد افندى ؟

أم سيد : والنبي يسأل عليكى دايما .

أم رتية : سألت عليه العافية ، بقاله منه ما حدش يشوفه ، ولا يسأل على سى عبد

الصبور ولا حاجة ، ولا كأتنا جيران ، ولا الشباك فى الشباك .. يا اختى دا

النبي وصا على سابح جار .

أم سيد : والله يا ستي ام رتيبة .. أصله مشغول اليومين دول ، والدنيا تلاهي ،
ويادوبك بيعجى من الشغل يحط راسه ينام ، وصحته مخسسته شوية ما
بقاش زى الأول . كان زمان عليه عافيه زى الحصان .. دلوقت ما بقاش
يستحمل حاجة أبدا ، وطول النهار شكوى م الشغل ومن الناس .

أم رتيبة : ربنا يكون فى عونہ . (يسمع على الباب الخارجى طرق فتنادى على
سنية) شوفى مين يابت (ثم تعاود الحديث مع أم سيد) ماتفضل شوية يا
ست أم سيد ، أنا خلاص ما ورايش حاجة .. الملوخيه انخرطت والفرخة
على النار .. مش ناقص غير أسقط الملوخيه فى الشوربه . والتقليه حا خليها
بعدين .. أصلى متعوده ما أطشهاش الا وسى عبد الصبور داخل ، والنبي
تيجى ندردش شويه ، أصل انا زهقانه اليومين دول ونفسى متضايقه .

أم سيد : بس بسلامته سى عبد الصبور زمانه جاى دلوقت .
أم رتيبة : لسه بدرى عليه .. دا ما يجيش إلا الساعة اتنين .. لسه واخذ على مواعيد
الشغل .. اللي فهشى ما يخلهشى .. أهو راح المعاش لكن برضه كل يوم
الصبح ياخذ الشنطه تحت باطه ويخرج ، ويفضل يسرح ما يرجعش إلا
الساعة اتنين زى الموظفين .

أم سيد : طيب ياختى أنا جايالك حالا .

(تختفى أم سيد داخل الشباك) .

(يطرق الباب مرة ثانية .. وسنية مستمرة فى الخروط والغناء ومضغ
اللبان) .

أم رتيبة : (ملتفتة فى غضب) انطرشت والا إيه .. قلت قومى شوفى مين ..
جاكى خابط فى ودانك ، كفايه عليك الغنا وسى عبده .

سنية : (تنهض مثاقلة) خليه مرزى على الباب ، يعنى مستعجل على إيه ..
جايب القليعه ، والا جايب الديب من ديله .. مش جايب بنكله كسيره ،
(تفتح الباب) خش . خلاص .. الدنيا طارت ؟ مش قادر تصبر ؟

(يدخل زينهم الخادم مندفعاً ويضع قرطاساً صغيراً ويصيح فى عجلة وهو

يهم بالخروج) .

المشهد الثالث

زينهم : خلدوا الكسيرة ايه .. الراجل قال ما فيش حاجة اسمها بنكلة اليومين دول ،
جيت بالتعريفه كله ، بنكله آل ، فيه حاجة اسمها نكله .. أنا نازل بقى .
أم رتية : (تغادر الشباك وتصيح بزينهم) تعالى هنا ياللى تنقصف رقبتك .. رايح
فين ؟

زينهم : مش وقت شرح . أصلى مستعجل قوى ، فيه خناقه على باب الحارة .
أم رتية : وانت مالك بقى ومال الخناقة .

سنية : سيبه يا ستى يمكن ياخذ له بطححه فى نافوخه ، تريحننا منه شوية ...
زينهم : أنا رايح اتفرج .. دى خناقه هايلة ، زكيه الملدنه بتاعة القول النابت مرقده
الحاج وحش الجزار على الرصيف ، ويتخططه كل دماغ واختها .. يتخلى
الشرار يطلع من الرصيف ، والناس ملمومين عليها مش عارفين يخلصوا
الراجل من إيديها أبدا .

أم رتية : خش انجر يا واد بلاش مسخره ، ما لنا احنا ومال زكيه الملدنه والمعلم
وحش ، امشى ياللا دق الكسيرة .

زينهم : الحق على ، أنا يررضه استاهل الى ما وقفتش اتفرج عليها قبل ما جيب
الكسيرة .. عملت نفسى بنى آدم وقلت يا واد روح الأول ودى الكسيرة
لحسن ستك تكون مستعجله عليها وبعدين ارجع اتفرج ، يررضه أنا الحق
على . ابقى مره إذا جيتلكم حاجة بعد كده دوغرى .

سنية : خش انجر دق الكسيرة بلا قلبه دماغ .

زينهم : أسكتى انتى لحسن والنبي أحطك ع الطبلية ، وانحطك زى الملوخيه الى
قدامك (ملتفتا إلى أم رتية فى توصل) أروح يا ست قبل الخناقة ما
تخلص ؟

أم رتية : قلت لك خش ، يعنى خش .

زينهم : طب خليني اتفرج عليها م الشباك (يندفع إلى الأريكة مدليا بجسده من الشباك صائحا بسرعة) .. أهم باينين .. أديني شايفهم كويس .. زكيه فوق .. الوحش يفلقص ، يفلقص .. كويس وحش .. مسكها من شعرها .. مسكته من شنبه .. الوحش ييشد .. زكيه يتشد .. ها .. شد .. شد .. شد .. يا خساره طلع في إيدها .

أم رتية وسنية : هو إيه ؟

زينهم : شنب الوحش ، طلع في إيد زكيه ، الوحش لوحده ، والشنب لوحده .. الوحش من غير شنب ، زكيه بشنب ، زكيه طبقت في زمارة رقبتة ، الوحش يبصرخ .. زكيه فأعته دماغ ، ودماغ تانيه ، وتالته .. الروسيات بترف زى المدفع الرشاش .. الوحش انفتح حاجبه .. الوحش مسخسخ .. ول زكيه ، تعيش زكيه ، فتوة الناصريه .

أم رتية : (تهجم وتجره من قفاه) انزل من على الكنبه جاك نازله في قصابك .. أنا مش قلت لك ميت مرة ما تطلعش على الكنبه برجليك اللى زى الطين ! . زينهم : برافو زكيه .. أنا كنت عارف انها حاتغلب ، يعنى نابك إيه يا وحش غير ضياع شنبك ، عشان تبطل الغلبه (ملتفتا إلى سنية) آدى النسوان والا بلاش ، مش زيك يا قرعه .

سنية : خليه يتلم يا ست ، لحسن والنبي اعمل فيه اللى اتعمل في الوحش .

زينهم : (مصفقا بيديه مغنيا) دانا باحبك ، بس شايله السمنه في الزلعه .

سنية : أسكت احسن لك ! ..

أم رتية : (وهى تجلس على الكنبه وتأخذ في تفصيل رأس ثوم) امشى دق الكسبره .

زينهم : (يأخذ الكسبره ويتجه إلى المطبخ منشدا) والله بحبك بس شايله السمنه في الزلعه (يختفى داخل المطبخ ويسمع صوته قائلا) بكره الماتش الأصلي المعتبر .. زكيه ضد على الذكر .. والله حقها تلعب كوره .. يا خسارتك يا زكيه في الفول الثابت ، دانت عليك سمانات رجلين .. ولا ابو حجاجه .

المشهد الرابع

أم رتيبة : يا الله يا بت يا سنيه ، شهل شويه ، كفايه خرط بقى ، انت حاتخليها إيه ؟
عصيده ؟. احنا عايزين نوضب الصاله عشان متلك الحاجة ام سيد جايه ،
والا عاجبك كده الكركبه اللي احنا فيها ؟

سنه : خلاص اهو يا ست ، خرطتين بس ، يا سلام عليكى يا ست ، دانت
عليكى شهر مكسم وزى الزبده .. يا خسارتك يا ستى فى قلة الجواز ، هم
الرجال انصابوا فى عنيبهم والا عميوا ؟

أم رتيبة : (تتحسس نفسها فى حزن) قلة بخت يا سنيه يا بنتى .. قليلة البخت تلاقى
العضم فى الكرشه .. واحنا حتى العضم مش لاقينه .. رضينا بالهم والهم
مش راضى بينا ..

سنه : يا ستى ربنا يسهلها ويرزقك باين الحلال .

أم رتيبة : يا بنتى إذا كان على .. أهو مسهلها ، وإذا كان على ولاد الحلال أهم كبير ..
لكن الدور على سيدك عبد الصبور اللي معقدها فى وشى .. وقاعد لى زى
قرود قطع .. كل ما ييجى عريس يطفشه ، لما تنفس حالى وميل بختى وخلا
رقتى بين النسوان زى السمسمه .. هو انا يا بنتى قادره اورى وشى لحد ..
خمسه واربعين سنه وأنا قاعده استنى ابن الحلال . وكل ما ييجى ابن الحلال
يصده بوشه العكر وكلامه اللي زى السم .. واهى السنه بتفوت ورا
السنه . والعمر بيضيع ولا من درى ولا من شاف ، وادبنى حاعيش
واموت وحدانيه .. من غير لا ولد ولا بنت ، وبس بالاسم ام رتيبه ، الله
يجحمها خالتي ام حميده بنت الشيخ معوض فضلت تقاطع على وتنق بلسانها
الى زى العقرب ، وتقول لى يا ام رتيبه ، وانا لسه بنت ما طلعتش من
البيضة ، آل إيه عشان حلمت أن انا اتجوزت وخلفت بنت اسمها رتيبه ،

ومن يومها ما شفتش الجواز الا في حلم القرشانه النفاقه ام حميده .

سنية : يوه ، يا ستي ما ترعليش نفسك ، دانت لسه صبيه في عز شبائك ،
والجايات اكتر م الرايحات .

أم رتية : ما هو بكره الجيات ييقوا ريحات ، والا يعنى تفتكرى الجيات حتبقى
اجعص م الرايحات ، هو عبد الصبور آفندى تستعصى عليه حاجه أبدا ،
بكره يضيع الجيات زى ما ضيع الرايحات ، ياما ضيع على فرص . هم اللي
خطبوني شويه يا بنتى يا سنيه ؟ دانا كان ليه شنه ورنه .

سنية : والنبي يا ستي باين عليكى كنت بنت حنت ، تلعبى بالبيضة والحجر ..
كام واحد والنبي يا ستي خطبوكمى ؟

أم رتية : ما تفكرنيش بقى يا بنتى باللى مضى وتجري ريقى . هوا أنا انسى سى على
العطار اللي كان دكانه قدام بيتنا لما كنا ساكنين في حوش آدم ، وكان طول
النهار عينه ما تتوريش من الشباك وأنا واقفه ورا الشيش وواخده بالى . كان
راجل ولا كل الرجاله . باين عليه العز والنعمة خدوده مورده ، والدم
حايظ من وشه ، وطابع الحسن في دقه ، يساع فنجان ، وإيده متختخه
وبيضة زى الفل ، وعاج اللاسه والجلبيه سكروته عليه تشف وترف ،
والبلغه الفاسى في رجله بتضوى .. قصده ما طولشى عليكى يا سنيه يا
بنتى .. كان حايظجن على كل ما يشوف إيدى تتمد الشباك والا يلمحني
بانشر الغسيل فوق السطوح .. لغاية ما في يوم العصريه سمعت نقر على
الباب .. بافتح اشوف مين لقفته سى على .. أنا شفته قدامى حسيت روحى
ساخت ، سألته عايز مين قال عايز يقابل سى عبد الصبور .

سنية : وهو يعنى ماكنش فيه غير سى عبد الصبور اللي يقابله ؟

أم رتية : يعنى حا يقابل مين تالى . هو انا ليه حد غيره . ما احنا اترينا يتامى لا لي
غيره ولا له غيرى .. أهو طول عمرى ما شفت لي أب ولا أم ، وكل اللي لي
في الدنيا هو عبد الصبور . قضيت عمرى في خدمته . وهو لا رضى
يتجوز ولا يخلينى التجوز .

سنية : وبعدين يا ستي عمل إيه سي على ؟

أم رتيبة : دخل أودة المسافرين ودخلت اصحى سي عبد الصبور عشان يقوم يقابله .
سنية : وبعدين .

أم رتيبة : دخل يقابله ، ودخلت اعمل القهوة ، وأنا قلبي بيدق ، ويدق ، أصلى
كنت حاسه ، وعارفه .

سنية : يوه يا ستي وهى الحاجات تخفى .

أم رتيبة : أيوه والنبي ما تخفاش أبدا .. عقبال ما دخلت اعمل القهوة وقلت للبنت
تحبه .. الخدامه اللي كانت عندنا قبلك — تدخلها .. بصيت لقيت سي على
خارج بيرطم ووشه أحمر زى الجزره ، ووراه سي عبد الصبور بوشه
الأصفر اوى الناشف الى زى جريد النخل .. يقول له : مع السلامة يا سي
على .. ما كانش يتعز .. الراجل خرج من بير السلم وأنا مسكت سي عبد
الصبور ، قلت له هوا إيه دا اللي ما كانش يتعز ؟ فقال لي طليه .. قلت له
هوا عايز إيه ؟ قال لي : جاى يخطبك .. قلت له : وبعدين . قال لي : ولا
بعدين ولا قبليين . قلت ما كانش يتعز يعنى بالعربى رفضت . سأله له : قال
لي دي حاجات ما تفهمهاش انت . سببي لي انت الحاجات دي أنا أدري
بيها .. الستات دايما قلايلات العقل ، لازم يسيبوا الحاجات اللي عايزه تفكير
وتدبير للرجال ، آمال الرجال اتخلقوا له .. المقصود فضلت الح عليه
واحاوره واداوره لغاية ما عرفت السبب .

سنية : إيه هو بقى يا ستي السبب ؟

أم رتيبة : قال لي إن الراجل نحين قوى وأنا نحينه قوى ، وإن اولادنا ، مش حايقوا بنى
آدمين ، حايقوا فيله وإلا بالقليل أوى .. حلاليف .

سنية : له حق والنبي يا ستي .

أم رتيبة : اخبرسي جاكى قطع لسانك ، دا انا كنت جيت اولاد زى القشطه ..
المقصود قعد يجيب لي في سبب ورا سبب ، مره يقول ان ما قيش سرير
يستحملنا ، ومره يقول لي أن فيه خطوره على من جواز العطارين عشان
حافظل آكل حله ومفتقه وحاجات م الى بتسمن ، لغاية ما يجي على

وقت اطلق اموت ، ويكون هو السبب عشان وافق على الجواز ، وبالطريق ده سددها في وش الراجل .

سنية : والنبي برضه ياستى له حق .. مين يعرف لو كنت اتجوزت مسى على العطار كان جراك إيه ؟

أم رتيبة : طب و ابراهيم افندى العقر .. العرض حاجى الى قد الدنيا ؟

سنية : ماله ياستى . برضه طفشه ؟

أم رتيبة : وطفش أبوه .

سنية : ليه بقى ؟

أم رتيبة : عشان اسمه العقر . العقر . ما يقدرش بسلامته يناسب واحد اسمه العقر ، أصله هو الى بسلامته اسمه عدل قوى ، عبد الصبور عبد الغفور عبد الشكور المقزقر ، يا ختى لو كان الواحد يشوف عيه ما كانش غايب على الناس أبدا ، إلا المصيبة إن البنى آدم من دول تلاقيه بجمج .. يعنى ما يعيش على الناس إلا بالحاجة الى فيه ، يعنى يلاقى التخين يقول لك يا سلام على فلان ده ماله تخين كده يا ساتر يارب ، وتلاقى ثقيل الدم ، يقول لك أما فلان ده عليه دم يا باى ، وسى عبد الصبور المقزقر ما يقدرش يناسب واحد اسمه العقر .

سنية : وعلى كده طار العقر ؟

أم رتيبة : العقر ، والسماطوطى بتاع المصبغه والشيخ عبدربه خادم الحسين ، والحاج صميده اللبان ، والشيخ ابراهيم عبد اللاوى الملتزم ، وزكى افندى شندى بتاع المانيفاتوره .

سنية : كل دول خطبو كى وطاروا ؟

أم رتيبة : طاروا يا سنية يا بنتى ، طاروا كلهم ، والعمر بيطور يوم ورا يوم ، يعنى إيه فايده عيشة الست لما تخش الدنيا وتخرج منها من غير ما تتجوز ، تبقى قيمة العيشه إيه لما الواحدة ما تعملش الحاجة الى اتخلقت عشانها . ربنا مش خالق الدنيا رجاله وسمات عشان الرجاله يتجوزوا الستات . الست عملها ربنا (أم رتيبة)

عشان تنجوز وتحب أولاد ، وانا ضيقت عمرى مع سى عبد الصبور لا جواز ولا اولاد .

سنية : الصبر طيب يا ستى !

أم رتية : أبوه . الصبر طيب ، وهو البنى آدم العاجز ، قدامه إيه غير الصبر ؟ أهو يعزى نفسه بأن الصبر طيب ، وهو مجبور على الصبر ، رضى والا مريض ، صابر ، صابر . لكن عشان يستحمل الصبر يقوم يقول ان الصبر طيب ، هوه فيه يا بنتى أمر من الصبر .

سنية : ربنا كريم يا ستى بكره يفرجها ..

أم رتية : أبوه يا بنتى كريم ، أنا برضه لما اقعد اراجع نفسى ، واقول الحمد لله على الستر ، الحمد لله ، على اللى اداه لنا ربنا ، دامدنا حاجات كثير ما حناش حاسين بيها ، أصل الواحد ما بيعشش اللا بالحاجة إالى مش معاه ، لكن الحاجة اللى معاه ما يعرفهاش أبدا ، ما يعرفهاش ولا يحس بها الا لما تضيع منه ، يقوم يعرف انه كان معاه حاجه ، احنا دائما نسخط عشان ربنا ما داناش ، لكن ما بنحمدوش على انه ادانا ، مع إنه يا بنتى دائما بيدينا .. أنا بعض ساعات اقعد افكر اقول مش برضه ربنا عوضنى يعنى هوا انا لو كنت اتجوزت ، كنت حلاق واحد يرعانى وينع على ، زى سى عبد الصبور ، أهو حقيقى ، بنغزه ومهفوف ، ومانيش عارفه آخذ منه لا حق ولا باطل .. لكن برضه مريحنى وموكلنى ، وكاسينى .. ولو قلت آه ، يقول ورايا ميت آه .

سنية : أبوه والنبي يا ستى ، سيدى عبد الصبور ما فيه زيه أبدا ، ولو انه اليومين

دول طالع لى فى حاجه جديده ما هياش عاجبانى أبدا ، ربنا يستر عليه منها .

أم رتية : مش حكاية دراسة الأرواح ، وتحضير الأرواح .. ربنا يكفيننا شرها ، إلهى

يوربنى فيك يا شيخ هباب ، انت اللى جريت رجله فيها ، هوه لا كان

يعرف أرواح ، ولا عفاريت ، طول عمره غرقان فى الخط العسرى ،

والاقلام البسط ، واليفط ، وكراريس المشق ، من يوم ما عرف سى هباب

الطين ، وهو ما وراهوش غير الأرواح .

سنية : ربنا يستر عليه يا ستي ، أنا والنبي بخاف عليه لما يخش الأوده ويقفلها عليه ، ويقعد يقرأ زى القطط .

أم رتبية : تكونش الأرواح دى هى اللى خسرت أخلاقه ، وخلته على دى الحال ؟
سنية : والنبي يا ستي انا مش راضيه افسر ، دا بقى ما ينطقش ، وحكاية الصراحه اللى طالع لى فيها اليومين دول كرهت فيه طوب الأرض .

أم رتبية : أهو كان زمان برضه طالع فى حكاية انه يقول للأعور أعور فى عينه .. لكن أهو برضك كان عنده شوية خشا ، لكن اليومين دول خلاص ، ما تعرف إيه اللى جراه .. العجز .. والا الهبابه الأرواح اللى طالع فيها .

سنية : تصدق يا ستي امبارح كان طالع على السلم قام قابل إدريس افندى اللى ساكن فوقنا ، الراجل يبسلم عليه بأدب ، بصيت لقيت ده مسن غير مناسبه . بيقول له يا إدريس افندى انت ما سمعتش على أزمة الزيت اللى فى البلد .. الراجل قال له أى والله .. الله يكون فى عون الناس ، فرد عليه سى عبد الصبور بشمخط ، وقال له يكون فى عونهم ازاى وأمثالكم عمالين يحوشوا الزيت .. الراجل استعجب قوى وقال أنا ياسى عبد الصبور .. أنا والله ما عندى نقطة زيت فى بيتى . قام قال له ما عندكشى فى بيتك نقطة زيت .. لكن عندك فى طربوشك كيلو زيت ، لو كان كل واحد زيك يعصر الخمسه سنتى الزيت اللى فى طربوشه كانت انفكت أزمة الزيت .

أم رتبية : يا عيب الشوم ، قال الكلام ده كله للراجل ، ياما انا خايفه يعمل كده مع سيد افندى وامه ، أهى دى تبقى المصيبه السودا .

سنية : وهو ماله وما لهم ؟ .

أم رتبية : أصلى ما خبيش عليكى يا سنيه ، أنا شايفه اليومين دول من ست ام سيد ريق حلو ، ودائما تقول ان سيد افندى يبسأل على ، وقلبي حاسس . إن فيه حاجه فى ضميرها ، وعينى اليمين بترف وإيدى الشمال بتاكلنى وعمرى ما بتحصل لى الحاجات دى الا لما يكون فيه خير جاي .

سنية : خير يا ستي خير .. خير ان شاء الله .

أم رتبية : أنا حاسه ان سيد افندى ناوى يخطبنى قريب ، وحاطه إيدى على قلبى ،
لاسى عبد الصبور يلخبط الدنيا ويطيره زى ما طير اللى قبله ، وهو الومين
دول زى مانتى شايفه حاله مبرجل .

سنية : ربنا يستر . (يسمع دق على الباب) تعالى شوف الباب يا زينهم .

زينهم : (من المطبخ) قومى افتحى . أنا مش فاضى .

سنية : انت مش خلصت خلاص دق الكسبره ، بتعمل إيه عندك ؟

زينهم : وانت مالك انت ، بقرا ، حد شريكى .

سنية : انت بتعرف تقرا ؟

زينهم : أهو بتعلم ، بفك الخط .. مالك انت ومالى ، زين وفتح زى ، ره وفتح
را ، عين وفتح عا ، زرع ، كويسه دى والال ، يا خسارتك يا زينهم فى
قلة التعليم كان زمانك واتخذ الليسانس .

(الباب يدق مرة أخرى)

أم رتبية : (فى غيظ) قومى .. يا بت اتحركى وافتحى الباب ، افتتحت فى راسك
طاقه ، كفايه علينا نقعد نسمع خناقكم طول النهار ، حقه بطلوا ده واسمعوا
ده .

(تفتح سنية الباب .. وتدخل أم سيد)

المشهد الخامس

أم رتبية : يا مرجبه يا مرجبه .. أهلا وسهلا ، الدنيا نورت يا ست ام سيد .

أم سيد : الله ينور عليكى ويشرف مقدارك .

أم رتبية : خطوه عزيزه .

أم سيد : ربنا يعزك ياختى .

أم رتبية : أهلا وسهلا .. أهلا وسهلا .. اتفضلى يا ستى الحاجه .. تعالى هنا على

الكنبه جنب الشباك .. داحنا زارنا النبى .. قومى يا بت يا سنية فزى ..

لمى الملوخيه واركنى الطبلية وشيلى الفراخ من الشوريه واسقطسى فيها
الملوخيه .. قومى كده اتحركى . عدم المؤاخذه يا ستى الحاجه .

أم سيد : خدى راحتك ياختى .

أم رتبية : واد يا زينهم ، تعال انجر لم عروق الملوخيه دى ارميها فى صفيحة الزباله ..
بلا زرع ، وبلا ضرب ، زرعوك زرع بصل ، وضربوك على نافوخك
بالصرم .. آل بعد ما شاب ودوه الكتاب .. ما تأخذنيش يا ستى الحاجه
على النكشه اللي احنا فيها .. أنا أصلى ما عندنيش خدامين . أنا عندى
نوايب .. عندى كواين .

أم سيد : ياختى وهم الخدامين بقوا خدامين .. دول بقوا اسياذ .

(يدخل زينهم وفى يده كتاب القراءة الرشيدة) .

زينهم : (إلى سنيه مشيراً بأصبعه إلى الكتاب) — شايفه يا بت يا سنيه راسمين امك
وابوكى فى كتاب القراءة .

سنية : صحيح يا زينهم ؟ ورينى كده ؟

زينهم : أهم ، أم قويق ، وابو جلامبو .

سنية : بتسكت يا روح امك ، جاتك نيله ، جاتك نيله حزم ، لم ياخويا العروق
لم ، أم قويق وابو جلامبو ، والله ما فيه ابو جلامبو غيرك ، يا مصدى ، يا
معقن ، يا مقشّف يا مجنّز .

أم رتبية : اتلمى يا بت انت وهوا ، انتوا السانكم ما يدخلش بقكوا أبدا ، ما تتعبوش م
الحناق ، ما يتهدش حيلكم ا فوت لِم العروق ووضّب الصالة ، واننى
اعمل قهوه لستك ام سيد .. تشريبها إيه يا حاجّه ؟

أم سيد : خليها على الريجه ، والا احسن خلهم يجيولى الكنكه والسبرتو والبن وانا
اعملها هنا ، أنا أصلى دائماً أحب اعمل قهوى بإيدى .

أم رتبية : تسلم إيديكى يا ستى الحاجه ، أمرك (إلى سنية) هاتى عدة القهوة يا بت
هنا قدام ستك ، اشهى شويه . آتستينا يا ست الحاجه .. ازاي بسلامته
سيد افندى ؟

(يخرج زينهم وسنية)

أم سيد : والنبي حاله مش عاجبنى اليومين دول أبدا ، شايفاه مش رايق كده ، وصحته نخستكه ، وبان عليه الهم والتعب .

أم رتية : ياختى بعد الشر عنه ، يمكن يكون استهوى .

أم سيد : أبدا والنبي ياختى .. داختى دائما محرص على نفسه .

أم رتية : أهو من باب الاحتياط برضك ، حقك تعملى له كاسات هوا والا اعملى له بالقدره ، أنا حابعتلك القدره اللى عندى وفتيلة الزيت تحطيا على ضهره مرتين تلاته تمص كل البرد اللى عنده وتشد وسطه وتصلب جتته .

أم سيد : والله يا ست أم رتية أنا متبياً لى الحكاية مش حكاية برد .. دا باين عليه مهموم ، ومتضايق ، وزى اللى فيه حاجه شاغله باله .

أم رتية : ومتضايق ليه ومهموم ليه ؟ ربنا ما يجيب لاهم ولا ضيق .

أم سيد : أنا افكرته فى الأول مهموم من حاجه فى شغله ، وقلت يمكن حد ضايقه والا داس له على طرف .

أم رتية : ما عاش اللى يضايق سيد افندى والا يدوس له على طرف . الراجل أمير ، وزى السكره ، يضايقوه ليه ياختى ؟

أم سيد : قلت يمكن حد مسه بكلمه كده والا كده ، أهو الأمر ما يسلمش ، والا يكون هوا عمل غلطه ، أصل اليومين دول الشغل بقى متعب قوى وهوا ما بيرحمش نفسه .

أم رتية : الله يكون فى عونته ، وياخذ بيده .

أم سيد : أصل المعمل كبر قوى ، والإنتاج بيكثر ، والأصناف بتزيد ، وكل الشغل متوقف عليه وحده ، مفيش فى البلد خبر غيره .

أم رتية : باين عليه ياختى باين ، هوا فيه حد زى سى سيد افندى !

أم سيد : من يومه والنبي يا ست أم رتية .. خمسة وأربعين سنه وهو الخبير الوحيد فى المعمل ده .. ما وثش ولا كلش ، لما انحرق وانكوى .. حاجه تلهل ياختى مين يقدر يستحمل غيره ؟

أم رتبية : ربنا يحميه ياختى .

أم سيد : يحميه أكثر من كده ، دالو لا إنه راسى ع الشغلانہ دى .. كان زمانہ بقى حريقه ، كان زمانہ لطلب وفرقع وانفجر .

أم رتبية : يالطيف .. يالطيف يارب ، ياختى بلاش الشغلانہ الوالعه دى ، ما بلاش معمل المفرعات ده .

أم سيد : معمل إيه ؟

أم رتبية : المفرعات !! مش بيشتغل خبير فى معمل مفرعات ؟!

أم سيد : مفرعات إيه ياختى .. سلامة عقلك .

أم رتبية : آمال معمل إيه يا ستى الحاجه اللى بيلهله ده ؟

أم سيد : معمل طرشى يا حبيبتى .

أم رتبية : معمل طرشى ؟

أم سيد : أيوه معمل طرشى ، خبير فى معمل طرشى . ماله ؟ وحش ؟

أم رتبية : لا ياختى مش وحش أبدا ، اسم الله عليه ربنا يحميه .

أم سيد : يوه ما بلاش ياختى حكاية يحميه دى . هوا ناقص حمو .

أم رتبية : أبدا ياختى أبدا .. ربنا يبرد جوفه .. ويسقع مصارينه .. وبسلامته سى

سيد افندى الخبير بيعمل إيه فى معمل الطرشى ؟

أم سيد : ياختى قلت لك خبير ، هو انتى ما بتفهميش ؟

أم رتبية : أيوه ياختى فاهمه وعارفه .. خبير .. والخبير دا بسلامته بيعمل إيه ؟

أم سيد : يدوق .. هوا الأمر الناهى فى المعمل كله .. ما فيش عينة طرشى تخرج م

المعمل إلا لما نفوت عليه .. لا لفت ولا خيار ، ولا جزر ، ولا كرنب ،

ولا أرنييط ، ولا فلفل ، ولا بنجر ، ولا لمون ، ولا حاجه تخلق فى عالم

الطرشى والمخللات ، إلا لما يحكم عليها هوه ويوافق على خروجها .

أم رتبية : ويحكم عليها ازاي ياختى ؟

أم سيد : يعنى يشوفها ناقصه شطه . ناقصه خل . دلعه .. حادقه . حاميه .

أم رتبية : ما شاء الله . ما شاء الله . عيني عليه بارده (يدخل زينهم حاملا معدات

القهوه ويضعها على متضدة صغيرة أمام أم سيد) .

زينهم : (لأم سيد) أجيئك فيه سقعه وإلامية دقه ؟

أم رتيبة : اقصر لسانك جاك قطعه .. مية دقه لما تلهلب جوفك .. عدم المؤاخذه يا ست ام سيد .. أصله دائما مسحوب من لسانه ، فوت امشى انجر على المطبخ .. قول للبت سنية تاخذ بالها من حلة الرز لحسن تشيبتها زى ما شيطتها امارح . (ملفتة إلى أم سيد) أبوه يا ست الحاجه بقى بسلامته ما فيش عينة طرشى تخرج من المعمل إلا لما تفوت عليه ؟

أم سيد : أبدا ، قبل البرميل من دول ما يخرج للبيع لازم ياخدوا التصديق منه بالخروج ، هوا لوحده الأمر الناهى ، ماقيش قرن قفل يعدى من غير إذنه .

أم رتيبة : يا سلام ، يا ست ام سيد ، كل ده بيعمله سيد افتدى ، ربنا يزيده من سلطانه ، ويقاله كثير فى الشغلانة دى ؟

أم سيد : من يومه ياختى .. من يوم ما وعى على الدنيا وهو خير مصر الأول فى صناعة الطرشى .. عليه لسان فى دوق الطرشى مينزلش الأرض .

أم رتيبة : ما شاء الله ما شاء الله . والموهبه دى جات له منين ياختى ، خلقه كده من عند ربنا ، والا وراثه ؟

أم سيد : أبدا والنبي ياختى ولا وراثه ولا حاجه ، دا حتى أبوه الله يرحمه ما كانش له فى الطرشى أبدا ، وما كانش يحب غير الحاجات المعسله ، زى العصيده ، والمفتقه . والعسل والطحينه .

أم رتيبة : آمال المحروس سيد افتدى ، نخذ الموهبه دى ازاي ؟

أم سيد : بالتمرين .. بمضى المده .

أم رتيبة : ازاي ياختى ؟

أم سيد : المسألة ابتدت معاه وهوا لسه فى اللغه ، أصلى لما كنت برضعه .. لبنى تشف ، فبقيت اديله لبن اصطناعى ، فليله من ذات الليالى صحى يصرخ بالليل وكنت متعوده دائما أول ما يصحى أروح ماده قزازة اللبن فى بقه بروح راضع شويه وتنه نايم ، ففى الليلة دى مديت إيدي على التراييزه وأنا

مغمضه وعيني فيها النوم مسكت البزازة لقيتها فاضيه ، فأعدت أحسس
لقيت الكباية اللي فيها اللبن جنب البزازة رحت دلقاها في البزازة وخطاها له
في بقة ، راح مقربها لآخرها وراح نائم .

أم رتيبة : بالهنا والشفا ، صحه وعافيه على سيد أفندي اللبن كويس ومغذى .

أم سيد : ما كانش لبن يا ستى أم رتيبة .

أم رتيبة : أمال كان إيه ياختى ؟

أم سيد : مية لفت .

أم رتيبة : يوه يا ندامه ، ومنين جتك مية اللفت ؟

أم سيد : أصلى كنت محضره كباية مية لفت أشربها على الريق ، وكنت حاطه
الكبايتين جنب بعض على التراييزه ، فلما مديت إيدى بالليل جت في مية
اللفت .

أم رتيبة : ياختى بره وبعيد ، وجرا إيه لسيد أفندي بعد كده .. مات ؟

أم سيد : تقى من بقلك سبع تفات .. بعد الشر عنه .

أم رتيبة : ألف بعد الشر يا خالتي الحاجه ، جرا له إيه طمئيني ؟

أم سيد : صبح لا بيه ولا عليه ، زى القرد المسنسل ومن يومه ياختى وهوراسه وألف
سيف .. ما يدوق اللبن أبدا ولا يحطه على لسانه ، كل رضاعته مية لفت ،
مية جزر ، مية بنجر .

أم رتيبة : بسم الله ما شاء الله .

أم سيد : قولى معدته اتحرشت ولسانه اتودك ، وأول ما ابتدا يمشى ويلعب مع ولاد
الحاره ، كنت دائما تلاقيه يحب الطرشجيه ، فتبصى تلاقى اولاد الحاره
ياخدوا مصروفهم يشترؤا بيه قصب والا مصاصه والا براغيت الست ،
وهوا من دون الاولاد ياخذ مصروفه إن كان ملين والا نكله ، وتنه رايح على
الطرشجى الى على باب الحاره .. يفضل يقربع في ميه لفت ومية دقه لما
يقول بس .

أم رتيبة : يا سلام عليك يا سيد أفندي ، من يومك وانت ابن كار .

أم رتيبة : أهوته كده ، يقرب في مية اللفت والدقه ، تقوليش غاوى .. لغاية ما بدأ الاحتراف .

أم رتيبة : وازاى يا ختى ابتدا الاحتراف ؟

أم سيد : في يوم من ذات الايام راح عند بتاع الطرشى ، وقال له ادينى بلميم مية لفت و بلميم مية دقه ، الراجل مد له إيده بكوز مية اللفت قربه ، ومد له إيده بكوز مية الدقه شرب شفتين ورجعه ، الراجل قال إيه مالها ، قال له وحشه مش مضبوطة .. قال له ليه .. قال له ناقصه شطه والخل بتاعها مغشوش .. أنا عايز تحيب لى من البرميل التالت اللي على إيدك الشمال ، أيوه البرميل ده .. الرجل فرغ الكوز وملاه من البرميل اللي قال عليه ، راح مقربه وقال له أيوه ، أهى دى تمام .. الراجل استعجب ، خد شفته من البرميل ده ، وشفته من ده ، استعجب أكثر ، لقى كلام الولد مضبوط وهو السه مطلعش من البيضة عمره لسه سبع سنين ، راح مرجع له النكله ورقع الصبى بتاعه علقه ، وقال لسيد اسمع ياواد ، انت تيجى كل يوم هنا تاخذ لك كوزين مجاناً ، وبعد جمعه كان سيد بيشتغل في دكان الطرشى ، قاعد على كرسي ما يعملش حاجه أبداً غير الدوقان ، ويفضل على كده كبير خمسة واربعين سنة .

أم رتيبة : ما شاء الله ... ما شاء الله .

أم سيد : الدنيا اتغيرت ، والمحل كبر واتسع ، وحاله راج وبقي معمل كبير أد الدنيا ، وسى سيد هوه ، هوه ، مالوش شغله غير انه يقعد على الكرسي ويدوق ، خمسة واربعين سنة ، وهو حافظ مركزه ، خير مصر الأول في صناعة الطرشى .

أم رتيبة : أدها وأدود ، وهو حد يقدر على كده غيره !

أم سيد : عشان كده بقول أن ضيقته وعكنتته اليومين دول مش ممكن تكون م الشغل .

أم رتيبة : آمال يعنى فكرك تكون من إيه ؟

أم سيد : والله يا ختى أنا بقول ان فيه حاجه شاغله باله .

أم رتية : زى إيه ؟

أم سيد : بقى يا ست أم رتية انت مش غريبه وانا مش حاخبي عليكى ، بقى انا طول عمرى اقول له أنا نفسى اجوزك وافرح بك ، وهو كل ما اجيب له السيره دى ألاقه كشر ولوى بوزه ، وقال لى انا مش عاوز اتجوز .. أنا مبسوط من عيشتى كده ، لكن اليومين دول ، شايفاه كده لما نجيب له سيرة الجواز ، ما يكشرش ولا يلويش بوزه ، وحتى فى بعض ساعات هوا يقعد يقوللى .. والله يا ام يا ريتنى سمعت كلامك واتجوزت من زمان .. أهو الواحد ضيع عمره فشوش .. ودلوقت لو حب يتجوز ما يلاقيش اللى ترضى به .

أم رتية : ليه ياختى ألف من ترضى به .. هوا فيه احسن من سيد افندى ؟

أم سيد : برضه انا قلت له كدا .. لكن لقيت زى ما يكون فيه حاجه فى فكره عايز يقولها لكن مش قادر .. زى ما يكون كدا مكسوف .. مستعيب .. خايف .

أم رتية : وياختى مش قادر ليه .. هى الحاجات دى عيب .. والا حد يبخشى منها ؟
أم سيد : المقصود .. فضلت آخذ منه وادى ، واحاوره وداوره ، لغاية ما ابتدا يفضفض باللى فى قلبه .

أم رتية : وطلع إيه !!؟

أم سيد : كلمه من هنا ، وكلمه من هنا ، قال لى .

أم رتية : قال لك أيه ؟

أم سيد : يوه ياختى يا ست ام رتية . صبرك على ، خلينى آخذ نفسى ، هى الدنيا طارت !

أم رتية : على مهلك أوى ياختى ، خدى نفسك بالراحه خالص .. هيه .. قال إيه ؟

أم سيد : كلمه من هنا ، وكلمه من هنا .. يا سيد قول ما تخبش على انا مش غريبه ، قال لى يا ام نفسى اخش دنيا ومش لاقى حد يوافقنى ، قلت له يا بنى الدنيا الواسعه دى كلها ما فيهاش حد يوافقك .. بصيت لقيته وطا رأسه فى

الأرض وقال لي بوشوشه ، فيه واحد بس يا أم ، واحد ما فيش غيرها ..
 هي النص التاني بتاعي ، النص اللي قعدت طول عمرى أدور عليه .. انتي
 مش عارفه ان البنى آدم منا زى ما يكون لفته وانشقت نصين وانه طول
 عمره يفضل تعبان لغاية ما يلاقى نص اللفته التانيه ، ياختي هوه قال لي كده
 وأنا اتلخبطت .. لفته إيه وخياره إيه .. قلت له إيه الكلام الفارغ اللي
 بتقوله ده يا سيد يا بنى .. إنت يا بنى عاوز تتجوز والا بتلور على نص
 لفته ، هو البنى آدم ده ما يقنعش . ما فيش حاجه تملأ عينه أبدا ، كل اللفت
 اللي انت غارقان فيه طول عمرك ويعدين تقول لي ان ناقصك نص لفته ا .
 أم رتيبة : يا ست أم سيد مش قصده نص لفته . نص لفته .. دا قصده نصه التاني ..
 أصل كل واحد كده لازم له نص يكمله يعنى انا ناقصنى مثلا ، نص
 كرتيه . نص بطيخه .

سنية : (مقبلة من المطبخ تحمل ملعقة وطبق) وانا يا ستى ناقصنى إيه ؟
 أم رتيبة : نص حيه ، وإلا نص عقربه .
 زينهم : (من داخل المطبخ) وانا يا ست ؟
 أم رتيبة : نص نمل ، يا مرقع يا بولوزه ، يا فردة شمال ، شوف شغللك بقى وبلاش
 لماضه ، حاكم دائما تتدخل فى اللي ماللكش فيه .
 سنية : (تمدها بالملعقة) شوف حديقها كده يا ست ؟
 أم رتيبة : (بعد أن تلتذوقها) أهى كويسه ، بس هدى الوابور شويه من تحت حلة الرز
 (موجهة الحديث إلى أم سيد) فهمت بقى يا ست أم سيد؟ أهو ده قصده .
 أم سيد : ما هو برضه قال لي كده ، فهمنى أن نص اللفته بتاعته ، يعنى الست اللي
 نفسه فيها .
 أم رتيبة : ولقاها ؟
 أم سيد : أيوه يا ستى لقاها ، بس ما طلعتش لفته أبدا طلعت زى ما بتقولى كرتيه ،
 كرتيه عمجالى .
 أم رتيبة : حقيقى .. حقيقى كرتيه ؟

أم سيد : ياختى اصبرى .. مالك مسروعه كده .
 أم رتيبة : وبعدين يا خالتي ام سيد لما قال لك انه لقي نص اللفته .. قصدى نص الكرنه ؟.

أم سيد : قلت يا بنى ، وهو نص اللفته برضه يوافق نص الكرنه ؟.
 أم رتيبة : يوه يا حاجه .. ما توافقش ليه .. قادر ربك يجمعهم سوا فى برميل واحد .
 أم سيد : ما هو برضه قال لى كده .
 أم رتيبة : من فهمه وتقديره ، وبعدين يا خالتي ام سيد قال ليه ؟ ما طلبش نص الكرنه ؟.

أم سيد : طلبها ياختى .. وقاللى يا ام انا خايف احسن ماترضاش لى .. قلت له ازاي يابنى يا سيد .. دا انت أدها وأدود ، قال لى طيب روحى جسى النبض ، لقيت الحكاية مش عايزه بد .. أخذت بعضى وتننى جايالك .. ليه رأيك ياختى ؟.

أم رتيبة : رأيى ؟ آل رأيى آل ، يا سلام ياست أم سيد دا انت خلطتى جتنى تمل .. دا انا طول عمرى احب اللفت ، أموت فى اللفت ومية اللفت .
 أم سيد : أصيله والنبي .. أصيله ياست ام رتيبة .. أنا برضه كنت عارفه أن أملى مش حايخيب فيكى أبدا .

زينهم : (يدخل وفى يده مقشة) اسمى يا بت يا سنيه . أنا على الكنس واننى عليكى المسح .

سنية : (وفى يدها جردل المسح) لأكل واحد منا عليه أوده كنس ومسح ، أنت أصلك ضلالى ما عندكش ذمه .. ما بتقرطش على المقشه ، وتسبب كل التراب ، ولا بتمدش إيدك تحت الكنبه .. وادوخ انا بعدك فى المسح ..

زينهم : يا سنيه ياختى ما تبقيش مناكفه .. أنا حاقش لك كويس خالص ، وامد ايدى زى مانتى عايزه .. أمد إيدى تحت الكنبه .. وتحت الملايه ، وتحت القميص .. بس ما تبقيش تقوليلى شيل إيدك .

سنية : شاهده يا ستى على قلة الأدب ؟.

- أم رتبية : اخرس يا واد يا زينهم ، واختشى على دمك وخلي عندك تريبه .
- زينهم : خريست .. هوه انا ما اعرفش اتكلم كلمه فى البيت ده ؟ .
- أم رتبية : كلمتك اجنابك (لأم سيد) خطوه عزيزه يا ست ام سيد . دا حنا زارنا النبى . دا يوم المنا . دا يوم المنا .
- أم سيد : خلاص يا ستى ام رتبيه .. موافقه ؟ .
- أم رتبية : موافقه وبس ، وهوا انا الاق أحسن من سيد أفندى .
- أم سيد : استيينا ؟
- أم رتبية : استيينا .
- أم سيد : طيب واخليه يجى يقابل سى عبد الصبور إمتى ؟
- أم رتبية : (فى فرع) عبد الصبور ! .. يا مصبتي .. يا وقعتي .. يا نخيتي .. يا نيتي ..
- أم سيد : ليه ياختى كفا الله الشر ؟ .
- أم رتبية : يا فرحه ما تمت خدوها الغراب وطار .
- أم سيد : يوه يا ندامه .. حصل إيه ياختى ما توجعش بطنى ؟ .
- أم رتبية : عبد الصبور .. مفرق الأحباب .. وهادم اللذات .. يا خية أملك يا أم رتبيه .. يا ميله بختك يا أم رتبيه .
- أم سيد : هو إيه أصله ياختى ده .. ما تقوليلى إيه الحكاية وقعت قلبى ؟ .
- أم رتبية : ما فيش فايده يا ست ام سيد . ما دام حا يدخل فيها سى عبد الصبور باظت واتفر كشت .. أنا كنت ناسياه خالص .. كان رايح عن بالى .. الفرجه نستنى أن فيه شىء اسمه عبد الصبور .. وشه يقطع الخمرة م البيت .
- أم سيد : ياختى ليه بس .. دا سى عبد الصبور باين عليه عاقل وابن حلال .
- أم رتبية : عاقل فى كل حاجه .. ما عدا الحكايه دى . مفيش فايده .. أنا عارفه ما فيش فايده ..
- أم سيد : طب بس فهمينى ليه ؟ .

- أم رتیبہ : اهو کده ، خلقتہ کده .. طبعہ کده .. شغلته انه یضیع منی العرسان .. الی خلاہ رفض العشرین عریس الی فاتوا .. یعنی حا یتعصی علیہ سی سید .
- أم سید : یاختی قادر و کریم .. مین یعرف .. یمکن ربنا یهدی سرہ ویعقلہ .. ویخلیہ یوافق .. هوا فیہ حاجہ بعیدہ علی ربنا ؟ .
- أم رتیبہ : مش بعیدہ علی ربنا .. لکن بعیدہ علی أنا حاسہ وعارفہ .
- أم سید : طیب خلیہا علی اللہ یاختی ، اسکتی انت وربنا حا یجیبہا سلیمہ .. إن شاء اللہ المرہ دی حا تصیب .. أنا قلبی حاسس کده .
- أم رتیبہ : یسمع منك ربنا .. ولو انی عارفہ انه ما بیرضاش یسمع الحکایہ دی أبدا .
- أم سید : ما تقولیش کده یا ام رتیبہ .. أستغفر اللہ العظیم من کل ذنب عظیم .. بکرہ کل حاجہ تنصلح .. أخلی سید یجی یزورہ إمتی ؟ .
- أم رتیبہ : یا ما انا خایفہ م الزیارة دی .
- أم سید : یاختی جمّدی قلبک ، ما تخافیش .. کل حاجہ حا یتجی سلیمہ ، هو سید فیہ حاجہ تنعاب ، دا علی الفرازہ ، وأدب وأخلاق ، وکمال وذوق ، هوا فیہ احسن من کده ؟ .
- أم رتیبہ : ما هم الی فاتوا کلهم کانوا کویسین ، لکن کان یطلع فیهم القطط الفطسہ .
- أم سید : لا .. بس اطمئی ، دامش حا یلاق فیہ عیب أبدا ، إن شاء اللہ ربنا حیتمم بخیر .
- أم رتیبہ : من بقلک لیاب السما ، ربنا یهدیه ویکمل سید افندی فی عینہ ، بس علی فکرہ یا ست ام سید لازم نعمل استحراصنا علی کل حاجہ ، عشان المقابلہ تتم علی خیر ، وعشان ما یحصلش حاجہ تعکر مزاج سی عبد الصبور ویخسر لنا الشغلانہ .
- أم سید : الی انت عایزاه منا یا ست ام رتیبہ نعملہ . بس آمری .

- أم رتيبة : أول كل حاجة .. اسم سى سيد افندى الكامل إيه .. الحسن يكون فيه
حالا جه كده وإلا كده ، أصله يهيم بالاسم أوى .
- أم سيد : اسمه سيد افندى بنجر .
- زينهم : (ضاحكا) بنجر .. ها .. أو .
- أم رتيبة : (بيأس) بنجر ؟ يادى المصيه الحمرا .
- أم سيد : ماله بنجر .. وحش ؟ .
- أم رتيبة : لأ حلو .
- زينهم : (مصفقا يديه مغازلا سنية) حلو .. يا حلو .. مش حاتنجوزينى
بقى يا بت يا سنيه ، أموت ولا رحش اتقن .
- سنية : يا خويه إلهى تموت وتروح اتقن .. يا بيج يا ضلالى ، أنا اتجوزك
انت .. خلاص الدنيا خلصت من الرجاله لما اتجوزك أنت .
- أم رتيبة : (تضرب كف على كف) حلو ، حلو أوى .. يا خسارة الجوازه ، يا
ميلة بخنك يا ام رتيبه .
- أم سيد : يا ختى .. هوا إيه أصله ده .. ميلة بخنك ليه بس .. هو اسم بنجر
عيب ؟ .
- أم رتيبة : اللى مارضى بالعقر يرضى بالبنجر .
- أم سيد : يا ستى هو ماله ومال الاسم .. هو الاسم بيعض .. كل واحد حرق
اسمه ، بنجر ، خيار ، جزر .
- أم رتيبة : ما فيش فايده يا ست أم سيد ، مش ممكن مش ممكن .
- أم سيد : وعلى العموم الاسم فى إيدنا .. ده حاجة سهل .. من بكره يروح
المحكمه الشرعية يغيره .
- أم رتيبة : حقيقى يا ست ام سيد ؟ ممكن يغير اسمه ؟ .
- أم سيد : مش ممكن ليه ؟ ممكن قوى . هوا يعنى كان لزق .
- أم رتيبة : ما لزقش ولا حاجة . بس هوا يعنى حايرضى يغير اسمه ؟ .
- أم سيد : يرضى قوى .. عشان خاطر عيونك . من بكره يروح يغيره ، وبعد

بكره يكون هنا من غيره .. مبسوطة يا ستي ؟.

أم رتيبة : كتر خيرك يا ست ام سيد . ما عدمكيش أبدا .

أم سيد : خلاص .. اتفقنا . بعد بكره أقول له ييجي يقابل سي عبد الصبور ؟.

أم رتيبة : خلاص أوى . بس قولى له . يستحملة ولا يزعلش منه . يعنى إن قال

له كلمه كده والا كده ما ياخذش على خاطره . قولى له ياخده على أد

عقله . حاكم هوا اليومين دول . عقله يعلم به ربنا .

(يسمع طرق على الباب بعضا)

أم رتيبة : (مرتبكة) يوه . دى دقة . يا ترى إيه اللى جابه بدرى كده ؟.

(يطرق الباب ثانية) .

أم رتيبة : طيب . طيب . افتحي يا بت يا سنيه . تعالى بنا يا ست ام سيد نخش فى

أودة الضيوف .

أم سيد : لأ ياختى أنا خاقوم بقى عشان اشوف ورايه إيه . واسيك يمكن يكون

سي عبد الصبور عايز حاجه .

(تفتح سنيه الباب ، ويدخل عبد الصبور . أم سيد تغطى وجهها

بالملاءة)

عبد الصبور : إيه ده . هوا انتوا نايمين نومة أهل الكهف .. ساعه وانا عمال اخبط ما

حدش راضى يفتح .. انظرشتم .

أم رتيبة : (مشيرة إلى أم سيد) خالتي ام سيد جارتنا يا سي عبد الصبور .

عبد الصبور : طيب . طيب . مش وقته دلوقت . قوموا ياللا من هنا . اخلو لنا

الصالة بسرعة .. عشان خاطر عندنا جلسه مستعجله . عندنا حاجه

خطيره عايزين نشوفها . ياللا اتفضلوا .

أم رتيبة : يوه .. هوا انت دائما كل حاجتك مستعجله ، جلسة إيه اللى حاتعملها

هنا ؟.

عبد الصبور : جلسة أرواح ، يعنى حاتكون جلسة إيه ، جلسة مجلس وزراء !.

أم سيد : (تلتف فى ملاءتها وتنهض) طيب يا ست ام رتيبه أستاذ أنا ..

(أم رتيبة)

خلیتک بعافیه .. إن شاء الله بعد بکره زی ما اتفقنا ؟ .

أم رتیبہ : إن شاء الله ، بس ما تنسیش الی قلت لك علیه ، إوعی یجی بیه ؟ .
 أم سید : ما تخافیش یاختی ، اطمئی . حظی فی بطنك بطیخه صیفی ، أنا اخلیه
 بغيره وبغير أبوه ، ما یكونش عندك فکره أبدا .
 (تنصرف أم سید ، وتودعها أم رتیبہ حتی باب البیت) .

المشهد السادس

عبد الصبور : (صائحا) زینهم .. یا حلوف ، یا بجم یا لوح .. انت فین ؟ .
 زینهم : (من داخل المطبخ) یا ستار یارب .. ادخنا جینا للشیخ والنظر
 (بنغم طویل) حاضر .

عبد الصبور : (مستمرا فی ثورته لسنیة وأم رتیبہ) وانتم واقفین کده لیه ؟ یا الله
 اتلحلحوا شویه مافیش وقت . الجلسة حا تنعقد الساعة ۱۲ ،
 والساعة دلوقت اتناشر الاربع ، عایز الصاله تكون جاهزه حالا
 (مشیرا إلى أكوام عروق الملوخیه وقشر التوم والبطاطا) یاللا
 شیلوا البلاوی التتلله علی دماغکم دی . عروق ملوخیه وفصوص
 توم ، إیه الحاجات الأرضیه دی .. ملوخیه وتوم وبطاطا .. احنا
 رایحین نحضر أرواح ، أرواح سماویه ، أثیره .. انتوا عایزین الأرواح
 تنزل بین الملوخیه والبطاطا والتوم ، دی تنقی فضیحه فی عالم
 الأرواح ، دی تبقى نکیه .. دی تبقى کارته .

أم رتیبہ : لیه یا خویا بس .. نکیه وکارته علی إیه !! یمکن أرواح تحب البطاطا .
 عبد الصبور : أرواح تحب البطاطا ؟ انتی یا ولیه مجنونه ؟ بتخرفی ؟ أنا طول عمری
 اقول ان عقلک علی قدک ، أرواح تحب البطاطا ؟ .

أم رتیبہ : لیه ؟ عیب ؟ قباحه ؟ مالها البطاطه ؟ دی حتی بطاطه حمرا من بطاطه
 سیدی جابر زی الشهد .

عبد الصبور : بطاطا ، بطاطا .. انتى يا وليه جنسك إيه . أرواح تحب البطاطا ؟ .

أم رتيبة : لا .. تحب الأمازيه ، يعنى هوا انت ضامن أن الأرواح اللى حا تنزل أرواح من جاردن ستى والا من الزمالك ، يمكن برضه تكون زى حالتنا كده من حوش آدم .

عبد الصبور : أرواح إيه يا شيخه اللى حا تنزل من جاردن ستى ، والا من حوش آدم ، دى نازله من طبقات الأثير ، من العالم الآخر المجهول ، أرواح يا وليه ، أرواح .

أم رتيبة : أرواح والا بستليه .. أنا مالى .. تنزل من مطرح ما تنزل .

عبد الصبور : تنزل من السما ، لا تاكل بطاطا .. ولا أمازيه .. دى أرواح .. عارفه يعنى إيه أرواح ؟ يعنى مثلا لما تطلع روحك ..

أم رتيبة : (مقاطعة) بره وبعيد .. تف من بقك سبع تفات . إيه الكلام دا اللى بتقوله اللى زى السم .

عبد الصبور : يا ستى يقول مثلا ، مثلا .. وعلى كل حال انتى زعلانه ليه ، ما هى مسيرها تطلع .. وتنطلق حره فى طبقات الأثير .. وربنا يتوب عليها من السجن اللى هيه فيه .

أم رتيبة : سجن ؟ فين يا خويا السجن دا اللى هيه فيه ؟

عبد الصبور : (يشير إلى جسدها) ده .. ده .. السجن السفلى ، الدنياوى ، الجته اللى زى جنة الخنازير .. اللى زى كيس الغسيل .. بكره تفارقه وتنطلق منه .. وتمشى فى السموات السبع حره .. تطير زى الفراشة .. تصورى انك تبقى طايره زى الفراشه ، خفيفه لطيفه ، بتفرسرف بأجنحتك . مش احسن من البرميل اللى انت محشوره فيه .. مش احسن من القدرة اللى عماله تدنى فيها أكل .. بطاطا ، وتسم .. وملوخيه ، ومفتقه .. وتكلفتها فى خرق وهلاهيل ، إيشى قميص وايشى لباس وايشى شراب .. والنهارده بردت وبكره سخنت ، ومره طلع لها خراج ، ومره وقعت انكسر لها إيد والا رجل .. مش

هى دى اجته اللى اتنى مسجونته فيها ، واللى مورياك الويل والعذاب ..

مش احسن لك تفارقها .. مش احسن إن روحك تطلع منها ؟

أم رتيبة : روحك انت اللى تطلع . أنا عجباني جتني . إذا كان مش عاجباك

جتتك الناشفه المقدده .. اطلع انت منها .. أهو باب السما واسع ، آل

جتني آل .. مالها جتني ؟ عوجه .. عارجه .. خمسه وخميسه ..

وحصوه في عين اللى ما يصلى على النبي .

عبد الصبور : لسه يدري عليكى عشان تفهمي .. لسه قدامك كثير .. كستير

خالص ، ومين يعرف يمكن ما تفهميش أبدا .. اللى زيك اتنى مش

يمكن يفهم .. ومش ضرورى يفهم ، وعلى كل حال ده مش وقته ،

ياللا ياللا .. شيلوا البلاوى دى .. الناس زمانهم جاين .. وله يا

زينهم الكلب يابوز الإخص ، انت مش عايز تيجي والا إيه ؟

زينهم : ما تصبر عليه شويه ، والا أجيلك كده زى مانا ؟

عبد الصبور : تعال بسرعه .. احنا مستعجلين .

(زينهم يدخل مترددا ، فلا يكاد عبد الصبور يرى وجهه حتى يفرغ

ويصيح به وهو يصرخ عليه) .

عبد الصبور : ارجع .. ارجع تاني .. ارجع بقول لك ، مقدرش ابص في وشك ،

شكلك يلبشتي .. وشك نحس .. عينيك كلها سفاله .. نظراتك

كلها مكر ولؤم .. ارجع .. ارجع احسن لك .. أنا قلت لك ميت مره

ما تخشش على بوشك مكشوف غطيه بسرعه .. يا ساتر .. يا

مغيث .

زينهم : (يتراجع) ما قلت كده ، ما عجبكشى .

أم رتيبة : مالوا يا خويه وشه ؟ مش خلقة ربنا ؟ مش زى وش البنى آدمين اللى في

الشارع ؟ حقه بطلوا ده واسمعوا ده . أهو ده اسمه كهن .. اسمه

بدع .

عبد الصبور : خبوه . خبوه بسرعه . أنا قلت له ما يطلعليش بوشه مكشوف أبدا .

- زينهم : (من المطبخ) — فين يا بت يا سنيه الوش ؟ . الله يخرب بيتك .
- سنية : (تخرج من إحدى الحجرات) بلاش زعيق كده . دور عليه عندك في صفيحة الزبالة (لعبد الصبور) الطرطور والعبايه وعلية النشوق والمنشه جاهزين على الكنبه . أحضر لك الطشت ؟
- عبد الصبور : لأ مش دلوقت ، أنا مش حاقط دلوقت لسه ورايه جلسه ، وجاى لى ضيوف .
- (زينهم يدخل وقد ارتدى وجهها من الوجوه الورق المضحكة) .
- أم رتيبة : كده يعجبك يا سى عبد الصبور ؟ كده حلو ؟ دلوقت ما يلبشكش ولا حاجه ، راحت السفاله والخساسه ؟
- عبد الصبور : أيوه كده ، كده أحسن كثير ، كده كويس خالص .
- (تخرج سنية من إحدى الحجرات وتأخذ في لم عروق الملوخيه)
- أم رتيبة : حكمته !! (تدخل في إحدى الحجرات) .
- عبد الصبور : يا الله يا زينهم جهاز التراييزة للشغل ، شيل المفرش وامسحها كويس ، وجهاز الكبايه ، ورض الكراسى . انت عارف التوضيب كله ؟
- زينهم : عارفه ، عارفه ، أوعدوا بقى وسعدوا لنا عشان نشوف شغلنا ، اوعى كده يا بت يا سنية .. وابعدى صدرك من سكتى لحسن زاحم الدنيا (يأخذ في تجهيز المنضدة ورض الكراسى حولها) .
- سنية : (وهى تجمع عروق الملوخيه والبطاطا) سامع يا سيدى يقول إيه ؟
- عبد الصبور : أنا مش قلت لك ياود يا زينهم أقصر لسانك الزفر عنها ، يعنى أعمل إيه فيك اكتر ما انا ملبسك وش ، ألبسك كمامه ؟ أربط لسانك ؟ مش حرمتك ميت مره شغل البصيصه ، وزوغان العين .
- زينهم : وأنا أعمل لها إيه .. إذا كانت زاحمه الطريق بصدرها ، مش تلمه شويه ، بص كده واحكم شوف مين فينا الغلطان ؟
- عبد الصبور : (يلتفت إلى سنية) أيوه حقيقى ، لك حق لمى صدرك يا بت واحتشمى جاكى خابط فى نافوخك ، أنا مش قلت لك ميت مره بطل

المسخره دى وقلة الحيا ؟

سنية : يوه يا سيدى .. وانا اعمل إيه ما هوه الى طالع كده خلقة ربنا .
عبد الصبور : أبوه حقيقى .. خلقة ربنا ، معذوره ، حاتعملى إيه .. الله يكون فى عونك ، ربنا ياخذ بصدرك .. يا اللا ياواد يا زينهم اشهل شويه ، الكبايه فين بتاعة كل مره ؟ (سنية تنتهى من جمع عروق الملوخيه وقشر التوم وزينهم ينتهى من تجهيز المضدة وإحضار الكوب الفارغة) .

عبد الصبور : أول ما يجوا الضيوف تعمل قهوه يا سنية وتدخليها ، وبعدين مش عايز أشوف خلقة حد منكم أبدا .. سامعه ؟ . قولى لستك كده ، وانت يا واد يا زينهم تقف على باب المطبخ لحسن يمكن نعوز حاجه .. وتلم لسانك .. ولا تتداخلش فى اللي ما لكشى فيه . واوعى تقلع الوش .

زينهم : علم يا سى عبد الصبور علم ، حافظ كل حاجه . (يسمع صوت أقدام تقترب من باب الشقة ثم صوت طرق على الباب) .

عبد الصبور : س .. بس .. ياللا يا بيت يا سنية شلى الى فى إيدك ده واطلعى بره . (يتجه إلى الباب ويفتحه) .

(يدخل الشيخ جاد الله ، والأستاذ زكى حنجل ، والأستاذ محبوب الور الذى يرتدى بدلة سوداء وكرافته سوداء) .

المشهد السابع

عبد الصبور : أهلا وسهلا .. (ينظر إلى ساعته) الساعه اتناشر وتلات دقائق ، يعنى جيين متأخرين تلات دقائق .. لكن معلش .. خشوا وخلاص .. ابقوا خدوا بالكم من المواعيد بعد كده .

الشيخ جاد : (يخرج ساعة الجيب) الساعه عندي اتناشر بالضبط .

عبد الصبور : ساعثك مغرفه .. لكن قلنا خلاص .. اتناشر .. اتناشر الا تلاته ..
اتناشر وتلاته .. مش مهم ، يا الله خدوا مطارحكم على الترايزه
لحسن ما عندناش وقت ، عايزين نخلص المجلس .. وننتهى بسرعه ..
أمال فين علوان افندى ؟

زكى : اعتذر .. علشان راح ياخذ حقنه .

عبد الصبور : حقنة إيه ؟

محبوب : حقنة كلب .

عبد الصبور : ليه ؟

محبوب : حماته عضته .

الشيخ جاد : مسكين .. أنا طول عمرى اقول له على الوليه دى انها سكرانه ،
مكانش مصدقنى .. يستاهل .

عبد الصبور : يا للا يا جماعه بقى اقعدهوا كل واحد ياخذ مطرحه .. زينهم ..
زينهم .. هات ورقة التحضير من على المكتب .

(يدخل زينهم من المطبخ إلى إحدى الحجرات .. ويدهش الجميع
من منظره ، ولكن عبد الصبور يهدئهم قائلاً) :

عبد الصبور : اسمعوا كلامى .. كده أحلى كثير .

(زكى يضع طربوشه على الشماعه ويضع محبوب طربوشه
بجواره) .

زكى : ابعد طربوشك لحسن يتلخبط مع طربوشى .

محبوب : إى والله أنا حاسس برضك انهم حا يتلخبطوا سوا وما حدش فينا حا
يعرف طربوشه أنهم .

زكى : أقول لك (يأخذ طربوش محبوب ويجذب زره فيقطعه ثم يرده له
قائلاً فى ارتياح) دلوقت نعرف نيزهم كويس .. طربوشك اللى من
غير زر .

(زينهم يدخل ويقف لمشاهدتهم)

- محبوب : (يتفعل ثم يجذب زر طربوش زكى فيخلعه) تبقى خالصين .
- زكى : (متأسفاً) كويس كده ؟. أهم حا يتلخبطوا تانى (بهم بأن يأخذ طربوش محبوب لينزع خوصته ولكن زينهم يتداخل فى الأمر) .
- زينهم : ليه ؟ وعلى إيه ؟. انتوا حا تعملوا زى الاتنين البرابره اللى اشترى كل واحد منهم معزه وخافوا لا المعزتين يتلخبطوا مع بعض .
- محبوب : وعملوا إيه ؟
- زينهم : ولا حاجه .. عثمان بص لمحمدين .. قال له يا مهمدين .. المعزّه بتأتى هاتلھبط مأ المعزّه بتأءك .. إيه الأمل . محمدین بص لعثمان .. وقال له دى بسيطه هالص يا أتمان .. تقطع ودن واحد منهم .. تبقى اللى بودن بتأتى واللى بتتین بتأتك ، عثمان بص لمحمدین وهز رأسه باتسائط وقال له يا سلام أليك يا مهمدين وألى أفكارك النيره دى حاجه تمام هالص ، وعنھا وراحوا قاطعين ودن معزه من المعزتين .. كان فيه واحد ابن حلال واقف بيتفرج عليهم حب يلخبطهم راح مسهيم وقاطع ودن الثانيه جم كل واحد ياخذ معزته لقوهم الاتنين بودن واحده ، بصوا لبعض كده وهزوا دماغهم بزعل ومصمصوا شفايفهم وعثمان قال لمحمدين : وبأدين إيه الأمل .. المعز اتلھبطوا تانى ؟ محمدین قال له : يا سلام يا أتمان .. ودا حاجه ترأل .. نقطع رجل واحد واللى بتلاته يبقى بتأتى واللى باربعه يبقى بتأتك ، بص عثمان لمحمدین وهز رأسه بمنتهى الإعجاب وقال له يا سلام يا مهمدين . أما أليك هته دين مخ ، وعنھا وراحوا قاطعين رجل معزه من المعزتين ، ابن الحلال كان واخذ باله برضه خلاهم بيتلقتوا كده وراح قاطع رجل الثانيه ، وبعدین جه كل واحد ياخذ معزته اتلخبطوا تانى ، عثمان قال لمحمدین : وبأدين بأه يا مهمدين دى حاجه تلھبط خالص . محمدین قال له ولا يكون أُنْدك فكر ، وعنھا وراح خازق عين واحده ، ابن الحلال سهاهم تانى وخرق عين الثانيه .. فضلوا على كده ، محمدین يقطع رجل وابن

الحلال يقطع رجل ، لغاية ما المعزتين صفصفوا خالص ، ما بقاش فيهم
حاجه أبدا ، والآخر قعد محمدين على الدكة وهز رأسه بزعل كده
وقال لعثمان : أقولكش يا أتمان .. عثمان قال له : إيه ؟ محمدين قال له :
أحسن طريقة أشان آدم اللهيطه . انت تاهد البيضة وأنا آهد السوده .

الشيخ جاد : (مقهقها) يا سلام على الذكاء وعلى المخ النضيف .

زكى : طب دلوقت حا تعمل ايه فى الطرايش ؟

زينهم : (يمسك أحد الطرايش ويقذف به من الشباك) حاجه بسيطه
قوى ، دلوقت ما فضلش غير طربوش واحد ، أظن مش ممكن
يتلخبط .

عبد الصبور : (هائجا ثائرا) إيه دا يا حلوف يا ابن الحرام .

زينهم : أعمل لهم إيه ما هى أصلها حاجه تلخبط خالص .

زكى : (يأخذ الطربوش ويلبسه غير أنه يسقط على أذنيه) ده مش
طربوشى .

زينهم : خلاص .. يبقى طربوشك اللى تحت .

(يجلس الأربعة حول المائدة)

عبد الصبور : أظن دى أول جلسة أرواح تحضرها يا شيخ جاد ؟

الشيخ جاد : تقريبا .

عبد الصبور : يعنى إيه تقريبا ؟

الشيخ جاد : سبق قبل كده ان انا رحمت مع أمى الله يرحمها عند الشيخ الكومى فى

سيدنا الحسين .. أصل الأسياد كانت تعبها .. وكان واحد منهم

متسلط عليها اسمه الويشى وبعدين الشيخ الكومى طلمه وطلع على جتته

البلا الأزرق بعد ما جنبنا له راس هدهد وفرخه باربع أجنحه ، ومره

تانيه حضرت معاها الزار عند سيده الكوديه ، والى كان عليها برضه

هوه الويشى نفسه .

عبد الصبور : زار إيه ، وكودية إيه ، وويشى إيه .. دا اللى كان على امك .. دا شغل

دجل ، شعوزه ، نصب واحتيال ، يضحكوا بيه على المهايفس
والخايل ، إحنا هنا مش بتدجل ، ومش بنعمل شغل مسخره من اللى
كان بيعمله الشيخ الكومى اللى بتقول عليه .. إحنا هنا مش حانجيب
العفريت اللى كان على أمك الله يرحمها .. إحنا حانجيب أمك نفسها .
فاهم والا لا ؟

الشيخ جاد : أمى !! أمى نفسها ؟! أمى أنا ؟ يا شيخ قول كلام غير ده ؟
عبد الصبور : آمال إحنا جاين هنا ليه ، يا بجم ، دى جلسة تحضر أرواح ، يعنى حان
تنزل الأرواح من السما السابعة ، هنا عندنا .. نكلمها وتكلمنا ، أى
روح عايزين نجيبها نقدر نجيبها .. ومن ضمنها روح المرحومه أمك ،
والا يعنى فاكر انها جعيصه ؟

الشيخ جاد : ولا جعيصه ولا حاجه .. بس هيه كانت دائما دماغها ناشفه .. الله
يرحمها كانت عنيده خالص يمكن تعصلج معاكم شويه .
عبد الصبور : ما فيش حاجه هنا اسمه عنيد ولا دماغه ناشفه .. إحنا حانجيبها ونجيب
أبوها كان ، أنا دلوقت حالا اجيبها لك يا شيخ جاد .

الشيخ جاد : حالا !! حالا ؟! من غير راس مهدد ولا ديك برجل واحده ؟
عبد الصبور : دا كلام فارغ ، دا نصب يا شيخ جاد ، دا احتيال ، قلت ميت مره ،
إحنا هنا حانزها بمنتهى البساطة .. إنت شايف الكبايه اللى قدامك
دى ؟

الشيخ جاد : طبعا شايفها .. بس يعنى يقول
زينهم : (مقاطعا) ليه .. هيه المرحومه كانت حبايه فى كبايه تطلع وردايه والا
إيه ؟

عبد الصبور : اسكت انت يا زينهم الكلب .
زينهم : طب عن إذنك ، اقلع الوش بقى لحسن حافظس ؟
عبد الصبور : إوعى ، إوعى ، إياك .
زينهم : هوه إيه أصله ده ! علوز اشم نفسى شويه يا عالم !

عبد الصبور : (في غضب) روح جوا المطبخ شم نفسك شويه وتعالى ، (إلى الشيخ جاد) خذ بالك بقى يا شيخ جاد . شايف الكبايه دى ؟

الشيخ جاد : شايفها .

عبد الصبور : أهو دلوقت حانطها في وسط الترايزه ونحط تحتها الورقه المدوره دى الى مكتوب عليها الحروف الهجائيه كلها والأرقام من ١ إلى ١٠ ومكتوب عليها لا ونعم ولا أجيب ، من باب مساعدة الأرواح .. فاهم ؟

الشيخ جاد : ولا انا فاهم حاجه .

عبد الصبور : لك حق .. فهمك على قدك .. زى اسم الله عليها اختى ام رتيه .
الشيخ جاد : يا أخى انا مش فاهم إيه دخل الأرواح بالكبايه ، وإيه دخل الكبايه بالحروف الهجائيه والأرقام ، وإيه دخل لا ونعم ولا أجيب ، في مساعدة الأرواح .. فهمنى .. اشرح لى .

عبد الصبور : حا شرح لك وافهمك كل حاجه ، بس ادينى عقلك الوسخ شويه ، حاول انك تفهم .. دلوقت ثلاثه منا حا يخطوا صوابهم السبايه على حرف قاع الكبايه وهى مقلوبه ، يعنى كده ، بشويش خالص ، مجرد لمس .

الشيخ جاد : وبعدين ؟

زكى : ولا قبلين .. الكبايه حا تتحرك ، يمين وشمال ، وتنقل من الحرف ده إلى الحرف ده ، وتحدد لنا الكلمات الى حا تجاوب بها على الأسئلة بتاعتنا . فاهم ؟

الشيخ جاد : ولا انا فاهم حاجه .

عبد الصبور : بعد دا كله ما نتش فاهم ؟

الشيخ جاد : حلمك شويه يا سى عبد الصبور ، مالى أنا ومال الكبايه لما تتحرك يمين وشمال .. وإيه دخل الكبايه عشان تجاوب لنا على أسئلتنا ، وأنا ليه حا سأل الكبايه ، بس فهمونى يا اخوانا، إيه حكاية الكبايه ؟

محبوب : ما هي الروح هي التي حاتحرك الكبايه .
 الشيخ جاد : يعنى الروح جوا الكبايه ، امى انا ؟ الست صالحه ؟ حاتخش جوا
 الكبايه (يضحك يشده) امى انا جوه هنا .. (مشيراً إلى الكوب ،
 ومستمراً فى الضحك) وبرضك تقول لى فاهم والا لا ، طبعاً مش
 فاهم .

زكى : ليه يا شيخ جاد ، الله لا يسيغك ، مانتش فاهم ليه !
 الشيخ جاد : أمى انا جوا الكبايه ! (يضحك بشدة) .
 عبد الصبور : أيوه أمك جوا الكبايه ، فيها إيه ا كثره ا معضله ا
 الشيخ جاد : (مستمراً فى الضحك) أصلك لو كنت شفت أمى ما كنتش قلت
 كده .. دى مره حيينا تدخلها فى أوده ما عرفناش ، انحشرت بين
 الاربع حيطان .. تقوم بسلامتك عايز تدخلها فى كبايه (مستمراً فى
 الضحك) .

عبد الصبور : شيخ جاد ، يا شيخ حلوف ، يا شيخ قرد ، يا عرة المشايخ .. أمك الله
 يرحمها ، حاتنزل بروحها مش بجسمها .. حاتنزل كده زى
 القراشه ، تشف وترف .. مش حاتنزل بالبراشوت زى صناديق
 الذخيره والتموين ، أمك الى كانت بتتحشر فى أوده ، بقت دلوقت زى
 النسمه الطايره .. أمك الى كانت ماتنفدش من الباب ، بقت تنفد من
 الحيطه ، تنفد من السقف . أمك الى كانت فى العش .. طارت .
 فاهم ؟ .

الشيخ جاد : ولا أنا فاهم حاجه .
 عبد الصبور : عنك ما فهمت ، أمك حاتجملك دلوقت وخلاص .
 محبوب : سيك منه بقى يا أستاذ عبد الصبور .. بلاش تضيع وقت ، ياللاينا
 نيتدى .

عبد الصبور : أهم حاجه عايز سكون تام .. لا كلمه ولا حركه .. عايز نفوسكم
 تصفو وتفكر كم يسمو . عايز بعد عن الماديات ، وارتفاع إلى

السماويات والروحانيات.. كلنا نركز أذهاننا في الأرواح اللى حا نستدعيها. فى الأشياء الساميه الصافيه الأثيريه غير المنظوره. إنتو التلاته كل واحد يمد السبابه بتاعه ويحطه على طرف الكبايه.. أيوه كده، لمس.. مد صباعك يا شيخ جاد ما تخافش، الكبايه مش حا تلسعك. سكون عميق. مالك بترعش كده له يا شيخ جاد؟ الله يخرب بيتك.

الشيخ جاد : (مرتعشا) هيه نزلت ؟

عبد الصبور : إيه هى اللى نزلت ؟

الشيخ جاد : روح امى !

عبد الصبور : روح امك لا نزلت ولا طلعت ، لسه ما فيش حاجه لغاية دلوقت ، ما فيش داعى للرعشه دى .. والخوف ده .. انت إيه ! جنسك إيه !

زكى : شد حيلك يا شيخ جاد ، شد .. دا حتى عيب عليك . انت عمرك ما قابلتش روح ؟

الشيخ جاد : أبدا .. أبدا .

محجوب : أدبك حا تقابل .

الشيخ جاد : ما هو ذا اللى مخوفنى ، أنا طول عمرى اخاف م الضلمه والعفاريت . عبد الصبور : انت مهفوف ، لسه برضه بتجيب سيرة العفاريت . احنا هنا مش حا نطلع عفاريت ، مش حا نحضر جن .. حا نستدعى أرواح ، أرواح ، يعنى لو كنت بسلامتك مت ، كنا جبنائك ، بغاوتك وسخافتك كده زى ما انت .

الشيخ جاد : طيب .. طيب .. ما تزعش كده .. آدى صباعى أهه .

عبد الصبور : بشویش .. ما تحطش صباعك أوى كده دامش طبق على لوز ، دى روح ، خلى إيدك خفيفه .. لمس يدوبك لمس .. مفهوم ؟

الشيخ جاد : مفهوم .

عبد الصبور : أيوه كده ، دلوقت . كل واحد يسبل عنيه . وياخد شوية شهيى طويل ، وبعدين زفير . اطرده معاه كل الأرضيات اللى فى نفسك

والشوائب والرواسب المادية التي في ذهنك .. عايز صفاء وسمو ..
مفهوم يا شيخ جاد ؟ ما تفكرش في حاجسه غير الأرواح
والسماويات .

الشيخ جاد : والترب والقرافات والأموات .. فاهم .. فاهم .. أنا الدمعة قربت
تفر من عيني .

عبد الصبور : دا اللي انا عايزه . مش عايز ماديات أبدا أبدا .. ودلوقت تحبوا نبتدى
بمين . أنتهى روح تحبوا نستدعيها الأول ؟

زكى : نبتدى بروح ام الشيخ جاد .

عبد الصبور : فليكن .. أملك اسمها إيه يا شيخ جاد ؟

الشيخ جاد : صالحه .. وشهرتها ابو جلمبو .

عبد الصبور : صالحه وخلاص .. ما فيش داعى لاسم الشهره دلوقت ، وخصوصا
انه أرضى خالص . واسم أبوها ؟

الشيخ جاد : الخمس .. المفش .

عبد الصبور : كفايه الخمس ما فيش داعى للمفش دى . زمانه فش فى السما وشبع
فششان .. اسم امها ؟

الشيخ جاد : أنا فاكر ! انت حاتفتحلها محضر ! ما دام ناوى تجيبها ابقى اسألها
هى .

عبد الصبور : اسم امها يا شيخ جاد .. أنا مش بهزر معاك .

الشيخ جاد : والله ما اعرف .. أنا فاكر ان أبويا كان بيقول لها املك .. ام قويق ..
يبقى لازم اسمها ام قويق . وعلى كل حال لما تنزل تبقى تتأكد ما دام دا
شئ يهلك أوى .

عبد الصبور : صالحه بنت الخمس وام قويق (ناظرا إلى السقف) يا ست صالحه ،
أرجوك تنفضلى شويه .

الشيخ جاد : (ناظرا إلى السقف فى دعر) هى حاتفضل من السقف ؟

زكى : (يزغده بكوعه) اثبت يا شيخ حنش .. اثبت ما تضحكشنى علينا

الأرواح .

الشيخ جاد : طيب بس فهموني يا ناس ، فهموني ، حاتيجي منين ؟
محجوب : دلوقت تشوف ، حط صباعك واسكت ، ودخل لسانك جوا
بقك ..

عبد الصبور : (مستمرا في النظر إلى السقف) يا ست صالحه ، اتفضلي شويه من
فضلك ، ابنك جاد عايزك .

الشيخ جاد : أيوه يا ام ، عايزك يا ام .

عبد الصبور : (يزغده) اسكت انت ، صوتك وحش قوى ، بيطفش الأرواح .

الشيخ جاد : (هامسا) آمال اعمل إيه ؟

عبد الصبور : حط صباعك على الكبايه واسكت .. وفكر في امك ، تفكير سماوى
نقى .

الشيخ جاد : إيه يا خويا اللخبطة دى ، إيه أصله ده !

محجوب : الخبطة إيه يا شيخ قرد !

الشيخ جاد : ماتتاش سامع بيقول لى إيه !

زكى : ماله ! بيقول لك إيه ؟ بيقول لك فكر في امك تفكير سماوى مرتفع .

الشيخ جاد : وهوه دا معقول بس يا ناس !

عبد الصبور : مش معقول ليه يا بلا .. مش معقول ليه ؟

الشيخ جاد : عشان التفكير السماوى المرتفع مش ممكن يجتمع مع امسى في خ

واحد .. لأننى لما بافكر في امى بتصورها قاعدة قدام الماجور وبتطب في

العجين .. طب . طب . أو ماسكه المنفضه وبتنفض في الكلم ، طاخ

طاخ ، أو طابقه في زمارة رقبة ابويا ، وعلى دماغه ، دى ، دى ..

بالذمه يبقى ده فيه إيه من السماويه والارتفاع .

عبد الصبور : طب بس ، بس .. إيه الأصوات المنكره دى .. دى أصوات تطفش

سما بحالها .

الشيخ جاد : وانا مالى ، ما هى دى الأصوات اللى كانت بتعملها في حياتها ، عايزنى

افتكرها ازاي امال ، ماسكه كمانجه وبتضرب تقاسيم حجاز ، تن ،
تن ، ماسكه مروحه وبتهوى بها بحقه ودلال ، هش ، هش .. عايزنى
اتصورها بترقص بصاجات تم ، تم .

عبد الصبور : ليه لا !

الشيخ جاد : لا ، اتصورها انت ، أصلك ما تعرفهاش أنا عارفها كويس .. دلوقت
تنزل لك بالحنجل والمنجل .. وتشوف ، وتقول يا ريت الى جرا ما
كان .

زكى : وبعدين معاك يا شيخ جاد ، الوقت حا يروح واحنا ما عملناش
حاجه .. أرجوك تسكت ، اسكت خالص وسينا على امك .. واحنا
نجيبها لك من تحت طقاطيق السما ، بس انسدا انت .

الشيخ جاد : (يضع كفه على فمه) هاب ، سكت انا .

عبد الصبور : (مستمرا فى النظر إلى السقف) يا صالحه يا بنت الشمس وام قويق ،
أرجوك تفضلى شويه .. كلمتين ورد غطاهم (ينظر إلى الكوب
الذى لا يتحرك ، ثم يستمر) يا لله بقى يا ست صالحه احنا مش
فاضيين لك ، عندنا شغل (يبدأ الكوب فى قلقلة خفيفة) .

زكى : بس . بس . أهى جت .

عبد الصبور : (هامسا لثلاثة) سكون ، ولا حركة ، (ناظرا إلى الكوب) أهلا
وسهلا .. العواف يا ست صالحه .

الشيخ جاد : (مرتعشا) هى نزلت . هى فى فى ؟ هى فى فى ؟

محجوب : (يضربه بكوعه) اثبت . اثبت يا شيخ جاد . (الكوب يأخذ فى
الحركة يمينا وشمالا فى اتجاه الحروف المختلفة) .

عبد الصبور : (يقرأ الحروف ويجمعها ويقول ببطء) الله يعافى بدنك .. (مخاطبا
الروح) حضرتك الست صالحه بنت الشمس بنت أم قويق ؟

عبد الصبور : (الكوب يتحرك وعبد الصبور يقرأ) لا . (عبد الصبور للروح فى
دهشة) الله امال انت مين ؟ (قارئا) أنا صالحه قاصين (متحدثا

للمجموعة (صالحه قاصين ؟ هي امك اسمها صالحه قاصين يا شيخ جاد ؟

الشيخ جاد : (مرتجفا) أبدا .. أبدا ، ولا امي ولا اعرفها .

عبد الصبور : (للروح) عدم المؤاخذه يا ست صالحه . الظاهر ان فيه غلظ

حصل .. (قارئا) يعني ما حدث عايزني (للروح) ما نستغناش يا

ست ، لكن احنا الحقيقه كنا عايزين الست صالحه التمس أم الشيخ

جاد ، عشان كان عايز بسألها على كام سؤال . (قارئا) تاني مرة تبقى

تاخذ بالك وتطلب الروح كويس . دى مسخره وقلة حياء ..

(للروح) متأسفين خالص .. عدم المؤاخذه .. (قارئا) يعني

امشي ؟ (للروح) اتفضل من غير مطرود ، بس إذا كنت تسمحي

ولو فيها رذالة تبعتي لنا الست صالحه التمس (قارئا) من عنيه

(للروح) تسلم عنيكي (للشيخ جاد) راحت تحبها .

الشيخ جاد : تفكر حا تلاقيا يعني ؟

عبد الصبور : ما تلاقياش ليه ؟ ضروري تلاقيا .

الشيخ جاد : أصل الله يرحمها كان لها غطسات كده في الغوريه وتحت الربع وسیدی

ابو السعود . ما حدث يعرف يعتر لها على أثر ، ربنا يسهل وتلاقيا .

(الكوب يأخذ في الحركة)

عبد الصبور : بس . بس سكون (للروح) أهلا وسهلا حضرتك مين (قارئا)

برضه صالحه قاصين (للروح) أمال ما بعيش الست صالحه التمس

ليه ، ما لاقيتياش ؟ (قارئا) لا .. لقيتها (للروح) أمال ما بعيتياش

ليه (قارئا) ما قدرتش تيجي (للروح) ليه كفى الله الشر ؟ تعبانه

والا حاجه ؟ (قارئا) لأ إيدها مش فاضيه (للروح) مشغوله بايه ؟

(قارئا) بزماره رقة ابو جاد .

الشيخ جاد : (صائحا فجأة) هي ما فيش غيرها ، هي بعينها . مفيش حد إيده

مشغوله برقة أبويا غيرها ، طول عمرها طابقه فيها ، مش تخليها

تفلفص ، هي بعينها .. ازيك يا ام ؟

(أم رتيبة)

عبد الصبور : (قائرا) اسكت يا شيخ هباب ، انسد ، لحسن تطفش الروح
(للروح) لا مؤاخذه يا ست صالحه .. ده الشيخ جاد ، أصل عنده
شوية خجل ، عقله على أده ، لسه ما تعلمش الأدب والصلاح في
حضرة الأرواح ، لا مؤاخذه (الكوب يتحرك وعبد الصبور يهز
رأسه أسفا) . معاك حق ، معاك حق ، هوا كده برضه زى ما
بتقولى .

الشيخ جاد : بتقول إيه ؟

عبد الصبور : بتقول انك مدب ، وغبى ، وقليل الأدب . زى امك .
الشيخ جاد : غورى غارك حنش ، وليه هزؤ ما تختشيش ، أنا اللي مدب وغبى يا بوز
الإخص يا وش النحس .. ما سمعتكيش امى كانت فصصتك وفرجت
عليكى اللي ما يتفرج . أم .. أم .. عاجبك يا ام .. الحقينى يا ام .
انزلى بسرعة يا ام . الوليه بتشتمنى .

عبد الصبور : عيب يا شيخ جاد ما يصحش . اعقل . ما تفضحناش قدام الأرواح .
(الكوب يهز بشدة والترابيزه تتأرجح وتهايل) .

عبد الصبور : (منزعجا) يا نهار اسود ، الظاهر ان امك نزلت لها زى القضا
المستعجل .. تلاقهم دلوقت مسكوا فى بعض ، والخناق شغال
والضرب نازل يرف .

الشيخ جاد : (فرحا) ول يا ام .. ادبها يا ام .. كان يا ام . ركبهم الى بالك فيهم ،
أيوه كده ، كان دماغ ، يا سلام عليك يام .

(الكوب مستمر فى الاهتزاز بشدة ثم يطير من المتضدة متهشما) .

عبد الصبور : (صائح فى عجلة) وله يا زينهم ، كبايه تانيه بسرعه يكملوا فيها
الخناق .. ياللا يا زينهم .. الخناق حامية قوى .. بسرعه يا وله ..
(زينهم يتقدم بكوب آخر ووضعه على المتضدة .. فيضعون عليه
أصابعهم ولكن الكوب لا يتحرك) .

عبد الصبور : الظاهر ان الخناقه خلصت .

الشيخ جاد : لازم صالحه قاصين هربت .

عبد الصبور : استنوا كده لما نشوف حد منهم موجود ؟ سكون . سكون . ارتفاع
عن الماديّات وسمو عن الأرضيّات . سمو . سمو . سماويّات .
روحانيّات .

الشيخ جاد : سماويّات إيه بس يا سي عبد الصبور ، هوا بعد الى حصل يقى فيه
سماويّات . بلاش تضيع وقت يا شيخ ، اسألها باختصار .. مين
انت ؟

عبد الصبور : انت مين ؟ (يقرأ) مين إيه .. يا عومر . انتوا حاتنلمسوا والا
اضلمها الكو ، وادشدشلكوا الكبايه على نفوخكو ونفوخ الى
يشددلكو (للشيخ جاد) لا .. دى حاجه ما تنطاقش أبدا .. دى
روح شلق قوى .

الشيخ جاد : هي أمى ما فيش غيرها (صائحا بأعلى صوته) ازيك يا ام ، سلامات
يا ام ، وحشتيني يا ام (لعبد الصبور) اطلع انت منها بقى وسيني
منى لها .

عبد الصبور : (فى ثورة) — دى بقت حاجه هزؤ خالص . دى ما بقتش جلسة
أرواح ، دى بقت جلسة أودباتيه . (الكوب يهتر بشدة) طب بس
خلاص اسكتي . حقك علينا . عدم المؤاخذه .. اتفضل يا سيدى
كلمها . كلم ست صالحه التمس .

الشيخ جاد : سلامات يا ام ، عامله إيه فى السما يا ام ؟

عبد الصبور : (يقرأ) برضك ماشيه بالدراع زى ما كنت فى الأرض ، ما فيش
روح تقدر تدوس لى على طرف ، مدوخاهم روح روح .. لو كنت
شفت العلقه الى هبدها لصالحه قاصين كنت عرفت ان امك برضه
راجل زى ماهيه .

الشيخ جاد : وازاى ابويا ؟

عبد الصبور : (يقرأ) مدوخنى فى السما زى ما كان مدوخنى فى الأرض .. فلاتى وبصباص وعينه فارغه .. كنت زمان فى الأرض بعرف اعفقه . لكن دلوقت سايب على حل شعره ، طول النهار يعط فى السما ، ما انا عارفه له قرار ، راح فىن ولا جه منين ، لكن لما يقع فى إيدي عينيك ما تشوف الا النور .. لسه اقربها دلوقت كنت طابقه فى زماره رقبته ، مخلصوش منى غير الوليه صالحه قاصين .. ما علينا .. ليه أخباركم انتم . ازاي أحتك خديجه ؟ .

الشيخ جاد : مبسوطه وأشيته رضا .. من يوم ما متى ، وجوزها مهنيا وباسطها وما تختفش معاها ولا خناقه .

عبد الصبور : (يقرأ) الضلالى ابن الضلالى .. هوا انا يعنى كنت ضبايه على عينه ، والا راكزه على نفسه ، يا حبيبتى يا بتتى ، لازم مفيش حد قادر يسودلك عيشته زى ما كنت باعمل ، لازم راكبك وموريك الويل ، وازاي خالتك زنوبه ؟ .

الشيخ جاد : بتدعى عليكى ان ربنا يحملك .. وكل ما تشوفنى تقول : جاتها داهيه امك مطرح ما راحت .. من يوم ما ماتت والدنيا رايقه بلوزه .. وانا مش قادر اكلها ولا اهب فيها .

عبد الصبور : (يقرأ) أصلك مره طالع لايوك .. وبتسكت هاليه ؟ خايف منها ؟ .
الشيخ جاد : لا .

عبد الصبور : (يقرأ) آمال إيه ؟ .

الشيخ جاد : الحقيقه انى شايف انها على حق .. أصل انت يا ام كان لسانك زفر قوى ، ما كانش حد يطبقك . فاكره لما دلقتى حلة الملوخيه الحامضه على دماغ الشيخ شوشه ؟ .

عبد الصبور : (يقرأ) ما هو كان كان يستاهل اكرم الى جراه ، مش كان هوا الى مخسر ابوك ، ومعلمه السهر والبصيصه ؟ .

زكى : (متمللا) يا الله بقى يا أخى قول لها تنصرف ، احنا ما عندناش

وقت للكلام الفارغ ده (الكوب يهتر بشدة) .

عبد الصبور : طيب ، طيب ، ما ترعلش حقلك على .

زكى : (خائفاً) ما لها ! بتقول إيه ؟

عبد الصبور : (يقرأ) بتقول قول للواد الأقرع اللى ينقرص فى لسانه بتلم ، لحسن والنبي ، واللى نيا النبي تدشكش الكبايه على نفوخك .

زكى : لا . مفيش لزوم ، وعلى إيه ؟ قل لها انا راجل غليان ، وصاحب عيال .

الشيخ جاد : عايزه حاجه يا ام ؟

عبد الصبور : (يقرأ) عايزاك تطلع القرافه على روحى بحتين مفتقه وحلة حليه وربطة حنا بغدادى .

الشيخ جاد : من عنيه يا ام ، بس المفتقه بقت غاليه أوى اليومين دول ، ما تغلبيهم حله واحده ، هو انتى مبطلتيش الفجمه دى ؟

عبد الصبور : (يقرأ) لسه برضك مقرم .. وتموت ع الملم ؟ هوا انا خساره فيه حلتين مفتقه .. ؟ إن شا الله تنطس فى عنيك ، ياما شلتك وياما ربيتك .. آدى آخره تربيتى وتعبي ، تستخسر فيه حلة مفتقه !

محبوب : (وقد ضاق ذرعاً) يا أخى أرجوك .. أنا حاطع عليها باربع حلل .. بس قول لها تفضل بقى .. وتروح لحالها .. كفايه ، عايزين نشوف شغلنا .

الشيخ جاد : طيب يا ام ، اتفضللى انتى بقى .. ابقى سلمى على ابويا ، وقولى له : التعميره اللى كان مخبىيا فى الطقيسى .. لقينها مغشوشه وغلوطة بحنه وتراب .. هى دى اللى جابت أجله .. الله يرحمه ويحسن إليه .. مع السلامه يا ام .

عبد الصبور : (يقرأ) مع السلامه .

زكى : (متلهذاً بارتياح) مع ألف سلامه ، حلّى عنا بقى دى أم دى يا شيخ جاد .. الله يكون فى عون عزرائيل اللى قبض روحها .

عبد الصبور : دلوقت خلونا نخش بقى ع المهم .. هيه . نبتدى .. ؟

- محبوب : (بلهجه حزينة) أيوه .. نبتدى .
- الشيخ جاد : (يفرك يديه مسرورا) أيوه نبتدى .. دى الحكاياه سهل أوى .. قولوا بس أنهى روح عايزين تنزلوها ، وانا انزلها لكسو زى العصفوره .. طلباتكم ؟ .
- عبد الصبور : اسكت انت يا شيخ جاد .. كل اللى عليك انتك تحط صباعك وتسكت . اوعى تتكلم والا تتنفس لحسن تطرد الأرواح .
- الشيخ جاد : أنا بطرد الأرواح . أمال امى نزلت لى ليه ؟ .
- عبد الصبور : علشان امك من نفس النوع الواطى بتاعك .. يعنى فيه توافق بين أرواحكم .. يعنى زى المتعوس وخايب الرجا .. فاهم ؟ .
- الشيخ جاد : عيب يا سى عبد الصبور .. نجيب سيرة امى .. دى برضه حرمه وميته .. وانا ما احبش حد يجيب سيرة امى أبدا .
- زكى : لا .. باين عليك مترى وابن ناس ! .
- عبد الصبور : دلوقتى خطوا صوابكم على الكبايه .. عايز صمت .. وسكون .. سكون .. سكون .. ارتفعوا بأذهانكم .. خلقوا بأرواحكم .. سمو .. وارتفاع .. لا ماديات ولا أرضيات .
- (يسمع فجأة صوت دقات شديدة بالهون فى المطبخ)
- عبد الصبور : (فرعا) إيه ده ؟ إيه الدق الفظيع ده ؟ إيه الضججه المزعجه دى ؟ واد يازينهم .. بت ياسنيه ؟ .
- (تدخل سنياه وهى تحمل إيد الهون)
- سنياه : يوه مالك يا سيدى .. بتصرخ كده ليه .. حصل إيه ؟
- عبد الصبور : انتم وحوش .. انتم مجانين .. إيه الدق المريع ده ؟ ! .
- سنياه : هو إيه أصله ده .. دانا بدق الكفته .
- عبد الصبور : (صائحا) كفته إيه .. وزفت إيه .. وبلا أزرق إيه .. ده وقت كفته !! .. فيه أرواح تنزل على دق الكفته ؟ .. انتوا إيه .. جنسكوا إيه ؟

الشيخ جاد : وما تنزلش ليه على دق الكفته ؟ .. أمال روح العجائى .. وروح الشيمى حاييقوا ينزلوا على إيه .. على دق الطبل .. والا على دق الزار .. كل شيلله ويشبيلله ، كل شيخ وله طريقه .

عبد الصبور : اسكت يا شيخ هباب . مين قال لك انى عايز انزل روح العجائى والا روح الشيمى .. إحنا عايزين روح ناعمه . روح رقيقه .

الشيخ جاد : طب خلاص . فهمنا كده ، روحى يا بت دق على واحده ونص .
(سنية تخفى .. بعد حين يسمع دق مثل طبل الرقص على واحدة ونص) .

عبد الصبور : (هائجاً) بس يا بنت الصرمة .. بلاش مسخره فارغه .. عايزين سكون مطبق ، سكون خالص .. ما فيش كفته ، ما فيش تقليه ، ما فيش ملوخييه ، ما فيش ماده ، فيه سمو ، فيه ارتفاع ، فيه إحساسات فياضه .. فيه عواطف رقيقه .. فيه تفكير صماوى ، سكون ، سكون ، ياللا حطوا صوابكم .. وارتفعوا بأرواحكم .. اسم الروح اللى انت عايزها إيه يا أستاذ محجوب ؟

محجوب : (يتنهّد بجزن) نعيمه .

عبد الصبور : أبوها ؟

محجوب : محمد .

عبد الصبور : (فى ضيق) محمد إيه .. لازم يكون محمد حاجه .. هو فيه حد ما اسموش محمد .. دا اسم مشاع .. زى سى .. وزى حضرة .. اسمه الكامل إيه ؟

محجوب : محمد محمد .

عبد الصبور : محمد محمد ا ..

محجوب : أبوه محمد محمد .. اسمه كده محمد محمد ..

عبد الصبور : محمد محمد كده حاف ، ما فيش المنفلوطى ، الأسيوطى ، الفيومى ، حاجه كده مميزه ، ما فيش اسم تالت ؟

محجوب : الاسم الثالث مقدرش ا قوله .

عبد الصبور : ليه ا عيب ! .

محجوب : مش عيب ولا حاجه .

عبد الصبور : آمال إيه ! فيه إيه ؟ .

محجوب : لا ولا حاجه ، بس يرضك محمد ، اسمه محمد محمد محمد .. أنا ماليش

دعوه ، انت اللي قلت لى قول ! .

عبد الصبور : طيب خلاص .. حصل خير ، اسمه محمد محمد محمد .. ويمكن لو

بحشت شويه كان فى تاريخ العيله تلاقى الاسم الرابع محمد والخامس برضه

محمد ، على كل حال من باب الاختصار نسميه محمد دايره .

الشيخ جاد : أيوه محمد بن الدايره .

عبد الصبور : اتلم يا شيخ قطران . اسكت انت بالتى هى أحسن .. اسم امها ؟ .

محجوب : عديله .

عبد الصبور : نعيمه بنت محمد دايره بنت عديله . كده مضبوط ؟

محجوب : أيوه مضبوط .

عبد الصبور : (ناظرا إلى السقف) يا سيده نعيمه يا بنت محمد دايره بنت عديله .

محجوب : آنسه يا أستاذ ، ماتت قبل ما تتجوز .

عبد الصبور : عدم المؤاخذه .. يا آنسه نعيمه يا بنت محمد دايره يا بنت عديله ،

تسمحى بكلمه .

(الكوب لا يتحرك) .

عبد الصبور : يا ست نعيمه .

محجوب : (فى حدة) آنسه يا أخى قلت لك ! .

عبد الصبور : آنسه ، ست ، أهو كله محصل بعضه .. يمكن يا أخى بقت ست فى

السما .

محجوب : لا أنا واثق منها كويس .

عبد الصبور : طيب حقتك على ، يا آنسه نعيمه .. اتفضل ، خمس دقائق ، عايزينك

في كلمه بسيطه ، لو سمحت .

(الكوب لا يتحرك) .

عبد الصبور : وبعدين يعنى .. يا ست نعيمه لحظه واحده .. مش حانأخسرك
كثير .. (إلى الشيخ جاد) خف صباعك شويه يا شيخ جاد ما تتفلش
ع الكبايه .. بس لمس . مفيش أكثر من كده .

الشيخ جاد : أنا يدوبك لا مسها .

عبد الصبور : يا ست نعيمه ، يا آنسه نعيمه ، أرجوك ما عندناش وقت .

(الكوب يتحرك ببطء) .

عبد الصبور : بس .. الظاهر انها جت ، ركزوا تفكيركم فيها .. ابتعدوا بذهنكم عن
الماديات (يقرأ) حاكمبوش خاناكيك (يتكلم) ده إيه الكلام
القصارغ ده .

الشيخ جاد : (لمحجوب) هي المرحومه كانت بتتكلم بالجرىجى .

محجوب : جريجى إيه يا جدع .. دى مصريه من ضهر مصرى .

عبد الصبور : دى لازم روح شريه بتأوز . أصل فيه أرواح كده فاضيه وتحب
اللعب والمعاكسه .

الشيخ جاد : يا أخى وفيها إيه ، خليها تأوز من نفسها شويه ، لازم مضيقين عليها في
السما . الظاهر انهم جد قوى فوق ، هات الروح الملعبانيه دى ،
نلعب معاها شويه خلينا نفرش ، حد واخذ منها حاجه .

زكى : هواده وقت لعب يا شيخ جاد ، احنا ف إيه والاف إيه ؟

عبد الصبور : نجرب تانى ، ركزوا أذهانكم كويس . اسموا بتفكيركم ، فكروا في
الآخرة والملايكه والجنه والنار .. سكون ، سكون .

سنه : (من المطبخ) آى .. آى .

عبد الصبور : مالك يا بت بتصرخى ليه ؟

سنه : زينهم قرصنى .

عبد الصبور : اتلم يا زينهم لحسن اقوم اقرصك في نافوخك ، اتلم احسن لك . أنا

قلت ميت مره ما لكش دعوه بسنيه ، لحسن ادبلك .

زينهم : (مندفعاً من المطبخ) هوا إيه ده ، تدبجنى ازاي ! هوا ما فيش حريات ، آمال فين الحريه الخامسة ؟ .

عبد الصبور : إيه هي الحريه الخامسة دى يا سى زينهم ؟

زينهم : حرية البصبصة ، حرية تلعيب الحواجب ، والضرب باللسان ، ومع كلاً أنا غرضى شريف .. يعنى بصبصتى شريفه .. أنا عايز اتجوزها .
آه .

عبد الصبور : الظاهر انك عايز أجلك ينتهى ، أنا قلت ميت مره مش عايزك تحيب السيره دى على لسانك ، أنا مش عايز سيرة جواز هنا فى البيت ده أبدا ، قوت النجر من قدامى ، حلوف ابن حلوف .
(زينهم يتجه إلى المطبخ) .

عبد الصبور : عدم المؤاخذه ، نيتدى من جديد سكون ، سكون .
الشيخ جاد : سكون ، روحانيات ، سماويات ، أبوك السقامات ، عارفين المتولوج كله ، ياللا بقى خش على الجذ ، انده لها وخلصنا ، هي إيه ؟
السفيره عزيزه !!؟ .

عبد الصبور : انت يا شيخ قطران اسكت بلسانك . انت السبب فى العطله دى ، الروح لازم مش عايزه تنزل من تحت راسك ، لازم تفكيرك مش ولا بد .. كده والا لا ؟

الشيخ جاد : والله من جهة مش ولا بد ، فهو صحيح مش ولا بد .

عبد الصبور : بتفكر فى إيه ؟ قولى لى ؟ .

الشيخ جاد : عايز الحق والا ابن عمه ، أنا أصلى ما حبش الكذب .. بصراحه كده كنت بافكر فى البت هانم .

عبد الصبور : هانم . هانم إيه ؟ .

الشيخ جاد : هانم زبده ، هانم قشطه ، هانم حلويات ، هانم سكر نبات .. يا خسارتك يا هانم ، ضاعت من إيدى . يا خساره ، يا ألف خساره .

عبد الصبور : إيه بس جرا ايه ؟ .

الشيخ جاد : كان ميعادها امبارح تيجي تشطف حنتين الغسيل ، والبيت كان فاضى مفهش حد غيرى ، وقلت يا واد احسن طريقه عشان تبلقها ، اقعدع الطشت خد لك فمين معاها .. وقعدت ، وهات يا دعك لما إيدى بقبقت ، وبعدين طلعت تنشر الهدمتين ، واستناها تنزل ما نزلتش .. أنايها زاغت من سطوح الجيران .. أنا أصلى غلطان ، الحق على . أستاهل ألف صرمة .. كان لازم اطلع انشر معاها ، مش اسيبها تضحك على وتزوغ منى .. أهو أنا عمال افكر . لو كنت طلعت ونشرت معاها ، مكاتتش قدرت تزوغ منى وكانت نزلت معايا ، وكنا قعدنا فى البيت سوا .

عبد الصبور : اخص ، اخص ، اخص على التفكير السافل المنحط .. شيل صباعك من على الكبايه ، جاك قطعه دا السمو والارتفاع الى باطله منك يادنى يا مرام . هاتم زبده ، وهاتم قشطه ، وفمين غسيل ! اخص . اخص . شيل صباعك . يادون يا بأف .

الشيخ جاد : طب خلاص شلته ، داماله محموق كده ليه ، هي الدنيا طارت ، هوا الغسيل حرم ، دا غسيل ، دا حتى ربنا قال النظافة من الإيمان وانا كنت بعمل مع هاتم شوية إيمان ، هو إيه ، حرام ؟

محجوب : (إلى الشيخ جاد) خلاص .. خلاص .. انتبهنا ، شيل صباعك واسكت .

عبد الصبور : أنا حا حط صباعى معاكم .. ابعده يا شيخ جاد ؟

الشيخ جاد : بعدت . اما اشوف كده حاتمعلوا إيه بشطارتكم وتفكير كم السامى ، يا الله اتفضلوا .

عبد الصبور : سكون ، سكون .

الشيخ جاد : سماويات .. روحانيات .. يا خسارتك يا هاتم يا سكر نبات .

عبد الصبور : سكون ، سكون . سمو وارتفاع .. (ناظرا إلى السقف) يا نعيمه يا

بنت محمد محمد محمد يا بنت عديله اتفضلى انزلى شويه من فضلك
واحسنك (الكوب لا يتحرك) . يا ست نعيمه وحياة والدك تنزلى
شويه ، كلمه واحده بس مفيش غيرها (الكوب لا يتحرك) طب إذا
كتتى مش فاضيه قولى لنا انك مش فاضيه (الكوب لا يتحرك) لا ،
دى حاجه تفور الدم خالص (للمجماعة) لازم فينا واحد وسيط مش
كويس .

الشيخ جاد : اوعى يا شيخ كده ، شيل صباeck شيل ، أنا حافرجك ازاي تنزلها ..
آل من فضلك آل .. ده مره يا سى عبد الصبور ، والنسوان ما يجوش
الا بالدق على دماغهم آل إيه كلمه واحده من فضلك .. اوعى كده ،
شيل إيدك من على الكبايه يا سى محبوب ، وانت عمال بتترعش
ووشك اصفر زى الكرم .. سيني عليها بلا مياعه (يضع أصبعه على
الكوب بدل محبوب وينظر إلى الكوب صائحا) انت يا بنت يا
نعيمه انزلى جاكى نزله فى ركبك .. انزلى وحياة امك بلا مرقعه
فارغه .. انزلى بقول لك يا بت لحسن اخلى امى تجيبك من شوشتك .
محبوب : لا .. أنا ما سمحشى .. دى وقاحه .. دى قلة أدب .. أنا ما سمحشى
لحد يخاطب نعيمه باللهجه دى .

الشيخ جاد : طب بس اتلهى انت واسكت (للروح) يا الله يا بابت انزلى بالتى هى
أحسن بدل ما خلى امى تجرجرك على ملا وشك وتفرج عليكى اللى ما
يتفرج ! (الكوب يهتز) شفتى مش قلت لكم النسوان ما يجوش الا
بالدق (للروح) ازيك يا بت .. ازاي امك .. انتى نعيمه بنت
عديله .. (الكوب يتحرك يمينا وشمالا ، والشيخ جاد يقرأ) ..
أيوه .. وانت مين ؟ (للروح) محسوبك الشيخ جاد .. مأذون
الصناديقه ودرب عجور وما بينهما (يقرأ) وعائز منى إيسه ؟
(للروح) عائز سلامتك .. عائز نتسامر شويه .. فيه مانسح ؟
(لمحبوب) ما تستلموها انتوا بقى يا جماعة.. أنا نزلتها لكم وانتوا

عليكوا الباقي .

عبد الصبور : (للروح) يا ست نعيمه .. فيه هنا واحد قريب منك جدا .. عايز يكلمك (يقرأ) عايز مني إيه (للروح) والله عايز يقول لك شوية كلام كده (محجوب) اتفضل يا أستاذ محجوب .. كلم الست نعيمه .

محجوب : (مرتجفا) هي دي نعيمه !! حقيقي نعيمه !! أنا مش مصدق .. أنا خايف قوى .. أنا مش حاقدر اكلمها ، أنا كنت ما بقدرش اكلمها وهي في الأرض .. كنت لما بقعد معاها لسانى ينعقد .. وقلبي يدق .. زى اللى حاق ينط من صدرى .. ازاي اقدر اكلمها دلوقت .. مش ممكن .. مقدرش اكلمها .. أبدا .. أبدا .

عبد الصبور : (في تهرم) كلمها ياسى محجوب ما تخليهاش واقفه ملطوعه .. كلمها ما يصحش .

الشيخ جاد : كلمها كلمتك اجنابك .. آمال كنت مسروع عليها ليه . لما انت بسلامتك مش قادر تكلمها ا خايف من إيه ؟ .. يعنى هي حاتكون اقوى من امي .. كلمها بلا نسونه .

محجوب : طب بس استنوا على شويه .. خلوني اشم نفسي وابلع ريقى .. حرام عليكوا يا ناس . دانا في حال يعلم بهارينا .. (هامسا) نعيمه .

عبد الصبور : زعق شويه .. بلاوى إيه دي ! .

محجوب : (للروح) نعيمه .

(الكوب يتحرك) .

عبد الصبور : بتقول ما له كده بيصوصو .. زى ما يكون بيتكلم من تحت الأرض .. اتكلم زى البنى آدمين .

محجوب : نعيمه .

الشيخ جاد : (في سخوية) إيه اللى نعيمه .. نعيمه .. ما حنا عارفين انها نعيمه .. وهي عارفه نفسها نعيمه .. انطلق قول لها عايز إيه .. انت فاكرا انها

فاضيه لك .

محجوب : (للمروح) أحبك يا نعيمه .

عبد الصبور : (يقرأ) حبك برص .

الشيخ جاد : تعجبنى يا بت يا نعيمه يسلم فمك .. آل احبك آل ، ياخى حبك الضب و غضب عليك الرب .

محجوب : .: إيه ؟. هى بتقول لك كده ؟ مش ممكن .. هى ما تقولش كده أبدا .

عبد الصبور : أنا ما جبتش حاجه من عندى يا غبى ، ابقى اقرا بنفسك الحروف .
ياللا كلمها . هى مش فاضيه لك .

محجوب : حاضر . حاضر . حاكلها (للمروح) نعيمه أنا مش طابق الحياه بعدك يا حبيبتى ، مش قادر اعيش فى الدنيا من غيرك ياختى .

عبد الصبور : (يقرأ) طيب وإيه اللى مقعدك فى الدنيا إيه اللى ما نعلك من الموت .

الشيخ جاد : آه حقيقى .. لها حق . إيه اللى ما نعلك ؟.

محجوب : (مرتبكا) اللى ما نعننى ، اللى ما نعننى (الشيخ جاد) أقول لها إيه ، إيه اللى ما نعننى ؟.

الشيخ جاد : قول لها أى حاجه ، ما دام حضرتك لازم تتفلسف وتقول لها انك مش قادر تعيش من غيرها ، قول لها الغلا ؟.

محجوب : الغلا ؟! غلا إيه !

الشيخ جاد : غلا الخانوتيه .. غلا الموت . هوا فى حاجه مصبره الواحد على غلا المعيشه غير غلا الموت .. كل حاجه دلوقت بقت متعذره .. الزيت والبقول والسكن والموت .. قول لها كده ..

محجوب : ازاي أقول لها كده ، عشان تفتكرنى فقير .. شحات .. ؟ وبعدين تحقرنى ، أنا طول عمرى مفهمها ان انا راجل متيسر ، ومبيحج ، ومتريش .

الشيخ جاد : طيب خلاص ، حقك على ، قول لها اللى يعجبك ، قول لها انك متريش .

عبد الصبور : اتكلم بقى يا أخى خليت الروح زهقت . انت أصلك إيه ! انطق !
محجوب : (للروح) مش قادر اموت يا حبيبى .. عشا عايش على ذكراك ..
الى مهون على عيشتى إنى بشوف طيفك فى المنام .

عبد الصبور : (يقرأ) بيقول إيه يا ختى ده ؟ .

الشيخ جاد : سيك منه دا بيخرف .

محجوب : (للروح) ذكراك هى كل حاجه لى ، طيفك هو الى مصيرى
ومسلىنى ، بافتكرك ليل ونهار ، بافتكر عنيك وبقلك وكلامك
الخلو .

عبد الصبور : (الكوب يهتز) ما فيش لزوم .

محجوب : بتقول إيه ؟ .

عبد الصبور : بتقول يا سم .. يادم .. يا كبه .

محجوب : كذاب ما بتقولش كده .. هى بتحبى زى ما يحبها (للروح) بفتكر
كلامك الخلو وبفتكر تحديه فوق والتفافه الى كنت بتفيا على .. كان
هزارك لطيف .

(الكوب يهتز) .

محجوب : بتقول إيه ؟ .

عبد الصبور : بتقول ما كانش هزار .. ده كان جد .

محجوب : كذاب ما بتقولش كده (للروح) بفتكر فى الايام الخلو الى قضيتها
سوى .. وفى الايام الى كنت بحلم بيكى ، وبفتكر ازاي سهينى ،
وموتى نفسك ، وسيتينى فى الدنيا لوحدى .. ليه يا نعيمه ..
تسرعى ، حقيقى الظروف ما كانش ملائم لجوازنا ، حقيقى
الأحوال العائلية كانت بطلاله .. لكن كل شىء كان مسيره يتصلح ،
وكنا برضه مسيرنا نتجوز ، ليه نتحرى عشان خاطرى ، وانا حياتى
كانت فداكى .. ليه يا نعيمه ؟ !

(الكوب يهتز)

محجوب : إيه ؟ .. فيه إيه ؟ بتقول إيه ؟ .
 عبد الصبور : بتقول المغفل دا بيخرف بيقول ايه ؟ .
 محجوب : لا .. دى دسيسه . انتوا عايزين توقعوا بينا وهى حيه .. انتوا كان
 بتوقعوا بينا وهى ميتة ؟ حرام .. حرام عليكم .
 (الكوب يهتز) .

عبد الصبور : (يقرأ) حرام إيه .. حرمت عليك عيشتك .. حب إيه وهباب إيه
 اللى كان بينا . أنا انتحرت عشان خاطرك ؟ .. يا أخى هزلت يا سى
 محجوب ليه الرجاله خلصم ، والا عدم .. أنا اللى زهقت من
 عيشتى ، أنا اللى لقيت الدنيا ما تستاهلشى .. أنا اللى يشت من كل
 حاجه مش لاقيه فيه عدل ولا رحمه حواله أبدا فى الدنيا بتاعتكم ..
 العدل فيها باللسان بس والرحمه بالكلام . لاقيه نفسى محرومه من كل
 حاجه . أبويه بيرى ثمانيه زى وياخد اتناشر جنيه .. يعنى لو كان
 بيرى ثمان معيز ما كانش قضاهم أكل .. ثمان معيز .. واحنا ثمان
 بنات ، لنا بق عايز ياكل ، وجسم عاوز يتغطى ، وعين بتجص
 وتشوف وتقرأ المجلات وتفرج ع الصور ، وتشوف الهدوم والصيفه
 والفلوس اللى بتبعت ، وتشوف بنى آدمين زينا متخومين ، واحنا
 يدوبك بتلاقى اللقمه .. كنت عايشه محرومه إلا من النظر
 والإحساس .. ياريت ما كانش عندى نظر ولا إحساس ما كنتش
 حسيت بالحرمان اللى انا فيه ، ولما كان الحال يفيض لى كنت اقول
 يمكن تفرج بالجواز .. لكن لما افكر كنت الاق ان جواز المحرومين حا
 يكثر المحرومين ويزود الحرمان .. وكنت الاق ان انا حاجتى على
 اولادى زى ما جنوا على أهلى .. قلت يا بت احسن حاجه .. سيبى
 الدنيا ، ونقصى المحرومين محروم .

الشيخ جاد : لكى حق يا نعيمه يا بنتى . الله يرحمك .
 محجوب : (للروح) يعنى ما متيش علشانى ؟ . يعنى ما كنتيش بتحبينى يا خاينه ؟ .

الشيخ جاد : بلاش لماضه بقى .. قالت لك ماتت من الجوع .. يعنى ماتت م الجوع .

محجوب : (للروح) وانا اللي كنت فاكر انك انت انتحرت عشان خاطر مش قادر اتجوزك ، أنا اللي كنت مخدوع فيكى وفاكر انك مت من حبي .. أنا اللي لابس عليكى بدله سوده وكرافته سوده ، وحالف ما اقلعهم أبدا .

عبد الصبور : (يقرأ) كرافته سوده ، وبدله سوده . لانت فاكر ان احنا هنا حاسين بالكرافته السوده والبدله السوده .. دى تفاهة أحياء ، وهياقة بنى آدمين .. روح يا خويا امضغهم .

زينهم : (يغنى داخل المطبخ بصوت مسموع) .

فى ليله شفت الحبيب ساهى وباكى العين

وع الرصيف ماشى يطوح على الجنسين

قلت الهوى عذبه والبعد كان له فين

خبطته ورده لقيته طب مات م الجوع

يا ريتنى يا حلو شقه وطعميه وقرص متين

محجوب : (للروح) اخص عليكى (يخلع الكرافته السوداء) اخص عليكى

يا خايته .. يا خسارة حزنى عليكى .. يا خسارة الكرافته السوده ..

شاربها بنص ريال .. خدى أهى .. (يقذف بالكرافته السوداء على

الأرض ثم يغنى عليه)

عبد الصبور : (صائحا) زينهم .. سنه .. الحقونا بكباية ميه .. الحقونا بنشادر ..

يا ناس .. يا هوه .. الراجل سخسخ الحقوه .. حاي موت .

الفصل الثاني

المنظر : حجرة جلوس عتيقة بها بعض الأرائك والكراسي ، ومكتب قديم في الركن ، وعلى جدرانها صور قديمة وآيات قرآنية ، وعلى اليسار باب يفضي إلى الصالة وعلى اليمين شباك وفي المواجهة باب زجاجي كبير ذو أربع ضلقات تبدو منه حجرة نوم عبد الصبور افندي ، في منتصفها سرير حديد ذو أربع أعمدة وضع كل عمود في صفيحة ، وأمام السرير كرسي وعلى الحائط مشجب ورف عليه كتب صفراء وعلى أعلى الباب الزجاجي علقت ساعة حائط تشير إلى الثالثة والنصف .
يرفع الستار عن سنية وهي تنظف حجرة الجلوس .

المشهد الأول

سنية : (تغني) وان كنت خايف من امي دي امي على ستوره .. وان كنت خايف من ابويا دا ابويا عدى المتصوره .
زينهم : (يدخل مندفعاً حاملاً في يده مكنسه) انا اخاف من ابوكي .. ليه ؟
هقيه .. دانا لو خبطته خبطه حاجيه الأرض .. آل عدى المتصوره آل ..
ما يعدى واللا ينفلق ، أنا يهمني .. دانا زينهم والأجر على الله .. أنا زينهم صبي زكيه الملدنه .. قاهرة الوحش .. إيدك بقي يا بت يا سنيه .. قرني على يا سنسن يا للى زى اللوز .
سنية : خليك عندك بالتى هي أحسن .. اوعى تقرب لحسن وسيدنا الحسين اخبطك بالزهريه اللي في إيدى أفتح قرنك .
زينهم : (في غزل) خشى على خشى .. يا سنسن يا للى زى المشبك اللي بيخر

عسل .. انخبطيني بالزهريه .. افتحي قرني .. موتيني .. ادبحيني ..
(مغنيا) وان دبحيني بايديكى عيب على ان قلت آه .. آه .

سنية : ابعد يا زينهم واقصر الشر .. وقول اللهم اخزيك يا شيطان ، ابعد احسن لك .. لحسن والنبي ارفع بالصوت .. أجيئك سيدى عبد الصبور .

زينهم : يا باى .. يا لطيف .. طب بس اخفيها سيره بقى .. سيدك عبد الصبور .. جاتك نيله على سيدك عبد الصبور .. ابقى خليه ينفعك .. بكره يضيع عمرك زى ما ضيع عمر المغفله الكبرى .

سنية : هى مين دى المغفله الكبرى ؟

زينهم : يعنى حا تكون مين غير ستك ام رتبه .. فضل يضيع منها العريس ورا العريس .. لغاية ما بلغت ارذل العمر .. وحا تطلع من الدنيا قفاها يفمر عيش .. خليكى انت وراسى عبد الصبور لغاية ما تحصلى ام رتبه .. يايت اعقلى .. حطى عقلك فى راسك واسمى كلامى .. طاوعينى يا سنيه لحسن تندمى ؟

سنية : أطاوعه فى إيه المنيل على عينه ده ؟ ما نيش عارفه اطاوعلك فى إيه .. واسمع كلامك فى إيه ؟

زينهم : الكلام اللى قولتهولك الجمعة اللى فاتت لما كنت بتنشرى الغسيل فوق السطوح .

سنية : ما نيش فاكره قلت لى إيه .. أدبك طول النهار بتقول كلام فارغ زيك .. هوا انت وراك ايه غير الكلام الفارغ !

زينهم : لا يا سنية دا ما كانش كلام فارغ .. دا كان كلام جد .. كلام صحيح .
سنية : قولهاولى تانى ، ما نيش فاكره .

زينهم : طلبت منك تتجوزينى .

سنية : أنا ؟ أتجوزك انت ؟ ليه .. انطسيت فى عينه ، انخبطت فى نافوخى ، اتجننت .. خلاص .. الدنيا صفصفت عليك يا سى زينهم ، الرجاله خلصم يا روح امك ، ومع كلا انت حقيقى بتكلم جد ، والا هزار ؟

- زينهم : هزار ازای يا سنسن ، هي الحاجات دى فيها هزار .. الدنيا دى فيها حاجتين الواحد ما يقدرش يهزر فيهم أبدا .
- سنية : ايه هما ؟
- زينهم : أول حاجة الجواز .
- سنية : والتانيه ؟
- زينهم : الموت .
- سنية : يا باى على ملافظك الوحشه ، صدق من قال الملافظ سعد .. ولما انت عارف ان الجواز وحش كده زى الموت .. حتعجوز ليه ؟
- زينهم : وحنموت ليه !!؟
- سنية : قضا .
- زينهم : أهو دا برضك قضا .. لا بد منه ، بس قضا عن قضا يفترق ، قضا يحط فى إيدك الكلبش .
- سنية : والقضا التانى ؟
- زينهم : يخلصك منه .
- سنية : ولما انت عارف كده ، بتجرى ورا الكلبش ليه ؟
- زينهم : (يقترب منها) أموت فى الكلبش .. أموت فى طره .. يا وعدى ع العسل النحل اللى بيعخر .. حا تحطى الكلبش فى إيديه إمتى يا سنيه ؟
- سنية : ابعده عنى كده .. كلبش لما يطبق على زمارة رقبتك .. آل كلبش آل .. ليه قالوا لك على مأمور ابو زعل ، آل كلبش آل .. حقه بطلوا دة واسمعواده ، ومع كل .. انت بتكلم جد ، ولا بتهزر ؟
- زينهم : قولتلك يا حبيبتى يا سنيه .. الكلام دا ما فيهش هزار . دا جد وابن جد . أدى إيدى حطى فيها الكلبشات .
- سنية : ما كانش ينزع يا خويا .. ياريت كان عندنا يا سى زينهم ، ومع كل سيبنى

اشاور عقلی .. خلینی أفکر .. هی المسأله کده سبیلی .. دا جواز .. دا
عمر .

زينهم : تعجیبنی کده .. أهو کده بقیتی بت عاقله .. مش .. أتجوزک لیه ؟
انطسیت فی عنیه ، انخبطت فی نافوخی ما یصحش الکلام ده یا سنسن ..
أنا برضه بنی آدم ، ولی قیمه عند نفسی ، والا حا تعملی زى المحبول
الأکبر !

سنية : دا یقی مین ده ؟

زينهم : أخو المغفله الکبرى .

سنية : بس .. عرفته ، والنبی راجل طیب ویستاهل کل خیر .

زينهم : طیب . طیب . لكن مغبول مغبول (مقلدا عبد الصبور) خبی وشک
لحسن ما بطیقوش .. غطی وشک بسرعة .. شکک یلبشنى .. بخاف
من عینیک .. بالذمه دا کلام یتقال . أنا وشى ما ینطقش ؟. عینیه
وحشین ! (ینظر إلی نفسه لی مرآة فی الحائط .. ویلعب حواجه) .

المشهد الثانى

(تدخل أم رتیه) ..

أم رتیه : کمان .. کمان .. یا سى زينهم .. أدى الی کان ناقصنا . تقف فی المرايا
وتلعب حواجبک .. خلاص .. کملت المعانى لما تلعب حواجبک فی
المرايا .. عاجبک أوى شکک الی زى بوز الإخص . قال لو کان القرد
شاف ...

زينهم : (مقاطعا) خلاص مفیش لزوم ، یعنى لازم تصدى نفسی .. قرد وما
قردش .. هوا یعنى الواحد کفر .. لما یشوف وشه فی المرايه ؟!

أم رتیه : ما کفرش ولا حاجه .. بس قلبی علیک ، تغم قلبک وتسد نفسك . کان
نفسی تتفرج علی حاجه عدله . ما علینا . قوت انجر شوف شغلک ..

اوصل لعم شرف هات منه قزازة كازوزه للضيف الى جى .. ياللا فوت .

(يخرج زينهم بعد أن يقذف بقبلة في الهواء لسنية)

زينهم : (لأم رتيه وهو يهم بالانصراف) لا مؤاخذه يا ست . دى حاجه

كده ع الماشى .. دى دفعه أولى من إيجار السجن .. دى عربون ثمن الكلبش (يصفق يديه) أموت في ابو زعل عقبال عندك يا ست .

أم رتية : قطع لسانك .. قليل الحيا ما تحتشيش .. إن شا الله انت وعشره

زيك .. يسنسلوك من رقتك ومحدفوك في أسفل سافلين .. سجن آل .. وكلبش آل .. بره وبعيد .

زينهم : (لسنيه وهو بجوار الباب) بقول لك على نياتها .. ما لهاش في الطيب

نصيب . (لأم رتيه) انت لو عرفت السجن الى قصدى عليه .. والكلبش الى بالى فيه .. لوديتى نفسك في طوكر .. آل بره وبعيد ..

قولى ان شاء الله ألف انشا الله . عقبال الحبايب . (يخرج زينهم)

المشهد الثالث

أم رتية : قصده إيه المهفوف في عقله ده ؟

سنية : ما تاخذيش على كلامه يا ست .. أهو عمال بيعرف .. حد واخذ منه حاجه غير كده .

أم رتية : امال كلبش إيه ، وسجن إيه الى حياجره ويدفع عربونه ؟

سنية : (تضحك) ربنا يديكى يا ستى .

أم رتية : انت كمان بتقولى كده ؟

سنية : أيوه والنبى يا ستى ، لو عرفت السجن الى عايز يخش فيه ، والكلبش الى ناوى يحطه في إيديه .. لتدعى بيه على الحبايب .

أم رتية : ولا انا فاهمه حاجه .

- سنية : زينهم قصده بالكلبش والسجن ، الخطوبه والجواز .
- أم رتية : طيب وهو مال و مال الخطوبه والجواز .. هو مال وش الفقر ده .
- سنية : (تضحك) أصله يا ستى عقبال عندك خطبى ، والنبي يا ستى بقاله كام شهر وهو بيزن على ودانى .
- أم رتية : (تبدو عليها الفرحة) بقى كده .. المتيل على عينه أبو تعسونه كان بيخطب ويتجوز .. وقلت له إيه ؟
- سنية : قلت له .. لا .
- أم رتية : لا تسب مفاصلك ، فيه حد تيجى له النعمة لغاية عنده ويرفضها ، حد فى الدنيا يجيه عريس ويقول لا ؟
- سنية : مش بتقولى عليه المتيل على عينه أبو تعسونه ؟
- أم رتية : طيب وفيها إيه ، دى حاجه ودى حاجه .. دى بشقه ودى بشقه ، مش راجل ؟ كفايه ؟
- سنية : بس يا ستى حاله على أده .
- أم رتية : بكره ربنا يعدل حاله ، والا يعنى حانكتر على ربنا ؟
- سنية : أنا برضه يا ست ما قلتش لا .. يعنى لا .. قلت سيبنى لما افكر .
- أم رتية : وتفكرى فى إيه ؟ وليه ؟ هى دى حاجه عايزه تفكير ، ارضى يا بت .. ارضى به ، ذا اللى ما يرضى بالخوخ يرضى بشاربه .. وعريس فى اليد ، أحسن من عشرة عند الخاطبه .
- سنية : بس يا ستى خايفه من سى عبد الصبور .
- أم رتية : وماله سيدك هباب ؟
- سنية : خايفه لا ما يوافقش .
- أم رتية : وهو مال .. له عندك حاجه .. أبوكى ! أملك ! .. حقه بطلوا ده واسمعوا ده .
- سنية : أنا أصلى شايفاه دايما ساخط على زينهم وما يطيقش يشوفه .. ودايما يقول لى اوعى منه يا بت ذا أصله خيس وخبيث .

- أم رتيبة : هو افيه حد عنده مش خسيس وخبيث .. هوا كده دا بما يكره العرسان
ويطلع فيهم القلط الفاطسه .. الود وده الجواز يحرم على العالم ..
والناس تقعد كلها زيه كده عزابه حقه عجائب .. مش كفاه ميل
بختي .. هوا عايز يميل بخت اللى يعرفه واللى ما يعرفوش .. ارضى يا
بت ارضى واسمعى كلامى .. ارضى دا العمر مش بعزقه ، والا يام
بشجرى زى ما يكون حد وراها بالكرباج .
- سنية : واذا ما رضاش ؟
- أم رتيبة : هوا مين دا اللى ما يرضاش !
- سنية : سيدى عبد الصبور .
- أم رتيبة : ولا يهك .. كل واحد يقول يا الله نفسى . آل يا روحى ما بعدك
روح .. شوفى مصلحتك يا بنتى .. بكره لا يتفعلك ست ولا سيد ..
ما حدش له عندك حاجه .. الدور على اللى مسنسلنى معاه ومجرجرنى
وراه .. وسادد طريقى ومميل بختى .. ويطفش منى العرسان بوشه
الى يقطع الخمره م البيت .. ربك يستر النهارده .. قادر يا كريم تعقله
وتهديه ، وتحلى فى عينه سى سيد افندى .. وتعمل الخير على قدوم
الواردين وتغلى نهارنا لبن .
- سنية : ان شاء الله يا ستى سليمه .
- أم رتيبة : سليمه يا بنتى بإذن الله .
- سنية : ربنا يتمم بخير .
- أم رتيبة : خير وألف خير .. أنا عيني الشمال بترف ، وعمرها ما رفت الا على
خير .
- سنية : خير يا ستى خير .
- أم رتيبة : وحكاية جوازك دا كان فال كويس .. خلانى استبشر خير .. هوا
ياختى اتأخر ليه !
- سنية : ما تقلقيش يا ستى .. أهو زمانه جاى .. هوا معاده كام ؟

أم رتيبة : ست ام سيد قالتلى حاييجى الساعة اربعة .
 سنية : لسه بدرى قدامه ربع ساعه .. يكون سيدى عبد الصبور شرب
 القهوة وشم النشوق ووزن دماغه .. يقابله وهو فايق ورايق .
 (يسمع صوت عبد الصبور افتدى وقدور المناقشة بينه وبين زينهم
 من الخارج) .

عبد الصبور : (صارخا) القبقاب .
 زينهم : (يحيه من الخارج أيضا) حاضر . حاضر حا جيهولك .
 عبد الصبور : يا باى .. يا باى . يا حفيظ يا مغيث .. خبى وشك يا خسيير يا
 إبليس يا خبيث يا منحوس .. خبى وشك لحسن بتلبش جتنى .
 زينهم : امال حا جيبلك القبقاب ازاي وانا مش لاقى الوش قدامى عشان
 البسه ، خبى وشك انت لغاية ما جيهولك .

عبد الصبور : انا حا غمض عليه ؟

زينهم : يكون أحسن .

عبد الصبور : خلاص .

زينهم : لسه .

عبد الصبور : خلاص ؟

زينهم : لسه .

أم رتيبة : الحقيه بالقبقاب يا سنيه يا حبيبتى .. الحقيه قبل ما يتلبش ويغلى يومنا
 زى بعضه .. شوفيهوله تحت الكنبه الى قاعد عليها ، ولا دورى عليه
 فى رجله .. ما هو اليومين دول خلاص عمى .. تبقى الحاجه فى إيده
 والا فى رجله ويقلب الدنيا عليها .

زينهم : (صائحا من الخارج) يا سلام . يا سلام . امال إيه الى فى رجلك
 ده ؟

(عبد الصبور يدخل من باب حجرة النوم وهو يطرقع بالقبقاب
 وقد ارتدى جليبا وطرطورا وظهرت أرجل السروال الطويل من

أسفل الجلباب) .

عبد الصبور : مش قصدى على القبقاب ده .. قصدى على القبقاب ابو جلاجل ..

القبقاب الموسيقى .. هو الى يهدى أعصاى ويرى جتى .

أم رتية : روحى يا حبيبتى يا سنيه شوفى له الحاجه اللي هوا عايزها . طيبى

خاطره شويه يا سنيه يا بنتى . هديه لاجل خاطرى ، وابعدى عنه

المقروص زينهم ما دام يلبش جتته .

(أم رتية تخرج من باب الصالون .. وسنيه تدخل إلى حجرة النوم

من الباب المتسع حيث يجلس عبد الصبور افندى على فوتيل أمام

السريـر وبجواره منضدة صغيرة) .

المشهد الرابع

عبد الصبور : القبقاب ابو جلاجل .

سنية : عنيـه يا سيدى . أبو جلاجل وابو صاجات ، وابو سنه ذهب لولى .

عبد الصبور : اخلصى بسرعه .

سنية : بس صبرك على يا سيدى ، انا حا جيـهولك من تحت طقاطيق الأرض .

(سنية تبحث تحت المقعد وتحت السريـر .. ثم تخرج قبقاب منقوش

بجلاجل) .

سنية : اتفضل يا سيدى .. قبقاب العافيه .. قبقاب السعد والهنا .

عبد الصبور : ومجيينه ليه تحت السريـر ، هوا معيه والامعيره !

سنية : أبدا .. يا سيدى أبدا .. دا زينة القباقيب .. احنا بس خايفين عليه م

العين (تصدر حركة منع الحسد وتدور بأصابعها متجمعة فوق

القبقاب) .

عبد الصبور : كلام فارغ ، أنا ما صدقش فى العين .. أنا عايزه ينحط داىما وبوزه باين

من تحت السريـر ، عايز اشوفه قدامى واتلى منه .

سنية : اسم الله على بوزه . من عنيه يا سيدى .
عبد الصبور : دلوقتى سيهولى قدامى ، وروحى هاتى لى القروانه ، وابتعى لى ستك
ام رتييه عشان اقرا لها شويه .. أنور مخها .
سنية : حاضر يا سيدى (تخرج وهى تنادى) ستى . ستى . كلمى سيدى
عشان عايز ينور مخك شويه .. الله ينور عليه .. ويهديه كان وكان .
(تدخل أم رتييه) .

المشهد الخامس

عبد الصبور : اقعدى .. قدامى .
أم رتييه : عايزايه .. انا مش فاضيه لك .
عبد الصبور : اقعدى يا جاهله ، اقعدى يا مسكينه ، يا مضيعه عمرك فى ظلمات
الجهل ، يا تاييه فى دياجير الحياه .. اقعدى لما افتح ذهتك شويه يا
بائسه .. يا تعسه . اقعدى لما ادبك شوية نور .. يخففوا عنك
العتمه اللى انت فيها . اقعدى يا غلبانه .
أم رتييه : يا خويه اعتقنى شويه لوجه الله .. كفايه بقى قلبت دماغى باللت
والعجن اللى كل يوم تصدعنى بيه ، انا مش عايزه نورك ده .. انا
مبسوطه كده من العتمه اللى انا فيها .
عبد الصبور : طبعا . طبعا .. زى كل جاهل ، وأخو الجهالة فى الشقاوة بنعم ..
ولكن انا لازم انورك غصب عنك ، انا مشول عن إخراجك من
الشقاوه اللى انتى بترتمى فيها ، دا واجب على .. انا لازم اعلمك
كل حاجه عشانم حاجاتك فى وقت الزنقه ، من سوء البخت ،
انك أقرب الناس لى ، ولا فيش حد حاعتمد عليه فى المهمه
الكبرى غيرك .. اقعدى .
أم رتييه : (تجلس متربعة على سجادة صغيرة على الأرض) حل عنى شويه

بقى .. مهمه كبرى إيه يا خويا وصغرى إيه !

عبد الصبور : بكره تعرف ، بعدين تعرف ، انت حا تكونى شريكه فى أكبر حدث فى التاريخ ، انت حا تقومى بدور ، ما نتش قده ، ولا حملة ، لكن اعمل إيه مفيش غيرك .. انت حا تخلدى فى التاريخ رغم أنفك .. حا تبقى عظيمه غصبين عنك .. يدى الخلق للى بلا ودان .

أم رتية : يا خويا اللى يفرقه العويل يسفه .. أنا لا عاوزه منك لا خلق ولا إسوره . هوا انت من يوم ما جبت لى الكردان الفالصو ، هان عليك تجيب لى حاجه بعده ؟ .

عبد الصبور : كردان إيه ، وإسوره إيه ، يا وليه يا جاهله دا مثل ، دا مجاز .. انا قصدى انك حا يبقى لك شأن ، وانت بلا شأن ، حا تبقى حاجه ، وانت مش حاجه . حا تبقى عظيمه ، وانت تور الله فى برسيمه ، فهمت والا لأ .. عشان كده انا عايز أنورك شويه . عايز اخليكى تور ، لكن متتور شويه . عايزك تفهمى حاجه عشان خاطر تساعدنى .

أم رتية : أساعدك فى ايه بس يا خويا يا عبد الصبور ؟

عبد الصبور : بعدين تفهمى . بعدين حا تعرفى كل حاجه .

أم رتية : أنا ورايا شغل .. لازم اشوفه عشان فيه ناس ضيوف جاين لك دلوقت .. وانت لازم تقوم تلبس علشان تستقبلهم .

عبد الصبور : ضيوف ؟ ضيوف مين ؟

أم رتية : جارنا سى سيد افندى .. الست ام منيد قالت لى انه حا ييجى يزورك .

عبد الصبور : عشان إيه . عايز منى إيه ؟

أم رتية : أنا عارفه .. وهى الناس بيزوروا بعض عشان إيه ، يمكن عايز يأتس بيك .

عبد الصبور : أنا مش عاوز حد يأتس بيه ، أنا كده كويس .. مقتنس بنفسى ..
أنا بحب نفسى .. أكثر من أى حد تانى .. خلاص .. مش عايز
اقابل حد .

أم رتية : والضيف اللى جاى ده نظرده ؟. مفيش داعى يا خويا للمحاجات
دى ، أهو قابله برضك واقعد معاه شويه ، واجبر بخاطره .

عبد الصبور : ع العموم .. مش وقته دلوقت ، المهم انى اقرا لك دلوقت بقية
الباب الرابع ، وبعدين يبقى نعلها ربنا دلوقت اسمعى كويس ،
وخلى نخلك معايا .. احنا كنا بنقرا فى باب « أشباح الأحياء » ..
ووقفنا لغاية « البحث النفسانى » .

أم رتية : حاضر يا خويا ، سامعك كويس قوى .. اقرا فى عفساريت
الأحياء .

عبد الصبور : (يمسك كتاب ويأخذ فى القراءة . وأم رتية تنهس أنشاء
القراءة) : « ولا يجب أن ننسى ، من جهة أخرى ، أن المكان
هو الذى يوجد التقسيمات الواضحة .. فأجسامنا خارجية
بعضها عن بعض فى المكان ، ونفوسنا من حيث هى مرتبطة بهذه
الأجسام ، تفصلها بعضها عن بعض مسافات ولكن إذا لم تكن
النفوس ملتحمة بالجسد إلا فى جزء منها كان من الممكن أن نعتبر أن
يكون ثمة تداخل متبادل فيما عدا ذلك الجزء ، وكان الممكن أن يتم
بين النفوس المختلفة تبادلات شبيهة بظواهرات التداخل ، وإذا صح
وجود هذا التواصل كان لا بد أن الطبيعة قد اتخذت الاحتياطات
التي تحول دون ضرره ، ولعل هذه هو موضوع : « البحث
النفسانى » لعل الرؤية الصادقة تتم على هذا النحو وكذلك تظهر
« أشباح الأحياء » فاهمه يا أم رتية ؟

أم رتية : (مستيقظة) أبدا ، مش فاهمه حاجه أبدا .
عبد الصبور : ولا انا .. على العموم الفهم مش مهم ، الكتب دى معموله

مخصوص عشان ما تفهمش ، دا تلاقى اللى كاتبها نفسه ، مش
فاهمها .. فيه ناس اختصاصيين فى الكتابه اللى ما تفهمش .
(تدخل سنیه حامله قروانه نحاس وإبريق ملئ بالماء الساخن) .

سنیه : كلمى يا ست . ست ام سيد عايزاك من الشباك .
(أم رتيه تنهض)

عبد الصبور : (بإصرار) خليكى قاعده لما اكمل لك الفصل .
أم رتيه : (تهرول خارجه) هوا إيه أصله ده .. هوا حكم قراقوش ، الوليه
واقفه ع الشباك . دا حتى ما يصحش .
عبد الصبور : (يضع الكتاب جانباً) طيب بس ما تغيبش كلمه ورد غطاها .. أصل
انا عارفك وليه رغايه .. اللى انشال من مخك انحط فى لسانك .
(يرفع عبد الصبور طرف جلبابه ، ويشمر سرواله ويضع ساقيه فى
القروان) .

المشهد السادس

عبد الصبور : يا للا ادلقى .

سنیه : دى نار يا سيدى . لما تبرد شويه .

عبد الصبور : مش مهم النار .. أنا احب النار اللى فى الأرض .

سنیه : ليه بس يا سيدى ؟ بعد الشر .

عبد الصبور : ما بعدش ولا حاجه .. لو ما دقناش النار فى الأرض حا ندقها فى

السما .. بنى آدم لازم يدوق النار .. يا نار الحرمان فى الأرض ..

يا نار العذاب فى السما .. ربنا قال كده يا سنیه .. حا نعمل ايه ؟

اهو الواحد منا قدامه خمره ونسوان وفرفشه فى الأرض ، وخمره

ونسوان وفرفشه فى السما يا ياخذ اللى فى الأرض .. يا ياخذ اللى فى

السما .. فيه ناس بينسرعوا على اللى فى الأرض وينسوا اللى فى

السما .

سنية : وانت يا سيدى ؟

عبد الصبور : أنا معشم نفسى باللى فى السما .. أصل العمر فى الأرض قصير يا سنيه .. دى فركة كعب . النهارده بتولد وبكره بنموت .. أنا فاكر نفسى امبارح لسه فى اللفه . وانتى يا سنيه .. ناويه تفرفشى فى الأرض والا فى السما ؟

سنية : (تضحك) هى ، هى ، .. فى الأرض يا سيدى .. السما بعيدة قوى .. وما حدش عارف إيه اللى فيها .. بعيدة بعيدة .. واللى قبلنا ما حدش عرف مصيرهم إيه .. يفرفشوا فى السما حقيقى والا بيدوبوا فى التراب .

عبد الصبور : الجسد هوا اللى بيدوب فى التراب .. لكن الروح بتتطلق حرة .. طليقة زى النسمة السارية ..

سنية : مين يعرف أهو كلام يقولوه .. حد راح هناك وقال لك ؟

عبد الصبور : أهى دى المشكله .. دى الحاجه اللى تبدد الإيمان .. البنى آدم عايز حاجه ملموسة قدامه .. دى العقده اللى عايز احلها .. دى المسأله المستعصيه اللى انا عايز اوصل لها .. أنا لازم اعملها .

سنية : تعمل إيه يا سيدى بعد الشر ؟

عبد الصبور : مش وقته ، بكره تعرفوا ، بكره حاعمل لكم المعجزه الكبرى ، بكره حاحكى لكم على العالم الواسع المجهول ، واكشف لكم نجايا الظلمات المحيطه بأجسادكم الفانيه .. ما علينا .. مش وقته ده .. حطى كإن شويه ميه .. فين عليه النشوق .. انا مش قلت لك دايما حطيتها على الترايزه جنبى .

سنية : والنبي يا سيدى كنت خطاها مطرحها .. يمكن حد شاها فى الدولاب .

(تذهب لإحضار علبه النشوق من الدولاب) .

عبد الصبور : ما فيش غير زينهم .. هوا ما فيش غيره اللي بيدعيس في حاجاتي .. هوا
الى معكن على عيشستي .. هوا الخنيس الخبيث .

سنية : والنبي زينهم مظلوم يا سيدى .. دا أمير وطيب وابن حلال وقلبه أبيض
ويحبك قوى .

عبد الصبور : لكن انا ما حبوش ، منظره يلبش حتى ..
سنية : والنبي يا سيدى دا دائما يشكر فيك قوى ، والنهارده كان قاعد يقول ان
هوه ما لوش حد غيرك ، وكلمنى في موضوع وكنيت عايزه استشيرك
فيه ، حاكم انا مقدرش اعمل حاجه الا لما آخذ رأيك يا سيدى .. أصل
عقلك بعجبنى أوى .

عبد الصبور : إيه هوا الموضوع ده ؟ .

سنية : أصل زينهم قاللى ..

عبد الصبور : (مقاطعا) قال لك ايه ؟ .

سنية : قال لى إنه كان عايز ..

عبد الصبور : (مقاطعا في دهش) عايز ايه ما تنطقى ؟ .

سنية : أنا أصل مكسوفه أوى يا سيدى .

عبد الصبور : أنا مانا عارفه ما وراءهش غير الكسوف والسفاله وقلة الحيا .

سنية : أبدا يا سيدى المره دى ما قالش حاجه فيها سفاله ولا قلة حيا .. دا قاللى
انه عايز يتجوزنى على سنة الله ورسوله .

عبد الصبور : (متفضضا من الغضب) يتجوزك !! ؟؟ الهفيه .. ابن الهفيه ..

الضايع ابن الضايع ، والله عال يا سى زينهم ، بقيت بنى آدم وعايز

تتجوز ، والنبي لا قطع دابرك وابطلك تحيب السرده دى .. تتجوز ..

ياخى جاك جنازه حره .. يا مقطوع ، يا لمام السبارس . يا عرة

العرر .. ما بقاش الا سى زينهم كان الى يجيب سيرة الجواز فى البيت

ده .. أهو ده اللي كان ناقص .. لكن معلش أنا برضك استاهل الى

خليته يشم نفسه ، ويفتكر نفسه راجل . لو كنت خلتيه زى ما كان
داير بشرشين الجزر وعودين الملائه وعرقين الحلبه الخضرا .. ما كانش
اتفرعن وقال اتجوز .

سنية : يوه يا سيدى هدى نفسك هدى .. ما تعكرش دمك كده .. دا
عشره زى زينهم فى ضفر رجلك .. خدلك تنشيقه وصل على
النبي .

عبد الصبور : (يتاول تنشيقه ويعطس) سى زينهم عايز يتجوز .. الاقرع
التزهي عايز يتجوز ؟ ياخي ينسم .. وانتى قلتى له إيه ؟ .. ما
تفتيش فى وشه ؟ ما رقتش صرمتين على نافوخه ؟ ما بلفتش
القسم ؟

سنية : يوه يا سيدى .. ليه بس دا كله .. هوا كفر . أنا قلت له سيبنى لما
افكر ، وقلت لنفسى يا بت استشيرى سيدك عبد الصبور ،
راجل صاحب شوره وكله عقل .

عبد الصبور : هى دى عايزه شوره ؟ هوا الجواز ده عايز شوره ، هوا فيه حاجه
جايه المصايب والمتاعب الخلق أجمعين غير الجواز .. صحيح
النبي قال « تناكحوا تناسلوا ، فإني مباه بكم الأمم يوم القيامة »
ولكن مش عشان سى زينهم يتجوز والا الوحش والا زكيه
الملدنه ، هم دول يتباهى بيهم ؟

سنية : ليه كده يا سيدى .. ناقصين رجل والا ناقصين عين ! ما كل
الخلق كده وحشين زينا . ما فيش حد احسن من حد .

عبد الصبور : أبدا إحنا أوحش كثير من بقية الخلق .. يعنى لو بقية الخلق فيهم
خمسه فى المايه وحاشه ، احنا كده بالقليل خالص ، عندنا خمسه
وتسعين وحاشه .. ثم نفرض ان احنا وحشين زى بقية الخلق ، ليه
نتكاثر ونتناسل ونعمل عقلنا بعقل بقية الخلق .. ليه تزود الدنيا
بلاوى .. كل المصايب جايه من الجواز .

(أم رثية)

سنية : يا سيدى دا نص الدين .

عبد الصبور : نص أنتهى دين ؟ الدين الى نسيناه ؟ الدين الى مش موجود ؟ . يعنى نص المفيش .. يعنى مفيش .. اسمعى يا سنيه .. انت زى بنتى ، ولازم ارسىكى .. انت زى كل النسوان قللات العقل ، انتم معذورين لأن ربنا خلقكم كده من غير عقل ، لأن مفيش حاجه بتعملوها عايزه عقل ، اسمعى نصيحتى .. أنا راجل عندى عقل ، شوقى .. أنا حا شرح لك حالتك قبل الجواز وبعد الجواز حا جيبها لك على بلاطه .. انت دلوقت بنت شايفه كيفك ، فرحانه بروحك ، خفيفه لطيفه ، شمه نفسك ، راسك لفوق ، صدرك لقدام ، بطنك لجوه ، مفيش عليكى حمل ولا عبء ، بعد الجواز حا تبقى إيه ؟ . نفسك الى كنت شماه حا ينقطع ، حا تبقى وليه غليانه كحياه ، صدرك لتحت ، بطنك لقدام . شايله فيها أول حمل ثقيل بارك على نفسك ، وهادد حيلك ، وميل خالك .. وبعدين تخلفى .. يعنى تشيل الحمل الى فى بطنك تحطيه على كتفك .. وصدرك الى كان لفوق ، حا يبقى زى الكتفيه تلفيه على صباعك ، وبعدين تفضلى كده ما لكيش شغله غير تحببى حمل تحطيه فى بطنك وبعدين تنقل الحمل من بطنك تحطيه على كتفك ، لا نوم تشوقى ، ولا راحه تدوق . النهارده الولد عى .. النهارده عطس .. النهارده كح . النهارده يبسن . النهارده سهل . النهارده حصبه . النهارده سعال ديكى . يا لطيف ، يا لطيف .. وبعد دا كله ، جوزك الى كان يبجرى وراكى ، ويبدوب فى دباديب رجلىكى ، يبقى طهقان منك وزهقان من خلقتك وتبقى أى واحده من الشارع أجمل منك فى عينه الفارغه الى ما يملهاش غير التراب . آدى يا ستى الجواز . آدى الهباب ، الى بتجرى وراه كل واحده ، مبسوطه منه ؟ .

سنية : لكن يا سيدى دا واجب لازم نأديه ، إذا كان كل واحد حا يتهرب

منه .. الدنيا تعمر ازاي .. والولاد ييجوا منين ؟

عبد الصبور : يا ستي عنهم ما جم . ما فيش داعي ييجوا أبدا .

سنية : ولما نموت احنا والدنيا تخلص ؟

عبد الصبور : يا ستي تخلص .. معنى فيها إيه غير العذاب .. هوا احنا مش حاسين

بالعذاب اللي فيها ، هوا مش احنا اللي قايلين (تعب كلها الحياه) ..

هوا مش احنا اللي قايلين ان (هذا جناه أبى على) .. ليه نحني على

أولادنا اذا كنا عارفين ان مجايهم في الدنيا جنايه ؟

سنية : لكن معنى قصدك كده . الدنيا تخلص ولا يقاش فيها ناس ؟

عبد الصبور : أيوه .. ما يقاش فيها ناس .. ويبقى هوا يشوف له تصرفه فيها .

سنية : هو مين ده ؟

عبد الصبور : ربنا .. اللي نظمها وخلقنا فيها ، خلانا عرضه لعذابها ، وعذاب

الآخره .. ما فيش داعي يسيننا فيها حيرانين ، لاحنا عارفين جينا منين

ولا رايحين فين ، وورانا الخير والشر ، وقال اختاروا بين الاتنين ..

نختار ازاي واحنا نفوسنا كلها سفاله وقلوبنا كلها شر ؟

سنية : أستغفر الله العظيم .. من كل ذنب عظيم .. انت جبرالك ايه يا

سيدى .. انت ما كنتش كده أبدا ؟ انت طول عمرك مؤمن وموحد

بالله !

عبد الصبور : هوا انا قلت مش مؤمن . أنا بس حيران قلقان . فيه حاجات كتيره

عايز أعرفها ومش عارفها . أنا مش فاهم ؟

سنية : مش فاهم إيه ؟

عبد الصبور : مش فاهم الحاجات اللي انت ما بنحاوليش تفهمها .. وعشان كده

انت مستريح ومبسوطه ، أصل الحاجات دي مش عايزه فهم ، دي

عايزه جهل ، أو تجاهل ، عايزه الواحد ياخذها كده عميانى .. يؤمن

بها بقلبه مش بذهنه .

سنية : والله ما انا فاهمه حاجه م اللي بتقوله ؟

عبد الصبور : أحسن ، أحسن كثير ، على العموم سيك م الكلام ده كله ، المهم عندي انك ما تتجوزيش ، وخصوصا زينهم الكلب ، الخسيس الخبيث ، السافل المنحط ، بوز الإلخس .

(يدخل زينهم مصفقا بيديه طربا من باب حجرة الجلوس منشدًا) .

زينهم : ياتلتميت مرجبه وسلامات ياخلي ، ياللى تكيد العوازل وانت داخلي .

عبد الصبور : يا باى ، يا لطيف . برضك داخلي عريان ؟ .

زينهم : لا عريان ولا مكسى .. اللى مش عاجبه وشى يغمض ، الوش الورق الست حطت فيه الملح ، ومع كل ، أنا حاقفل الباب اللى بينى وبينك . عدم المؤاخذه أصل فيه ضيوف جاين ، والست بتقول لك كفاياك بقى تقع رجلين .. دول لو كانوا حجر كانوا ياشوا .. قوم اتفضل قابل الضيوف .. (يغلِق الباب الزجاجى) .

عبد الصبور : (من وراء الباب) ما باقابلش ضيوف ، أنا مش فاضى للحاجات الأرضيه دى ، أنا مشغول فى حاجات أكبر ..

زينهم : الله يكون فى عونك .. الحقيقه مشغول قوى بتعب خالص من قروانة الميه السخنه ، وعلبة النشوق .

(يسمع طرق على الباب الخارجى وصوت سيد افندى من الخارج) .

سيد افندى : (يتنحنح) يا ساتر .

أم رتية : (من بعيد) يا واد يا زينهم ، شوف مين على الباب .

زينهم : (لنفسه) يعنى حا يكون مين غير عريس الهنا (بصوت عالى) اتفضل .

(يدخل سيد افندى متفخا وهو مستمر فى قوله يا ساتر) .

المشهد السابع

- زينهم : يا ساتر على إيه . خش يا سيد افندى خش .. دا البيت بيتك . أهلا وسهلا .. داحنا زارنا النبي (لنفسه) ماله كده نافش زى الديك الرومى .
- سيد : (يجلس) أمال سى عبد الصبور افندى فين ؟ .
- زينهم : (تسمع عطسة عالية من عبد الصبور) .
- زينهم : (مشيرا إلى اتجاه العطسة) أهو .. هوه بعينه سى عبد الصبور .. دى البشايير بتاعته .. أهلا وسهلا .. أشرقت الأنوار .. أجيب لحضرتك إيه .. قهوه مضبوط ؟ .
- سيد : لا .
- زينهم : سكر زيادة ؟
- سيد : لا .
- زينهم : سادة توزن دماغك ؟
- سيد : برضه لا .
- زينهم : كازوزه ؟
- سيد : لا .
- زينهم : كركديه .
- سيد : لا .
- زينهم : شاي . قرفة .. ينسون . كراويه . حلبة ؟ .
- سيد : لا . لا . لا . لا . لا .
- زينهم : أجيب لك لقمة بجينه ؟
- سيد : متفدى .
- زينهم : ما هو لازم اجيب لك حاجة .. لحسن الست ام رتييه تدبحنى .

- سيد : إذا كان ولا بد .. هاتلى . (ويشير بإصبعه السبابة والإبهام إشارة إلى كوب) .
- زينهم : لا . لا . لا . داسى عبد الصبور بخرب بيتى . دا ما يطقش الحاجات دى أبدا ، دا عمره ما دخل البيت نقطة ويسكى .
- سيد : ويسكى إيه يا بنى آدم .
- زينهم : شمانيا .. فرموت .. نبيت .. زيبب .. آمال يعنى قصدك إيه بـ (ويشير بيده نفس الإشارة) .
- سيد : شوية مية دقه .. بس حاميه خالص .. لحسن كلت فى الغدا شوية مفتقه عامله حرقان على قلبى وعازب أضيعة .
- زينهم : عازب تضيع الحرقان بمية الدقه .
- سيد : أيوه .
- زينهم : الحرقان يضيع بمية الدقه ؟ حقه بطلواده واسمعه .
- سيد : أيوه يا أخى .. أنا كده ، خلقتى كده ، معدنى كده . الحرقان ما يضيعش عندى إلا بمية الدقه .. على طريقة المصل الواقى .. أو على طريقة وداوها بالتى كانت هى الداء .
- زينهم : حاضر .. عينى الاتنين ، وعازب مية الدقه كده ساده والا جنبها حنتين خيار .. حنتين جزر ؟
- سيد : لا . لا . كفايه قوى الميه ، أنا معدنى مليانه خالص .
- زينهم : وفيها ميه . تهضم بالخيار واللفت .
- سيد : ما فيش لزوم .
- (تسمع عطسة من الداخل)
- زينهم : فاضل كان عطسه ، وييل علينا .. عن إذنك .
- (يسمع صوت أم رتيه تنادى على زينهم ، فيخرج لها ... وينهض سيد أفندى لمشاهدة الصور ويقف أمام صورة صبي وصية) .
- سيد : (لنفسه) يا سلام .. هى بعينها . النص التانى ، نص اللفتة ، نص

الخياره ، لازم دلوقت استوت ، وبقيت حاجه طعمه .. حاجه
تساكل .. يا سلام عليكى باست ام رتيه ، وعلى وقفك الخلوه .. يس
الورده اللى فى إيدك ما كانش لها لزوم . لو كان بدالها حزمة جرجير . أو
فجل . حاجه كده تفتح النفس مش كانت بقت أفكه ؟ .
(زينهم يعود وعليه سيماء الاهتمام والعجالة) .

- زينهم : سيد افندى . سيد افندى . فيه حاجه مهمه خالص .
سيد : حاجه إيه ؟ .
زينهم : حاجه مهمه خالص .. حاجه خطيره . حاجه يتوقف عليها
مستقبلك .
سيد : مستقبلى أنا ؟ .
زينهم : أيوه مستقبلك انت وهى .
سيد : هى مين ؟
زينهم : الست ام رتيه .
سيد : آه .. مستقبلنا المشترك .. مستقبلنا الجميل ... مستقبلنا المتظر ،
مش تقول كده يا غيبى عشان افهم .
زينهم : معلش ، عدم المؤاخذه .. ما كنتش عارف انك واقع بالشكل ده .
سيد : إيه هى الحاجه المهمه دى . قول . انطق !
زينهم : الست عاوزة تطمن .
سيد : على إيه ؟ .
زينهم : على اسمك . اسم الله عليك . اسم النبی حارسك .
سيد : ماله اسمى .. عايزه تطمن عليه ليه .. هوا كان وقع اتكسر ، والا قالوا
لك اتشرح منه حرف ، ولا انصاب بشبهه ، والا همزه .. ماله
اسمى ! .
زينهم : طب بس وطى صوتك لحسن سى عبد الصبور يسمعك .. الست ام
رتيه كانت وصت الست والدتك خالتي ام سيد .. انها تقول لك

عشان تغير اسمك .. أصل سى عيد الصبور ده دماغه ترللى . وبعض ساعات له تلاكيك على حاجات فارغه ، فهى خافت لا ما يعجبوش اسم السيد بنجر .. يقوم يتلكك عليه ، والحكاية كلها تبوظ من تحت راس حاجه لا راحت ولا جت . حقيقى السيد بنجر بينى وبينك — اسم مش حاجه . لكن فيها إيه يعنى . ياما فيه أسامى أبوخ من كده ، فقالت من باب الاستحراص تغير اسمك عشان ما نديلوش فرصه يحرن فيها ، ويقول كانى ومانى . وهى باعتاقى دلوقت عايزه تظمن غيرت الاسم والا لا ؟.

سيد : وهو انا اقدر أخالفها فى طلب ؟. أنا ارفض لها حاجه ؟ آل اسم آل . ميت إسم فى ضميرها . ست رتيب الحلوه .

زينهم : يعنى غيرته ؟.

سيد : طبعا ودى عايزه كلام .. امبارح ما كانش لى شغله غير كده ، طول اليوم فى المحكمه الشرعيه . لعمل الترتيبات اللازمه .

زينهم : الحمد لله . الله يطمئنك .. لا والله شهم وذوهمه ، أهو كده الخطاب والا بلاش .. عن إذنك بقى اما اروح اظمن الست .. لحسن دى قلقاته أوى .

سيد : روح طمعنا خليها تحط فى بطنها بطيخه صيفى .. قول لها ان السيد

بنجر ، اللى قعد طول عمر السيد بنجر ، وبقاله خمس واربعين سنه .. الناس يقولوا له سيد بنجر خلاص ما بقاش سيد بنجر .

زينهم : امال بقى إيه ؟.

سيد : بقى .. على بنجر .

زينهم : (صائحا فى دهشة) على .. إيه ؟. ١١٩.

سيد : على بنجر .. فيها إيه .. مالك بتصرخ كده زى ما تكون قرصتك حيه ؟.

زينهم : على بنجر ١١٩.

- سيد : أيوه .. كنت سيد بنجر .. وبقيت على بنجر .. فيها إيه ؟
عجيبه !!؟
- زينهم : لا .. ولا حاجة !
- سيد : أمال مالك كده بتخلق فيه ؟
- زينهم : وانا مالي يا عم حا بخلق فيك وتخلق في .. أنا اروح اقول لصاحبة الشأن .. وذنبا على جنبها .. لو وقعت من طولها والا صابها حاجة انا مش مسؤول !
- سيد : وقعت من طولها والا صابها حاجة ؟ إيه الكلام اللي زى السم ده ..
عشان إيه دا كله ؟ قلنا سيد وحش ، كخه .. كان على مش حا
يعجب .. أمال يعنى كنت اخليه إيه ! زنوبه ! زنوبه بنجر ! كان
يعجب كده ؟
- زينهم : يا أستاذ مش مسألة محمد ولا سيد ولا زنوبه ولا خدوجه .
- سيد : أمال مسألة إيه ؟
- زينهم : مسألة بنجر .. بنجر .. يا سى على بنجر .
- سيد : بنجر ؟
- زينهم : أيوه بنجر !!
- سيد : ماله بنجر ! فيه أحلى ولا أغلى ولا أطعم من البنجر .. أنا اغير بنجر ..
ليه ! مجنون ؟ حد فى الدنيا يقى اسمه بنجر ويغيره .. إنت عارف طبق
البنجر يقف بكام ؟
- زينهم : إيه يعنى .. مش بالكثير قوى بقرش ابيض ؟
- سيد : اخرص .. دا البنجر المغشوش .. دا اللقت المصبوغ الى يبيعه على
لانه بنجر — لكن البنجر الأصلى ..
- زينهم : (مقاطعا) يا أستاذ احنا مالنا ومال البجر الأصلى والبنجر
المغشوش .. إحنا عايزين عريس .. مش سلطنة طرشى .. البنجر
يمكن له قيمة وسط الطرشى .. لكن وسط البنى آدمين .. حاجة تبقى

- ما لهاش معنى .
- سيد : يعنى إيه .. ما نيش فاهم .. يعنى كنت عايزين اغير اسمى ، بدل سيد بنجر ، يبقى سيد جزر ، سيد لفت ، سيد جرجير ، سيد قشطه ؟ .
- زينهم : وهوا يعنى الدنيا ضاقت بالأسامى . اشمعنى فصيلة الخلل دى اللى انت ماسك فيها ، أصل ما فيش لزوم أبداً يبقى بنى آدم اسمه على أسماء أصناف الخلل ، دى حاجه ودى حاجه .
- سيد : أمال يعنى فيه لزوم علشان بنى آدم يبقى اسمه خشبه ، والاحمام . والا الجمل ، والا ظاظا ، والا الفار . كل دى يعنى حاجات لها لزوم ، والا لها علاقة بالبنى آدمين ؟ على الأقل البنجر حاجه لها قيمه فى عالم الحلو ، وعالم الحادق . انت ما تعرفش ان البنجر يبقى ..
- زينهم : (مقاطعها) يبقى والا ما ييقاش .. انا مالى .. ذنك على جنبك .. خليك بنجر بنجر .. ابقى قول لسى عبد الصبور ان اسمك بنجر .
- سيد : يعنى يعمل فيه إيه ؟ .
- زينهم : ولا حاجه . بالقليل خالص . حايثف فى وشك .
- سيد : إيه الكلام البارده .. اللى يسم البدن .. هوه ماله إذا كان اسمى بنجر والا عفريت أزرق ؟!
- زينهم : آدينى قلت لك بقى . خليك على كيفك . الظاهر ان دماغك ناشفه قوى .
- سيد : على العموم احنا فيها .. خلاص إذا كان مش عايز بنجر ، مش ضرورى بنجر ، مادام ما لوش فى الطيب نصيب . حانعمل له إيه .. خلىنا كده سيد حاف .. والا سيد على .. والا سيد قشطه .. والا سيد أى حاجه .. كده كويس ؟
- زينهم : تعجبنى .. أهو كده بقيت راجل عاقل .. بناقص البنجر ده .. اللى تغلبه العبه .. بس فيه حاجه تانيه عايز اوصيك عليها .. علشان الشغلان ما تبوظش وتطلع فشوش .. الراجل سى عبد الصبور زى ما

قلت لك، بنغزه .. فخذته على هواه ، وطاوعه أوى .. إوعى تقول
حاجه كده والا كده .. تلبشه وتقور دمه .

سيد : يعنى إيه حاجه كده والا كده ؟ مانيش فاهم ؟

زينهم : يعنى مثلا هوه ما يحبش الكرنب المحشى .. فمتجيش سيرته قدامه ..
واذا جت سيرته اعمل انك ما تقدرش تدوقه على لسانك .

سيد : لكن انا بحب الكرنب المحشى خالص .

زينهم : يا أخى معلش .. استحمل .. ابقى حبه بره لكن قدامه اعمل انك ما
تحبوش .

سيد : بسيطه .. حاجه مش صعب .. وإيه كان سى عبد الصبور ما يحبوش ؟

زينهم : ترمای نمره ٥ .

سيد : ترمای نمره ٥ ؟ إيه المناسبه ؟ يكره الكرنب المحشى معقول ، كل

واحد وكيفه ، أنا مثلا ما حبش السباغ ولا احبش الثقليه على
البصاره ، لكن ترمای نمره ٥ ده .. إيه العلاقة بينه وبين سى عبد
الصبور ؟ يحبه ليه ويكرهه ليه ؟ هوا داقه ؟ قطم حته من السلم مثلا
لقاها متفله . والا داق السنجه لقاها دلعه ؟ .

زينهم : سلم إيه اللى لقاها متفل ، وسنجه ايه اللى لقاها دلعه ، فيه حد ياكل
ترمای ؟

سيد : يمكن ، ما هو سى عبد الصبور بتاعك ده ما يستبعدش عليه حاجه
أبدا .

زينهم : لا مش للدرجه دى .

سيد : أمال إيه المناسبه ، انه يكره ترمای نمره ٥ بالذات ؟

زينهم : ما فيش استلطاف .. العلاقة بينهم وبين بعض سيئه ، أصل سيدى عبد

الصبور دايمًا يحب يركب الترمای من غير مؤاخذه ، سفلقه ، طول
عمره بارع ، فى التزويغ من الكمساريه ، يفضل سنين وايام ، يتنقل
من ترمای ١٠ ل ٢٢ ل ٣ ، ما فيش حد يقول له انت فىن ، هوا يحط

- رجله في ثمره ٥ والكمسارى والمفتش يكبوا على أنفاسه ، عشان
كده ما يحبش حد يجيب سيرة الترمای ثمره ٥ أبدا .
- سيد : لا معذور ، وإيه كان ما يحبوش سى عبد الصبور ، فيه حاجه تانيه العلاقة
بينه وبينها متوتره أو مقطوعه ، غير الكرنب المحشى وترماى ثمره ٥ ؟
- زينهم : راس العبد .
- سيد : برضك بينها وبين سيدك عدم استلطاف ؟
- زينهم : لا ، دى بقى عداوه مستحکمه ، حرب دايمة ، خصومه مخيفه .
- سيد : وعشان إيه ؟ ، وبمناسبة إيه ؟ ، يعادى سى عبد الصبور افندى راس
العبد ، ويعمل عقله بعقلها ؟
- زينهم : الحقيقة ، فى الحكايه دى ، هوه مش غلطيان ، هى السبب .
- سيد : ازاي بقى يا سى زينهم ؟
- زينهم : هى دايما المعتديه ، كل ما يكون رايح كده ، والا جاى كده .. تروح
مترحلقة من على الأرض وواقعه على نافوخه .
- سيد : طيب يا أنخى ما يعمل معاها معاهدة عدم اعتداء .
- زينهم : عمل .
- سيد : والنتيجه ؟
- زينهم : زى كل معاهدة عدم اعتداء ، بعد المعاهده على طول راحت واقعه على
نافوخه مسيحه دمه .
- سيد : يستاهل .. فين هى راس العبد دى عشان ابوسها من هنا ومن هنا ..
- دى مش راس عبد ، دى راس منصر . اللى قدرنت تعمل فى سى عبد
الصبور كده ، وفيه إيه كان ما يحبوش سى عبد الصبور غير الكرنب
المحشى وترماى ثمره ٥ ورأس العبد ؟
- زينهم : العدس اللى من غير جبه .
- سيد : وابو جبه ؟
- زينهم : يجبه .

- سيد : وإيه كان خصوم سيدك عبد الصبور . قلهم مره واحده وخلصنا .
- زينهم : زكيه الملدنه ، وسنيه القرعه ، وابو على الاحول والكسبه ، والزيت الحار ، وابو قردان ، والسملك البكلاه وبراغيت الست ، وعبد الحليم القرد ، والكرات ابو شوشه والسجق الى من غير فلفل .
- سيد : وأبو فلفل ؟
- زينهم : يموت فيه ، والكسبريه ، وحشيش الأراتب .
- سيد : وغير الأراتب ؟
- زينهم : يتعاطاه أحيانا ، والمنجه ، والفيل ابو زلومه ، واللبان الدكر ، والحلاوه السمسيميه .
- سيد : ديهده .. ديهده .. دا ماله عامل زى الحكومه المصريه .. مخاصم طوب الأرض .
- زينهم : والرز ابو شعريه . وسكارش بتاع الجاز ، وقسم السيده .. و ...
- سيد : (مقاطعا) طيب .. بس ، وانا حا جيب دماغ متين احفض كل الخصوم دول .. أنا أحسن طريقه اقعد ساكت ما فتحش بقى لا بطيب ولا بردى .
- زينهم : ما ينفعش .
- سيد : ليه بقى ؟
- زينهم : ينام منك .
- سيد : ينام منى ازاي ؟
- زينهم : أيوه ينام منك .. لو سييته شويه كده من غير كلام .. تلاقيه فقر ونام ، ولو نام منك يا حظ ، لازم تفضل متسمر قى مطرحك .. لا حس ولا حرکه .. لحسن تقلقه .
- سيد : أفضل قاعد كده قدامه ؟
- زينهم : لغاية ما يصحى من نفسه .
- سيد : ودى مصيبة إيه الى طبلت على دماغى .

- زينهم : اهو على آد ما تقدر ما تجييش سيرة الحاجات الى قلتها لك .
- سيد : على العموم .. بسيطه . ما فتكرش ان حا يبقى فيه أى مناسبه لها .
- يعنى مش شايف ان الواحد حا ينزق لها قوى .
- زينهم : وفيه حاجه ثانيه .
- سيد : حاجة إيه كان ؟
- زينهم : شكلك ، وقيافتك .. ورينى كسمك .. اعدل الكرافته شويه ..
- والطربوش ميله لقدام شويه .. أصل هوا دقيق قوى فى حكاية الملابس
- دى ، دايمًا يحب القيافه والجفله .
- (تسمع عطسة من داخل حجرة النوم فيقفز زينهم من محله ويفتح الباب الزجاجى ويدخل عبد الصبور وقد شمر الجلباب ووضع ذيله فى عبه وشمر أرجل السروال ولبس القبقاب ذو الجلاجل والطرطور وحمل فى يده كتابا ضخما وفى الأخرى علبة النشوق ووراءه سنيه تحمل القروانه بالماء الساخن) .

المشهد الثامن

- سيد : الحقيقة باين عليه يحب القيافه قوى .
- عبد الصبور : (يصرخ فى زينهم) يا لطيف يا مغيث .. برضه واقف بوشك عريان .. اخرج بره يا خسيس .. دم لما يلطفك .. دم لما يلحس بك قعره .. عايز التجوز .. آدى الى انت فالخ فيه .. تتجوز بوشك العكر ده . تودى نفسك من ربنا فىن ؟ .. يا حيوان يا حلوف (يخرج زينهم ويبدو كأن القول موجه إلى سيد افندى فيزداد خجله وارتباكاه) آل يتجوز آل . ياخى جاك جنازه .. جاك مصيبه .. جاك وكسه . جاك نيله حزم .
- سيد : (لنفسه) لا .. دى مش حاله دى .

عبد الصبور : آل جواز آل .. هي الدنيا ناقصه مصايب (يلتفت إلى سيد) . وانت إليه ؟

سنيه : دا الضيف يا سيدى . جارنا سى السيد افندى بنجر .
سيد : ما بنجرش ولا حاجه .. بنجر ما فيش .. خلاص راح ، عليه العوض .

عبد الصبور : (باشمئزاز) بنجر .. انت بنجر .. اسمك بنجر ؟ بنسى آدم اسمه بنجر ؟ أمال البنجر الحقيقى يسموه ايه !! على ؟ والخيار يسموه محمد ؟

سيد : قلنا مش بنجر .. انا مش بنجر .. يا سيدنا أنا سيد ، سيد بس ، سيد حاف ، متبرى من البنجر .

عبد الصبور : وتبرى منه ليه .. بينك وبينه إيه ؟
سيد : علاقات مش ولا بد ، من نوع العلاقات اللى بينك وبين الكرب المحشى والترماي نمره ه ، ورأس العبد ، ما فيش استلطاف أبدا كده لله فى الله .

(يجلس عبد الصبور وتضع سنية القروانة أمامه ويضع قدميه فى الماء وتأخذ سنيه فى تدليكهما) .

عبد الصبور : اقعد يا سى سيد افندى . يا عدو البنجر . اقعد . اتفضل (يمد يده بعلة الشوق) تاخذ تنشيقه ؟

سيد : متشكر ما بتعاطهوش ؟

عبد الصبور : علشان إيه ما بتعاطهوش ؟

سيد : والله ما جربتوش .

عبد الصبور : وليه ما بتجربوش . يخس عليك إيه ! مش ممكن تلاقيه كويس وتقعده نادى على العمر اللى ضيعته دا كله من غير نشوق ؟

سيد : والله ما افتكرشى .

عبد الصبور : (بغضب) يعنى إيه ما تفتكرش ؟ انت باين عليك مقايح !

سيد : (يستدرك نادما) أبدا أبدا ، أنا بس مناخيري تعبانه شويه .
عبد الصبور : أهو دا اللي يسلكها لك ويفوقك ويحلي راسك . أهو دا الحاجة الوحيد
الى تعدلك . كان لازم انت تقول لى هات تنشيته ، انت مش صغير
عشان اوريك مصلحة نفسك ، وأنا مش ولى أمرك . انت راجل
كبير .

سيد : ما فيش لزوم للزعل .. أنا غلطان ، هات تنشيته يا موى عبد الصبور ..
هات .

عبد الصبور : (ينظر إلى العلبة فاحصا ويقلب شفته السفلى) مفيش ، متأسف .
الى فاضل يدوبك تنشتين ليه . طلبك متأخر . ما لكش فى الطيب
نصيب .

سيد : معلش . معلش . حصل خير . (بصوت منخفض) ربنا ستر .
عبد الصبور : (يعيد النظر فى العلبة) والا اقول لك .. تقدر تاخذ لك تنشيته ..
بس صغيره ، ما تكترش .. خدى ياسنيه ودى له العلبة .
(سيد افندى يتاول العلبة خائفا ويأخذ تنشيقه فتصيه نوبة عطس
مرعجة)

عبد الصبور : عضمك طرى . لسه بدرى عليك ، دى حاجه غايزه تمرين . مش
كل واحد يقدر عليها .

المشهد التاسع

(يدخل زينهم وهو مرتديا الوجه وحاملا بين يديه صينية عليها
كوبتين بهما مشروب أحمر اللون ويتقدم إلى سيد افندى) .
سيد : (مندهشا ومدعورا) إيه ده بسم الله الرحمن الرحيم ! إنت إنس والا
جن ؟
زينهم : لا إنس ولا جن .. أنا زينهم .. اتفضل اشرب .

سيد : (مستغرقا في الضحك) زينهم ، ومالك عامل كده ليه في نفسك ؟ يا سلام يا زينهم .. دا انت بقيت زينهم حقيقى ، أهو كده الجمال .

زينهم : اشرب يا سيد افندى . اشرب بلاش نقوره .
(يشرب سيد افندى الكوب مستمتعا مستطعما ويمس شففيه في لذة) .

سيد : يا سلام . حاجه حلوه . بديعه .
(يتقدم زينهم بالكوب الآخر إلى عبد الصبور فيأخذه ويوفعه إلى فمه ولا يكاد يتناول منه رشفة حتى يقفز من مكانه ملسوعا وهو يتأوه وينفخ) .

عبد الصبور : إيه ده ؟ دى مية نار !!؟

زينهم : .. مية دقه .

عبد الصبور : مية إيه ؟

زينهم : دقه .

عبد الصبور : دقه ؟

زينهم : أبوه مية دقه . عمرك ما سمعت على مية الدقه .

عبد الصبور : وآيه اللي يخليك تقدم مية الدقه للضيوف . يا خلوف ؛ يا ابن الخلوف .. اتجنتت !

زينهم : اتجنتت ليه ، وانا مالى . أنا عبد مأمور .. يقولوا لي هات مية دقه ، اجيب مية دقه .. هات سم هارى اجيب سم هارى ، وانا مالى .

عبد الصبور : سم لما يهرى جوفك . انا لازم اشوف قصدك إيه . انا لازم اكشف نواياك الإجرامية . انا لازم اوديك في داهيه . مين الحيوان اللي أمرك تحرق جوفنا بمية الدقه ؟

زينهم : الحيوان اللي يتسأل عنه قاعد جنبك لرق . هوا سيد افندى .. هوا الضيف بتاعك .

عبد الصبور : هوا اللي طلب منك مية الدقه (إلى سيد) انت اللي طلبت مية (أم رتية)

الدقه .. يا اخينا ؟

سيد : أيوه انا ، أصل كان فيه حرقان على قلبي ، وخلاص راح ، والحمد لله .. الحقيقة نوع ممتاز .. نوع لا كسترا .

عبد الصبور : إيه هوا اللي ممتاز ! وإيه هوا اللي اكسترا ! النار الآيده دى .. فيها ممتاز وفيها لا كسترا ؟ . إيه . هوا انت من زباين جهنم والا من صبيان إبليس . وإذا كنت انت عندك حرقان بتعطفيه بمية النار دى . أنا ذنبى إيه ! اسمع وحياة والدك يا سى سيد افندى ، اذا كنت ناوى تيجى هنا تانى ، وناوى تحس بحرقان على قلبك ، ابقى اشرب مية اللهايب دى بره . مفهوم ؟

سيد : على العموم الحرقان دا ما بيعيلش كثير .

عبد الصبور : كثير والا قليل ، المهم تضيعه قبل ما تيجى . فاهم ؟

سيد : حاضر ، من عنيه يا سى عبد الصبور ولا يكون عندك فكر من نواحي مية الدقه ، مع إنيك لو اخدت عليها مش حاتسلاها أبدا ، زى النشوق تمام ، تروق المخ وتسلك الزور .

عبد الصبور : إيه دا يا أخى الكلام الفارغ ده . حد يقول مية الدقه زى النشوق ، دى دقه ودى دقه .

سيد : أيوه برضك معاك حق .. إيش جاب دى لدى ، أنا غلطان خالص ، غلطان قوى .

عبد الصبور : معلش حصل خير ، انت شرفتنا يا سى ..

سيد : (مقاطعا) سيد ، محسوبك سيد .

عبد الصبور : سيد إيه ؟

سيد : الى يعجبك ، الى ييجى على مزاجك ، أنا سايبها مفتوحه .

عبد الصبور : يعنى إيه . ما نيش فاهم ، السيد والدك ما لوش إسم ؟

سيد : أبدا . نزل كده ، من غير إسم . ما رضوش يسموه ، لغاية ما تسميه

انت الإسم اللي يريحك !!

عبد الصبور : انا اسمی أبوك ؟ وهوه انا فاضی عشان بسلامته أبوك يقعد لی خمسين سنه من غير لاسم .. وييجی دلوقت عشان اسميه .. انا فاضی للهيافات دی ؟ . انا ورايا حاجات كثيره أهم من كده .

سيد : علی العموم .. ما تتعیش نفسك ، دی حاجه مش مستعجله .. انا كفايه علی سيد بس .. سيد حاف ، أهي حاجه مأمونه وما منهاش ضرر .. والی خلاه يقعد خمسين سنه من غير لاسم . يقعد ...

عبد الصبور : (مقاطعها) طيب .. طيب .. فطينا بقى من حكاية لاسمك دی .. لنت شرفتنا .

سيد : الله يشرف مقدارك .

عبد الصبور : فيه حاجه اقدر اعمالها لك ؟ عايز مشوره في علم الروح ؟ عايز تحضر . جلسه .. عايز ...

سيد : (مقاطعها) لا . لا . أبدا .. كتر ألف خيرك . انا مش عايز حاجه من دی أبدا .. انا كنت عايز . اقول . اقول . أصلى كنت عايز اقول ...

عبد الصبور : تقول ايه ؟ اتفضل . وقول وخلصنى يا سى سيد وحياء أبوك الی ما يتسماشى .

سيد : انا أصلى كنت عايز اقول ، انا طول عمرى . عايش كده عازب . ووحداى ..

عبد الصبور : (مقاطعها في حدة) خير ما عملت ، عين العقل . ربنا يديمها عليك نعمه .

سيد : لكن انا شايف العمر ينفوت والحياه بتتقضى والشيب ملا راس الواحد ، والعجز دب في مفاصله .

عبد الصبور : شىء لا بد منه وبكره كان تشيب أكثر وتعجز أكثر ، الزمن بيدوب الحجر مش عايز يدوب البنى آدم ، لازم تشيب ، ولازم تعجز . هي دی حاجه غريبه !

سيد : لا مش غريبه ، بس الغريبه ان الواحد كده يخرج من الدنيا ، صفر

اليديين .

عبد الصبور : وهو فيه واحد يا أخي ما يبيخر حش منها صفر اليديين ، الدنيا عاملة زى البلد الموبوء ، وباب الآخرة زى باب الحجر الصحي . لازم يجردوك فيه من كل حاجه ، لازم تخرج من الدنيا زى ما دخلت فيها ، صفر اليديين والرجلين والراس والعينين ، ما تتاش شاييل معاك غير ذنوبك ، دى الحاجه الوحيدده اللى ما تقدرش تسيبها .

سيد : مفهوم ، مفهوم ، يا سى عبد الصبور .. لكن الواحد برضه ، لازم يكمل نص دينه .

عبد الصبور : نص دين إيه يا خويه اللى طالعين لى فيه ، هو نص الدين ما يكملشى الا بالجواز ؟ دا لو كان عندك نص دين ، الجواز حا يطيره . الجواز اللى انتوا فاكرين انه يكمل نص دين يضيع دين بحاله .. دا يكفر بلد ، إنتم ايه ! مغفلين ، مهافيف ، ملاحيس ؟ ومع كلا ، أنا مالى أنا ومال نص دينك ، تكمله ما تكملوش ، أنا ما ليش دعوه ، دى حاجات متخصصينش .

سيد : لا ، من جهة الاختصاص ، ما فيش حد مختص غيرك ، إنت لوحدك جهة الاختصاص المسئولة عن تكملة دينى .

عبد الصبور : يعنى إيه .. ما نيش فاهم ؟

سيد : يعنى نص دينى موجود عندك هنا . معاك .. إنت المتحكم فيه ، إنت الأمر الناهى فيه ، أرجوك رده لى ، رد لى نص دينى ، ينوبك ثواب فى .

عبد الصبور : إنت إيه يا جدع انت ؟ انت مجنون ؟ اختصاصى إيه ؟ ودين إيه ؟ إحنا هنا مش مشيخة الأزهر .. أرجوك قول لى قصدك إيه ؟

سيد : قصدى اتجوز .

عبد الصبور : يا مغيث يا لطيف . أنا اصطبحت بوش مين النهارده ؟ كل ما أقابل حد يقول لى عاوز اتجوز ، ما فيش غير زينهم الكلب ، هوا صبحنى

بوشه ، الى زى القطران ، اسمع يا سى سيد افندى . انا عايز اعرف ،
إذا كان انت بعد طول العمر الى ضيعته فى هنا وراحه اتخبطت فى
راسك وعايز تتجوز ، تقدر تقولى لى انا ذنبى ليه تعكن مزاجى
وتضيع وقتى فى المسألة البايخه دى !! إنت عايز تتجوز ، وانا مالى ؟

سيد : أصلى عايز اتجوز . اتجوز ...

عبد الصبور : (فى حدة) تتجوز ليه .. انطق ؟ فلقتنى ؟

سيد : عايز اتجوز أم رتييه .

عبد الصبور : بتقول ليه ؟ أم ليه ؟ إنت لازم مجنون . أنا نظرتى ما تخيش أبدا . من
ساعة ما شفتك وشفت عينيك المبحلقه وراسك المبططه ووشك
الناویشى قلت الراجل ده مجنون .

سيد : ليه بس يا سى عبد الصبور ؟ مجنون ليه ؟ عشان جى اخطب الست
المصونة أختك . عشان جاى اتشرف يقربك . هما برضه الناس
يعملوا فى جيرانهم كده ! النبى دا وصا على سابع جار .

عبد الصبور : النبى حريوصى زى ما هو عايز .. على سابع جار .. على تامن جار ..
إن شا الله على عاشر جار . لكن انا ما احبش الكلام فى موضوع الجواز
ده أبدا ، خلاص ، انتبهنا .

سيد : طيب بس حلمك على . خد ودى معايا شويه . اسمع كلامى كله يمكن
تقتنع .

عبد الصبور : ولزومه ليه ! وعشان ليه ؟ إنت تبقى مين علشان اضيع وقتى الثمين
معاك فى كلام مالوش فايده ؟

سيد : أبوه .. كده تعجبني .. قلت لى تبقى مين .. أنا محسوبك سيد ..
باشخبر فنى معمل شبرا .

عبد الصبور : باش ليه ؟

سيد : باشخبر .. يعنى كبير الخبراء .

عبد الصبور : طيب يا أخى مش تفهمنى كده من الصبح . أنا فاهم انك راجل ، على

أذك . فاهم أنك حمار .. من ضمن الخمر الى ماليا اليلد ، ما عنديش
أقل فكره عن أنك راجل خبير ، فنى ، بتفهم . يا سلام .. ليه
تسينى كده على عماى يا سى سيد يا باشخير . وحضرتك درست
فين ؟ اكتسبت الخبرة الفنيه بتاعتك دى منين ؟ من أنهى جامعه ؟

سيد : أنا ما درستش فى جامعات ، خبرتى موهبه إلهيه من عند ربنا .

عبد الصبور : ما شاء الله ، ما شاء الله . يعنى خبير بالقطره ، يعنى عبقرى !

سيد : بالظبط .

عبد الصبور : يا سلام ، أنا من زمان وأنا عايز اشوف واحد عبقرى ، أصل انا كان
عبقرى ، ودايما العبقرى يحب العبقرى .

سيد : مطبوط ، مطبوط .

عبد الصبور : وحضرتك خبير فنى فى إيه ؟

سيد : خبير فى الذوق .

عبد الصبور : فنى فى إيه ؟

سيد : فى الذوق (ويخرج لسانه) عندى لسان ، ما بخطيش اهدا ، ما ينزلش
الأرض .

عبد الصبور : وهوا فيه لسان ينزل الأرض يا سى سيد يا باشخير ، غير لسان
الكلاب ، لكن أنا برضه ما نيش فاهم . حضرتك خبير باللسان ؟

سيد : مطبوط ، أدوق باللسان وحكمى لا يعلى عليه .

عبد الصبور : وحضرتك بتدوق إيه ؟ إيه المواد الرفيعه اللى بتحتاج لذوقك الحكيم ؟
سيد : كل الأصناف .

عبد الصبور : ما نيش فاهم ، يعنى مثلا بتدوق الشرابات النايلون . بتدوق الخرسانه
المسلحه ؟

سيد : لا . لا . مختص بس فى صنف الحادق . صنف الخلل .

عبد الصبور : يعنى حضرتك باشخير فنى فى الطرشى ؟

سيد : تمام . مطبوط .

عبد الصبور : باشخير فنى فى الطرشى ؟ ياخى دم لما يلهفك .. باشخير طرشى ،
وجى تناسبنى ، ليه قالوا لك على وقع ، هفيه . قليل الأصل ..
خلاص ، هى ضاقت على الدنيا ، ما لقيتش غير انت اللى اناسبك ! ليه
اتجننت ، اتخبط فى عقلى ، أنا ادخل بيتى باشخير طرشى ، وانا ما
طيقش طعم الطرشى ، دنا لما بشوف دكان طرشى من بعيد بيغمى
على ، دا انا بينى وبين الطرشجيه تار بايت وعداوه متأصله .. أقوم
آجى على آخر الزمن ، أناسب باشخير طرشى ! أنا اللى محرم عليهم ما
يدخلوش فى البيت حته لفت أقوم ادخل برميل طرشى متحرك !

سيد : طيب بس حلمك شويه يا سى عبد الصبور .. ما تتحمقش كده ،
هدى نفسك وخلينا نتفاهم .

عبد الصبور : نتفاهم على إيه ! وهى دى حاجه عايزه تفاهم ! أنا والطرشى عدوان
لدودان ، يبقى نتفاهم على إيه ؟ المسألة مالهاش الا حل واحد .

سيد : (بلهفة) إيه هوه ! الحقنى بيه .

عبد الصبور : إنك تقلب .

سيد : أقلب ؟

عبد الصبور : أيوه تقلب .

سيد : أقلب ازاي مانيش فاهم ؟

عبد الصبور : زى الناس .. يعنى بدل ما انت باشخير فنى طرشى .. تبقى باشخير
فنى ، حلاوه طحينيه مثلا .. أو باشخير فنى غزل البنات ، أو
باشخير فنى براغيت الست أو باشخير فنى حلاوة زمان .

سيد : حلاوة زمان ؟

عبد الصبور : أيوه حلاوة زمان ، ماتاش عارفها !! الحلاوه اللى يلفوها على حته
خشبه طويله فى آخرها كوز زى الشخصيشخة والراجل يشد فيها
وعيط ، ويعمل لك حصان وعروسه زى ما انت عايز .. ؟

سيد : أنا ابقى باشخير فنى حلاوة زمان ؟

عبد الصبور : فيها إيه ! . يعنى مش احسن ما تبقى باشخبير فنى فلفل .. أقل ما فيها
تبقى خبير فى حاجه حلوه .. ما تحرقشى .. ما تشويش .. مش خبير
هاليب .

سيد : لكن دى ...

عبد الصبور : (مقاطعا) ما لكنش ولا حاجه ، انا بحب غزل البنات ، وبراغيت
الست ، والحلاوة الطحينيه ، حلاوة زمان ..

سيد : أنا ما قولتش حاجه حب اللى تحبه بس انا ما قدرش بعد خمسة واربعين
سنه خبره فى الطرشى ، اقلب فى آخر الزمان ، وابقى خبير حلاوة
زمان ، والا حتى حلاوة دلوقت . دى حاجه ما تعقلش ، دى تمام زى
ما تقول للفسخانى اللى طول عمره فسخانى .. تعالى بيع رواج
عطريه ، يموت منك ، الريحه اللى انت فاكرها كويسه تأثر على
نخاشيشه إالى واحده على ريحة الفسيخ تموته . والا مثلا زى لما تاخذ
الفحام ، إالى قاعد طول عمره زى حته الهبابه ، وتقول له امنتغل فى
حمام ، يدوب منك ، يوش فى الميه زى قص الملح ، الوساخه اللى على
جنته اللى هنى حلت محل اللحم تنزل ويسيح وما يقاش فيه حاجه .

عبد الصبور : فحام ، حمامى ، فسخانى ، دا كله ما يهمنيش كلمه واحده ما فيش
غيرها ، انا ما احبش صنف الطرشى أبدا ، حلاوه معلش ، عندك
جميع أصناف الحلويات ، كلها مقبول ، أنا ما بدقش إن شا الله تبقى
خبير فى المصااصه ، كله ينفع .

سيد : يا سى عبد الصبور الله لا يسبيك .

عبد الصبور : (فى حدة) خلاص انتينا .

سيد : (ثائرا) هوالميه اصله ده ! دا استبداد ، دا ظلم . دا تحكم !

عبد الصبور : تحكم مش تحكم ، أنا قلت كلمتى خلاص ما فيش غيرها .

سيد : ده حرام . اتقى الله يا شيخ . داربنا ما يرضاش بكده أبدا .

عبد الصبور : إذا كان ما يرضاش ، خليه يجوزها لك أمى قدامه ، لكن انا مش حا

جوزها لك أبدا .

سيد : ده جبر .. دى قسوه .. دا انت ربنا مش حا يورك نصفه .

عبد الصبور : مش مهم ، النصفه اللى عنده .. ابقى خدها انت .

سيد : روح يا شيخ ، ربنا يرزقك بحلة كرنب محشى .

عبد الصبور : (فى فزع) آى .. اخرج بره .

سيد : والا بفتش نمره ه يكبس على أنفاسك .

عبد الصبور : الحقونى يا هوه .

سيد : والا براس عبد تطب على نفوخك .

عبد الصبور : جاى يا عالم .

سيد : (مستهرا) زكيه الملدنه ، سنيه القرعه ، أبو على الاحول ، كسبه

زيت حار ، أبو قردان ، سمك بكلاه . . .

عبد الصبور : جاى . جاى . الحقونى .. ابعدوا المجرم ده .. اخرج بره يا مجرم

(يتشنج ويغمى عليه) .

(سيد يهرول هاربا إلى الخارج . تدخل أم رتيه والخدم وراءها) .

أم رتيه : فيه إيه ! جرائيه كفا الله الشر ؟

سيد : (وهو يهرول إلى الخارج) آل باشخير حلاوه طحينيه آل .. دا انا

حتى ابقى قليل الأصل ، بعد العمر اللى قضيته مع الطرشى .. أنضم فى

الآخر .. لمعسكر الأعداء . دى تبقى خيانة ، دى تبقى نداله .. آل

إيه باشخير مصاصه ، أصلها هزلت .. حد الله بينى وبينكم .

(أم رتيه منهكة فى تفويق عبد الصبور ، وزينهم يهجم عليه بكوب

ماء ويضربه فى وجهه) .

عبد الصبور : المجرم . ابعدوه . باشخير الطرشى المولع . إوعوا تدخلوه بيتى . آل

كرنب محشى ، وراس عبد ، السافل المجرم .

سنية : سلامتك يا سيدى ألف سلامه ، روق دمك ما عاش اللى يزعلك .

زينهم : شفت .. عشان ما تبقاش تعايب على وشى .. اللى ما يرضى بالخوخ

يرضى بشرابه ، اهو جالك الى جابلك الكافيه (يفادر الحجره) .

المشهد العاشر

أم رتيبة : إيه يا خويا ! جرى إيه بسن فهمنى ؟ . إيه بس الى لهلها كده ؟

عبد الصبور : باشخبير الطرشى ، الدون ، المنحط . ما يعتبش بيتى أبدا .

أم رتيبة : بس اهدى يا خويا ، وقول لى إيه الى جرى ؟

عبد الصبور : آل عايز يتجوزك آل !

أم رتيبة : ودى فيها حاجه تزعل ، دى حاجه نشرح حاجه تبسط .

عبد الصبور : دا باشخبير طرشى ؟

أم رتيبة : وفيها إيه !

عبد الصبور : طرشى حراق ؟

أم رتيبة : حراق والامش حراق ، هوه قال لك تعال دوق بدالى ؟

عبد الصبور : خلاص ، أنا قلت كلمه واحده .. أنا ما حبش لا الطرشى ولا ريحة

الطرشى ولا سيرة الطرشى قلت كلمه واحده وانتهينا .

أم رتيبة : يا ميله بختك يا ام رتيبه (تنهه) .

سنية : معلش يا ست . ما تزعليش يا ست .

عبد الصبور : بس خلاص ، بلاش عياط . اقعدى قدامى هنا . لما اقول لك على

المهمه الكبرى . أنا حاسس ان وقتها جه . اقعدى قدامى ، وفتحى

ودانك كويس ، أنا نازل على الإلهام ، والوحى يقوللى عشان استعد

من دلوقت وافهمك كل حاجه .

أم رتيبة : يا خويا سيبنى فى حالى . كفايه ميله البخت الى انت جايهاالى ، مهمه

كبرى إيه ؟ وسخام إيه ؟ وهباب إيه ؟ .

عبد الصبور : اقعدى يعنى اقعدى ، دا مش وقت أخذ وعطا .. الوقت ضيق ..

اقعدى وفتحى ودانك .. واسمعى كويس الكلام الى حا قولهاولك

ده .

(تجلس أم رتيه أمامه وهي تنهد يائسة) .

أم رتيه : يارب .. توب على بقى م الغلب ده .

سنية : (تجلس على الأرض) معلش يا ست . استحملى يا ست .

عبد الصبور : خدى بالك كويس م اللى حا قولك ، فتحى ودانك خالص

وحضرى ذهنك ، ما تخلش بتشت لاهنا ولا هنا .. أنا عارف انك

غيه ، لكن حاولى انك تفهمى ..

أم رتيه : يا خويا قول ، علتنى .

عبد الصبور : بقى انا عايز اعقد اتفاق بينى وبينك .

أم رتيه : اتفاق ؟

عبد الصبور : أيوه .. اتفاق .

أم رتيه : بينى أنا ، وبينك انت ؟

عبد الصبور : أيوه ، اتفاق بينى أنا وبينك انتى ، حاجه غريبه ؟

أم رتيه : أبدا . هوا فيه حاجه منك غريبه ، بس إيه المناسبه ، تعمل اتفاق بينى

وبينك .. ليه ! وعلى إيه ؟

عبد الصبور : أيوه . قلتى لى ليه ، وعلى إيه ! بقى يا ام رتيه يا تننى أنا حاسس ان

الأجل قريب .

سنية : بعد الشر يا سيدى .

أم رتيه : بقى اسمع يا عبد الصبور يا خويا ، إذا كنت بتقعدين عشان تقول لى

الكلام الفارغ ده . أنا مش فاضيا لك انت بقالك عشر سنين وانت

تقول انك حاسس ان أجلك قرب واديك قاعد زى فرد قطع ، لا بيك

ولا عليك .

عبد الصبور : لا ، المره دى حاسس انه قرب قوى .

أم رتيه : قرب والا ما قربش ، اللى انت عايزه ايه ؟

عبد الصبور : عايز تعمل اتفاق مع بعض ان اللى يموت قبل الثانى ينزل يقول له شاف

إليه فوق .

أم رتيبة : هو إليه أصله التخريف ده ؟

عبد الصبور : معلش ، واحده ، واحده ، أنا عارف انتك غيبه ، ولازم افهمك حته ، حته ، بقى يا ام رتيبه يا اختى .. الواحد منا لما يموت .. روحه بتطلع فى السما وجتة بتفضل فى الأرض تعفن وتاكل وتدوب . يعنى لما انت تموتى مش حا يفضل منك غير روحك .

أم رتيبة : يا باى على كلامك اللى زى الضرب .

عبد الصبور : فروحك . وبقية الأرواح بتطلع فى السما وتبقى عايشه فى عالم كبير خالص أكبر من العالم اللى احنا عايشين فيه ده وتبقى مقسمه لدرجات ، واحنا دلوقت بنقدر نستدعى بعض الأرواح ، وتكلم معاها ، إما بطريقة الكتابه والإشاره ، أو بالصوت ، يعنى الروح تحتل جسم بنى آدم اسمه الوسيط .. أو فى الأحيان النادره تتجسد الروح ، فأنا عايز اللى يموت منا قبل الثانى ، يبقى يتجسد وينزل ويتفاهم معاها ويديله المعلومات اللى يعرفها عن عالم الأرواح .

أم رتيبة : اسمع ياخويه يا عبد الصبور ، بلاش الكلام ده انت ليهشت جتنى ، أنا لا اقدر لا انزل ولا اطلع عافينى ياخويه م الاتفاق ده .. أنا لما اموت حاستكن فى تربتى لا حاهوب لا هنا ولا هنا . كل اللى انا عايزاه انكم تبقوا تزرعوا على تربتى صباره ولبلايه .. حاكم انا احب اللبلاب .

عبد الصبور : لبلايه إيه وبتاع إيه . إيه الكلام الفارغ اللى انتى بتقوليه ده .. إانت مش حاتبقى فى التربه . إانتى حاتبقى هايمه فى السما ولازم تنزلى .

أم رتيبة : ما نزلش ولا روحش ولا جى . بلا قلبه دماغ ، هو انت ورايا فى الحيا وفى الموت .

عبد الصبور : عنك ما جيتى ، انت اصلك راسك ناشفة . على العموم انا متأكد ان أنا اللى حاموت قبلك . لأن حاسس ان أجلى قرب خالص ، يعنى يمكن أموت الليلة دى .

سنية : يوه يا سيدى .. تف من بقلك سبع تفات .

عبد الصبور : لا سبع تفات ولا تمانيه . الواحد لما قضاه بيسجى ، ما ينفع فى رده حاجه .. على العموم أنا مش زعلان ان انا حاموت لأن دى مسألة مفروغ منها .. لانا أول اللى حا يموتوا ولا آخر اللى حا يموتوا .. الحياة قنطره ، أو نفق ، والزمن دا زى القطر الاكسبريس . الروح تركب فيه شويه لغاية ما تعدى من ناحيه للناحيه التانيه ، عمر الاكسبريس ما كسكس ولا هدى ولا وقف . يعنى واصلين للنهاية عزنا والا ما عزناش . كل حاجه فى الدنيا تتخلص ، اشجعنا احنا اللى مش عايزين نخلص . أنا حاموت ومش زعلان اللى انا حاموت ، انا مش خايف من الموت ، لكن اللى انا خايف منه ، ان انا اروح كده هدر ، زى كل الحمير اللى ما توا قبل .. أنا عايز استغل موقى ، عايز اعمل حاجه ما عملهاش حد قبل .. عايز ارجع تانى ، عايز اموت وارجع ، أروح وآجى .

أم رتبية : (تضرب يدها على صدرها) يا مصيبتى !

عبد الصبور : مالك كده .. بتضرى على صدرك ، زى الخبايل . خضيتنى . يا مصيبتك ليه ؟ عشان حاموت ؟

أم رتبية : لا .. عشان حاترجع . موتك حقيقى مصيبه . لكن رجوعك مصيبه أكثر . عايز تموت ويرجع عفريتك ينط لنا كل شوية ، يا لطيف . يا لطيف . ودى مين تستحمل الغلب ده .. اللى ماحنا طايقينك وانت بنى آدم .. نطيقك وانت عفريت ؟ .

عبد الصبور : برضه الوليه بتقول عفريت ، افهمى يا غ راکب . يا نجم . أنا مش حارجع عفريت . انا حارجع زى ما انا كده . حارجع روح مجسده ، زى ما انت شايفانى تمام ، بس أكون بقى عرفت كل حاجه ، أكون كشفت الستار وهتكت الحجاب ، ونورت العتمة اللى بتخبي العالم الواسع .. أكون لفيت فى السما شوية ، واطلعت على المستخسى ، وعرفت الأسرار المخفيه ، وعرفت تركيب السموات ووضع الكون ،

وجليت سر الموت ، والروح .. كل ده الى حار فيه الفلاسفه
والعلماء . بشوية لف في السما ، حا عرفه ، وبعدين خارج لكوا ،
واكشف لكوا المستخبي ، وشرح لكلوا المستر .

أم رتية : يعنى حا تعرف مثلا .. انا حا تجوز إمتى ؟
عبد الصبور : انتى جنسك إيه ؟ مخلوقه من إيه ؟ أقول لك أسرار الكون ، والعالم
الجهول .. تقولى حا تجوز إمتى ؟ يا بيجحه يا ام عين فارغه ؟ . إيش
يكون جوازك ، في المهمات الكبرى الى حا تكون ورايا .. إانتى
فاكرانى حاشتغل في السما خاطبه ؟ . إانت فاكرانى حاكون فاضى
للكلام الفارغ بتاعك ده ؟ ثم انت مالك ملهوفه على الجواز كده ؟ ..
أنا قلت لك انك مش حا تتجوزى يعنى مش حا تتجوزى لا وانا حى
ولا وانا ميت .. مبسوطه .

أم رتية : يا باى على ملافظك الى تسد النفس .. طيب عرفنا وانت حى مش حا
تجوز ، طيب ولما تموت .. يبقى شأنك إيه بقى في جوازى ؟ هوا انا
حافضل مربوطه لك كده حى وميت ؟ حافضل متسنسله فيك ؟ .
حقه دى مصيبه وطبلت على دماغى .

عبد الصبور : الى حاصل . قسمتك كده ، بحتك كده . المهم خلينا في الى احنا
فيه ، بلاش السقاسف دى ، خلينا في الحاجه المهمة ، بقى انا قلت لك
ان انا لما اموت حاضرب بلطه في السما وابرم فيها برمتين ، وارجع .

أم رتية : ترجع ازاي بس ياخويا ؟

عبد الصبور : أيوه .. كده عجبتينى ، قولتلى حا ترجع ازاي ، بقى احنا دلوقت
بنقدر نستدعى الروح الى احنا عايزينها وبتفاهم معنا وتقول لنا على
الى احنا عايزينه يا إما بواسطة الإشاره .. أو بواسطة الصوت ، عن
طريق وسيط شاطر ، فأنا دلوقت حاطلع وانا مصمم على الرجوع .
بس عايز وسيط اتفاهم معاه على الرجوع ، وسيط يكون بين أرواحنا
تجاذب وتفاهم ، وما افتكرش فيه تفاهم وتجاذب بين روحى وروح
تانيه أكثر من روحك ، حقيقى روحك غيبه وحماره ، وروحى زكيه

وراسيه وعاقله .. لكن دا ما يمنعش التجاذب والتوافق اللى بينهم ..
 لأننى أقرب الناس وأحبهم لى ، رغم السخافة اللى أنت فيها ، واحنا
 الاثنين بقالنا خمسة وأربعين سنة مافارقناش بعض ، وعمر روحي ما
 تظمن وتهدى الا لروحك ، وعشان كده حا خليكى الوسيط .. اللى
 حانزل بواسطته ..

أم رتيبة : (تتهدى بيأس) ولا انا فاهمه حاجه ؟ وسيط إيه وتوافق إيه ؟ وكلام
 فارغ إيه ؟

عبد الصبور : عارف .. عارف انك مش حا تفهمى حاجه أبدا .. لكن اصبرى على
 لغاية ما فهمك كل اللى انا عايزه منك . أنا مش حا طلب منك حاجه
 اكتر من طاقتك . إنت حا يكون دورك بسيط خالص ، وانا حا يكون
 على كل الحمل .. اللى انا عايزه منك .. انك تستعدى لاستقبالى فى
 يوم معين .. فى ساعة معينة ، ويكون اليوم دا يوم الاربعين فى نص
 الليل مثلا .

أم رتيبة : (تهمز رأسها أسفا) قصدك تقول انك حا تموت وترجع فى يوم
 الاربعين .. يعنى حا ترجع تاخذ بخاطرنا ؟

عبد الصبور : لا .. بس الفكرة انكم تدوفى وقت عشان الف شوية فوق ، أنا مش
 عايز ابقى مكروش ، وأظن اربعين يوم مش كثير علشان جوله فى
 السما .. يمكن احب اروح هنا والا اروح هنا ، حد من الأهل
 يعرفنى .. يعمل حفلة تكريم بمناسبة صعودى للسما .. برضه الواحد
 لازم يعمل حسابه على المشاوير اللى زى دى .

أم رتيبة : (فى سخرية) أيوه برضك لازم تعمل حسابك .

عبد الصبور : المهم ان احنا نتفق مع بعض من دلوقت . عايزك تستنى ليلة الاربعين

الساعة ١٢ بالليل ، ونهيق الجو الملائم لاستقبالى .. يعنى تقعدى
 لوحدة فى أودنى فى صمت وسكون .. لا حس ولا حركة ، وعايز
 كل حاجه فى الأوده تبقى زى ما هى .. كل حاجاتى تبقى حاضره ،

الطرطور بتاعى والعبايه وعلبة النشوق ، والطشت والابريق والميه
السخنه ، والكتب اللي على الرف ، وما تنسيش القبقاب أبو جناجل .

أم رتيبة : حاضر من عيني الاتنين .. مش خلاص بقى ؟ أقوم اشوف شغلى ؟
عبد الصبور : استنى شويه .. مستعجله على إيه ؟ بكره تقعدى لوحده لما
تشبعى .. فيه حاجه كان عايز اقولها لك .

أم رتيبة : إيه تانى ؟
عبد الصبور : انا عايز التلامذه بتوعى زى الشيخ جاد والأستاذ زكى والأستاذ

محبوب ، يكونوا موجودين عشان يشوفوا التجربه وينشروها على
العالم .. بس يقعدوا هنا ، وما يخشوش الأوده دى إلا لما انزل ..
عشان ما يشوشوش علينا . إانت لوحده بس اللي تستنى فى الأوده
بتاعتى . أنا أصلى ما عنديش فكره حانزل ازاي ، يمكن أنزل بجتنى
عريان مثلا ، تبقى عباره قدام الناس الغرب ، عشان كده بقول من
باب الاحتياط نحضرى لى غيار .. وانت قاعده مستتيانى . عايزك
تركزى ذهنك فى ما تخلص حاجه فى فكرك غيرى .

أم رتيبة : حاضر ، مش حاخلى فى فكرى غيرك .. سيبنى بقى .. اعتقنى لوجه
الله .

عبد الصبور : إخصص عليكى يا خاينه .. بعد العشرة الطويله ، اقول لك انا حاموت
الليله دى .. تقوللى سيبنى بقى اعتقنى لوجه الله !

أم رتيبة : ياخويا أصل انا شبعث من موتك ده .. بقى لك اتناشر سنه وانت
تقول انك حاتموت .

عبد الصبور : (فى تأثر) لا .. المره دى يظهر انه جد ، صحيح ، مش هزار .
أم رتيبة : (ييدو عليها الفزع) يانداهه إيه الكلام اللي انت بتقوله ده .. إانت
حانسس بحاجه . اجيب لك دكتور ؟ .

(تنهض وتضع يدها على جبينه)
عبد الصبور : ما فيش لزوم للدكتور ، عمر الدكتور ما يمنع الموت .. الا لما يكون

المريض من نفسه ، مش ناوى يموت . لكن انا قلت لكم خلاص ، أنا ناوى اموت .. أنا دلوقت حاقوم ادخل فى السرير وارخى الثاموسيه ، واذا كنتم تحبوا تقروا الفاتحه على روحى ، ما فيش مانع . يمكن تفيد .
(ينهض ويتجه إلى السرير) .

سنية : (تنهه) يا عني عليك يا سيدى ، بعد الشر عنك يا سيدى ، ما كان بدري عليك يا سيدى .

(يدخل زينهم منزعجا) .

زينهم : فيه إيه ؟ جرا إيه ؟ فيه إيه يا بت يا سنيه ؟ كفا الله الشر ؟ .

سنية : سيدى عبد الصبور حا يموت .

زينهم : يموت ؟ ها أو ، أنا كان أموت فى المهليه .

(سنيه مستمرة فى البكاء) .

أم رتية : بس يا بت بلاش كهن وبدع .. إيه المسخره دى ؟ . دا بقاله ..

اربعتاشر سنه ناوى يموت .. ما ييموتش .. دا عمر الشقى بقى .

(يصعد عبد الصبور إلى السرير) .

(تقف ام رتية وزينهم بجوار السرير .. ويحدقان بأنظارهما إلى عبد

الصبور) .

سنية : (وهى تبكى) ما كانش يومك يا سيدى .. والله حاتوحشنا يا

سيدى ! .

عبد الصبور : نشوف وشكم بخير ، حدش لازمه حاجه من فوق ، حدش له حبيب

عايز يبلغ له السلام .

(يشير بيديه تحية الوداع ويرخى الثاموسية) .

يسدل الستار

(أم رتية)

الفصل الثالث

المنظر : نفس منظر الفصل الثاني بعد أربعين يوما ، الساعة تشير إلى الثانية عشرة إلا لث ، وحجرة الاستقبال رصت بها مقاعد خيزران ومنظرها غير مرتب بعد أن انفض المعزون في الأربعين ، الباب الزجاجي المفضى إلى حجرة نوم عبد الصبور مغلق ، يبدو زينهم وقد أمسك بمقشة يد وأخذ يكنس الحجرة ويجمع المقاعد الخيزران في أحد الأركان .

المشهد الأول

زينهم : والله عملتها وخلت يا سى عبد الصبور .. هوا انا كان داخل عقلى انك حاتموت حقيقى . أربعتاشر سنه على رأى ام رتيه وانت كل يوم بتقول انك حاسس ان أجلك قرب ، وتصبح زى الحصان . صاغ سليم . يعنى اشمعنى المره دى الى صدقت . اشمعنى المره دى الى حليت عنا لازم فيها سر ، لازم محضر لنا مكيده ، لازم مديبر لنا مقلب . إنت مش ممكن تسيينا كده بالساهل ، مش ممكن تحمل عنا كده الله فى الله .. ياما انا خايف لتكون ناوى ترجع حقيقى .. ما انت أصلك ما تستبعدش عليك حاجه أبدا ، أهو كده تيان طيب وعلى نيائك .. لكن فى الحقيقة قرم ابن قرم ، مين يعرف يمكن تعملها من دون الأموات ، وتقل عقلك وترجع لنا تانى ، وانت أصلك بنغزه ، وتعملها صحيح .. وتزوغ من عزرائيل زى الحريابه .. أنا بقالى خمس سنين معاشر ك . ما شفتلكش حاجه كده تفوت زى بقية الخلق حتى موتك ، هى دى موته دى . تفضل ملبشنا كده أربعين يوم ، وكابس على

أنفاسنا ولا كأنك مت .. كنا عايزين نشم نفسنا .. كنا عايزين نحس أنك مت حقيقى .

(تدخل سنية وقد ارتدت ملابس سوداء) .

سنية : ماتيا الله تشهل شويه يا زينهم .. إنت عمال تحسوك فى إيه ؟ .

زينهم : مش لما اوضب الأوده ، عشان اللى يتسمموا دول يرجعوا يقعدوا تانى .. أنا مش عارف لزومه إيه الأكل فى الميتم ؟

سنية : وأكل إيه ! هوا أكل بعقل ! دا انت لو شفت الشيخ جاد وهو هابش فى حته الفخذه اللى فوق الفته تقول دا عمره ما حضر ميتم أبدا ، والا الأستاذ محبوب وهو يلحس السمن اللى فى صوابعه ، وبابن عليه الفرحة كده ، زى اللى نفسه كل يوم يكون فى ميتم .

زينهم : الحق مش عليهم .. الحق على اللى سمهم ، ما كانش ضرورى نعمل لهم اللى عملناه ده .

سنية : آمال يعنى فكرك كده بيعزوا يعزوا مجاناً .. يقعدوا يسمموا القرآن كده لوجه الله ، على العموم . أهى رحمه ونور على روح المرحوم .

زينهم : مرحوم ؟ أنهى مرحوم ده ؟ هوا ده تنفع فيه رحمه والا نور . دا تلاقيه دلوقت مشاكل طوب السما . تلاقيه مخلص حد ما تخافش معاه . أنا متأكد انه وهوا طالع مع عزرائيل خلا عزرائيل ندم على أحده ، وانه لو رجع لنا زى ما بيقول مش حا يكون راجع بكيفه أبدا ، دا يكون راجع مطرود بناء على طلب الأرواح ، حا يكون راجع مضروب ثلاثين ألف برطوشه ومكسور وراه أربعين ألف قله . لكن لزومه إيه يرجع ؟ وهوا سابنا لما يرجع لنا .. بدمتك انتى حاسه انه مات ؟ .

سنية : أبدا والتبى يا خويا يا زينهم ، أنا متيأ لى انه فى كل ساعه قاعد قدامنا ، وكل ماجى أخش أودته ألاقية مدلدل رجليه فى الطشت زى عوايده ، وكل ما بص لطرطوريتيأ لى انه قاعد تحته .

زينهم : إنت برضه كده ؟ دا انا كنت فاكر انا لوحدى . أنا كل ما فكر .. يتيأ لى

انه هوا ما طلعلش لا سما ولا حاجه وانه قاعد تحت التاموسيه زى ما شفقناه
آخر مره ، وكل ما اسمع عطسه .. تنهياً لى انها بتاعته .

سنية : وستى ام رتيه . ألعن وألعن ، متلبشه ومرعوشه وعاملاله حساب زى ما
يكون حى .. أصل حكاية رجوعه تانى مغلهاها زى الفرخة الدايمه .. مش
مصدقها أبدا انه خلاص مات ، وانها حره تعمل اللي هي عايزاه . حاسه انه
زى ما يكون فى سفر وراجع ، وانه لسه بارك على أنفاسنا .

زينهم : على العموم .. كلها نص ساعه ، وننتهى .. والمسأله تفوت بالطول والا
بالعرض ، واذا كان ناوى ينزل حقيقى .. أهو ينزل له شويه من نفسه ويحل
عنا ما يورناش خلقتة بعد كده أبدا .. نص ساعه ، ونبقى أحرار .. نص
ساعه ونخلص منه خالص ، ونقطع دابره من هنا ، ونعمل زى ما احنا
عايزين .. انتى فاكركه يا سنيه الطلب اللي طلبته منك ؟ .

سنية : فاكركه يا خويا .. بس المرحوم .. خوفنى م الجواز قوى ..
زينهم : وهوء المرحوم كان وراه حاجه غير كده .. أنا عارفه كويس . نوع أنانى ما
يجبش الا نفسه . فضل مقعد اخته كده من غير جواز لغاية ما ضيع
عمرها .. عشان عارف انه ما يقدرش يعيش من غيرها .

سنية : طب وانا ؟ ماله ومالى ؟ .

زينهم : نفسه فيكى ومش طايلك .. نفسه يتجوز ومش قادر .. خايف وموهوم ،
وعشان كده ضيع عمره عازب .. وعايذ كل الناس تقعد زيه .

سنية : لا يا زينهم حرام عليك .. الراجل كان يقول انه صاحب مبدأ ..

زينهم : مبدأ .. سلامات يا مبدأ .. مبدأ إيه بقى يا ست سنيه .. دانتى على نيائك
قوى .

سنية : كان بيقولبنى آدم قدامه نعيمين ، نعيم الأرض ونعيم السما ، وانه هوا
حارم نفسه من نعيم الأرض عشان قصير وزايل ، ومستنى نعيم السما عشان
باقى ودائم .

زينهم : هاأو ، هاأو أو أو ، داقصر ديل يا ازعر . كلهم بيقولوا كده .. الواحد لما

ما يطولش النعمة ، يقول عليها زايله ، ويعزى نفسه بالسدايمه الى في السما .. خليه ييقى يقابلنى في السما . فيه حد يزهد في النعيم بكيفه ! ما يزهد في الخلق الا الى بلا ودان . ما فيش في الأرض زهد .. الا بالاكراه .. والزهد في النعمة كفر ، دا انا لما اديكى حته ملين وترفضيها اتكسف ، تيقى عيه في حقى . أنا البنى آدم الغليان ، إيش حال بقى ربنا ؟ يصح يدبنا حاجه ونقول لا !! يصح نكسف ربنا ؟ .

سنية : أستغفر الله العظيم .

زينهم : تستغفرى ليه ، هوا انا قلت كفر ؟ الكفر هوا الى قالوه لك الله يرحمه سى عبد الصبور . أنا لازم اتجوزك ، ربنا ادانى حته ملين . حته قشطه . أكسفه ! أقول لا أنا عايز من الى في السما .. دى تبقى لماضه .
(يفتح الباب الزجاجى وتبدو منه أم رتيه متشحة بالسواد ويبدو الفراش والمقعد والطرطور وعلبة النشوق ، وكل الاستعدادات لاستحضار روح عبد الصبور) .

أم رتيه : مش تخلصوا بقى وتخلوها ليله تفوت على خير الساعة قربت على اتناشر ، مش تقولوا للمزاغيف الى يتسम्मوا يجوا يقعدوا بقى .. مش كفاهيه أكل . هم إيه يياكلوا في آخر زادهم .. ما شافوش ميا تم قبل كده .. (ترفع رأسها إلى السما) يارب انهينا بقى .. خلصنا م الدوخه الى احنا فيها . الناس كلهم ييموت لهم أموات ويمزنوا عليهم ويخلصوا .. ما فيش حد موته عجب غيرنا احنا ، لازم سى عبد الصبور يروح وييجى .. أصله واخذ السكه قياسه . إلهى يعدلها له .

(يدخل سيد الفدى من باب الصالة وهو مصمم بشفته وبسلك أسنانه ويفاجأ بوجود أم رتيه فيترجع) .

المشهد الثاني

- سيد : يا ساتر .. عدم المؤاخذه .
- أم رتيبة : (يندو عليها الخجل وتحجب وجهها بطرف الطرحه) اتفضل يا خويا .. ما فيش حد غريب . اتفضل .
- سيد : (يتقدم ويصافحها وهو يتعثر من الكسوف) أهلا ، وسهلا .. أهلا وسهلا .
- أم رتيبة : (يخرج زيتهم وسنيه ويترك كان سيد افندى وأم رتيبة في الحجرة) .
- سيد : أهلا بك يا سى سيد ، والنبي يا خويا .. مش عارفه اودى جميلك فين .
- سيد : على إيه يا ست .. على إيه ؟
- أم رتيبة : على التعب اللى تعبته في جنازة المرحوم . هوا انت تعبت شويه ؟
- سيد : ذا الواجب يا ست .. احنا ما عملناش حاجة اكترم الواجب .
- أم رتيبة : أبدا والنبي يا سى سيد افندى .. ذا انت عملت أكثر واكثر .. انت أصلك طيب وابن حلال .. ربنا يقدرنى على رد جميلك .
- سيد : يا ستى ما فيش فرق .. إحنا برضك أهل .. أنا مش غريب .
- أم رتيبة : غريب ازاي يا سى سيد .. ذا الليت بيتك . هوا احنا فاضل لنا مين بعد سى عبد الصبور غيرك انت والست أم سيد .
- سيد : أنا تحت أمرك .. أنا خدامك .. أأمرى يا ست أم رتيبة .. أنا ماليش بركة الا انت .. هوه لو كان الله يرحمه حط عقله في راسه ، ووافق على المسألة اياها . مش كان بقى زيتنا في دقيقنا ، وكان هدى سرنا .
- أم رتيبة : ربنا يتمم بخير يا سى سيد .. ربنا ما يخيبش رجاء مؤمن .. احنا برضه مسيرنا لبعضنا .
- سيد : أيوه . برضه مسيرنا لبعضنا .. أنا مؤمن وربنا ما يخيبليش رجاء

أبدا .. إن شاء الله أحلامنا حاتتحقق وحا نتجوز وبسرعة أسرع مما
نتصور .

أم رتيبة : ازاي ؟ ..

سيد : زى الناس . هوا فيه مانع انا نتجوز دلوقت ؟ العقبه الى كانت
موجوده زالت . السد الى كان بيننا انشال .

أم رتيبة : ما نشالشي ولا حاجه .. دا السد حا ينزل تانى الساعة اتناشر .

سيد : انت برضك بتصدقى كلام الجماعه بتوع الأرواح دول . هوا برضه
معقول انه ينزل ! وينزل ليه ؟ وعلشان إيه ؟

أم رتيبة : قال علشان يكشف لنا السر .

سيد : سر ؟ سر بتاع إيه ؟

أم رتيبة : أنا عارفه يا خويا .. أهو قعد يقول لى كلام كثير ما فهمتش منه حاجه
أبدا .. غير انه حا ينزل تانى الساعة ١٢ ليلة الاربعين ، وان انا لازم
احضر كل حاجه واقعد لاستقباله فى أودته ما فيش حد معايه أبدا ..
علشان يقول لنا على الى شافه فوق .

سيد : وهوه كان حد طلب منه يقول ع الى شافه فوق .. حد كان سألته ؟
أما عجيبه على الجدة ده !

أم رتيبة : معلش يا سيد افندى .. فات الكثير ما بقاش الا القليل .

سيد : أنا مقدرش استنى .. أنا حاسس بفرحه عجيبه .. أنا حاخرج ادور
على مأذون .

أم رتيبة : يادى النايه يا سيد افندى ، الناس يقولوا إيه ؟ اتجوزت ليلة الاربعين
بتاع اخوها وهو لو نزل وشاف المأذون حا يغلى ليلتنا تفوت كده
بالساهر ؟ دا يغليها ليله زى الطين .

سيد : طيب معلش .. انا حاصبر علشان خاطرك .. حا قعد استنى اشوف
بسلامته حا يعمل إيه بنزوله ، حا يجيب الديب من ديله !

أم رتيبة : والنبي دنا حى خايفه من قعادك ساعة نزوله .. أصل الله يرحمه ما

كانش يطيقك أبدا . كان يقول عليك فيك شبه من الخريت .

سيد : الإيه ؟

أم رتية : الخريت .

سيد : والخريت ده يبقى ايه ؟

أم رتية : لازم حاجه شكلها وحش قوى .

سيد : انت شفتيه ؟

أم رتية : لا .. أبدا ، وانا مالى اشوفه .

سيد : هوا شافه ؟

أم رتية : ماظنيش .

سيد : أمال يعنى منين عرف ان انا شبه الخريت ؟

أم رتية : ما انا برضه سألته نفس السؤال فقال لى انه هو لما يحاول يتصور

الخريت ما فيش صورته تيجى فى دماغه غير صورتك .. وما دام كده

يبقى لازم يكون الخريت شبهك ، وما دام الخريت شبهك يبقى لازم

انت شبه الخريت .

سيد : ما شاء الله .. اما استتاج بديع ، معلهش .. الله يساعه ، كانت عليه

لسان زى العقربه ، وكان .. لكن على إيه . النبى قال اذكروا محاسن

موتاكم .. الله يرحمه مطرح ما راح .

(يسمع صوت الشيخ جاد من الخارج يصيح) .

الشيخ جاد : ماتيا لله بقى يا جماعه .. دى الساعه قربت على اتناشر .

محجوب : أيوه .. ياللا بينا .

أم رتية : طيب اسيبك انا بقى يا سى سيد .. لحسن الجماعه جاين .. أنا حا

حش اقعد استنا . ياما انا خايفه قوى ، كل ما الساعه بتقرب أحس ان

روحى سايحه وركبى ملخلخه .. أنا أصلى عمرى ما قابلت أرواح قبل

كده .

سيد : شدى حيلك ، ما تخافيش . انا قاعد لك بره ، لو كان ناوى على أزيه

ابقى از عقى على وانا اخش اكسر لك نافوخه .. أنا عارفه جنس بطلال
ما يجيش غير بضرب الصرم .
(تنصرف أم رتيبه وتغلق وراءها الباب الزجاجى ثم يدخل الشيخ
جاد وزكى ومحجوب تباعا من باب الصالة) .

المشهد الثالث

محجوب : (ينظر إلى ساعة الحائط) الساعة اتناشر الا عشرة . فاضل عشر
دقائق .
(يجلس كل منهم على مقعد وعيونهم متقلبة ما بين الساعة والباب
الزجاجى) .
زكى : لو كان صحيح الأستاذ عبد الصبور حا يقدر يوفى بوعدده وينزل ! .
يبقى معجزة قرنه !
محجوب : قرنه بس ! دا يبقى معجزة ميت قرن ، لو كان يقدر ينزل يحسمه زى ما
كان بيقول دائما فى الجلسات بتاعتنا ، ويقول لنا عمل إيه فى الاربعين
يوم ، وشاف إيه .. دا يبقى الحدث الأكبر من عهد آدم .
سيد : عبد الصبور يبقى معجزة قرنه ؟ يبقى حدث أكبر ؟ دالميه الكلام ده ؟
زكى : أمال .. هوا فيه حاجه محيره البنى آدم ، غير جهله باللى بعد الحياه ..
البنى آدم اللى طار فى السما .. البنى آدم اللى غاص فى البحر ، البنى آدم
اللى اتكلم فى لندن سمعوه فى القاهره ، واللى اتحرك فى أمريكا شافوه فى
طوكيو .. البنى آدم اللى نطق الجماد وحرك الحجر . البنى آدم اللى ما
عجزش عن شىء أبدا . البنى آدم اللى فهم كل حاجه وكشف كل
سر .. عجز عن أبسط الأشياء وأقربها له ، عجز عن فهم نفسه . جى
منين . ورايح فين ! أصله إيه ؟ وفصله إيه ؟ بيتولد ليه ؟ ويموت
ليه ؟ البنى آدم عرف كل حاجه فى الدنيا الا نفسه .

محجوب : مظلوط . فهم الشمس والكواكب .. فهم فيه إيه في باطن الأرض ، وفيه إيه ورا السماوات .. لكن ما فهمش فيه إيه في بطنه . والا فيه إيه ورا نفسه .

زكى : فهم كل حاجة .. ما عدا روحه .. روحه .. اللى هي كل حاجة عنده ما عرفش عنها حاجة أبدا ، بتطلع ازاي ؟ بتنزل ازاي ؟ بتعمل إيه ؟ بتروح فين ؟

سيد : حقيقى معاكم حق .. لكن لزومه إيه يعرف .. وحا يعمل إيه لما يعرف ؟ ما دام ما يملكش من أمر روحه حاجة .. ليه عايز يعرف عنها حاجة ؟ لا هوا اللى بيعجب روحه ولا هوا اللى بيطلعها ، يبقى ماله هوه وما لها . هوا كل اللى عليه انه يعيش ، إنه يمشى ، إنه يسب نفسه للى خلقه ، هوا اللى منزله ، وهوا اللى بياخده . ماله هوه ومال روحه ! عرف والا ما عرفش . لا حا يقدر يوقف طلوعها ولا يمنع نزولها . يا شيخ انت وهوه ريحوا نفسكم بلاش فلسفه فارغه . كان غيركم اشطر .

زكى : هوه حقيقى مش حا يقدر يوقف طلوعها ، لكن على الأقل يبقى عارف هي طالعه فين ، يبقى عنده فكره ... مش يفضل في حياته دايه تايه حيران ، كل اللى يعرفه عن روحه حاجات ما يقبلهاش عقله ، ويضطر يصدقها من غير تفكير ، لأنه لو فكر مش حا يصدق ، وهوه حاسس انه لازم يصدق في حاجة ، ولأزم يؤمن بحاجة ، ليه ما يقاش المصير واضح ومعروف ؟ ليه ما نعرفش انه لما حانوت حانبقى كدا ، وحا تنتهى كدا .. ما دام مصيرنا مقرر ومعروف .. ليه يستخبر علينا ؟ ليه يفضل في ضلاله وفي ظلام ؟

محجوب : ايوه حقيقى ليه العالم الواسع دا كله ، اللى بتفاوت عليه الأجيال ، ما يعرفوش معمول ليه وفائدتهم فيه ايه ؟ ليه يفضلوا يتخبطوا في عقائد مختلفة ، وأوهام متناقضة ، وأجيال تروح ، وأجيال تيجي ، ولا حد

عارف ده راح فین ولا ده جه منین ، والا لیه فایده وجوده فی العالم .
ولمصلحة مین العالم موجود ؟ . إذا كان الی عایشین فیه هم أشقی ما فیه
من ساعة ما يتولدوا وهم مهددين بالموت ، ولیه هوا الموت ما هماش
عارفین .. يقولوا لهم ده انتقال من حیاتهم الوحشه الفانیه لحیاه حلوه ،
حیاه دائمه ، حیاه خالده ، طیب امال جم للحیاه الفانیه الوحشه لیه ،
لما فیه حیاه حلوه ، وحیاه دائمه ، وحیاه خالده ؟ لزومه لیه التعب
والشقا فی الحیاه الفانیه دی ؟ الحیاه الی بیاكل فیها الکبیر الصغیر ، والی
عمره ما داق فیها الإنسان سلام ولا شاف هدوء ، ولا استريح باله ..
لیه قيمة الفتره القصیره الی یقضیها الإنسان فی الحیاه الأولى ، مغمور
فی الشقا والتعاسه والظلم ؟

زکی

: مین يعرف ؟ یمکن لو کان عرف الإنسان مصیره المجهول ، وتأكد ان
الفتره الی یقضیها فی الحیاه دی فتره مؤقتة ، وان له مصیر طویل آخر .
ما کانش طمع فی الدنیا وجرى ورا المتع وانکب علی الملذات ، وحب
یاخذ أكبر کمیه ممکنه منها قبل ما يموت ویضیع کل شیء من یدیه فی
الآخر .. لو کان حقیقی يعرف ان حیاته لسه لها بقیه طویل ، کان
صبر فی الحیاه دی واستحمل وکان کل الناس حبوا بعض وتقاسموا
اللقمه سوا ، بدل ما کل واحد یخطفها من بقى التانی یاأخی دا الواحد
منا لما یكون وراه عزومه ما بیرضاش یرمرم عشان نفسه ما تنسندش ..
لیه ؟ لأنه ضامن العزومه .. وکان لو کانت العزومه الموعود بیها فی
الآخر مش ممکن کان یرمرم فی الدنیا .. لکن المصیبه انه حاسس انه
مش ضامن حاجه .

سید

: آیوه تمام . لو کان الواحد ضامن ان الدنیا — زی ما قال سیدنا علی —
سفر ، والاخره غایه ، کان قضی السفره زی ما تكون .

زکی

: لکن هوا مش شایف الغایه أبدا ، هوا فاكر ان السفره هوا کل حاجه ،
شایف الغایه غامضه ومجهوله .. مش عارف هوا رايح فین ، وعشان

كده يقول يفوز بالسفره أحسن له ، وعصفور قدامه خير من عشره
مش شايفهم .. يقولوا له ان فى آخر السفره حا تلاقى كل الحاجات
احلوه الى انت بتشوفها فى المخطات وأحلى منها ، إذا كنت بتلاقى فى
المخطات جنبه وسطي ، حا تلاقى فى آخر السفره كفافه وقطاييف
وشهد ، ولبن ، لكن أهو كلام يقولوه له .. حد وصل لآخر السفره
وجه قال له ، أبدا .. ومع ده كله كان تلاقى واحد مثلاً ميعبش الكفافه
والقطاييف والشهد واللبن ، واحد نفسه حلوه بيعب الطعميه
السخنه ، والبنى آدم بيتغير والناس أذواق .. مش معقول انه حا يفضل
باستمرار كل أمانيه ، لبن وشهد وخمر ، وكل حاجه ولها أوان .. كان
زمان ركوب الحمير زينه .. لكن دلوقت بقى مهزأه .. عشان إيه ؟
عشان فيه جنب الحمير كاديلاك وبكار .

محجوب : وليه اللف دا كله يا أخى ، البنى آدم دلوقت بيلاقى فى المخطات الى انت
بتقول عليها حاجات أحسن من الى بيتوعدها بيها فى آخر السفره ،
دلوقت الناس ، الى يقولوا عليهم كفار ، ولا هاش مسلمين ، ولا
عايشين فى أرض الرسول ، عايشين عيشه أحسن من الى اتوعدوا بيها
المؤمنين والمسلمين الى دلوقت بيمرغوا فى التراب .. دلوقت كل
واحد منهم عنده فريجيدير فيه الشهد واللبن والخمر ، وكان فوقها
جاتوه ، ومرتدلا ، وبسطره ، وديك رومى ، وعنده تلفزيون
وعنده حاجات كثير قوى .. إخواننا المسلمين لسه ما عندهمش فكره
عنها ، وعمرهم ما ينتظروها حتى ولا فى آخر السفره .

الشيخ جاد : (وهو منكم فى تسليك أمانته) وحدوه يا جماعه .. إيه أصل
الكلام الى بتقولوه ده .. (ينادى زينهم الذى ظهر بجوار الباب)
شوف كده يا زينهم وحياة أبوك قشايه اسلك بها سنائى .. حته اللحمه
الى كلتها كانت متفله قوى . إيه أصل الكلام الى عمالين تكفروا بيه
ده .. أسرار إيه الى عايزين تكشفوها دى ! هوه كل من أنعم عليه ربنا

بمحنة غم ، خلاص صابه الغرور ، واستكبر على خالقه .. ذا فيه حاجة اسمها ربنا ، سيدى وسيدك ، وسيد الكون .. اللى منظمه ، واللى مساويه .. هوا العامل اللى فى المصنع ، مش يشتغل الحاجه اللى فى إيده ؟ ورئيس المصنع ، مش بيديره كله وهو قاعد فى الأوده القزاز الصغيره بتاعته ؟ يعنى لو كان كل عامل ساب اللى فى إيده ، وقال أنا عايز اعرف المصنع ده ماشى ازاي ، والحته اللى يعملها رايحه فين وحا يعمل بيها إيه ، والخامات دى بيعييوها منين ، وأصلها إيه ، كان مشى المصنع ؟ أبدا وحياتكم . كان خرب . بقى إذا كان الكلام ده صحيح فى المصنع اللى قد كده ، يبقى مش صحيح فى العالم الواسع ده . إذا كنا مستكترين على العامل إنه يتدخل فى شئون ريس المصنع اللى هو بنى آدم زيه ، يبقى ما نستكترش على المخلوق الضعيف انه يتدخل فى شئون ربنا .. إذا كان العامل بيخفى عليه سر المصنع ، يبقى ما يخفّاش على البنى آدم سر الكون ؟ يا جدع انت وهو عيب اختشى .

زينهم

: أيوه والله يا شيخ جاد ، يسلم بقك ، ذا العبد لله ضعه له حدود . أسرار إيه وبلاوى إيه اللى عايز يعرفها ؟ كفايه عليه يعرف ربنا كويس . كفايه عليه يؤمن بضميره ، وبقلبه .. ذا الواحد مهما اتقرعن ، وكفر ، ونسى ربنا ، لما بتصيبه مصيبه أو تجراله حاجه ، غصين عنه ، ومن غير ما يفكر ، يقول يارب ، يارب .
(يذهب زينهم ليحضر المقشه) .

الشيخ جاد : أصل البنى آدم ضعيف ومغرور ، وعقله مهما كبر برضك عاجز ، ولو ساب لعقله العاجز حايضلله ، عشان كده ربنا وضع الإيمان فى القلوب ، القلوب بتهدى أكثر من العقول ، والمغرور مهما اتنفخ ، حيقى برضك زى البللونه أقل شكه تنزله على فشوش .

محجوب : (ينظر إلى الساعة ويدو عليه الاهتمام) بس بقى يا جماعه ، كفايه

كلام ، خلونا ننتظر الساعة قربت على الانتاشر ما فضلش غير دقيقة
والا دقيقتين ، والأستاذ عبد الصبور ينزل ، يعنى زمان روحه دلوقت
عماله تحوم حوالينا .

سيد : إئتوا برضك مصدقين انه حا ينزل ! برضك بتصدقوا الكلام البفارغ
ده ؟

زكى : (إلى سيد) إيه ده يا سيدنا ، وطى صوتك كده وانت زى المدب ،
حد يقول كده والروح نازله . إنت عايز تطرد الروح ، دى حاجات
مجربة ومدروسة فى أكبر الجامعات ده فيه عندهم صور لأرواح . عايز
إيه أكثر من كده ؟

سيد : وانا مالى تنزل تنزل ، أهى عندكوا . امضغوها واشبعوا بيها .. بلوها
واشربوا ميتها .

محجوب : بس بقى يا جماعه ، كفايه كلام . أرجوكم عايزين سكون خالص .
الشيخ جاد : وبرضه ، سماويات ، روحانيات ؟
محجوب : طبعا ، طبعا ، ركزوا فكم فى الأستاذ عبد الصبور ، ما حدش يفكر
فى حاجه تانيه .

سيد : ودى مصيبة إيه دى كان ! أفكر فيه بتاع إيه ؟ هوا دل حد يفكر
فيه ؟

محجوب : يا أخي .. يا بنى آدم ، وطى صوتك ، اتكلم بهدوء .. إذا كنت مش
عايز تفكر فيه .. عنك ما فكرت ، بس اقعد ساكت .

سيد : سكت يا سيدى .

زينهم : (يدخل حاملا المقشة على كفه منشدا) اللبارق ، اللبارق ، اللبلالا
بالا بارق ..

عبد الصبور الله يجازيك ما تقول لى بس لمن اشكيك
ما لحقتش أبدا افرح فيك تموت وترجع تسألنى تنشق
اللبارق . اللبارق .

- محبوب : (ناهرا زينهم) إيه ده يا حيوان ده ! إنت عايز تطفش الروح ؟
- زينهم : ما تخافش . دا كان يحب الغنويه دى قوى . دى يمكن هى دى اللى حا تنزله . قولوا معايه قولوا ، اللبارق . اللبارق .
- محبوب : إنت حاتسكت والا اقوم اكسر دماغك ؟
- زينهم : ما فيش لزوم . خلاص سكت . خد يا شيخ جاد المقشه ، سلك سنالك زى ما انت عايز .
- زكى : بس يا جماعه ، اسكتوا ، خلاص ، دى كلها دقيقه بس .
- (يسود السكون وتمضى فترة دقيقة فى صمت عميق .. والكل واجم ساهم محملق فى الساعه التى أخذ يقترب عقرب الدقائق فيها من ١٢) .
- (تدق الساعة ١٢ دقه ، وفى كل دقه يزداد توتر أعصاب الجميع ، ويزداد إرهافهم ، ويشتوا فى أماكنهم كالتماثيل) .
- (تمضى دقيقة أخرى بعد دقائق الساعة . ثم يسمع صوت جبر الطشت على الأرض وسكب المياه من الإبريق فيه) .
- زينهم : (يبدو عليه فزع شديد ويمسك بيده كصف سيد أفندى وهو أقرب الموجودين إليه ويهمس فى خوف) يا نهار اسود دا بينه عملها ونزل ؟
- سيد : (هامسا فى فزع) هوا مين ؟
- زينهم : هوا ، هوا بعينه .. سامعين رجليه بتتحرك فى الطشت ، يا نهار مهيب وزى الطين سامعين يا جدعان ؟
- (الجميع ينصتون ويعلمو وجوههم الفزع)
- محبوب : (فى خوف) سامعين .
- الشيخ جاد : أنا سامع كويس .. صوت الطشت بيتجرجر على الأرض .
- زكى : إصبروا شويه يا جماعه بلاش قلق ، إيه اصله ده اسكتوا خلونا نسمع ، دى مصايب إيه دى ؟
- (يسمع صوت وقع أقدام القبقاب ذو الجلاجل ، وتبدو سنية على

(الباب مصفرة الوجه) .

- سنية : (هاهمه لزنيهم) سامع يا زنيهم .
- زنيهم : سامع يا سختي .
- سنية : سامع القيقاب ابو جناجل ؟
- زنيهم : سامعه كويس .
- سنية : (فزع) أنا خلاص يا زنيهم ، ركبي سابت ، مش قادره اقف ، أنا كنت فاكهه الحكايه كلها تهويش في تهويش .
- زنيهم : أنا كان كنت فاكهه كده .. لكن ابن الأروبه عملها صحيح .
- الشيخ جاد : فيه إيه ؟ يتشوشوا بتقولوا إيه ؟
- زنيهم : ما نتش سامع ؟
- الشيخ جاد : سامع إيه ؟
- زنيهم : القيقاب ابو جناجل ؟
- الشيخ جاد : ماله القيقاب ابو جناجل ؟
- زنيهم : هوه فيه حد كان يقدر يلبسه غيره !
- محبوب : آهه .. أنا سامعه كويس ، وسامع شخشة الجناجل .
- سيد : لا .. أنا ما قدرش على كده أبنا ، دى الحكايه بقت جد خالص .. دى مصيه وطلبت ، وبعدين نعمل إيه لو عملها وبلط هنا ولا رضيش يطلع تاني ؟
- زنيهم : طيب پس ما تفسرش بقى .. أهى دى تبقى حقيقى المصيه الكبرى .
- سنية : الله يكون في عونك يا ستي .. يا ترى عامله إيه معاه دلوقت ؟
- (يسمع صوت تصفيق)
- زنيهم : يانهار اسود ، أنا ماليش دعوه ، ولا انا منقول من هنا ، خشى له انت يا سنيه ، بينده لك انتي ، الصقفتين دول يعنى لكى ؟
- سنية : أخش ! إيه ؟ اتجننت ؟ أنا أخش ؟ دانا عقبال ما اوصل للباب .. يكون دمي نشف .

(يعاد صوت التصفيق) .

زينهم : خشى بقة يا سنيه ، إننى بتعرفى تهديه .
سنية : أبدا .

(يعاد التصفيق) .

زينهم : خشى يا سنيه ، لازم عايز عليه النشوق .
سنية : وأنا مالى ، أهى عنده اخته تحببها له .

(يسود الصمت فترة)

الشيخ جاد : لازم لقاها .

تصدر عطسة عالية) .

سيد افندى : (وهو يحضن الشيخ جاد) بالطيف ، هوا بعينه ، ما فيش غيره
(يندو الخوف على الجميع) هى عطسته ، الى تطلع تشرح الودن ،
يا مغيث ، يا ناس الحقوى ، حد يشيلنى يطلعنى بره ، ودى كانت
وقعة إيه المهيبه دى ، يا ناس حرام عليكم ، دانا بينى وبينه تار بايت ،
أنا حاكون أول ضحيه له ، دا مش ممكن ينسالى حكاية الكرب
المحشى ورأس العبد ..

زينهم : طب بس بقى اخفيها سيره ، لحسن يسمعك ، يطلع يمرط بك
الأرض .

(تستمر الجماعة فترة جالسين فى أماكنهم بلا حراك ، وكلمسا
صدرت عطسة انتفضوا فى أماكنهم وظهرت عليهم علامات الرعب
والفرع) .

محبوب : وبعدين يا جماعة إوليه آخرتها ااحنا حانفضل كده متلشين .. مش
نشوف إيه الى حصل ، دا حتى حرام علينا نسيب الوليه الغلبانه جوه
كده لوحدها ، دى مش رجوله ، دا احنا دلوقت بنعمل تجربه ،
والتجربه فى طريقها للنجاح ، فإيه الى مخوفكوا كده ا هو ااحنا مش
كنا أكثر ما بتتمناه إن الأستاذ عبد الصبور ينزل لنا روحه متجسده ،
(أم رنية)

طیب أهو ده اللى حصل ، يا الله واحد منا يقوم يشوفه ويسلم عليه
ويكلمه .. يا الله يا شيخ جاد .

الشيخ جاد : أنا ؟ ولا اعرفه ، ولا لى دعوه بيه . حد الله بينى وبينه ، أنا لا انا عايز
أرواح ، ولا لى دعوه بالأرواح .

زكى : (ناهضا من مكانه) اقعديوا بقى اعزموا على بعض لغاية ما الراجل
يزحف ويسينا وتنه طالع .

سيد : يا ريت ، ربنا يسمع منك .

زكى : أيوه دلوقت نقول يا ريت ، وبعدين نرجع نندم ، خليكوا قاعدين ، أنا
حاقوم أشوفه (ينهض متردداً ويأخذ فى الاقتراب من الساب
الزجاجى) .

الشيخ جاد : حاسب على نفسك .

زكى : (يتقدم) العمر واحد والرب واحد ، إحنا لازم نستمر فى التجربه إلى
النهايه .

(يقف أمام الباب متردداً ، ثم ينحنى ويضع إحدى عينيه على ثقب
المفتاح فلا يكاد ينظر ما وراءه حتى يتراجع مبهوتا مذعورا)

زكى : يا لطيف ، يا لطيف ، الطف بنا يارب . هو بعينه ، بطرطوره ،
بعبايته ، بنضارته . يا لطيف يا لطيف .

سيد : (وقد تراخت أعضاؤه) يا ناس حرام عليكم .. حد يشيلنى يرمى
بره ، أنا جتتى نملت ، ومفاصلى خلاص سابت .

الشيخ جاد : وانا زيك ، ما يقاش فى نفس .

زينهم : بس كان مالنا ومال الغم ده .

(سنيه تنهاوى إلى الأرض)

محجوب : (ينهض واقفاً) وبعدين يا جماعه ، والوليه اللى جوه دى نعمل فيها
ليه ؟ دى ذنبها فى رقبتنا .. إذا كان احنا واحنا بره الأوده جرا لنا
كده ، إيش حال هى بقى .. اللى معاه فى أوده واحده .. هى دى

- برضه أصول ؟ خمس رجاله طوال عراض يقعدوا كده زى الولايا ،
ويسيو الوليه الغلبانه دى لو حدها جوه .
- زينهم : أيوه حقيقى ما يصحش ، دى أمور نسوان الى احنا عملينها دى .
سنية : يا عينى عليكى يا ستى .
- الشيخ جاد : أنا ما لياش دعوه ، لو قتلتنى ما انتقلش من مطرحى .. أنا لا قلت له
انزل ولا اطلع .
- سيد : وانا زيك .. لو كان على كنت وصيت عزرائيل يسمنله فى السما
بحديد .
- محجوب : أقول لكم أحسن طريقه .. ولا انت ولا هوه (يتقدم بجرأة ويدفع
الباب الزجاجى فيفتحه على مصراعيه)
(تبدو حجرة النوم فى ضوء باهت تماما كما كانت فى الفصل السابق .
وعلى المقعد أمام الفراش جلس شبح يرتدى الطرطور والعباءة
والمنظار على أرنبة أنفه وقد وضع ساقيه فى الطشت) .
(الجميع يصيهم فزع ويحدقون فى الشبح فى دهش شديد)
- زكى : (هامسا إلى سنية) بسم الله الرحمن الرحيم .. هوه بعينه الخالق
الناطق ، بس باين عليه تخن شويه .. الظاهر إن صحته جت على
السما .
- سنية : لكن امال فىن ستى ام رتيه ؟ راحت فىن ؟
- سيد : لازم أكلها .. هوا دا تستبعد عليه حاجه أبدا .
- محجوب : ما تكلمه يا سى زكى .. ما تسأله .
- زكى : اسأله يا شيخ جاد .
- الشيخ جاد : أنا اسأله ؟ بتاع إيه ؟ وعشان إيه ؟ أنا ما كلمش الأرواح شفوى ؟
مقدرش عليها الا لما تكون فى الكباية بس ، لكن كده سايه .. حد الله
يبنى وبينها .
- محجوب : طيب بس .. بس . اسكت انت وهوه . أنا حاكلمه (للشبح)

- السلام عليكم يا سيد عبد الصبور عبد الغفور عبد الشكور المقرقر .
سيد : إيه ؟ عبد إلايه ؟ إيه ؟ صبور وغفور وشكور ومقرقر ، ومكانش
عاجبه سيد بنجر ، ياخي جتك نيله .
(يرفع الشبح رأسه ، ويفادر مقعده ، فإذا به أم رتييه نفسها وقد
ارتدت ملابس عبد الصبور) .
- أم رتييه : (بلهجة عبد الصبور وهي تتقدم تجاه سيد) سيد إيه ؟ .. سيد
بنجر .. إنت هنا يابوز الإخص . ياوش الخريت .. يالمامة اللمامه .
(يكاد الجميع يصعقون من فرط الدهش) .
- زينهم : إيه ده ؟ مين دى ؟
منية : دى ستي ام رتييه . اسم الله عليكى يا ستي .. إيه اللي جرا لعقلك يا
ستي ؟
- سيد : إيه ده ؟ .. أنا بوز الإخص ؟ .. أنا وش الخريت ؟ أم رتييه تقول على
كده .. مش ممكن ، إحنا اللي كنا متفقين حا نتجوز دلوقت ، تقوم
تقابلنى المقابلة دى ؟
- أم رتييه : تتجوز ؟ ياخي جاك جنازه حاره .. مين قال لك تخش هنا يا باشخير
الولعه ، يا باشخير اللهاليب ، لما تبقى باشخير الحلاوه ، ابقى تعالى
هنا .. يا للاقوم ورينا عرض اكتافك .
- سيد : ما يمكنش ، مش ممكن أبدا تكون دى ام رتييه . أقطع دراعى ان ما
كانش دا عبد الصبور ، هو بعينه عبد الصبور .. أم رتييه الأميره ، اللي
زى السكره ، تقول كلام زى كده ؟ تقول على خريت ؟
- زينهم : حقيقى ، لك حق . الحكايه لازم حصل فيها لخبطة .
- أم رتييه : (تنظر إلى زينهم فى استعزاز) وانت إيه اللي جابك هنا قدامى بوشك
العريان ده .. يا خسيس يا خبيث ، يا إبليس .. أنا مش ميت مره قلت
لك ان وشك بيلبش جتنى ، مش خرجت عليك تيجي قدامى من غير
وش .

زينهم : ولا كلمه ، هوه بعينه .

أم رتية : (لزكى ومحجوب والشيخ جاد) وانتوا إيه ؟ قاعدين لغاية دلوقت تعملوا إيه ! ياللا ورونى عرض كتافكم .

محجوب : يادى الخساره .. الوليه انصابت ، يا مسكينه يا ام رتية ، عقلها راح بلاش ، وهى دى حاجه بسيطه .. دا انا كنت بره وحاتجن ، إيش حال هى ، هى المسكينه المبيطه الطيبه اللى لا تعرف لا روح ولا عفاريت .. روحتى بلاش يا ام رتية ، الله يجازيك يا عبد الصبور يا لى كنت السبب .
سنيده : يعنى خلاص . أخرج كده من المولد بلا حمص . ما فيش جواز ولا حاجه ، ده برضه يرضى ربنا !.

أم رتية : جواز فى عينيك يا خلبوص يا وش الخريت يا وحش .. إياك اشوفك تعتب هاتانى .

(يخرج سيد وهو يضرب كفها بكف) ..

(أم رتية تجلس على المقعد وتضع ساقيها فى المياه وتساؤل علبه الشوق) .

سنية : وبعدين يا زينهم .. نعمل إيه فى المسكينه دى اللى عقلها راح ؟.

زينهم : راح ؟ ولا راح ولا حاجه ، أنا عارف الحكايه . عارف اللى جرا (ينظر إلى ام رتية ويهز رأسه) آه يا عبد الصبور افندى يا غمس .. برضك عرفت تستكرد الوليه الغلبانه وتنزل مطرحها أنا عارفك كويس وعارف ألاعيك .. طول عمرك واكل عقلها وضاحك عليها ، طبعاً نزلت وقعدت تدردش معاها وتاخذ وتدى ورحت مسهبها وتازل بروحك فى جتها ومطلع روحها . الله يرحمك يا ست ام رتية . منك لله يا سى عبد الصبور .. يا مغالط عزرائيل ، طبعاً مبسوط عشان فسخت الجوازه بتاعتها ، مش دى اللى كنت بتحرب عليها ، طفشت الراجل بلسانك اللى زى المبرد وفضلت تقول له .. وش الخريت ، وبوز الإخص ، وطبعاً عايز تفسخ جوازى انا كان ، لكن بعينك . والنبي لنا متجوزها غصب عن

عنيك .. وابقى تعالى بقى خدها منى بجحتك المفشوله .. جنة ام رتيه ،
جنة الوليه ، تاخذها منى ؟ تقدر تتجوزها ؟ بعينك . (إلى سنيه) خشى
على يا سنسن يا لى زى اللوز ، تتجوزينى والا لا يابت ؟

سنيه : أتجوزك يا زينهم .

زينهم : سامع يا سى عبد الصبور ، حا تجوزها ، غصين عن عنيك لتنين .

أم رتيه : (فى غضب) اخرص ، يا خسيس ، يا إبليس يا تعيس يا منحوس .

زينهم : ولو .. برضه حا تجوزها .. ابقى خلى جنة ام رتيه تنفعلك .

الشيخ جاد : ايه اصله دا يا جماعه ! اتوا حا تجنونا معاكم زى الوليه ما تجنت ، إيه أصله

ده يا وله يا زينهم ما تسبب الوليه فى حالها ، عبد الصبور دا إيه وبتاع إيه ؟

مش كفايه الى جرالها . كله دا من المسخره الى اتوا عاملينها .. مالكم

ومال الأرواح ، والأسرار .. يعنى لو كان كل واحد يمشى على أده ،

ويعرف الى على أده . مش يبقى احسن . دا لازم يكون فيه فرق بين الى

يعرفه ربنا والى يعرفه العبد .. دا الى ماشى على الأرض ما يشوفش زى الى

فوق السطوح ، إيش حال امال الى فوق ، فوق فوق ، يا أخى منك له ،

خلى الى لله ، واتقى الله .. واخش الله ، وقل هو الله أحد ، الله الصمد ،

لم يلد ولم يولد ، ولم يكن له كفوا أحد (بصوت عال ممدود) وحدوه .

الجميع : (بما فيهم أم رتيه) لا إله إلا الله .

(أم رتيه تهرز رأسها منتفضة وتستم بضع كلمات غير مفهومة ثم تغمض

عينها برهة .. وتفريق إلى نفسها وترمى الطرطور والنظاره) .

أم رتيه : يا ندامه .. يا عيب الشوم .. أنا إيه الى لبسنى اللبس المشوم ده ؟ ، أمال فين

سيد افندى ؟ راح فين ؟ الحقونى بسيد افندى .

زينهم : (متجهها إلى الباب) سيد افندى ، سيد افندى .

سيد : (يعود مهرولا ويقبل على أم رتيه) أم رتيه .. مالك ياختى . قلبى

عليك ، حمد الله على سلامتك . يا ألف نهار أبيض .

زينهم : أبوه كده .. أهى طلعت روحه تانى .. ونزلت ام رتيه مطرحها .. هى
إيه ؟ سايه . (ناظرا إلى السقف) اطلع يا عبد الصبور الكلب ، خليك
فوق عندك ، إياك تهوب هنا ، الحقونا يا جماعه بمأذون قبل ما ينزل
يفشكلها تانى .

الشيخ جاد : ويلحقك ليه .. أمال انا هنا باعمل إيه؟ دانا أدها وأدود، هاتوا إيديكم فى
إيدى .. قال يا بخت من وفق راسين فى الحلال ، وانا حاو فوق اربع روس ،
منهم راسين عجالى (يجلس الجميع وتسمع زغاريد) المأذون لما يسعد ،
تجيله جوازتين فى ليله .

تسدل الستار

(تمت) .

جمعية قتل الزوجات

الامضاء

إلى النقاد الذين أثارتهم « أم رتيبة » ..
واتهموني بالإسفاف والتهريج ..
أهدى مزيدا من الإسفاف والتهريج ..

يوسف السباعي

أحب قبل أن يقدم القارئ على قراءة هذه المسرحية .. أن أجعله على بينة من أمره وأمرى وأمر هذه المسرحية التي يوشك أن يضيع في قراءتها بضع ساعات ثمينة — أو غير ثمينة — من عمره .

أنا لست واعظا ولا فيلسوفا ولا حكيما ولا مرشدا .. ولا .. ولا شيء أبدا من هذه الصفات الفاخرة .. التي قد يتوهمها القارئ في الكاتب .. أو يتوهمها الكاتب في نفسه .

أنا عند ما أكتب أحس بمتعة من الكتابة ، وعند ما أقدم ما كتبت للقارئ أحاول أن أدعوه لمشاركة تلك المتعة ، وتزداد متعتي عند ما أحس أنني نجحت في أن أسبب له نوعا من المتعة .. وأنى هيأت له خلال أيامه المرهقة المتعبة التي تزدخر بها حياته ساعات من المتعة الذهنية وإيائى في كتابى .

هذا هو كل ما أقصده وأحب أن أبلغه بكتابتى .. فإذا صادف بها القارئ ما توهم فيه عظة أو حكمة أو أى شيء آخر من هذه المسميات المحترمة فأؤكد له أنى لم أقصدها .. وأنها زجت بنفسها بين الكتابة عفوا بلا قصد منى أو تدبير .

فإذا كنت يا أخى القارئ . « غلبانا » مثلى ومثل بقية الناس الذين أرهقهم أيامهم من أمرهم نصبا وعسرا ووددت أن تخفف عنك بعض هذا النصب والعسر فاقرأ هذه المسرحية .. فقد تقلح في منحك بعض الراحة والتسلية .

وإذا كنت قارئاً « فنزوحاً » تضر بوقتك أن يصرف إلا بين آيات بينات من الحكم والعظات فلا تضع وقتك معي عبثاً .. أمامك كتب الأخلاق والتهديب والتربية

و نفلسفة .. أو .. لم أذهب بعيدا .. أمامك الكتب السماوية .. خذ منها ما شئت من
تنصح والعظة .. ولا أظن كاتبها مهما بلغ من الحكمة والعقل والبلاغة والقدرة بقادر
على أن يأتي لك بخير منها .

أما أنا فإرسالتي كما قلت لك أن أخفف عنك بعض ضيقك ونصيبك فإذا نجحت ..
فيها وسمعت .. وإذا لم .. فاعذرنى .. إنما الأعمال بالنيات .

والسلام عليكم ورحمة الله

يوسف السباعي

الفصل الأول

المنظر

: سطح منزل فى شارع سلامة فى حى السيدة زينب . فى اليمين قطاع حجرة يقطنها سيد القنط ومحمود جاب الله . فى مواجهتها باب يؤدى إلى الحمام والمطبخ وسرير حديد بأربعة أعمدة يرقد تحته محمود وسيد وقد أسدلت عليهما ملاءة السرير فأخفتها .. وعلى اليسار أريكة بالية تعلوها نافذة وضع بدل زجاجها المكسور ورق جرائد .. وفى الوسط منضدة صاج عليها لمبة زجاج وبقايا طعام وأوراق ومنبه وعود . وعلى اليسار الباب المؤدى إلى السطح ، وقد كومت وراءه صناديق وسلال وشوالات وأثاث قديم حتى لا يمكن فتحه من الخارج ومعلق على الحائط مشجب ومرآة مشروخة . وفى يسار السطح يبدو الباب الخارجى لحجرة خشبية صغيرة منخفضة وبجوارها تقفية فراخ .. وفى المواجهة مدخل السطح وحبال غسيل ممتدة بطول السطح . الوقت قبل الفجر فى أواخر الشتاء .

المشهد الأول

(تمر فترة صمت .. تسمع خلالها دقات المنبه وصياح الديكة دون أن يبدو على المسرح أحد .. وفجأة يرق جرس المنبه فيندفع سيد من أسفل السرير ويسكت المنبه .. ثم يتسلل على

أطراف أصابعه فيرتدى البنطلون والجاكّة فوق الجلباب ويدس قدميه في الحذاء ثم يقف أمام المرأة لمشط شعره ويتزين ويدندن . محمود يمد رأسه من أسفل السرير وينظر إليه في دهشة .

: ديهده .. ديهده .. إيه الحكاية يا خال ؟

: (مأخوذاً بيقظة محمود) .. حكاية إيه ؟! ما فيش حاجة أبدا .

: أبدا ؟! أبدا ؟!

: أيوه .. أبدا .. أبدا .. شايف في حاجة غريبه ؟

: لا أبدا .. ولا غريبه ولا حاجة .. بس يعني مش زى عوايدك

تسحب كده لوحدك من تحت السرير .. وتسييني أروح ضحية

النوم واقابل لوحدى القضا المستعجل . انت ناوى تخلى بيه ؟!

: أخلى بيك ازاي ؟! أنا ما انا واقف اهو قدامك .. مين قال لك ان

أنا حاسيك رايح في النوم وانزل .. نام نام .. لسه بدرى .. أنا مش

حائزل دلوقت .. ولما آجى أنزل حاصحيك (مستمرا في الدندنة

والتزين أمام المرأة) يا الله إرعى الستاره ونام .

: أنام ؟! ازاي (يخرج من تحت السرير) ما يمكش .. لازم اعرف

إيه سر الحتفة والسبب اللى بتعملها في روحك دى .. أنا اعرف ان

بينك وبين المرايه تنافر شديد .. وخصومه مستحكمة .. كل

واحد منكم ما يطقش التانى .. ازاي قادر تقف قدامها الوقفه

الطويلة دى ؟

: مُكره خالك لا بطل .

: وإيه اللى يكرهك على العذاب ده ؟! إيه اللى يرغملك على الاصطباح

والبحلقه فيما تكره ؟!

: محتاج لها يا محمود يابنى .. مزنوق فيها . لازم اعندمها واسببها

لأنى حاستعملها .. حاعرضها للأبصار .

: هي إيه دى ؟!

- سيد : خلقتى .. اللخبطه الى انا شايفها فى مرآة النحاس .. لازم اساويا شويه .. لازم احتفظها .. واسيسبها .. واساويها .. واهندمها علشان تبقى مقبولة شويه .. ان كان على أنا ما يهنيش .. أنا خلاص خدت عليها ، ما بقتش اخاف منها قوى .. لكن هم ..
- محمود : هم مين ؟!
- سيد : الى حاشوفوها .. لازم اوضبها لهم ، لازم اهيأها لهم شويه .
- محمود : إيه أصله ده يا خال ؟! هى إيه الى توضبها لهم وتيأها لهم .. هى لحمة راس ؟! بس مين دول الى خايف عليهم قوى من خلقتك ؟!
- سيد : انت ما انت طول النهار ماشى بها كده عريانه .. وسايها على خلق الله .. اشمعنى دول يعنى الى لازم توضبها لهم .. وتيأها لهم ..
- سيد : يقول إيه دول ؟ يطلعوا إيه ؟
- سيد : يطلعوا ؟! ما يطلعوش أبدا .. بيرموا سهامهم كده وهم قاعدين .. بيصوبوا سحرهم كده وهما نعسانين .
- محمود : ولا انا فاهم حاجه .. هم إيه دول الى بيرموا السهام ويوزعوا السحر .. يكونوش هنود حمر ؟!
- سيد : حمر ؟! يا غبى . دول سود . سوادهم عجب .
- محمود : هنود ، سود . إيه الكلام ده ؟!
- سيد : هنود ؟! هنود إيه يا جدع . مين قال هنود سود ؟!
- محمود : آمال يقولوا إيه دول الى قاعدين يسحروا ويضربوا بالسهام ، والى انت عمال توضب لهم لحمة الراس بتاعتك ؟!
- سيد : عيون .. عيون سود .. مش هنود سود يا مغفل ، عيون المها ، عيون ، فى طرفها حور ، عيون من الى قال فيها الشاعر :
- « يصرعن ذا اللب حتى لا حراك به » .
- محمود : وانت بقى ذا اللب الذى لا حراك به ؟!
- سيد : لا حراك ، ولا روح ، ولا نفس ، ولا حتى .. لب ..
- (أم رتبة)

: يعنى بالاختصار . انت بتحب ؟!

محمود

: أيوه .

سيد

: قديمه .

محمود

: إيه هي اللى قديمه دى ؟!

سيد

: مسألة الحب بتاعك ، طول عمرك وانت بتحب . من يوم ما

محمود

وعيت عليك وانت عاشق مستهام . أنا فاكروانا صغير يوم ما جيت

لنا البيت وهدومك تحت باطك ، لما ابوك طردك وحرم عليك نخش

البيت من تحت راس قضايد الحب اللى كنت بتعملها فى مرات

الشيخ علوان ، يعنى من يومك وانت حبيب ومستندات الحب

بتاعتك ، لا تعد ولا تحصى .

: مستندات الحب ؟ . إيه هي دى ؟ .

سيد

: الخيايه ، والفقر . وتلتعيت قصيده ، وخمسين قصه . واربعين

محمود

غنوه . محبوسه بين اربع جدران فوق سطوح ام عبده ، ما سمعهاش

غيرك ، وغبرى . والغلبان شندى عبد الجليل الجرجاوى . هو

الحب دا حاجه جدت عليك .. طوى عمرى وانا اوعى عليك ،

تبص لنجوم السما وتتنهد ، وتبص لغروب الشمس وتتحسر .

وتبص لطلعة القمره وتأوه . ما فيش حاجه من الحاجات دى

تعدى عليك من مكات أبدا ، لكن كل ده ما كانش له صله بخلفتك

أبدا . كل الحب اللى انت غرقان فيه ده ما خلاكش مره واحده تبص

فى المرايه . ولا تسبب شعرك ولا تهندم نفسك . إيه اللى جد

عليك ؟!

: ما كانش حب يا محمود .

سيد

: آمال كان إيه يا بحال ؟!

محمود

: كان هيامان . كان إفراط فى الحساسية . كان انتظار لحب . كان

سيد

حب من طرف واحد ، كان حب ، والحبيب مجهول .

محمود

: يعنى كده ، زى الجنايه . لما تنقيد ضد مجهول .

سيد

: كان عندى فيض من الحب ، لكن ما كانش متركز فى حاجه مخصوصه . كنت ابص للنجوم واحس انى بخلق بينها وادور على حاجه ناقصانى . كنت اسمع صوت الكروان سارى مع نسيم الفجر ، واحس انه بيحمل لى رساله من حبيب نائى . كنت ابص للقمر ويتهاى لى ان فى وشه ابتسامه حلوه بتحسينى . كنت امسك العود بتاعى واحس بصوابعى بتجرى عليه ، مش بنغم ولا لحن ، لكن بمناجاة . للحبيب الهائم الغايب . كنت بحب . لكن ما كنتش عارف با احب مين . لغاية ما ليله من الليالى ، سمعت صوت لذيد بيدندن ، بغنوة : « فى الليل لما خلى ، إلا من الباكي » ، « النوح على الدوح حلى ، للصارخ الشاكي » « ما تعرف المبتلى فى الليل من الحاكي » وكنت قاعد مره على سور السطح ، وسمعت الدندنة وسط سكون الليل الخالى . حسيت جسمى بيرتعش . ولقيت دموعى نازله بتجرى زى السيل .

محمود

: وعرفت مين صاحبة الصوت ١٩ .

سيد

: عرفتيا .. ليله .. ورا ليله .. بقيت أقعد لوحدى اسمع الدندنه .. ولقيت الإحساس الفياض والشعور الهائم والقلب التايه .. ابتدوا يتركزوا فى الصوت وفى صاحبة الصوت .. واتجمع كل الحب الحيران بين النجوم والسما والقمر والغروب والبلابل .. واتحط كله فى صاحبتنا دى .

محمود

: بس مين هى ١٩ .

سيد

: وبقيت احس ان الأمانى بتاعتنى فى الدنيا كلها انحصرت .. فى حاجه واحده .. مش انى أبقي فنان شهير ، ولا صاحب ثروة ولا سلطان .. بل فى إنى أقعد كل ليله واستنى لغاية ما تخرج فى البلكونه .. والمخ خيالها فى الليل ، واسمع الدندنه .. كل سعادتى

- كانت متركة في اللحظات القصيرة دي .
- محمود : هي مين بس يا خال ما تقوللى وتريح قلبى .. شفتها بالنهار واللا لآ ؟
- سيد : شفتها .. وحسبت زى اما اكون بقالى ثلاثين سنة ماشى فى صحرا فى عز الشمس .. ولقيت شجرة خضرا تحتها فيه واكل .. حسيت زى اما اكون لقيت حاجه بتاعى .. مش غريبه على .. إانت مجريتش الحب يا محمود ؟ ما تعرفش حاجه عن الحب ؟
- محمود : والله يا خال .. الحب بتاع الصحرا والشجرة الخضرا .. وهات لى معاك بقره .. دا مجريتوش .. أنا أصلى ما كلش كثير من حكاية سكون الليل .. والنسيم والحاجات دي .. أنا بقالى ستين ماشى مع البنت « زكية ولعمه » .. ومرىحانى خالص .. كل ليلة ألاقها محضرا لى الكاسين والعشا .. أشرب الكاسين واكل اللقمين .. وانا لى شويه .. وتانى نازل .. حاجه ألسطه خالص .. لا تعب .. ولا صرف .. ولو انها اليومين دول مرغوشانى شويه .. من حكاية كده .. ربنا يستر .
- سيد : إانت ما تعرفش الحب ، الحب اللى انا بقول لك عليه ، بينك وبينه ما بين السما والأرض ، الفرق بين اللى بتعمله وبين الحب ، زى الفرق بين الكلب اللى يينهش حته لحمه ، والبني آدم السايح فى روضة بين الزهر والبلابل .
- محمود : والله يا خال ، انا يا احب اللحمة .
- سيد : كل إنسان وله طبيعته ، وكل طبيعه ولها الحاجه اللى ترضيها ، إانت تحس انه يرضيك كاسين وحضنين ، أى كاسين وأى حضنين ، وانا با احس انه يرضينى مجرد صوت أو كلمه أو لمسه ، بس من مخلوق معين وإنسان مخصوص ، يمكن يمر على العمر بطوله وانا ماش لاقية ، ويمكن يخلص العمر واخرج من الدنيا وانا بقول مع اللى قال « عبثا

خلقت ، ولكن دلوقت حسيت ان انا ما تخلفتش عبث ، وان فيه
حاجه تستاهل الحياه والوجود ، وان العمر ما راحتش ، ومش حا
يروح أونطه ، حاسس ان انا لاقيت الحاجه اللي اتخلقت علشانها ،
ولو خلصت الحياه بعد كده ، مش حاندم .. لأنى شاعر انى خدت
الى انا عايزه منها .

محمود

: ديهده ، ديهده ، إيه دا كله ١٢ الظاهر انك واقع قوى ١١ .

سيد

: قوى ، قوى ، قوى ، إذا كان الحب اسمه فى لغتك وقوع .

محمود

: ومين هى اللي عملت فيك كده ١٢ قوللى مين هى دى بنت الأرويه

علشان اشوف تستاهل كل اللي بتقوله عليها والا لا ، مين هى دى

صاحبة العيون السود اللي « يصرعن ذا اللب » ، أعرفها انا ١٢ .

سيد

: أيوه .

محمود

: وشفتها ١٢ .

سيد

: أيوه .

محمود

: طيب يا أخى قوللى مين هى وريحنى ١٢ .

سيد

: بهيه .

محمود

: بهيه ؟ بنت ام عبده ؟ .

سيد

: أيوه .

محمود

: كده مره واحده ؟ . يا نهارك اسود يا خال ، ودى تقدر عليها

ازاى ١٢ البنت من ناحية الخلاوه حلوه ، بت زى اللوز ، بس جد

قوى ، وانا ما احبش الجد ، وما احبش الهوى العذرى ، وما

تنساش انها بنت ام عبده كان ، يعنى ما يمكنش تقدر تقرب لها ،

دى ساكنه فى منطقة الخطر ، فى المنطقه الحرام ، ودى وصلت

معاها لغاية إيه ، حب من جانب واحد زى عوايدك ، من بعيد

لبعيد ، والا حصل حاجه ١٢ .

سيد

: فضلت مده طويله ، والحب من جانب واحد وانا سعيد بيه جدا ..

كل الى أتمناه اني أنحها بالليل واسمع صوتها وما كانش عندي فكره
أبدا انها يمكن تحس بي ، لغاية ما ليله من ذات الليالي قعدت ادندن أنا
بالناي ، فدنندت هي معايا ، وبعدين في الآخر رفعت راسها لفوق
وضحكت وشاورت بالسلام .

محمود

: وعملت إيه انت ؟

سيد

: حسيت ان انا مش ماشي على الأرض ، حسيت ان انا بطير في
السماء ، حسيت ان الدنيا مش سايعاني . ما تتصورش أد إيه تكون
سعادة المحب لما يخص ان اللي بيعبه ميزه من دون الناس ، وإته خصه
من دون الخلق دول بابتسامه أو بإشاره أو بكلمه ، سعادته عجيبه
جدا ، وبقيت بالاحس وأنا بستناها بالليل ، انها حاسه بيه ، وانها
بتغني لي أنا .

محمود

: وبعدين فضلت كده تغني لك بالليل وانت تصفر لها ؟ أمال إيه الى
خلاك صابح تسبب أوى كده ؟

سيد

: امبارح حسيت بخنين عجيب لها ، وكان نفسي ادفع نص عمري
والمسها أو أمسك إيدها ، فبعد ما خلصت الدندنه رحت متحرراً
ومكلمها ، قولتلها بالشويع ، ان نفسي اشوفها... فضلت واقفه
ساكنه شويه وانا كأني منتظر حكم بالإعدام لغاية في الآخر ما قالت
لي انها ما تقدرش تطلع دلوقت ، ولكن بكره الصبح بدرى حاتطلع لي
الساعة ٦ ، (يرهف السمع) سامع حاجه ؟ ، فيه صوت رجلين ؟ !

محمود

: (ينصت) لا مش سامع .

سيد

: (ينظر إلى المنبه) على العموم لسه قاضل عشر دقائق ، يا سلام ،
تصور ان انا ما نمتش نص ساعه على بعضها طول الليله الى فاتت .

محمود

: ليه ؟ ! بخيخة القليت ما هي مخطوطه جنبك .

سيد

: فليت إيه يا أخى ، أنا ما نمتش من الفرحه ، مش من التاموس ، أنا
مش مصدق ان انا حاكلمها وحا سلم عليها ، أقول لها إيه مش

عارف ، حضرت كلام كثير قوى عشان اقوله ، شعر ونثر
ومواويل ، لكن انا عارف كل حاجة حاتطر من غنى ساعة ما اقف
قدامها ، أنا بالتلخبط قوام لما عينها تيجي في عيني .. أظن يدوبك
بقي لما استعد للخروج .

(يبدأ في رفع الأشياء المكومة وراء الباب) .

: (منزعجا) إيه ده ؟ إيه إيه الى بتعمله ده ؟

محمود

: بشيل الحاجات دي علشان افتح الباب .

سيد

: (يسرع بإعادة الأشياء مكانها) إنت مجنون .. عايز تشيل

محمود

التاريس والحصون الى بتدافع بيها عن كيانتا .. عايز تزيل الخطوط
الدفاعية وتسيينا كده مكشوفين قدام الأعداء ؟

: الأعداء زمانهم نايمين في سابع نومه .. ما فيش في السطوح دلوقت
الا الأحبه .

سيد

: والله انا خايف من الأحبه بتوعك دول ليحيوا لنا الكافيه .. خايف

محمود

ليكونوا حلقاء مع العدو . ما بلاش يا خال خروج من الباب
دلوقت .. خلتنا مستورين .. أنا طول الليل احلم بالوليه ام عبده .
وانها كيسست علينا زى عزرائيل الموت .

: طب بس ما تفسرش .. قال الله ولا فالك .

سيد

: ما فسرش ازاي .. وانت بتفتح علينا باب جهنم .. قال الباب الى
يجيلك منه الريح سده واستريح .. واحنا مش بيعيلنا منه ريح
وبس .. بيعيلنا سموم .. هبوب .. عواصف .

محمود

: يا ستار .. طب بس اخفيها سمه .. ندرن عليه يوم ما اتلم على
قرشين اسدد بيها الأجره المتأخره .. لاحظطهم لما على أقدم
برطوشه .. وانحزأ حبابي عينيها .

سيد

: قرشين ؟ منين دول ؟ من القصائد .. والا من الأغاني ؟

محمود

: يا سيدى ربك كريم .. يعنى هوا احنا حا تفضل على طول كده

سيد

على الحديد . مسير الجواهر الى في الوحل ، يعرفوا الناس قيمتها .
 : طب وحياة أبوك . تسيينا من الجواهر الى في الوحل ، إذا كنا حنا
 نقضل معتمدين عليهم ، حانتنا مدفونين معاهم في الوحل . لا احنا
 طالعين ولا هم طالعين ، إحنا كل أملنا دلوقت في اولاد الصرم الى
 في البلد بيعتو لنا حاجه .

سید لا .. أنا يمست منهم خالص . ثلاث تشهر ما يبعوش نكله . وهى
 الوليه أمك دى مش عارفه ان لها ابن يتعلم ، ويهص ، ويفرفش ،
 وأخ ييشقى ليل ونهار في الفن الى ما حدش يقدره . (يأخذ في
 شيل الأشياء من وراء الباب) خلينا نخرج لحسن يدوبك فاضل
 خمس دقائق .

محمود : (في استماته ويمسك بالأشياء) ما يمكش ، أنا قيل الباب ده .
 سید : أمال أخرج لها مين ؟

محمود : زى ما بتخرج كل مره .. من الباب الخلفى (يشير إلى النافذة
 الزجاجية) إحنا مش بقالنا شهر بنتزل ونطلع على مواسير الميه ،
 زى النسانيس ، والوليه مش حاسه بينا . عايز نخرج من الباب
 وتضيعنا في شربة ميه . بقلنا شهر متمتعين بالأوده ، والوليه مش
 قادره تقفشنا ، تصور لو اتلمت على واحد منا . حاتيب خبره ..
 أنا سامعها امبارح من ورا الباب وهى بتقول لقرقر ، آه يا نارى لو
 أتلم على واحد منهم الضلاله النصايين ، أربع تشهر ما يدفوش
 الأجرة والنبي لاطلعها على جتهم .

سید : يا ساتر !! سمعتها بتقول كده !؟

محمود : بودنى دى ، والواد قرقر الله يستره ، قال لها والله يا ست ما حد
 بيعتر لهم على أثر ، أنا عارف دول اختفوا فين ، زى اما تكون
 الأرض انشقت وبلغتهم ، يمكن سافرم يجيوا فلوس .

سید : طب ودلوقت اخرج ازاي !؟ دى الحكايه كلها فاضل ثلاث اربع

دقائق وتطرب .

محمود : يعنى كان لازم تدبلك مواعيد فى السطوح ؟ لازم تحديد مواعيد الغرام ، فى مناطق الخطر ؟ .

سيد : أهو اللى حصل ، ما خطرش بيالى أبدا حكاية ام عبده دى ، أنا ساعتها كنت بخلق بأجنحة الحب فى سماء السعادة .

محمود : طيب وحياء أبوك تخلى أجنحة الحب تنزل لك لغاية تحت ، يا الله ورينا ، الشباك اهو ، مادام خايف من المواسير .

سيد : أنا مش خايف من المواسير ، هوا انا بعد الشهر اللى فات دا اللى خدت فيه السكه قياسه على المواسير ، بقيت اخاف من المواسير .

لكن الفكره ان انا لما انزل تحت حاضطر اطلع تانى على السلم علشان اوصل للسطوح ، ولازم حافوت عليها ، يبقى ما عملناش حاجه ، نبقي عملنا زى جحا لما قالوا له ودنك منين . اسمع انا حا اخرج من الباب واللى يحصل يحصل . اوعى (يقذف بالأشياء بعيدا عن الباب) هى موته والا اكتر ، انا لو جت على شئى لازم اخرج ، بقى معقول هى تطلع لى وتآيس وانا اقف زى الجبان ورا الباب ، خايف من امها ؟! اوعى يا شيخ بلا مسخره ، (تبدو بهيئة من مدخل السطح ويسمع وقع أقدامها) سامع ، الظاهر انها جت . يا سلام ، انا حاسس ان قلبى ييطب ، انا مش قادر اقف على رجلى ، مين يصدق ان انا حا كلمها وخط يدي فى إيدها ؟! .

محمود : (يدفعه) طب بس اخرج .. اخرج .. ان شاء الله حاتجيب لك

الكافيه .. أنا يا عم حاخش فى الخبأ اكمل نومى .. ولما تخلص من التحليق بأجنحة الحب فى سماء السعادة .. ابقى طب على صحنى .. اتفضل .

(يدخل محمود أسفل السرير ويخرج سيد متسللا فيلمح بهيئة فيقترب منها مترددا) .

المشهد الثاني

سيد : (لنفسه) يا سلام . انا متبياً لى ان انا فى حلم . مش مصدق انها حقيقة بتحبينى وانها تخاطر بنفسها وسمعتها .. علشانى أنا .. دى نعمه ما استحقهاش .. دى سعادة انا مش أدها ، دا كرم من ربنا ما استهلوش . فيه فى الدنيا سعادة أكثر من سعادة المحب لما يلاقى نفسه محبوب .

(يصل إلى بية فبندو عليها الدهشة عندما تميزه)

بيهة : مين ؟ سيد افتدى ؟

سيد : أيوه أنا سيد .. أنا .. أنا .. أنا مش عارف اقول لك إيه .. فيه حاجات كتير قوى عايز اقول لها لك .. لكن مختار ابتدى ازاي .

بيهة : (ما زالت فى دهشتها) .. انت ؟ انت !!

سيد : أيوه أنا .. أنا عارف انك خايفه قوى .. عارف انك أول مره تقفى موقف زى دا . لكن أنا متأسف .. متأسف جدا .

بيهة : لكن .. لكن ..

سيد : لكن إيه ؟ انت خايفه من إيه ؟

بيهة : أنا مش خايفه .. لكن .. آمال ..

سيد : آمال إيه ؟

بيهة : آمال فى محمود ؟

سيد : محمود ؟

بيهة : أيوه محمود .. كان لازم يقابلنى دلوقت .. امبارح بالليل بعد ما

صقر بالناس قال لى اطلعى فقلت له انى ما اقتدرش اطلع بالليل أبدا واديت له ميعاد دلوقت .

سيد : (مردداً فى ذهول) محمود ؟ محمود !!

- بهية : ماله !؟ هو جلاله حاجه !؟ .
- سيد : (في يأس شديد) أبدا .. أبدا ما جلالوش حاجه (لنفسه) أنا اللي جلالى .. انا اللي اتعلقت بأمل واهى .. أنا اللي انحطم قلبي ، وضاع أملى .. أنا اللي طمعت نفسى بسعاده ما تخلفتلهاش .
- بهية : مالك يا سيد افندى سكت ليه .. قوللى !! طمنى ! هو محمود جلاله حاجه ؟ .
- سيد : أد كده بتخافى عليه !؟ .
- بهية : طبعا .. طمنى .. قوللى فيه إيه !؟ .
- سيد : بتحببته قوى !؟ .
- بهية : قوى .. قوى .
- سيد : بتحببى فيه إيه ؟ .
- بهية : كل حاجه فيه .. أحب الهوا اللي بيتنفسه .. والأرض اللي ييمشى عليها .. من أول ما شفته حسيت ان فيه حاجه شدتتى له .
- سيد : (لنفسه) أنا كان با احبك كده ، واكثر من كده لكن انتى مش حاسه لى ، وهو كان مش حاسس بيكى .. دنيا عجيبه .. تحب اللخبطة !؟ .
- بهية : ما تقوللى يا أخى .. طمنى .. فيه إيه !؟ .
- سيد : ولا حاجه ، ولا حاجه أبدا .
- بهية : آمال ما جاش ليه !؟ .
- سيد : ما جاش ليه ؟ (لنفسه) أقول لها إيه !؟ أقول لها انه مش حاسس بيها ، أقول لها انه ماشى مع « زكيه ولغه » وانه ما يجيش الهوى العذرى !؟ أقول لها ان انا اللي با اعبيدها وانا اللي كنت با اضرب لها الناي !؟ لكن إيه الفايده ؟ هى بتحببه هوه .. مش بتحب الناي .. هى حبت الناي علشان هوه .. مش حبت علشان الناي .. إيه الفايده لما انحطم قلبها زى ما حطمت قلبي .. ما يمكش اخذها ..

- لأنى ياحبها .. مقدرش اشوفها زعلاته .
- بهية : ما تقوللى يا أختى .. ما جاش ليه ؟
- سيد : أيوه .. ما جاش .. علشان .. علشان .. علشان .. أصله ..
تعبان شويه .
- بهية : ماله ؟ فيه إيه .. تعبان ازاي ؟
- سيد : لا .. ولا حاجة .. بس عنده شوية ..
- بهية : شوية إيه ؟ انطق !
- سيد : (لنفسه) شوية إيه .. ابن الصرمة ، دا انا سايبه زى الحصان
(لبهية) عنده شوية مغص .
- بهية : مغص ؟ مسكين .. لحسن يكون عنده المصران الاعور .. لازم
تجيب له دكتور ، ازاي تسييه كده ؟
- سيد : لا .. لا .. ما فيش أعور ولا حاجة ، ما فيش لزوم للدكتور .. دا
مغص بسيط .
- بهية : بسيط ازاي ؟ ازاي تسييه كده ، مش حرام عليك .. لازم
اشوفه .
- سيد : تشوفيه ؟ لا .. لا .. ما فيش لزوم .. ما فيش داعى .
- بهية : لازم اطمئن عليه (تتقدم نحو الباب) .
- سيد : (لنفسه) يا نهار اسود .. دلوقت تعرف كل حاجة (سادا
الطريق إلى الباب) يا ستى اطمنى .. دا زمانه بقى كسويس
خالص .
- بهية : لازم اشوفه بعينى .
- سيد : طيب بس استنى شويه .. اما ادى له خبر .. استنى ثانية واحده
(يندفع إلى داخل الحجرة ويفلق الباب وراءه ، ويمد يده تحت
السريـر ليخرج محمود) محمود .. محمود ، قوم قوام .
- محمود : (فى دعر من أسفل السريـر) إيه .. إيه .. فيه إيه ؟ هى جت ؟

- هي جت؟ .
- سيد : هي مين دي .
- محمود : أم عبده ؟ .
- سيد : لا ما جتش ولا حاجه .. بس اطلع بسرعة ، بسرعة .. (يخرج محمود) نام فوق السرير .. يا الله يا أخى اتغطى بسرعة ، وقول آه .
- محمود : أقول آه ازاي ؟ .
- سيد : قول آه . الله يخرب بيتك . انت عندك مغص .
- محمود : هو يايه أصله ده ؟! أنا ما عنديش مغص ! .
- سيد : عندك مغص .. قول آه .. قول يا جدع .. قول وبس .
- محمود : آه .. آه .
- (تدخل بهية) .
- بهية : ماله .. مالك يا محمود ؟ .
- سيد : ما تكلمهش كثير لحسن المغص اتحرك عليه .. لكن ان شاء الله حا يروح حالا .. دا برد بسيط .. ما فيش خوف منه .
- (محمود ينظر بطرف عينيه إلى بهية في دهشة وإعجاب فيقرصه سيد فيصيح آه) .
- بهية : مسكين .. سلامتك .. ألف سلامه .
- سيد : يا الله بينا بقى .. لحسن حد يطب .
- بهية : لازم تحوط له حاجه سخنه على معدته .
- سيد : أيوه .. أيوه .. أنا حا اعمل له اللازم .
- (يجرها من يدها نحو الباب) .
- بهية : لازم تجيب له دكتور .. انا حا طلع اطل عليه بالليل .. لما تيجوا تناموا .
- سيد : طيب .. طيب .. بس يا الله بينا بقى .

- بهيمة : خذ بالك منه قوى ، علشان خاطرى .
سيد : علشان خاطرك ؟! علشان خاطرك حا اعمل كل حاجه .. كل حاجه فى الدنيا .. مستعد اعملها علشانك .
(تخرج بهيمة ، ويعود سيد مطرقا حزينا ويرتقى على مقعد ويضرق برأسه على كفه ويتهد) .

المشهد الثالث

- محمود : (مستمرا فى تأوّهه وقد أخفى رأسه تحت الملاءة) آه .. آه .
سيد : بس خلاص . كفايه . (يتأوّه فى يأس) آه .
محمود : (يرفع رأسه من تحت الملاءة) هيه خلاص مشيت . (يقفز واقفا) إيه الحكايه ؟ فهمنى ؟! إيه اللى جرى ؟!
سيد : (وهو مستمر فى إطرافه وإخفاء وجهه بكفه) ولا حاجه .
محمود : ولا حاجه ازاي !! كل ده ولا حاجه ! تصحبنى من عز النوم ، وتجرجرنى من تحت السرير وترمينى فوقه ، تقوللى قول آه ، آه ، وأسألك دلوقتى تقوللى ولا حاجه ، فهمنى إيه اللى حصل ؟ إيه اللى دخلها هنا وإيه اللى خلاك تقول لها ان انا عندى مغص ، وانا صاغ سليم ، فهمنى يا خال ، إيه اللى جرى ؟!
سيد : (فى ضيق ويأس) قولتلك يا أخى ولا حاجه ، سببى دلوقت .
محمود : ما يمكنش اسيلك الا لما اعرف إيه اللى جرى ، ورينى وشك كده (يزيح كف سيد عن وجهه ، فيرى عبرات صامتة تنساب على خديه ، فيبدو عليه التأثر والدهشة) الله إيه ده ، انت بتعيط . مالك يا خال ؟! قوللى جرى إيه ؟! قوللى الحقيقه . إيه اللى زعلك كده . أنا عمرى ما شفتك بتعيط أبدا . كلمنى يا خال ، أنا ما طيقش أشوفك كده ؟ قوللى إيه اللى حصل . أنا مستعد اعمل لك

- كل حاجة علشان اضيع زعلك .. بس فهمنى .
- سيد : (يتهد تنهده طويلة) ولا حاجة . ما فيش حاجة .
- محمود : مش ممكن ، لازم فيه حاجة حصلت .
- سيد : حصل حاجة مالهش علاج ، لانت ، ولا انا . ولا أى واحد يقدر يصلحها . سخره بسيطه من سخریات الدنيا . عبث هايف من عبث الأقدار ، (رافعا كفيه مادا شفته السفلى) حانعمل فيها إيه ، ما فيش غير اننا نستحملها ونسكت .
- محمود : إيه هواده ١٩ أنا مش فاهم حاجة أبدا . انت صاحب مبسوط وعمال تسبب فى شعرك وتبأ فى نفسك وبتقول انك بتخلق بأجنة الحب فى سماء السعاده . وبتقول ما فيش على وش الأرض مخلوق أسعد منك . لأنك عجب محبوب . وعندك موعد حب ، وخرجت علشان تقابل اللى بتحبها وتحبك .
- سيد : كنت فاكر كده .
- محمود : وبعدين ١٩ .
- سيد : وبعدين طلعت انها بتحب واحد تانى .
- محمود : واحد تانى ١٩ أمال كانت بتشاور لك وتضحك لك . وادتك الميعاد ليه ؟
- سيد : ما كانش ليه دا كله .. كان لواحد تانى .
- محمود : واحد تانى ١٩ . ازاي ؟!
- سيد : كانت بتحب واحد تانى ، وافتكرت ان اللى واقف فى الضلمه ويصفر لها بالنأى هو الشخص اللى بتخبه ، فشاورت له وسلمت عليه ، وادت له ميعاد .
- محمود : وعرفته يبقى مين ١٩ .
- سيد : يبقى اللى يبقاه ؟
- محمود : ازاي الكلام ده ، مين ابن الأروبه دا ، وانا اجيب لك خبره ،

أحببوك من على وش الأرض ؟.

سيد : ما فيش لزوم .

محمود : ما فيش لزوم ازای ! لازم اعرفه ؟.

سيد : ضرورى يعنى ؟.

محمود : طبعا .

سيد : انت ؟.

محمود : أنا ؟. أنا ؟. (مستغرقا في نوبة من الضحك) ، أنا ؟. مش

ممکن ، انت بتضحك علىّ يا خال ؟.

سيد : باکلمک جد يا محمود .

محمود : قول كلام غير ده يا خال !!.

سيد : دى الحقيقه ، إنت عارف انا بحبها ازای ؟.

محمود : ميت صبايه .

سيد : أهى هى كان كده .

محمود : بتحبنى أنا ؟ ليه ، وبتاع إيه ؟! وعلشان إيه ؟!

سيد : اللى حصل .

محمود : لكن أنا ما عنديش أى شعور ناحيتها ، دى مش النوع اللى يدخل

مزاجى أبدا ، دى واحده شريفه وعذراء ، وأنا لا أحب الشرفا ،
ولا العذارى .

سيد : ماهى دى المصيه .. ماهى دى السخريه .. لو كنا احنا الاثنين

بنحبها وانت اللى فزت بيها كانت بقت حاجه معقوله .. لكن أنا

أحبها ، وهى مش حاسه بيه ، وهى تعبدك ، وانت مش حاسس

بيها ، دى سخرية القدر اللى على أصولها .. دى مهارة الأقدار فى

تعذيب الإنسان وإيلامه .. لكن على العموم أنا مش عايزها تحس

باللى أنا حاسس بيه .. مش عايزها تتصدم الصدمه اللى أنا

اتصدمتها . مش عايزها تتألم زى ما أنا بتألم .. أنا مجرب الشعور ده

وعارفه ، وأنا لغاية دلوقت با احبها ، وحا فضل احبها طول
عمرى ، وما اقدرش افكر انها تتألم .. ما طيقش .

: (مندهشا) إيه يا خويه ده ، والعمل ؟ .

محمود

: العمل ما تكسفهاش .. زى ما كسفتنى ؟ .

سيد

: يعنى إيه ١٩ .

محمود

: يعنى عايزك تحبها ، وكان تخلص فى حبك لها .

سيد

: إيه ١٩! أحبها ١٩! واخلص فى حبي لها ١٩! إيه أصل ده يا خال ١٩! انت
جرالك حاجه ١٩ .

محمود

: اسمع يا محمود .. أنا باتكلم جد .. البنت دى مش بنى آدمه عاديه ،

سيد

دى ملاك ، وهى بتحبك حب ، ما تستهلوش أبدا .. لو كانت ،

بتحبني ربع الحب اللى بتحبو لك ده .. كنت حاسيت ان انا أسعد

مخلوق على ظهر الأرض ، ولو كنت اعرف ان الحب دا ممكن

الإنسان ينقله بسهولة كنت نقلته ، لكن انا عارف ان ما فيش فايده .

أنا يائس من حبها .. لكن حاسس ان انا عايز اسعدها ، ولو كنت

انا أقدر اسعدها بنفسى كنت سعدتها لكن المصيبة اللى يقدر

يسعدها انت ، وعشان كده لازم تسعدها .. لازم تحبها ، لازم

تكون كويس معاها علشان تستاهل حبها .. لازم تبقى إنسان

جد ، وتستقيم فى الدراسة علشان تبقى شخص محترم ولك مركز .

: يفتح الله .. أنا لا انا عايز احبها ولا امتاهل حبها .. أنا مبسوط كده

محمود

خالص ، كفايه على « زكيه ولعه » على أد إيدى ، وبسطانى

ومهيانى ، والأشياء رضا .. ابعدهنى يا خال وحياة ابوك أنا لا بتاع

حب ، ولا بتاع جد .. انت عارف من زمان ان انا ما ليش فى

الكلام ده .. وما تنساش ان البت زكيه نفعا نارضه لولاها كنا متنا

من الجوع ، أهى برضه بتنفعنا بقرشين بأكلتين ، وحكاية

الاستقامة فى المدرسة دى عارف معتها إيه ؟ انى النجح وانخرج ،

(أم رتية)

وتنقطع الفلوس الى يبيعتوها لنام البلد ، ولا يبقى عندنا مصاريق
مدرسه نضيعها ، ولا رسوم امتحان نتشربق بها ، ولا تمن كتب
تسدد بيها ديوننا ، واقعد معاك كده على باب الله . لا شغله ولا
مشغله ، انت عارف ان انا بتاع شغل ؟ وحياة أبوك يا خال سيينا
من السيرة دى ، خلينا كافيين نخيرنا شرنا .. كفايه ام عبده والى
عاملاه فينا ، انت راجل بتاع حب .. حب زاي ما انت عايز ، ما
حدش قال لك حاجه .. لكن تجرجرنى معاك ، وتقول عايزك
تحب ، وعايزك تبقى أهل للحب ، وعايزك تبقى جد ، وتستقيم ..
كفايه كده . يفتح الله . حد الله بينى وبينك .

(يسمع فجأة صوت صياح فراخ وضجة فى حجرة الفراخ .. ثم
يفتح باب حجرة الفراخ ويخرج قرقر من الحجرة وهو يسب
ويلعن محاولا حبس الفراخ فى الغرفة وفى يده قلة ، وفى الوقت
نفسه يصيب الذعر محمود وسيد فيقفان ويجمعان الأشياء وراء
الباب) .

محمود : أنا مش قلت لك انا طول الليل احلم بيها .. هات .. هات .. حط
الترابيزة كان .

سيد : بس يا أخينا .. كفايه كده .. هى كانت دبابه .. كفايه خالص .

محمود : والعن من الدبابه .. دى صاروخ .. دى ديناميت ، يا باى ، أنا يا
عم حا خش المطبخ .. كان فيه حته جنبه رومى قديمه . اياك يكون
الفارساب لنا منها حاجه .

سيد : وأنا اما خش اتوضا .

(يخرج الاثنان من الباب المؤدى للمطبخ ويقف قرقر فى
السطوح) .

المشهد الرابع

قرقر

: (بعد أن ينتهي من غلق الباب على القراخ) يا ناس يا هوه ، يا عالم ، حد في الدنيا يرضى بكده ، طول الليل ما اشوفش النوم . أنا قرقر المسيط ، ويحكم على الزمان ، وانا في عشة فراخ !! لكن معلش ، علشان يرضى المست ام عبده ، وعلشان ينسط شيخ السو ، الشيخ عجائب ، اللي طول النهار يزلط في حمام وفراخ وكباب ، ويعزم له تعزيمتين ويهزله هزتين ، وآل إيه يطلع العمل ، ياخي عملك اسود ومهيب على دماغك ، أنا قرقر ، انطرد من أودتي ، واترمى في أودة القراخ ، وطول الليل ديك الكلب ده ، ينقر لي في بطن رجلى .. وانا بغير من رجلى موت . خلاني بايت مسخس م الضحك ، حد في الدنيا يقول كده ، واحد ما ينامش من كتر الضحك ، طول الليل سهران اضحك ، وانا حالي يستاهل البكا ، وكل ما عيني تغفل شويه ، والا افكر شويه يزعل ، ويروح تقرني في بطن رجلى أروح مفرهدم الضحك . إلهي تنقص رقبته الشيخ زفت ، اللي نايم يشخر في الأودة وسايينى انا قرقر طول الليل مع القراخ . وياريت بلاقي ثانيه استريح فيها بالنهار ، الا طول النهار ما تفرغلوش طلبات ، اطلع يا قرقر ، انزل يا قرقر ، روح يا قرقر ، تعالى يا قرقر ، وياريت طلبات زى طلبات البنى آدمين ، الا طلبات لها المعجب ، وآخر تغليعه طالع لي فيها حكاية القله ، علشان ادوخ ، علشان اموت ، أنا عارف هو مش حايستريح الا لما يجيب أجلى . (يضع القله على كف يده ويتحرك في السطوح وهو يوازنها . تدخل عديله الخادمه وقد حملت الغسيل وكيس المشابك) .

- عديله : إلهي يعدها لك ، إيه اللي انت عامله دا يا واد يا قرقر ، انت حا تشتغل مع بتوع النقرزان ؟!
- قرقر : (يقف ويمسك القلعة من عنقها) اصطبحي وقولي يا صبح ، أنا مش ناقصك ، إيه طلعتك كده من النجمه ؟!
- عديله : أنشر الهدمتين اللي غسلتهم امبارح العشا وبيتهم طول الليل منقوعين ، إذا كتش اعمل كده ، حا يضيع مني النهار .
- قرقر : ما يضيع ، يعني وراكي إيه ، مؤتمر سان فرنسيسكو .
- عديله : سان إيه ؟! والله اتعدلت ولسانك مشي ، الله يرحم زمان ، أيام التريتر ، وجنية الحيوانات ، بقى انا ورايا إيه ؟ الشغل اللي مطربق على دماغى ده كله وورايا إيه ؟! الكنس والمسح والغسيل والطبخ والمناكفه والمناقره والمهاجره ، كل ده وماورايش حاجه ؟ ياخي نخلي حد يقول كده غيرك ، ليه .. هوا انا زيك ؟ طول النهار قاعد لى فوق السطوح زى تنابله السلطان لا شغله ولا مشغله .
- قرقر : اللي هوا انا ؟ طيب معلش ، انشري الهدمتين وانزلى ، نخليه نهار يفوت .. أنا اللي قاعد فوق السطوح ، ولا شغله ولا مشغله .. حا قول إيه ؟
- عديله : (يضع القلعه على كفه ثم يأخذ في السير بها كما كان يفعل) .
- عديله : (فى دهشه) : هو إيه أصله ده .. ما تفهمنى بس إيه اللي بتعمله .. انت جرالك إيه ؟
- قرقر : مالكيش دعوه .. انتى مش بتقولى لا شغله ولا مشغله .. سيبنى بقى فى حالى .. كفايه القرف اللي انا شايفه .
- عديله : طيب ما تزعلى .. حقك عليه .. بس قوللى إيه اللي بتعمله ده ؟
- قرقر : زى مانتي شايفه كده .. باتمرن .
- عديله : تتمرن على إيه ؟
- قرقر : ع الشغل .

- عديله : شغل !؟ سلامات يا شغل !! شغل إيه اللى بتتمرن عليه ده ياسى
 قرقر . يا ابن ام قرقر .. تكونشى بشتغل فى سيرك ولا حناش
 عارفين ؟
- قرقر : ومش عارفين ليه ؟ ما هو قدامكوا اهو .. على عينك يا تاجر .. فيه
 سيرك اكتر من السيرك اللى بشتغل فيه ده .
- عديله : سيرك إيه ؟
- قرقر : سيرك أم عبده .. أم عبده والشيخ عجائب .
- عديله : انت بتهرز ؟
- قرقر : بتكلم جد .. شوفى شغللك بقى خلىنا نشوف شغلنا . (يعاود
 سيره بالقله) .
- عديله : (مغتاضه) بقى اسمع بقى يا قرقر ، والنبي واللى نبى النبي نبى ..
 والولى واللى ولى الولى ولى . وال ..
- قرقر : (يقف فى ضيق) إيه بس عايزة إيه بلا نبى بلا ولى ؟
- عديله : إذا ما كنتش تقول لى إيه اللى بتعمله ده .
- قرقر : حاتعملى إيه ؟
- عديله : حارقع بالصوت .
- قرقر : مفيش لزوم ، حاقول لك .
- عديله : قول .
- قرقر : بقى انت عارفه ان الشيخ عجائب مفهم ستك ام عبده ان معمول لها
 عمل .. وان العمل ده هو اللى مطفش نوح افندى منها .. واللى
 مخليه مش طايقها .
- عديله : معقول .. له حق .
- قرقر : حق .. يا اخى انشا الله ينكسر حُقلك .
- عديله : ان شا الله انت .
- قرقر : هى ستك ام عبده ناقصه عمل .. دى هى نفسها عمل .. دى مش

تطفش نوح افندی و بس .. دی تطفش بلد .. أنا مش فاهم
الحکومه تايه عنها فين .. دی لو سابوها في القنال .. حا تطفش
الانجليز في ليله .. دی كانت تحيب لنا الجلاء في ثانيه .

: المهم ، خلينا في اللى احنا فيه هنا ، بتقوللى ان الشيخ عجائب مفهم
ستى ان معمول لها عمل ؟

عديلة

: أيوه .

قرقر

: وبعدين ؟

عديلة

: ولا قبلين ، عايز يطلعه .

قرقر

: له حق لازم يطلعه .

عديلة

: بس دا حا يطلعه على عنيه .

قرقر

: و انت مالك .. إيش حشرك ؟

عديلة

: مالى ازاي ؟ ما هو كله على دماغى ، هوا بيخلينى اون ثانيه ، أنا

قرقر

المستول عن كل الطلبات البايخه اللى بيطلبها ، ما هو لو كان العمل دا

حا يطلع كده زى كل حاجه ما بتطلع ، كانت هانت ، الا العمل

بتاع ستك ام عبده مش عايز يطلع ، الا بحاجات ما وردتش ،

مالهاش نظير ، ما سمعتش عنها عمرى .

: زى إيه كده ؟

عديلة

: خدى عندك ، أول حاجه طلبها ، جدى احول .

قرقر

: وماله .

عديلة

: وماله ازاي ؟

قرقر

: هات له جدى احول .

عديلة

: وهوا فيه جدى احول يا مغفله ؟

قرقر

: يوه ، ما فيش ليه ، هو مش فيه بنى آدم احول ؟

عديلة

: فيه .

قرقر

: يبقى لازم فيه جدى احول ، زى ما فيه بنى آدم اعمى وجدى

عديلة

- اعمى ، وبنى آدم اعور وجدى اعور .
- قرقر : أصل الاعمى والاعور دى فى إيدينا ، أقدر أجيب له جدى سليم
واخزق له عينه يبقى اعمى ، والا عين واحده يبقى اعور ، لكن
الاحول ده أحوله ازاي ؟
- عديلة : زى الناس .
- قرقر : يعنى إيه زى الناس ؟
- عديلة : يعنى جيب له معزه على يمينه ومعزه على شماله تبص تلاقيه يحول ، هو
البنى آدم بيحول من إيه ، من كتر البصيصه يمين وشمال ، من
فروغية عينه .
- قرقر : طب افرضى طلع جدى ، تقى ، جدى مطمطم ؟
- عديلة : حايحول أكثر .
- قرقر : طب انتبينام الجدى ، والفرخه الزعلانه ، دى أجيبها له منين ؟
- عديلة : فرخه إيه ؟
- قرقر : زعلانه ، ابن الرفضى ، لازم يعقدها ، يعنى إذا كانت مبسوطة ما
تنفعش ، ما يطلعش العمل ، أجيب له الزعلانه دى مسنين
بذمتك ؟
- عديلة : بسيطه خالص .
- قرقر : برضك أجيب لها ديكين ؟
- عديلة : لأ ديك واحد .
- قرقر : تقوم تزعل ؟
- عديلة : حانتبسط فى الأول .
- قرقر : تبقى مش نافعه .
- عديلة : اصبر عليه شويه .
- قرقر : صبرنا .
- عديلة : تجيب لها ديك ونسيه معاها .

- قرقر : سبتاه معاها .
- عديلة : حاتفرفش .
- قرقر : فرفشست .
- عديلة : تكبس عليها بتلات فرخات ، مره واحده . وتسيهم مع الديك .
- قرقر : حاتزعل ؟
- عديلة : تزعل ويس ، دى يمكن تنزل عليها نقطه .
- قرقر : يا سلام عليكى يا بت يا عديله ، يالى مفيش منك ، يسلم بقك ،
(يضع القله على كفه ويعاود السير) عن إذنك بقى اما اكمل
الشغل .
- عديلة : (فى غيظ) بينلك ، بقى بعددا كله ، وما تقوليش بتعمل إيه ؟
- قرقر : أيوه والله كنت حانسى ، حاقول لك ايه .
- عديلة : قول .
- قرقر : بقى يا ستى .. الراجل الضلالى طول النهار ما كفاهوش الطلبات
المعقده اللى بيطلبها ، واللى مدوخنى بيها ، لا ، آخر المتحمه ، قال ان
العمل ده مش حانعرف هو موجود فين الا بطريقة القله .
- عديلة : طريقة القله ؟
- قرقر : ايزه يا ستى طريقة القله .
- عديلة : ودى تبقى إيه دى كان ؟
- قرقر : قال نملا قله للآخر .
- عديلة : وبعدين ؟
- قرقر : واحد يحطها على كفه ، كده .
- عديلة : بسيطه .
- قرقر : لا مش بسيطه ، يفضل فارد دراعه بيها .
- عديلة : حاجه سهله ، انا اقدر اعملها .
- قرقر : يا ستى اصبرى على لما اكملك .

- عديلة : طيب كمل ، أنا أصلى عارفك قليل الحيلة .
- قرقر : يفضل فارد دراعه كده ، وماشى بيها ، ماشى ، ماشى . ماشى .
- (يأخذ في السير) .
- عديلة : وبعدين .
- قرقر : يفضل ماشى ، (يأخذ في السير) .
- عديلة : خلاص ، فهمنا ، وآخرة المشى !؟
- قرقر : لحد ما تتدغدغ رجليه ، ويتقطم وسطه . ويتخذل دراعه ، وتقع القله تتكسر .
- عديلة : طب وبدال ما يفضل ماشى لغاية ما يجراه كل اللي حا يجراه ده مايدشدها من الأول ويرج نفسه .
- قرقر : ما ينفعشى ، لازم يسيبها لحد ما تقع من نفسها .
- عديلة : طيب وقعت من نفسها .
- قرقر : يطب وراها في الأرض ، والخته اللي تقع فيها ، يفضل يحفر فيها لغاية ما يطلع العجل .
- عديلة : يا سلام ، أما طريقه مدهشه ، وجربتها دي يا قرقر !؟
- قرقر : جربناها .
- عديلة : ازاي .. احكى لي احكى ، حصل إيه !؟
- قرقر : خرجت أول امبارح العصر . بعد ما مليت القله لثمت عينا ، وفردت إيدي بيها كده ، ونزلت السلم . وخرجت من الباب ، أقول لك الحق ، أنا كنت مكسوف وعارف ان الناس حا تضحك عليه ، وقلت أخرج بيها كده قدام الست ام عبده ، أهو برو عتب ، وبعدين أدشها في أقرب حته بدل ما مشى بيها في الشارع وافرج الناس عليه ، لكن لما نزلت الشارع الفار لعب في عبي ، وقلت يمكن تكون الحكايه صحيح ، ولو وقعتا بالعنيه يمكن ما يطلعشى العمل ، قولي الشهامه مسكتني وضميرى أنبى وقلت يا واد امشى

واستحمل .

عديلة

: لك حق ، طول عمرك شهر .

قرقر

: مشيت ، من شارع السد على ميدان السيده ، والعيال حواليه
والنقوره دايره ، شقع بقع يارب تقع . وكل من هب ودب يرقعني
بكلمه ، لحد ما وصلت شارع خيرت على عابدين ، حسيت ان
دراعى خلاص ابتدا يتصلب وكفى حا ينخلع ، ضغطت على
نفسى . وفضلت ماشى ، ماشى ، لغاية ، ما حسيت زى اما يكون
دراعى اتشل ، ما بقيتش حاسس بيه خالص ، ومره واحده ، القله
طبت انكسرت .

عديلة

: وبعدين ، عملت إيه ؟

قرقر

: رحت طابب وراها على الأرض ، ورافع الفاس اللى شايله فى إيدى
التانيه ، وهات يا حفر . فضلت احفر ، احفر ، احفر .

عديلة

: لغاية ما طلعت العمل ؟

قرقر

: لا ، لغاية ما جى العساكر وودونى القسم ، وبيتونى ليله على
الأسفلت .

عديلة

: ليه ؟

قرقر

: لأنى كنت بحفر فى وسط ميدان العتبه ومعطل حركة المرور كلها .

عديلة

: يا خساره ، والعمل ؟

قرقر

: عمل اسود ، لازم سفلتو فوقوا تانى .

عديلة

: والشيخ عجائب قال لك إيه ؟

قرقر

: ولا حاجه .. هو خاسس عليه إيه ، قاللى اطلع تانى مره ، وامشى
حسب القله ما تودينى يعنى مش زى ما أنا عايز .. أميل مطرح ما
تميل .. مالت فى عطفه ادخل فى عطفه ، مالت فى زقاق ادخل فى
زقاق ، دخلت فى بيت ادخل فى بيت .. عشان المره دى .. مش
يودونى قسم الموسيقى وبس .. يودونى قره ميدان على طول ، إياك

ينبسط الشيخ السو .. إياك يرضيه ، أنا عارف هو مش حايستريح
الا لما يجيب داغى . لكن أنا مش حاسكت له ، مش كل الطير اللي
يتاكل لحمه ، لازم اجيب داغه قبل ما يجيب داغى .. لازم اطربقها
عليه .

(يندفع في ثورة من الغضب ويرفع يده بالقلعة ويهوى بها على
سقف الحجرة التي ينام فيها الشيخ عجائب فتكسر القلعة وينزل
ما بها من مياه على الشيخ عجائب من خلال فتحات السقف
الخشبى ويسمع استغاثات الشيخ عجائب وتأففه من المياه النازلة
فوقه) .

عديلة : يا منيل على عينك ، انت اتجنتت والا جرى لعقلك حاجه ..
الراجل يقول إيه دلوقت ؟

فرقر : ولا حاجه .. نظره .

عديلة : نظره ؟

فرقر : أيوه نظره .. حاجه عجيبه ، السما ما بتنطرش أبدا ...

عديلة : والسما اللي نظرت دى مش بتنطر في كل حته ؟

فرقر : لا .. بعض ساعات تنطر في حته وما تنطرش في الحته الثانية .

عديلة : يعنى النظره ما عجبتهاش حته تنزل عليها في كل الدنيا الواسعه دى

غير أودة الشيخ عجائب ؟

فرقر : أيوه .. لأن ده السطح البارد الوحيد اللي قابلته .. دى نظريات

علميه ما تفهميهاش .. حاجات عرفتيا زمان لما كنت في كتاب

الشيخ زكى ، وعلى العموم علشان نسبكها عليه نعمل لها شوية

تحايش .

(يخرج من جيبه بطارية ثم يضيئها عدة مرات سريعة متوالية)

دابرق (يدق ضربات فوق سطح الحجرة أشبه بالرعد) ودارعد

(يصفر صفيرا أشبه بالريح) ودى العاصفه .. أظن بعد كده يبقى

ما لناش ذنب ، وإذا ما صدقش انها نظره .. عنه ما صدق ، أنا عملت اللى عليه .. يعنى هى السما بتعمل إيه أكثر من كده .
(يسمع صوت أم عبده من بير السلم) .

: بت يا عديله .. بت يا عديله ، انت غمى فوق والا إيه ؟!

: يا حفيظ .. زمارة الخطر .

: أيوه يا ست ، أصل الجبال كانوا وسخين قوى وكنت بامسحهم .
(يسمع صوت أقدام صاعدة بالققباب) .

: يا نهار اسود ، دى طالعه .. القضا المستعجل طالع .. اخلصى يا عديله ، دلوقت تخش للشيخ عجائب علشان يرقها .. فتعرف اللى حصل ، وتشوف القله المكسوره اسمعى أنا لازم استخى .

: خش فى أودة الفراخ .

: ما فيش فايده .. حا تدور عليه وتقفشنى ، اقول لك .. أحسن حاجه أخش عند الجماعه دول (يشير إلى حجرة سيد ومحمود) .

: لكن دول ساكين الأودة وبقالهم مده ما بيجوش .

: لا أنا عارف انهم موجودين بس يطلعوا على مواسير الميه وبيدخلوا من الشباك علشان ام عبده ما تقفشهمش وتطالبهم بالأجرة المتأخره .

: طب وحا يرضوا يفتحوا لك ؟!

: طبعا .. إحنا فيه بيننا وبين بعض عمار ، فيه موده .. انا وهم على ام عبده . (تنهك عديله فى النشر ويستمر صوت الققباب فى الاقتراب) .

(يطرق قرقر الباب وفى هذا الوقت يكون سيد خارجا من دورة المياه يجفف وجهه استعدادا للصلاة) .

(سيد يقف متسمرا فى حالة فرع .. قرقر يعاود الطرق دون أن يحيب عليه أحد) .

أم عبده

قرقر

عديله

قرقر

عديله

قرقر

عديله

قرقر

عديله

قرقر

- قرقر : افتح يا سى سيد افندى .. افتح انا قرقر ، افتح بسرعه .. انا فى عرضك .
- (سيد يزيح ما وراء الباب ثم يفتحه ، فيدخل قرقر ويغلق الباب وراءه) .
- سيد : إيه ؟ فيه إيه ؟ .
- قرقر : القضا المستعجل طالع .
- سيد : القضا المستعجل ؟
- قرقر : أيوه أم عبده .
- سيد : يا نهار اسود ؟! طالعه هنا ؟
- قرقر : أيوه ، فى السطوح .. طالعه للشيخ عجائب عشان ييخرها ويرقيها ويلبسها الحجاب .
- سيد : طيب وانت خايف ليه ؟!
- قرقر : أصل عملت فى الراجل خازوق ، وخايف لا تطلعه من عنيّه ؟
- سيد : طيب اقعد لما اصلى ركعتين .
- (سيد يبدأ الصلاة ، ويجلس قرقر وراء الباب ينظر من خلال الثقب) .
- (تظهر أم عبده صاعدة من السلم فى السطوح) .

المشهد الخامس

- أم عبده : مش خلاص والا حاتفلى تنشرى فى الهدمتين طول النهار .. آمال فين قرقر ، لسه ما صحيش ؟!
- عديلة : ما اعرفش والنبي يا ستى ، انا من ساعة ما طلعت ما شفتلوش أثر .
- أم عبده : لازم لسه بيشخر .. هوا دا عنده دم ، عايز الخدامين بتوع أبوه يصحوه ، لازم ينام لى لغاية الضحى . (تقترب من عشة

(الفراخ) واد يا قرقر ، انت يا واد يا قرقر ، قوم فز اصحى ..
 هى نومة أهل الكهف ، قوم يا الله (لا يجيب عليها أحد .. تفتح
 التقفيسة وتمد رأسها إلى الداخل فلا ترى غير الفراخ) ما هواش
 نايم جوه .. هوا راح فبن يا بت ؟

عديلة : انا عارفه يا ستى .. هوا حد عارف له قرار ، أهو داير ينطزى فرقع
 لوز .

أم عبده : يمكن نايم مع الشيخ عجائب ، مع ان انا قلت له يسبب له الأوده ولا
 يعتبش جواها علشان ما يضايقش الراجل ويعطله .. الراجل وراه
 شغله .. طول الليل ما يطلش قرايه وكتابه وتعزيم .. ربنا ينجحه ،
 ويطلع لى العمل الى علبش لى الراجل ، ومهججه .
 (تنقر بسابتها على باب حجرة الشيخ عجائب) .

الشيخ عجائب : (من الداخل) ها .. مين ؟

أم عبده : (بصوت رقيق) أنا .

الشيخ عجائب : (لا يسمع) مين اللى بيخبط ع الصبح مش كفايه التعب والسهر
 والدوشه اللى شافينها طول الليل ؟

عديلة : افتح يا سيدنا الشيخ دى الست ام عبده .

الشيخ عجائب : طيب يا ست ام عبده .. لا مؤاخذه ، حالا .

(يفتح الباب ويدو مبتل الوجه والثياب) .

الشيخ عجائب : عدم المؤاخذه .. أنا افكرت .. الواد قرقر .

أم عبده : أنا صحتك م النوم ؟

الشيخ عجائب : هوا انا باشوف النوم .. وآخر الليل جيت اغفل شويه .. لقيت
 النظره نازله ترخ .

أم عبده : نظره ؟ نظرة إيه ؟! هى الدنيا نظرت يا بت يا عديله ؟

عديلة : (مرتبكة) والله يا ستى مانا عارفه .. يمكن قبل ما اطلع .

الشيخ عجائب : لا .. لا .. دى نظرت حالا دلوقت السقف خر على غرقتى .

أم عبده : يمكن ندا يا سيدنا الشيخ ؟

الشيخ عجائب : ازاي .. دى نظره .. برعد ، وبرق ، وعواصف .

أم عبده : كان ؟

عديلة : يمكن يا ستى من عمایل الجن والعفاريت .. ما هو سيدنا الشيخ

طول الليل يحضر فيهم .. اللهم احفظنا .

الشيخ عجائب : على العموم يا ست هانم أحسن حاجه تشوفى لنا أوده تانيه يكون

سقفها كويس ، علشان لما النظره ترخ علينا تالى ما تبقاش تنزل

تفرقنا وتتلف شغلنا .

أم عبده : أنا برضه بفكر فى كده .. بقول انى ادبك أودة الجماعة النصايين

دول اللى بقى لهم ثلاث تشهر ما بيدفعوش الأجره .. أحسن حاجه

ان انا اعز لهم وافضيالك .

الشيخ عجائب : كتر خيرك يا ست هانم .. علشان نعرف نشوف شغلنا كويس ..

الحاجات دى عايزه تعب ، وعايزه سهر اتفضلى جوه .. أما

اوريكى أنا عملت إيه طول الليل .. اتفضلى (قدخل أم عبده فى

الحجرة ، وتحمل عديله السبت وتهبط به) .

المشهد السادس

(سيد ينتهى من الصلاة .. محمود يدخل من المطبخ ... قرقر

يرقب من ثقب الباب) .

محمود : الله !! إيه ده ؟ إيه اللى جابك رهنا يا قرقر ؟

سيد : لاجىء سيماسى .. هارب من العدو المشترك .

محمود : يعنى إيه مش فاهم ؟

قرقر : طب بس ما تعلقش صوتك ، الوليه قاعده برة .

- محمود : ولى مين ؟
 قرقر : أم عبده .
 محمود : يا نهار اسود !! يره .. يره ! يعنى فى السطوح ؟
 قرقر : أيوه .
 محمود : يا لطيف ، وقاعدين كده ساكتين ؟
 قرقر : على العموم هى دخلت دلوقت فى الأوده بتاعتى عند الشيخ عجائب ، ودلوقت زمانها ملخومه فى الأحجبة والبخور ، وزمان الراجل عمال يرقى فيها .
 محمود : يعنى ما فيش خوف ؟ فيه حال أمان ؟
 قرقر : أمان مؤقت .. وبعده .. الخراب المستعجل .. فيه أنباء سيئه جدا عرفتها دلوقت .
 سيد : إيه هى ؟
 قرقر : بعد عشر دقائق بالكثير . حا تصبحوا بلا مأوى .. حا تبقوا كده زى حالاقى .
 محمود : يعنى إيه ؟
 قرقر : يعنى حا تنظردوا ، الشيخ عجائب ، حا ينتقل فى الأوده بتاعتكم لأن الأوده بتاعتى اللى هو فيها دلوقتى سقفها بيخر .
 سيد : بيخرا إيه ؟ هوا ؟
 قرقر : لا .. ميه .
 سيد : ومتين جات له الميه ؟
 قرقر : نظره .
 محمود : نظره ؟ مش ممكن ، الدنيا ما نظرتش أبدا .
 قرقر : مطر صناعى .. مطر قناوى .
 سيد : إيه يا سيدنا الكلام اللى بتقوله ده .. مطر فى الصيف ؟
 قرقر : لا .. أصل انا اتغظت منه وكسرت القله على نفوخته .. المهم ان

القضا المستعجل قال انه حاي نقله في الأوده بتاعتكم دلوقت .. فايه العمل ؟!

سيد : إيه العمل ؟. دى تبقى كارته .. دى تبقى تكبه حانروح فين وننام فين ، ونودى العفش دافين .. داحنا ما معناش اللضا .

قرقر : على العموم بسيطه ، نقعد سوا في الأوده بتاعتى . والا تناموا فيها وانا انام في أودة الفراخ ، وعوضى على الله . بس المهم انكم تزوغوا دلوقت قبل ما تقفشكم .

محمود : لكن ازاي تاخد الأوده بتاعتنا .. دى ما لهاش حق قانونى .. احنا مأجرين منها أجره بالسنة .. ولنا الحق ان احنا نقعد لغاية آخر السنة .

سيد : أيوه يا أستاذ .. لك الحق لو كنت بتدفع الأجرة .. أو لو كان معك فلوس دلوقت تدفعها .. لكن عايز تقعد ولا تدفعش .. حاجه مش معقوله . إذا كنا عابزين نقارح ونبت في الأوده لازم اقل ما فيها نكون دافعين الأجرة المتأخره .. بس لو تسيينا يوم والا يومين ، كان الواحد قدر يدير المبلغ .

قرقر : ما فيش فايده ، بعد نص ساعه حا تكون مسئوليه على الأوده ، أنا عارقها كويس .. دماغها ناشفه .

سيد : والا حد بس يشوف لنا سلفيه !

محمود : سلفيه متين يا خال ، داحنا مديونين للشارع كله ، المكوجى ، والبقال ، والخضرى ، والجزار ، وبتاع البسبوسه ، وبتاع لحمه الراس ، وبتاع القول والبليله السخنه ، يعنى مفيش حد يا منا أبدا .

قرقر : بس يا جماعه انا سامع صوت رجلين .
(يبدو في السطوح عم على بائع القول ويتجه إلى باب الحجرة ويطرقها) .

(الجميع يصفون .. يزداد الطرق ..) .

(أم رتية)

- عم علي : هو إيه أصله ده ، ده اسمه نصب ، انتوا عايزين تاكلوا بلاش ، بقالى خمس تيام وانا آجى علشان الشلن اللى انتوا واخدين بيه .. دا حتى حرام ما يرضيش ربنا .
- قرقر : (ينظر من ثقب الباب .. هامسا) داعم على بتاع الفول ، مشى خلاص .
- سيد محمود : (الاثنان يتفشان الصعداء) .
- سيد محمود : ها .. وبعدين .. العمل إيه ؟
- سيد محمود : ولا قبلين .. ما فيش قدامنا غير الطريق الوحيد ده (يشير إلى النافذة) .
- سيد محمود : أيوه بس حانات فين بعد كده ؟! والعفش والحاجه بتاعتنا حانعمل فيها إيه ؟
- سيد محمود : يا أخى يبقى يحلها ربنا .
- قرقر : هس .. فيه صوت رجل تانيه .
- سيد محمود : (يدخل عم إبراهيم بائع لحمة الراس .. ويطرق الباب) .
- عم إبراهيم : لا .. ما هو ما ينفعش ده .. أنا ما فياش نفس اطلع كل يوم السلام علشان الريال من غير فايدة .. دانتوا أفنديه محترمين امال خلتيوا إيه للهلافيت .. لما انتوا مش أد الجواهر .. تاكلوا جواهر ليه ؟! كلوا أباه .. كلوا كرشه .. معلش مسيركو تقعوا فى إيديه ، وانا اوضبكوا كويس .
- قرقر : (ينظر برهة ولكنه يأس فينصرف) .
- قرقر : (ينظر من ثقب الباب هامسا) دا عم إبراهيم .. يا جابر ..
- سيد محمود : يا ساتر .. هولسه واقف ؟!
- قرقر : لا .. مشى والحمد لله .

- سيد : (متهددا) الذى لا يحمد على مكروه سواه .
- محمود : ودلوقت يا الله بنا يا خال نزوغ بسرعه من الشباك قبل ما الوليه
تغلب علينا ونروح فى شربة ميه .
- سيد : مش بس يا أخى تفكر فى الحكايه كويس ، حانات فين ، ونودى
الحاجه بتاعتنا دى فين ؟
- محمود : بعدين تفكر فى الحاجات دى كلها ، المهم اننا نزوغ دلوقت .
(يأخذان فى ارتداء ملابسهما) .
(يسمع صوت أقدام أخرى تقترب ويدو فى السطوح الشيخ
زين يرتدى جلبابا بلديا .. يطرق باب الحجره) .
- سيد : ودامين دا كان ؟
- قرقر : (من ثقب الباب) مش باين ، ما عرفش يبقى مين شحط كبير
قوى سادد الباب .
- محمود : يعنى حا يطلع مين ؟ مندوب البنك الأهلئ ؟ أهو لازم واحد من
الديانه ، تلاقيه عم حلاوه بتاع البسبوسه ، والا الحاج عضمه
الجزار .
- سيد : لكن دا ما بيتكلمش .
- (زين يستمر فى الطرقي على الباب) .
- محمود : لازم ناوى على الشر ، لازم بيخمن لنا على حاجه . (زين يمل من
الطرق فيجلس أمام الباب) .
- قرقر : يا نهار أسود ، ده قعد ، ده مبلط خالص ، يعنى مش ناوى يعتقكم
أهدا .
- محمود : قلت لك يا خال ، النهارده باين من أوله ، يا الله وحياة أبوك بنا
نزوغ من الشباك ، أنا حلمت الليله الى فانت حلم وحش قوى .
(يتجه إلى الشباك ويهم بإخراج ساقه ولكنه يتراجع) .
- محمود : يا وعدى ، الظاهر انها طبلت من كل ناحيه .

- سيد : إيه ؟ فيه إيه ؟ .
- محمود : الطريق مقفول .
- سيد : يعنى إيه مقفول ؟
- محمود : يعنى الست بيه ، بسلامتها واقفه فى البلكوند الى تسبص على
المواسير ، يعنى حاتكشفنا ، على كده مش حاتقدر ننزل .
- سيد : وبعدين ؟!
- محمود : (يتقدم مرة أخرى إلى الشباك) على العموم أنا حانزل ، ميت بيه
ولا واحد ام عبده ، يعنى حاتعمللى إيه ؟
- سيد : (يحسك به) مش ممكن .. ما يصحش نتفضح قدامها .. ما
يمكنش اخليك تنزل ابدا .
- محمود : يا سيدى انت مالك ، أنا ما يهمنىش .. أنا حانزل وحدى ، خليك
انت ، ما دام مكسوف من الست بيه (يتقدم إلى الشباك ثم
يتراجع ثانية فى يأس) خلاص ، اتفقلت من كل ناحيه .
- سيد : فى إيه تانى ؟!
- محمود : نوح افندى واقف فى الشباك الى قصاها ، وعم على واقف فى
الشارع بعريه الفول والبليله السخنه ، يعنى عاملين علينا حركة
كأشه ، حصار من جميع الجهات . خلاص . رحت بلاش (يجلس
فى يأس) .
- سيد : (لقرقر) وأخينا دالسه برضه قاعد بره ؟!
- قرقر : (ينظر من الثقب) دا مصمم ، ما فيش فايده .
- (يسمع صوت أقدام .. تظهر عديلة فى السطوح) .
- سيد : ودامين تانى ؟!
- قرقر : عديلة ، لو اعرف انده لما يمكن تسرب لنا اللوح الى مبلط على
الباب ده ، بس حانده لها ازاي ؟! اهى دى الى تقدر تنقلنا ، يا
نهار اسود دى راحة الأوده التانيه ، استنوا شويه اما نشوف إيه

اللى حا يحصل .

(توجه عديلة إلى باب حجرة الشيخ عجائب وتطرق الباب) .

الشيخ عجائب : (من الداخلى) مين ؟

عديلة : أنا عديله .

أم عبده : عايزه إيه يا عديله ؟

عديله : الباميه حا نعملها بالسلق ولا بالقوطه .

الشيخ عجائب : انا احبها بالسلق .

أم عبده : استنى انا جايه لك .

(تخرج أم عبده وقد علقت على صدرها حجابا ووراءها الشيخ

عجائب) .

الشيخ عجائب : الحجاب ده ، ما تقلعش أبدا ، انا بقالى ثلاث تيام با اعمل فيه ،

وان شاء الله النهارده حيا نشوف حكاية العمل ، لازم أطلعاه بإذن

الله . بس انا عايز آخذ حته من أترك . اتفضللى جوه شويه .

(يعود الاثنان إلى الحجرة) .

قرقر : (يصف ما يراه) أم عبده على الباب .. الشيخ عجائب وراها .

الشيخ عجائب دخل الأوده . أم عبده دخلت وراه . عديله واقفه

بتقصع .. اللوح قاعد زى ما هو ، ما بيتعتش ، أم عبده

خرجت ، الشيخ هباب خرج .

المشهد السابع

(أم عبده تخرج ووراءها الشيخ عجائب) .

الشيخ عجائب : ودلوقت وحياة أبو كى يا ست أم عبده ابعتى لى الفطار .

أم عبده : عنيه يا سيدنا الشيخ ، عنيه .

الشيخ عجائب : بس امبارح كان شويه وانت عارفه ان انا طول الليل سهرا

وتعبان .

قرقر : (من الداخل) قوى ، الله يكون فى عونك .

الشيخ عجائب : وعائزك تبعنى لى أد ست بيضات مقلين واذا كانت عندك حنة قشطه على شوية غسل نخل ، يبقى كويس ، بلاش القول لأنه يعمللى عسر هضم ، إذا كان تقدرى تبعنى لى رطل بسبوسه غلشان احلى بيه ما فيش مانع ، أصلى ما حبش اتقل كده .. طلبات حفيفه .

أم عبده : من عنيه يا سيدنا الشيخ .

الشيخ عجائب : وحكاية الأوده الى قلت عليها ؟

أم عبده : دلوقت حالا .. هات الحاجه بتاعتك كلها وانتقل فيها دلوقت ،

دول جماعه نصايين .. حراميه .. أنا حاعرف اوربهم ازاي .

(يدخل الشيخ عجائب لإحضار ملابسه وصندوقه ومعداته

وتتجه أم عبده إلى باب الغرفة) .

قرقر : يا تنهار اسود .. استندونى .. خلاص .

محمود : حا تعمل إيه دلوقت ؟ قول قوام .

سيد : أنا عارف .

(يجلس الثلاثة فى يأس .. أم عبده ترى الشيخ زين) .

أم عبده : وانت مين ؟

الشيخ زين : أنا الشيخ زين .

أم عبده : وعائز إيه ؟

الشيخ زين : عائز الجماعه الى هنا .

أم عبده : ما بيجوش .

الشيخ زين : حا ستاهم .

أم عبده : مش حا بيجوا أبدا .

الشيخ زين : برضه حا ستاهم .

- أم عبده : خلیک مستنی (إلى عدیله) بت یا عدیله .. انزلی قولی للأسطی
أحمد النجار یجی یکسر لنا الیاب ده .
- عدیله : حاضر یا ست .
- (الشیخ عجایب یحول مهماته أمام الباب) .
- محمود : یا جماعه لازم نشوف لنا حل .. احنا حافضل قاعدین کده ..
لازم نستخیی فی حته .
- سید : ما فیش فایده ، دی حاتخش تدعس هنا وهنا وحا نتکشف لو
استخیینا فی آی حته .. ومش حاینبونا غیر الکشفه .
- فرقر : (ینظر إلى الشوالات الفارغة) اسمعوا یا جماعه أنا عندی فکره
کویسه .
- محمود : إینه هی ؟
- فرقر : کل واحد منکم یدخل فی شوال واربط علیه وارکنه جنب بقیه
الشوالات .. ومش معقول أبدا حد حایفکر فی فتح الشوالا دی .
- سید : بقی معقول اننا نتحبس فی الشوالات ؟
- فرقر : مش معقول إیه ؟! خمس دقائق لغایه ما تنزل ام عبده .. وبعدين
اسرب لکم الشیخ عجایب .. وتزوغوا بعد کده .
- سید : لکن بس .. حکایه اللشوله دی !
- فرقر : ما فیش حل غیر کده .
- سید : أنا کان عندی انزل احسن علی المواسیر .
- محمود : ما خلاص حکایه المواسیر دی ما فیهاش فایده کل الطرق مقفله ..
الظاهر ان حکایه الشوالات دی ما فیش منها مفر .. هی الطريق
الوحید لإنقاذ ما یمکن إنقاذه .
- سید : یا ناس .. کل ده علشان ثلاثه اربعه جتیه ، ثلاثه اربعه جتیه نسد
بهم بق الولیه ، ونخلینا بقیمتنا بدل البهلله فی الشوالات .
- محمود : طب ما نخط العفش ورا الباب زی ما کنا حاطینه ؟!
- فرقر : ما فیش فایده دی بعثت تجیب النجار ومصممه علی الاستیلاء علی

- الأودة .. ولو أدى الأمر انها تخلع الباب .
- محمود : طب وانت حاتعمل ايه ؟!
- قرقر : ولا حاجه حاعمل نفسى بردت بالليل من أودة الفراخ ولقيت باب الأودة مفتوح قدخلت وسكيتته ونمت .
- (تحضر عديله ومعها التجار الذى يبدأ فى كسر الباب) .
- قرقر : يا الله يا جماعه .
- (يدخل كل منهما فى شوال ويربط عليه ، ويضعهما بجوار بقية الشوالا ، ثم يرتقى على الفراش ويغط فى النوم) .
- أم عبده : (تدخل فترى قرقر على الفراش) . يوه .. ودإيه دا كان ؟!
- عديلة : دا قرقر يا ستى .
- أم عبده : ينيلك يا قرقر .. إيه اللى جابك هنا ؟ دا انا دخت عليه ، ولسه نائم لغاية دلوقت .. قوم فر .. قامت قيامتك وانتصب ميزانك .. متمطع قوى على السرير تقولشى فى بيت ابوك .
- قرقر : (يقف ويفرك عينيه) .. هو إيه ده ؟! يعنى انا كفرت ؟!
- أم عبده : أخرج يا الله ، فضى الأودة لسيدنا الشيخ .
- قرقر : طب والناس اللى ساكنين فيها ؟
- أم عبده : دول نصايين .
- قرقر : والعفش بتاعهم ؟
- أم عبده : أنا احجز عليه لغاية ما يدفعوا القلوس ، حانزلوا عندى فى الشقه ، إذا ما دفعوش .. حايبعه .. أما اشوف يا أنا ياهما .
- قرقر : تنزليه فى الشقه ؟! مش ممكن .
- أم عبده : مش ممكن ليه يا عمر .. حايستعصى ؟!
- قرقر : لا بس مش شايف انه يستاهل .. كله شوية كراكيب على كام شوال .
- أم عبده : أحسن من عنيتهم .. اللى يجى منه أحسن منه . أنا ما يتكلش حقى أبدا .

- قرقر : بس طول بالك .. ما تبقيش كده يا ست طبعك حامى .. كل حاجه بالدوق كويسه .
- أم عبده : ذوق !؟ سلامات يا ذوق .. هما فاكيرين إيه . فاكيرتها تكيه .. فاكيرتها أردغانه .. فاكيرتها شفت .. فاكيرتها نهب .. أنا لازم أفرجهم .. لازم ادوخهم زى مادوخونى ، لازم افضحهم فى الحى كله وافرج عليهم الى يسوى واللى ما يسواش .
- قرقر : يا ست ما فيش لزوم . دول ناس طيبين وطول عمرهم ما حدش سمع لهم حس ولا خبز .
- أم عبده : اخرس انت .. ما حدش عملك محامى . نخش يا سيدنا الشيخ ، (إلى عديله) وانت يا بت يا عديله نخشى حولى العفش ده مع قرقر ونزلوه تحت (قرقر وعديله يحملان الشوال الذى به سيد) .
- عديلة : هوا ماله تقيل كده ؟ حاطين فيه زلط ؟
- قرقر : شيلى من سكات .. بلاش غلبه .. لازم تنسحى من لسانك . حاطين زلط حاطين زفت احنا مالنا .
- (قرقر وهو خارج ينظر فيجد الشيخ زين ما زال جالسا فينظر إليه فى تهكم وغيظ) .
- قرقر : وانت يا أختينا .. مستنى إيه ؟
- زين : مستنى الجماعه .
- قرقر : جماعه !؟ جماعة مين ، قوم ، قوم ، ما فيش لزوم .. الجماعه خلصوا خلاص .. الجماعة بقوا عفش .. والعفش انشال .
- زين : يعنى إيه !؟ عزلوا ؟
- قرقر : بيعزلوا دلوقت ، ما شيين قدامك اهم .
- زين : طب واروح لهم فين !؟
- قرقر : ما فيش فايده . ما فيش داعى تروج لهم أبدا . مش حاتعرف تاخذ منهم لاحق ولا باطل .. دول ما حيلتهمش اللضا . مش حايدوك ولا ملين .

زين : ما حيلتهومش اللضا ؟ هو انا جاي اشحت ؟ هو انا محتاج ؟ . وهو انا عايز منهم حاجه ، أنا جايب لهم قرشين من البلد ، معايا عشرين جنيه عايز اديهم لهم .

قرقر : (يترك الشوال يسقط من يده من فرط الذهول) يابن القديه !! معاك إيه ، عشرين جنيه ؟! الله يخرب بيتك بحق جاه النبي .. وقاعد المده دى كلها ما بتقولش حاجه ؟! طيب هات الفلوس ، هات ، إيدك .

زين : أجيب الفلوس ؟ ليه أهيل ؟ .. عبيط ؟ .. أدبك الفلوس ازاي ما يمكنش ، لازم أسلمهم لهم يدا بيد . وبعد فحص وبحث وتمحيص وتديق وإثبات الشخصية والذي منه .

قرقر : ما فيش لزوم لحكاية الفحص والبحث دلوقت .. ادبنى الفلوس الله يسترك وبعددين ابقى افحص وابحث زى ما انت عايز .

زين : ازاي ؟!

قرقر : لأن الفحص والبحث مش ممكن دلوقت .. لو بحثت عنهم دلوقت حا تلاقهم هما والرز والفاصوليا والبقول المدشوش واحد . هات الفلوس تكسب فيهم ثواب .

زين : أنا أدبك الفلوس ؟ ليه ؟ اتبيلت ؟ اتخطت في نافوخي . عايز تضحك عليه . فاكرني غشم .. يا ضلالى يا نصاب .. يا محتال .. يا حرامى .. أدبك الفلوس علشان تضرب عليهم عياف .. فاكرني هفيه ، دا انا اوديك البحر وأجيبك عطشان .. دا انا اوديك فى داهيه .

قرقر : وعلى إيه ما فيش داعى ، أنا مالى ، خليهم هم اللى يروحوا فى داهيه . أنا عملت اللى على وهم سامعين وشاهدين . شيلى يا بت يا عديله شيلى ، الحكاياه مش باينه حا تنتهى على خير أبدا ، شيلى ، خلينا نخلى شيلى ، السلام عليكم .

الفصل الثاني

صالة الجلوس والأكل فى شقة أم عبده ، على اليمين باب يؤدى إلى السلم ، وعلى اليسار باب يؤدى إلى داخل الشقة ، وفى الواجهة نافذة مسمرة بقطعة من الخشب حتى لا يمكن فتحها ، وفى الركن الأيمن البعيد أثاث سيد ومحمود الذى أنزل من غرفتهما وبعض الشوالات وبينها الشوالان اللذان وضعا بهما ، وفى الركن الأيسر البعيد أريكة عليها عود وأمامها قانون ، وفى المنتصف منضدة عليها ورق ، وبالحجرة فوطيات وبعض مقاعد متفرقة ودولاب للصينى والزجاج والطعام الجاف أشبه بنملية ، وفى الركن اليمين القريب منضدة صغيرة عليها جراموفون وأسطوانات ، وفى الركن اليسار القريب راديو على منضدة صغيرة أخرى .

المشهد الأول

أم عبده : بس .. خليم مخطوطين كده لغاية ما يدفعوا الأربعة جنيهه اللى عليهم .. إذا ما جوش بعد جمعه ، حايعهم لبتاع الروبايكيا .. زى ما يحبوا .. ان شا الله يحبوا تلاته أبيض ، أحسن من حبابى عنهم ، الضالاه النصاين .

بهاء : ليه بس يا نينه .. هم عملوا حاجه ؟

أم عبده : عملهم اسود ومطين على دماغهم ، مش كفايه مدوخينى على الأجره بقا لهم أربع تشهر ، عايزاهم يعملوا اكتر من كده إيه ، يسرقونا ، ينهبونا ، يدبحونا ويشربوا دمتنا .

- بهية : يا نينه الحكايه مش مستاهله دا كله ، يمكن مزنوقين ، يمكن
معذورين .
- أم عبده : المعذور ما يسكنش في بيوت الناس .. ويدوخهم على الأجره .
- بهية : أمال يعني يعملوا إيه ، يناموا على الرصيف ؟
- قرقر : أيوه حقيقي .. يناموا فين ؟
- أم عبده : اتسد انت ، ما تتحشرش في اللي ما لكش فيه ، خلاص انتينا ..
مش حا يعتبروا الأوده يعني مش حا يعتبرها .. مفهوم .. رجليهم
مش حا تتمد فيها .
- قرقر : مفهوم قوى .. هم يقدرُوا يمدوا إيديهم لما حا يمدوا رجليهم .
- عديلة : ما يمدوش ليه ، دول يمدوا إيديهم ورجليهم ، أمال يتشعبطوا
ازاى .
- أم عبده : يتشعبطوا ؟
- قرقر : قصدها يتشعبطوا على الترمای ، ما تاخذيش على كلامها يا ست ،
هى وراها إيه غير الملوسه ، روحى اقلى البيض للشيخ عجائب ،
خلى الراجل يشوف شغله .
- أم عبده : أيوه حقيقي ، مستنيه إيه ، أنا مش قلتلك تحضرى له الفطار ، هوا
انت كل حاجه تقفى تطقسي عليها وتحشرى نفسك فيها .. فوقى
انجرى اقلى البيض وحضرى طبق العسل والقشطه ، يا الله قوام احنا
ورانا حاجات كثير ، أديكى شايفه ، البيت يضرب ويقلب .
- قرقر : (شامتا) أهو كده ، أمال إيه ، الحكايه لعب .
- بهية : (تنظر إلى العفش وتتهل) بس انا صعبانين على الجماعه دول .
- أم عبده : ما يصعبش عليكى غالى .. فوقى يا الله انتى كان شوفى شغلك ،
إحنا ما ورائناش فضا ، شوفى المقلوب ابو كى قام والا لا ؟ .
- بهية : قام ونام تانى .
- أم عبده : قام ليه ؟ .. ونام تانى ليه ؟! إلهى تعدلها له .

- بهية : قام علشان يشرب .
 أم عبده : يشرب إيه ؟!
 بهية : أنا عارفه بقى ، يشرب م القزازة الى حاططها جنب السرير .
 أم عبده : طبعا ، هوا وراه إيه غير كده . وراه إيه غير البصبصه والشرب ، لكن معلش مسيرى امشيه على العجين ما يلخبطوش ، مسيرى ادشدش القزاز الى هو مخبها الى تحت السرير .
 (تبدو حركة من أحد الشوالات فيلحظها قرقر ويدو عليه الاضطراب ويتنحنح بصوت عال) .
 أم عبده : إيه أصله ده ؟ إيه الى جراك ؟
 قرقر : أصلى ، أصلى شرقت ، حكاية القزاز الى حا تدشدش دى شرقتنى .
 أم عبده : وانت مالك ، إيش حشرك .
 قرقر : أبدا ما فيش حاجه (تعود الحركة ويعود إلى التنحنح) ما بلاش يا ستى حكاية دشدشة القزاز ، لحسن باين عليها مزعلاه خالص .
 أم عبده : مزعله مين ؟
 قرقر : مزعله سيدى ، سيدى نوح افندى .
 أم عبده : وانت مالك اتته يا بارد .. إيه دخلك .. اشتكالك ؟
 قرقر : أنا مالى .. أنا قلبى على القزاز الفاضيه .. غساره تدشدش وتروح هدر ، نبيعه احنا لبتاع الروبايكيا نستفيد بتمنها احسن .
 أم عبده : بقى كده ؟! القزاز الفاضيه بس هى الى مزعلاك ، طب فوت يا الله شوف شغلك ، هات لى السيرتو وككة القهوة والبن .
 (تهم بالجلوس فيبدو القلق على وجه قرقر) .
 قرقر : ما تفضلى يا ستى تعملها فى المطبخ علشان ننصف هنا ، بعدين التراب يطلع عليكى .
 أم عبده : مالكش دعوه .. فوت اعمل زى ما بقول لك .

(تجلس على الكنبه) .

: يا ست انا حاشيل الشلت والبياضات .

قرقر

: اكنس الأرض قبله .

أم عبده

: أصل الأرض لسه عايزه غلبه كثير ..

قرقر

(يسمع صوت نوح افندى ينادى بهيه) .

: بهيه .. بهيه .

نوح

: أيوه يا بابا (تخرج) .

بهيه

: قوعى يا ستى شوفيه .. صبحى عليه ، يمكن يكون عايز حاجه .

قرقر

: أصبح عليه ، الله لا يصبحه ولا يربحه .

أم عبده

: يعنى حاتسيه كده لغاية ما يبص من بلكونه ولا شباك ، تقع عنيه

قرقر

على واحده من الجيران .

: (تقفز من مكانها كمن لدغتها عقرب) تقع عنيه ؟ ياخى جه قلع

أم عبده

عنيه ، ما يوعى يبص بيها لا يمين ولا شمال ، ما انا عارفاه ، راجل

دنى ورمرام ، والننى لانا مستكراله بقيت الشبايك والبلكونات ،

أما اشوف حايص منين ، هو خلا حد فى الحته ما يصلوش ، دا

فاضحنى فى وسط الجيران .

(تخرج أم عبده .. يتبعها قرقر حتى الباب) .

: الله يكون فى عونك يا ست ، خدى بالك منه كويس ، امسكه

قرقر

جامد . سنكرى الشبايك قوى .

(قرقر يرد الباب وراءها .. ويعود وهو يفرك يديه فرحا) .

: بس ، ولا كلمه ، يا سلام على حداقتك يا واد يا قرقر ، يا الى ما

قرقر

فيش منك فى الاربعناشر مديرية ، (يقترب من الشوالات ويوجه

إليها الحديث) إيه رأيكم بقى ، مش برضه عرفت ازوحهم . أهو

لو ما كانش ربنا ألهمنى حكاية نوح افندى دى . ما كانتش عنىكم

حاتشوف النور أبدا ، كنت حاتخذوها تأييده جوه الشوالات .

لكن ربنا ستر ، أصل نينكم كويسه . دلوقت بقى ، فين سيد
افندى ، وفيه سى محمود . أظن ده سى محمود . (يحدث
الشوال) كنت متأثر أوى على قزايز الويسكى وعمال ترفص
كنت حا تودينا فى داهيه . اتفضل (يفتح الشوال فيخرج منه
راس سيد افندى) الله هو انت سيد افندى ، أمال كنت بتقلب
قوى ساعة ماجت سيرة الويسكى ليه ؟ .

سيد : ويسكى إيه يا سى قرقر ، أنا كنت با اهرش ، معرفش فيه إيه فى
الشوال بيقرصنى .

قرقر : طب مش وقته اطلع قوام . لما اسيب سى محمود رايخر .
(يهم بالذهاب إلى محمود ، ويهم سيد بالخروج عندما يسمع
صوت بهية مقبلة) .

بهية : حاضر يا نينه ، حاضر ، انا حاقطقها .
قرقر : يا نهار اسود . خش يا سيد افندى خش ، خش احسن ست بهيه
جايه ، (يربط عليه) ما تتقلبش بقى لحسن تودينا فى شربة ميه ،
ابقى استحمل القرص .

(تدخل بهيه متقدمة إلى قرقر الذى يقف بينها وبين الشوالات
وقد تناول مكينة كانت مستدة على الحائط) .

بهية : (فى عجلة ولهفة) اسمع يا قرقر . انا عايزاك فى حاجه ضرورى .
قرقر : (فى قلق) حاجه ضرورى ؟ . طيب بس اما اخلص الصاله دى ،
عن إذتك شويه لحسن العفار يطلع عليكى (ويأخذ فى الكنس) .

بهية : يا أخى استنى شويه ، الدنيا ما طارتش على الكنس .
قرقر : ما طارتش على الكنس ؟ لكن حا تطير على ابن الهرمه اللى فوق ،

دلوقت حالا يرقع بالصوت ، عايز الفطار ، وبعدين عايز الجدى
الاحول والفرخه الزعلاته ، والقله ، والكفته والكباب والسم اللى
بيهرى مصارينه ، كل دا دلوقت يطلبه ، وانا لازم اخلص من الأوده

- والى فى الأوده . مش معقول أبدا أسيها وامشى .. دى تبقى مصيبه .
- بهية : هو إيه أصله ده . انت اتجننت ؟ اسمع الكلام الى حا قولك ده من سكات .
- قرقر : سمعت . اتفضل .
- بهية : الجماعه راحوا فين ؟
- قرقر : أنهى جماعه ؟
- بهية : سيد افندى وسى محمود .
- قرقر : وأنا إيش عرفنى .
- بهية : انت مش كنت فى الأوده معاهم ؟
- قرقر : لا ، لا يا ست بيه ما تلخبطيش فى الكلام لحسن الست ام عبده تسمعك تودينى فى داهيه .
- بهية : توديك فى داهيه ازاي . انت مش كنت فى الأوده قدامها ؟
- قرقر : كنت فى الأوده أيوه ، لكن معاهم لأ .
- بهية : ازاي ؟! إذا كانوا هم كانوا فى الأوده ، تبقى ما كتش معاهم ازاي ؟
- قرقر : وايش عرفك بقى انهم كانوا فى الأوده ؟
- بهية : وايش عرفنى ؟ أصل . أصل ...
- قرقر : أصل إيه ؟!
- بهية : أمال يعنى حاياتوا فين الا فى الأوده ، ما هم لازم يكونوا فى الأوده .
- قرقر : يعنى استنتاج كده ؟
- بهية : أيوه .
- قرقر : اذا كان كده تبقى غلطانه ما كانوش فى الأوده .
- بهية : بقول لك كانوا فى الأوده يعنى كانوا فى الأوده ، أنا متأكد كده

خالص .

قرقر

: متأكد من بس . إذا كنت أنا نائم في الأوده لوحدى طول الليل .

بهية

: كذاب . أنا شفتهم بعيني ، شفتهم في الأوده وانت ما كتتش فيها .

قرقر

: يا نهار اسود . شفتهم بعينك ؟ .

بهية

: أيوه شفتهم . وعائزه اطمئن عليهم ، راحوا فين ؟ جراحهم ايه ؟ .

قرقر

: راحوا فين ؟ . إيش عرفنى !! هم لازم ، خرجوا يشطحوا زى

عوايدهم .

بهية

: مش ممكن .

قرقر

: ليه بس يا ست بهية ؟ مش ممكن ليه ؟! ليه عدم إمكانيتها ؟ .

بهية

: لأن سى محمود كان راقد ، كان عيان خالص .

قرقر

: محمود ايه ؟ . راقد .. عيان . لا . دى انت بقى الى ما عندكيش

فكره عن الموضوع خالص .

بهية

: إزاي ؟ .

قرقر

: لأن محمود صحيح اربعة وعشرين قيراط ، صحته زى البمب .

بهية

: بمب ازاي ، إذا كنت أنا شايفاه بعيني دى ، راقد وتعبان . ويقول

آه .

قرقر

: آه ؟! .

بهية

: أيوه .

قرقر

: يمكن .. قادر ربنا يعيه ويعبى أبوه ، لكن على العسوم اطمئن قوى

ربنا خد بيده خالص ، آخر لحظة شفته فيها ما كانش يقول آه .

بهية

: إزاي بس ! دا كان عيان قوى ، يا ترى راح فين ؟ وحايه قد فين ؟

اسمع يا قرقر ، أنا عايزاك تسبب الأوده دلوقت وتخطف رجلك

تسأل عليهم ، تشوفهم راحوا فين ، وجم منين .

قرقر

: أسبب الأوده .

بهية

: أيوه .

(أم رتيبة)

- قرقر : ما يمكنش ، دا انا قتل الأوده ، ما سيهاش أبداشم .. حكاية السؤال
عنهم دى .. مش عايزه لا خطف رجل ، ولا سيان أوده .. اسمعى
يا ست بيه .. إنتى يهملك أمرهم قوى ؟ .
بيهة : أوى وبس .. أوى خالص .
قرقر : يعنى تخاف عليهم ، وتحبى مصلحتهم ؟ .
بيهة : طبعا .
قرقر : والله انك أميره وبنت حلال ، طيب حيث كده .. انا حا اقول لك
على الحقيقة .. يمكن تقدرى تساعدنى .
بيهة : بس قبل كل حاجة انا عايزاك تسأل عنهم .. تشوفهم راحم فين
وجم منين .
قرقر : حاضر .. من عنيه .. اطمنى .. هم لا راحم ولا جم .
بيهة : يعنى مستخيين فوق ؟ .
قرقر : لا .. مستخيين تحت .. ومن جهة السؤال حاسأل لك حالا عليهم
(يتجه إلى أحد الشوالات ويريت عليه) ازيك يا سيد افتدى .
سيد : (من داخل الشوالات) زى الزفت البتاعه لسه نازله فيه قرص .
قرقر : معلش .. تقدر تهرش شويه .. ما فيش حد غريب هنا ..
(يريت على الشوالات الآخر) وانت ازيك يا سى محمود .. لسه
بتقول آه ؟ .
محمود : (من داخل الشوالات) آه .
قرقر : ليه بقى .. ما انا حطك فى الشوالات سليم اربعة وعشرين قيراط لا
بيك ولا عليك .. إيه اللى بيخليك تقول آه دلوقت ؟ .
محمود : الجوع .. جعان قوى .. حنة الجبنة الرومى اللى كنت شايلها من
امبارح .. لقيت الفيران واكله ثلاث ارباعها .
قرقر : والربع الباقي ؟ .
محمود : نصه واكله الصراصير والربع واكله الثمل . الظاهر كان عندهم

عزومة حشرات .. آه .

فرقر : طب بس ما ترعش كده .. لحسن الست ام عبده تسمعك
اصبر شويه انا حا افتح لك دلوقت .. اصل ست بيه عرفت
خلاص .. بقت مننا وعلينا .

بهية : (فى ذهول) إيه ده ؟ إيه اللي عملته فيهم ، ازاي ترميهم الرمي
دى ؟ .

فرقر : آل إيه اللي رماك على المر ، قلت له اللي أمرته .. قال إيه اللي رماك فى
الشوال ، قلت خوفى لاقع فى إيد ام عبده عرفتى بقى يا ست بهيه ،
ما كانش فيه وسيله للهروب من فتك الست والدتك غير الحكايه
دى ، وأظن دلوقت ما فيش داعى نضيع وقت فى الأخذ والعطا ..
المهم اننا نفرج عنهم ونخليهم يطيروا قبل ما تيجى ست ام عبده
وتقفشهم .

بهية : طب وبعدين حا يروحوا فىن ، ويناموا فىن ؟ .

فرقر : يا ستى يحلها الحلال .. المهم دلوقت ان احنا نطلق سراحهم ..
نخرجهم يره اللشوله .. نخليهم ياخدوا نفسهم ، نخليهم يشموا
النسمه .

بهية : طب ومحمود ؟ .

فرقر : ماله محمود ؟ .

بهية : مش يقول لك انه جعان .. حانسيه كده جعان ؟ .

محمود : (من داخل الشوال) أيوه جعان .. جعان قوى واقع من
الجوع .

فرقر : يا جددع أسكت انت الله لا يسيثك .. لحسن أم عبده
تسمعك .. ابقى شوف لك اى حاجه يره ، انشأ الله حتى لقمه
بجبهه .. المهم بس انكم تخرجوا .

(بهم بفتح الشوال عندما يسمع صوت نوح افندى قادما) .

المشهد الثاني

- نوح : (من الخارج) دى ما بقتش عيشه .. دى بقت جهنم الحمرا ..
 واد يا قرقر .. قرقر .
- قرقر : لا .. الظاهر ان اليوم ده مش حايتم على خير أبدا .. ما فبش
 فايدة .. بايتكم حاتخدوها تأييده .. أصل لو نوح افندى اترستا فى
 الأوده دى .. ما حدش حا يعرف يطلعه منها ولا بالطبل البلدى ..
 الحقيه يا ست بيه .. حوشيه شويه لغاية ما اخرجهم .
- (بهم بيه بالخروج عند ما يدخل نوح مرتديا الجلباب ، وقد
 أمسك زجاجة ويسكى فى يده وارتنى فردة حذاء ، وأمسك
 بيده الفردة الأخرى) .
- نوح : ما بتردش ليه يا قرقر الكلب ؟ .
- قرقر : (فى يأس) نعم يا سيدى .. أفندم .
- نوح : فين فردة الشراب الشيبكه ابو نقره واحده ؟ .
- قرقر : أمال إيه اللى فى إيدك دى ؟ .
- نوح : دى بنقرتين .. واحده عند الصباع وواحده فى الكعب ، لكن انا
 فاكر ان التانيه كانت بنقره واحده عند الصباع ، تبقى راحت
 فين .
- قرقر : تبقى برضه هى اللى فى إيدك .. بس ربنا أنعم عليها بنقره زياده ،
 وبكره كان تبقى بتلاته وأربعه .
- نوح : طب بلاش الشيبكه ، هات لى ابو حربيه .. أنا آخر مره قلعتة كان
 بحربه واحده ، دلوقت حلاقه بحريتين والايه ؟ .
- قرقر : وافرض انك لقيته بحريتين ، تزعل ليه ؟! أهه زياده فى التسليح ..
 حدلاقى .

- نوح : طيب زى بعضه .. حربه حربتين .. هاته والسلام .
- بيهة : تعالى يا بابا .. أنا اجييلك اللي انت عايزه .. تعالى معايا ..
- نوح : لا .. مش جاي ، أنا مش عايز اشوف وش الوليه امك دى مره ثانيه أبدا .. أنا حا سيلها البيت .. أنا حافرجها .. أنا وهى والزمان طويل .
- بيهة : ليه بس يا بابا ؟ هى عملت حاجه .
- نوح : عملت حاجه ؟ كل اللي عاملاه فيه ده .. وما عملتش حاجه ؟ .
- عايزاها تعمل إيه أكثر من كده .. هى تخليانى عارف اتنفس .. حاشره نفسها فى كل شؤونى .. دا مش جواز ، دا أسر ، لكن معلش هانت ، فوت يا واد يا قرقر هات الشراب والبدله (يجلس على الأريكة) .
- قرقر : (ينظر مترددا إلى بيهة) حضرتك حا تفلح هنا ؟ .
- نوح : أيوه .. إيه المانع .. هوا انا حا قلع فى الشارع ؟ .
- بيهة : طب ما تفضل فى أودتك يا بابا وأنا اجيب لك اللي انت عايزه .
- نوح : أودتى ؟! هى بقت أوده ، دى بقت زنزانه ، انت عارفه عملت فيه إيه ؟ .
- بيهة : عملت ايه ؟ .
- نوح : أنا لسه بقول يا فتاح يا عليم لقيتها لك من غير مناسبه هاجمه زى الغول وفى إيدها الشكوش وشوية مسامير وهات يا دق فى باب اليلكونه والشباك .. قال إيه علشان ابطل البصبصه للجيران .. هوا انا لسه فتحت عيني ؟ . الوليه دى لازم اتجننت .. اتخيلت .. ومع كل هى البصبصه حرمت . طيب أدبنى خارج دلوقت .. اما اشوف حا تقدر تمنعنى من البصبصه ازاي ؟ .
- بيهة : طيب يا بابا قوم البس هناك وبعدين اخرج زى ما انت عايز .
- نوح : (فى إصرار) لا .. انا حلفت ما انا داخل الأوده لاجل خاطرها ..

فوت يا واد يا قرقر هات لى البدله والشراب ابو حربة ، وحالة الشراب ، وهات علبة السجائر من فوق المكتب .. بس اوعى تلتطش منها حاجه .

: (تشير إلى قرقر أن يبقى مكانه) خليك انت يا قرقر شوف شغللك أما أروح ادور انا على الحاجات اللى هوا عايزها .
(تخرج بهية) .

بهية

: (وهو يدندن على العود) وبعدين يا واد يا قرقر ، وأخرتها ؟ .

نوح

: (وهو يكتس حوله مثيرا الغبار لمضايقته) آخرتها فى إيه ؟ .

قرقر

: فى إيه ؟ فى ستك أم عبده .. هوا ربنا مش حا يتوب علينا منها .. ده مش عدل أبدا .. دانا أعرف واحد قتل قتيل خد فيه عشرين سنة سجن ، واليومين دول طلعم السجن ، بقى حر .. يعمل زى ما هو عايز ، يصبص للجيران زى ما هو عايز .. ويروح البيت وقت ما هو عايز ، ويشرب ويسكى زى ما هو عايز ، ويغنى زى ما هو عايز ، وانا اللى ما قتلتش ولا حاجه .. لغاية دلوقت فى السجن ، مش عارف اتلففص .. تقدر تقوللى بقى ليه أفضل أنا ويخرج هو ؟ .

نوح

: لازم كان حسن السير والسلوك .

قرقر

: والله لو أعرف انى بقيت حسن السير والسلوك . ربنا يتوب على منها .. لكنك صليت من بكرا لكن انا عارف ما فيش فايده .. يبقى لا انبساط ولا حريه ؟ .

نوح

: معلش ياسى نوح .. استحمل ، أدحنا كلنا مستحملين .

قرقر

: انا كنت زمان با استحملها .. لكن دلوقت ما بقتش تنطاق أبدا ..

نوح

فى حد فى الدنيا يستكر الشبابيك كلها كده زى ما هى عامله ؟ !

هوا دا بقى بيت يتسكن . والنضافه اللى هى طالعالي فيها دى ..

اقوم من النوم افتح عيني على طاخ .. طاخ .. يتبأ لى ان التنظيم بيهد

البيت وبعدين الاقيها بتنفض الشبايك . ما يحيكش مسح السلام
إلا الساعة اتنين وانا جاي .. علشان مية المسح كلها تنزل على
نفوخي ، هوا انا عمرى شفت البيت فى حاله طبيعى أبدا .. لازم
السجاجيد فوق الكراسى ، والكراسى فوق التراييزات ،
والتراييزات جنب الحيط والأرض مبلطه ، تزحلق بلد بحالها ، ده
بيت ينقعد فيه ده .. انا اقدر اقعد قاعده هاديه .. أشرب لى فيها
كاسين ولا اتتن لى تقسيمتين .

: هوا انت يعنى بتنقعد يا سى نوح افندى ؟

: أقعد فين .. هوا فيه حته ينقعد فيها ، دى حاجه تخلى الواحد يهيج ،
وآخر المتهمه .. الشيخ الى جايهولى فوق السطوح .. تقدر تقوللى
جايياه ليه ؟

: عشان يطلع العمل .

: عمل ؟! يعنى إيه العمل ؟

: أصل فيه ناس قالوا لها ان الحاله الى انت فيها نتيجة عمل اتعمل لك .

: حالة إيه الى انا فيها ؟

: ولا مؤاخذه .. البصيصه والعربده ، وفروغية العين ، والشرب

والمهيصه والهيجان بره البيت ، وال

: مفهوم .. مفهوم .. ماله ده كله ؟

: كله ده صايك .. علشان حد متغاض منها فعمل لك عمل علشان

يطفئك منها .

: وبعدين ؟

: ولا قبلين ، قالوا لها على الشيخ عجائب انه راجل مجرب واحجبتة ما

تنزلش الأرض .

: يعنى حا يعمل ايه ؟

: حا يطلع العمل .. ويعمل شوية تعازيم واحجبه ..

- نوح : والنتيجه ؟ .
- قرقر : النتيجه انك تتلم ، وتبطل الشرب والسنكحه والبصبصه وتقعد في البيت .. وتحب ست ام عبده وما تبصش لغيرها .
- نوح : (منزعجا) يا مغيث .. يا حفيظ .. الراجل ابن اللثام الى فوق ده حا يعمل فيه كده ؟ .
- قرقر : دا المفروض .
- نوح : دا انا اقتله ، ودى تبقى أنهى عيشه دى .. أنا اقعد في البيت ولا اشريش ولا اهيصش ، وما اعملش حاجه غير ان انا ابص لام عبده .. يا هوه .. الراجل المجرم ده عايز يعمل فيه كده ، وتفكر انه يقدر يعمل الحاجات دى يا قرقر ؟ .
- قرقر : مين يعرف .. أهو اذا ما كانش ده يقدر غيره حا يقدر .. هى يعنى حا تسكت .. حا تسيك كده لغاية ما تطير من إيدها .. أهى حاتها وراك كده .. لغاية ما تسنسلك .
- نوح : قال الله ولا فالك يا شيخ .. على العموم الحمد لله ، الى ربنا ألهمنى المشروع الى انا ماشى فيه دلوقت هوا الوحيد الى حا يتقدنا من المصبيه دى .
- قرقر : مشروع ؟ مشروع ايه ؟ .
- نوح : قرب .. قرب هنا .. ادبنى ودنك .. (يقترب منه قرقر) مشروع جميعه سريه .
- قرقر : جميعه سريه ؟ .. بتاعه ايه ؟ .. وعلشان ايه ؟ .. واسمها ايه ؟ .
- نوح : اسمها جميعه قتل الزوجات .
- قرقر : يا ساتر .. مره واحده كده ؟ .
- نوح : أيوه ما فيش طريقه لإنفاذ العالم من السيطره النسائية وإعطاء الرجل حريته غير كده .
- قرقر : ودى خلاص عملتها ؟ .

نوح

: امال ! دا انا ما شئ فيها جد قوى .. انا لازم اجيب خيرها .

قرقر

: هى إيه دى ؟ .. للجمعية ؟ .

نوح

: لا .. أم عبده .. لازم اقضى عليها هى وأمهاها ، قبل ما يضيعونا فى شربة ميه ، أنا فكرت فيها من زمان ، وكل الشله اللى باقعد معاها وافقتنى على المشروع ، وقالوا لى دى فكره هايلاه ، وكنت بادرس الموضوع شويه على مهلى ، لكن حكاية الشيخ عجائب واللى ناوى يعمل فيه خوفتنى أوى ، المسألة دلوقت لازم نمشى فيها بجد ، دى مسألة حرب ، يا هم يلمونا فى البيوت ، يا احنا نجيب داغهم ، دا صراع على تقرير المصير ، انا اقعد فى البيت ولا ابصش لغير أم عبده .. يا هوه .. يا جاه النبى .

قرقر

: على العموم ما فيش داعى للخوف كده .. الحكاياه مش مستعجله أوى .. والجماعه دول اللى زى الشيخ عجائب معظمهم نصايين ، يعنى هى أول مره قبيهمها هى بقالها سنين تترقى وتشبشب وتلبس فى احجبه وتطلع فى عمل ، علشان ربنا يتوب عليك وتهدى ، ما بتتهدىش ، هى تنتقل من شيخ لشيخ ، وانت تنتقل من واحده لواحد ، ما فيش حاجه بتحوق فيك أبدا ، لغاية ما رسيت على الشيخ عجائب وانت رسيت على زكية ولعه . أما نشوف مين اللى حا يغلب ، الشيخ عجائب والا الست ولعه ؟ .

نوح

: إيه يا واد ده انت اتجننت ؟ وطى صوتك ، انت عايزها تسمعك تيجى تطلع على جتنا البلى !! .

قرقر

: انت لسه بتخاف منها بعد الجمعية اللى عملتها ؟ دا انت رئيس جمعية قتل الزوجات على سن ورمح ؟ .

نوح

: قولتلك متزعقش ، دى جمعية سرية ، لازم تفضل مستخبيه كده ، تعمل فى الخفاء .. انت عمرك ما اشتراكش فى جمعية سرية أبدا ؟ ! .

قرقر

: أبدا ، لا سرية ولا علنيه .

- نوح : على العموم تقدر تشترك .
- قرقر : لكن انا مش متجوز ؟ .
- نوح : مش مهم ، الجمعية حا تجوزك . وبعدين هى نفسها تتولى أمر تخليصك من مراتك .
- قرقر : وعلى إيه .. اما اتجوز ، يبقى يحلها ربنا .
- نوح : ما تضيعش الفرصة من إيدك ، واسمع نصيحتى اشترك من دلوقت أحسن لك ، دى أحسن طريقه لضمان حريتك ولتأمين حياتك ، وللقضاء على ام عبده وأمثال ام عبده .
- قرقر : (يتحرك أحد الشوالات ويصدر الآخر صوت آه) .
- قرقر : (فى فزع) يا نهار اسود وهو افه حاجه حاتنجينا من ام عبده ؟ !
- ولا ميت جمعية سريه ، ولا انقلاب كامل ، (تستمر الحركة) اصبر شويه يا ويكا .
- نوح : أصبر اكتر من اللى صبرته ، مش ممكن ، أنا لازم اقضى عليها خالص ، بس عايزين أعضاء ، عايزينها تكبر ، لازم تشترك ، فاهم .
- قرقر : حاضر حا اشترك ، بس عن إذنتك شويه ، أنا عايز انفض الكنبه اللى انت قاعد عليها ، تسمح تفضل فى أودتك شويه .
- نوح : انت كان بتجيب سيرة التنفيذ ، إخص ، إخص عليك ، يا خيبة أمل فىك ، خلاص مش حاتنفع أبدا معانا .
- قرقر : ليه بس ياسى نوح افندى ؟ .
- نوح : عايز تدخل الجمعية وانت بتنفض ؟ عايز تبقى عضو ، وإيدك ملوثة بمجرمة التنفيذ ؟ .
- قرقر : وفيها إيه يعنى ؟ مش جمعية قتل ؟ .
- نوح : أيوه قتل ، لكن مش تنفيذ ، قتل بطرق شريفه نضيفه مش قتل بإثارة الغبار ، مش قتل بتحطيم الأعصاب ، دى من أول الحاجات

الى بتنادى بيها الجمعية ، المطالبة بحرية الوساحة ، وحق الكركبة
والفر كشه والخبطة والخبفنه ، تقوم تيجي حضرتك وتقوللى قوم
عشان انفض .. اتفو عليك .

قرقر

نوح

: الله يسامحك ، طب بلاش التنفيض ، قوم عشان تفطر .
: ماليش نفس ، انا حاخذ بقى م القزازة كفايه (يشرب) الله ..
بالصحة والعافية .. بالهنا والشفاء .

قرقر

نوح

: قوم بقى يا سى نوح افندى الله لا يسيئك ، قوم الله يستر عرضك .
: مش حا قوم خلاص انا عايز ادندن شويه عندى كيف للغنا ، ناوولنى
العود ، ناوول .

قرقر

: عود ١؟ لا ، الظاهر انها حا تطبل على دماغنا (يناوله العود) مادام
مسك العود يبقى مش حا يطلع من هنا أبدا .
: تعرف تشتغل معايا على الرق ؟ .

نوح

قرقر

: رق ؟ رق انت شويه ، وقوم .. قوم الله يجبر بخاطرنا انا لاليه فى
طبله ولا فى رق .. انت عايز ستى تيجي تلاقينى ماسك الرق
تقطع عيشى ، انت يا سيدى بتقدر عليها ، لكن انا غلبان ، على قد
حالى .

نوح

: (يبدأ فى ضرب العود والغناء) يا سيدى زعلان ، يا روحى
زعلان (قرقر يمد يده تحت الأريكة ويخرج منها لافتة يعلقها أمام
نوح مكتوب عليها : « ممنوع الغناء بأمر أم عبده » فلا يكاد يراها
حتى يصيبه الدعر ويصمت ثم ينهض ويقلبها فيبدو عليها « ممنوع
البصبة بأمر أم عبده » فيتزعمها ويقذف بها تحت الأريكة ثم
يعاود الغناء) . يا سيدى زعلان .. يا روحى زعلان . (يتحرك
سيد ويتأوه محمود) .

(قرقر يزداد ارتياكا ويقترب من الشوالات ويربت عليها فى غفلة
من نوح افندى) .

- قرقر : (للشوات) حاضر .. اصبر شويه .. دلوقت اجيب لك
ساندوتش جنبه ، بس لما أخرج الكاينه دى حالا ، ربنا يسهل .
- نوح : (ملتفتا إلى قرقر) انت بتعمل ايه عندك .. بتكلم مين ؟!
- قرقر : لا ما فيش حاجه .. دانا بس بدندن .
- نوح : بدندن ؟! انت جنسك إيه .. حيوان .. تدندن وانا با اغنى ..
انت ما عندكش إحساس .. انت جماد .. لما انا اغنى يبقى لازم
الدنيا كلها تسمع .. ويايه اللشوله اللى عندك دى .. إيه دا كله ؟!
- قرقر : دا عفش الجماعة اللى كانوا ساكتين فوق السطوح .
- نوح : ويايه اللى جابه هنا ؟.
- قرقر : ست أم عبده نزلته .
- نوح : علشان إيه ؟.
- قرقر : حاتبيعه .
- نوح : تبيعه ؟ .. واصحابه راحوا فين ؟.
- قرقر : طردتهم .
- نوح : كده على طول .. وليه تطردهم ؟.
- قرقر : علشان تسكن الشيخ عجائب .
- نوح : أما وليه دون .. تطرد الناس الطيبين الأمرا علشان تقعد الراجل
النصاب المحتال .. طب وحاتبيع عفشهم ليه ؟.
- قرقر : علشان تاخذ أجرة الأوده من تمنه .
- نوح : إخص على السفاله والإجرام .. تبيع عفش الناس علشان تاخذ
الأجره .. لا .. أنا ما اسكتش على كده أبدا .
- قرقر : (فرحاً) إيه ! أطلعه تانى ؟.
- نوح : لا .. لا .. ما فيش فايده .. لو طلعهنا حا تنزله تانى .
- قرقر : آمال إيه ؟! نعمل ايه ؟.
- نوح : نعقد جلسه غير عاديه .. جلسه مستعجله .

- قرقر : جلسته !... لإيه ؟ .
- نوح : للجمعية .. ما فيش غير ..
- قرقر : (مقاطعا بخيبة أمل) دا كل اللي تقدر تعمله ؟ .
- نوح : وده شويه .. لازم نجمع الجمعية .. لاتخاذ قرار ضدها .
- قرقر : (بيأس) طب ، اجمعها .
- نوح : لكن ، لكن حاجتجمع ازاي اذا كان ما فيش أعضاء ، عايزين أعضاء ، لازم تشترك .
- قرقر : حاضر .. حاشترك .
- نوح : وتحبب مكان حد يشترك .
- قرقر : حاضر .. حاجيب لك حد يشترك . المعلم عضمه الجزار لسه متخافق مع مراته وراقعاه علقه لما قطعت نفسه .. اجهولك يشترك ؟ .
- نوح : أيوه ، ده ينفعنا كويس ، مش يعرف يدبح ؟ .
- قرقر : قوى .. دى شغلته .. بس .. عن إيدك بقى دلوقت .. خمس دقائق .. حل عن الأوده شويه .
- نوح : علشان إيه ؟ .
- قرقر : أصلى .. أصلى .. عايز انكشها شويه .. وفيه شوية زباله بره .. عايز أدلقها على الكنبه .. علشان القعده تحلى .
- نوح : لا .. ما فيش لزوم .. ما تتعبش نفسك .. أنا اقدر استحملها كده .. ناولنى العود ناول .. واقعد جنبى هنا لما اشنف ودانك .
- قرقر : أنا عارف .. ما فيش فايده أيضا .. اتفضل يا سى نوح افندى (يناوله العود) وآدى قاعده (يجلس على الأرض بجواره ، وهو يلتفت إلى الشوالات) أنا عملت اللي عليه وفوق اللي عليه .. لكن أعمل إيه .. لازم يشنف ودانى ، اتفضل شنف .
- نوح : (يأخذ فى العزف والغناء) يا سيدى زعلان .. يا روحى

زعلان .. لان .. لان .. آه ياسيدى زعلان .. يا عيني زعلان ..
يا روحي زع .. لان يا .. عيني زع .. لان يا .. يا .. يا ..
سيدى زعلان .. وكان زعلان ..
(يصيح فجأة منفجرا بالبكاء) آه .. يانى .. آه .

قرقر

المشهد الثالث

(تدخل أم عبده مهرولة .. ونوح افندى منهمك فى غنايه) .
إيه .. مالك يا واد .. انطق قول ؟ : أم عبده
آه .. يانى .. آه . : قرقر
مالك .. بتعيط ليه ؟ : أم عبده
يا اعيط على سى نوح افندى .. بقاله نص ساعه .. زى مانتى شايفه : قرقر
كده .. لا ييسكت .. ولا يقول زعلان ليه .
طب بس انسد .. قوم شوف شغلك .. وانت التانى ما كفاكش : أم عبده
غنا .. جايب الواد مقعده جنبك ومعطله عن شغله ؟ .
يعنى وراه إيه .. المفاوضات ؟ : نوح
انتبهنا .. قوم بقى من فضلك كفايه غنا . : أم عبده
ليه .. الغنا حرم ؟! : نوح
ما حرمش ولا حاجه .. بس مش وقته .. قوم بقى علشان تلبس : أم عبده
وتروح تشوف شغلك .
وانت مالك .. عملوكى وصيه على .. أما دى مصايب .. ياستى : ح
انا مش قتللك ميت مره ما لكيش دعوه لى . هو انتى لكى عندى
حاجه ؟ .
بقى اسمع اما اقول لك .. أنا العفارىت بتتنطط فى وشى .. وإذا .. : أم عبده
(تصدر فجأة صيحة من محمود وهو داخل الشوال) .

- محمود : آه .
- أم عبده : (تتلفت حولها في ذعر) إيه ده ؟ اتم سامعين ؟ .
- قرقر : يا نهار اسود ، جالك الموت يا تارك الصلاة .
- أم عبده : إيه ده ؟ .
- قرقر : ده .. ده (يلفت حواليه في حيرة) دول دول لازم العفاريت
- أم عبده : أنهو عفاريت ؟ .
- قرقر : العفاريت .. اللى كانوا بيتتططوا فى وش حضرتك .. الظاهر .. ان واحد منهم ، طب وقع فى الشوال .
- محمود : آه .
- قرقر : يا نهار اسود .
- أم عبده : الحقوفى ، أنا جتتى حاتلبش ، الحقوفى بالشيخ عجائب .. أنا بقالى ليلتين حاسه ان فيه حاجه فى الشقه .. اندهولى الشيخ عجائب قوام .. ما فيش حد حا يطلعهم غيره .
- نوح : هم إيه دول اللى حا يطلعهم ؟
- أم عبده : العفاريت اللى مالين البيت .
- نوح : عفاريت إيه يا وليه ، انت مش حا تبطل بقى شغل الهفه دى ، مش حا تعقل أبدا ؟
- أم عبده : اسكت انت .. ما تتداخلش فى اللى ما لكش فيه .. اطلع يا قرقر نادى لى الشيخ عجائب .. الحقنى بيه .
- قرقر : أيوه ، علشان تكمل ، ما هو مفيش غير هوا اللى ناقصنا ، علشان ينسطوا ، أنا مالى ، أنا خاسس على حاجه ، أنا واقف على رجلى ، الدور على المقرفين جوا الشوالات .
- أم عبده : هم مين ؟ .
- قرقر : العفاريت .
- أم عبده : يا هوه ، يا مغيث ، ما تفسرش بقى لحسن جتتى بتلبش .. اجرى

الحقنى بيه .. مدشويه .
(يخرج قرقر .. وترقى أم عبده وهى تلهث .. وفى اللحظة
نفسها تدخل بيه) :

المشهد الرابع

بهية	: (فى دهشة) إيه ؟ فى إيه ؟ ، مالك يا نينه ؟
أم عبده	: هس ، ماتز عقيش .
بهية	: ليه ؟ جرا إيه ؟
أم عبده	: قولتلك ماتز عقيش كده ، لحسن بعدين يتفرعوا ، خليههم مكنونين زى ما هم .
بهية	: هم مين دول ؟
نوح	: اللي فى اللشولة .. أصل الدنيا ضاقت بيهم .. مالا قوش حتة يطبوا فيها غير اللشولة .
بهية	: (فى فزع) إيتوا عرفتم ؟
أم عبده	: وانتى كان كنت عارفه ؟
بهية	: أيوه يا نينه عرفت ، وصعبوا على قوى ، والنبي دول غلابه .
نوح	: هم إيه دول الغلابه ؟! عفاريت غلابه ؟! حلوه دى ، أول مره اسمع على عفاريت غلابه .
بهية	: عفاريت ؟ . (تشهد فى راحة) أيوه برضه فيه عفاريت غلابه .
محمود	: (من الداخل) آه .
أم عبده	: يا مصييتى ، يا وقعتى .. متفسروش بقى .. كفايه ، أنا خلاص ما بقاش فيه نفس ، فين هوا ده الشيخ هباب يلحقنى قبل ما اروح قطيس .
بهية	: هو الشيخ عجائب حا يطلعهم ؟

أم عبده

: أيوه قرقر طلع ينده له .

بهية

: (في فزع) طلع ينده له ؟ .. وبعدين .. وبعدين لما يطلعهم

حقيقى ، يروحوا فين ؟

نوح

: يطلعوا على جتنا .. يشاركونا في عيشتنا .. علشان تبسط امك

ويهدا بالها .. آمال .. العفارىت بتتطط في وشها ، ويطبوا في

الشوالات ، وبعدين تطلعهم على جتنا ، هي وراها إيه غير تطلع

على جتنا التراب والعفارىت .

أم عبده

: يا راجل اسكت بقى وانسد ، ما تقعدش تجيب سيرتهم وتهيجهم .

نوح

: أنا برضه اللي بهيجهم ؟ .. أنا اللي بعت أجيب لهم الشيخ عجائب

علشان يطلعهم من اللشولة ؟ .. مالك وماهم إذا كانوا قاعدين في

اللشولة مستريحين تطلعهم ليه ؟

بهية

: أيوه يا نينه حقيقى .. تطلعهم ليه ؟! ما تخليهم قاعدين مستريحين !

أم عبده

: انتوا اتجنتوا ، أخطيهم كده قاعدين معانا ؟ باركين على نفسنا ؟

نوح

: مش باركين على نفسنا ولا حاجه ، الناس مكثونين جوا

الشوالات ، والشوالات مش بتاعتنا يبقى حا يخس علينا إيه ؟

أم عبده

: يعنى حا يفضلوا كده قاعدين ؟

بهية

: أيوه يفضلوا .. لغاية ما يزهدقوا ويمشوا من نفسهم ؟

أم عبده

: واذا ما زهدقوش ؟

بهية

: نعتبرهم ضيوف ، يعنى حا يكلفونا إيه غير لقمة بجينه ، والا شوية

خضار .

أم عبده

: وكان حيا كلوا .. ؟

محمود

: (من داخل الشوال) آه .

أم عبده

: يا مصيتى ، الحقونى ، يا ناس ، أنا مش قادره ، يا واد يا قرقر ؟

(يدخل قرقر ومعه الشيخ عجائب حاملا كيس في يده أشبه

بالخرج) .

(أم رتية)

المشهد الخامس

- قرقر : آدى الشيخ عجايب .. اتفضل يا سيدنا الشيخ
 اتفضل .
- عجايب : يا ساتر .
- أم عبده : اتفضل يا سيدنا الشيخ .. اتفضل .
- عجايب : بسم الله الرحمن الرحيم .
- أم عبده : الحقنا يا سيدنا الشيخ .. الحقنا .
- عجايب : يا أرحم الراحمين ارحمنا .. يا لطيف الطف بنا .. يا لطيف الطف بنا .. فيه إيه يا ست هاتم ؟ فيه إيه ؟
- نوح : عفاريت يا سيدنا الشيخ .. يعنى حا يكون فيه إيه غير كده .. انت لك اختصاص فى إيه غير العفاريت ؟
- عجايب : هم فين ؟؟ هم فين ؟
- قرقر : جوه هنا فى اللشولة .. مع العفش المحجوز عليه .. أصل الست ام عبده حجزت على العفش بالعفاريت الى فيه .. لكن دلوقت استغنت عن العفاريت .. يعنى ممكن انك تطلعهم ؟
- نوح : بس تاخذهم معاك .. مش تطلعهم من اللشولة على جتتا .. مفهوم ؟
- عجايب : مفهوم يا سيدنا الافندى مفهوم .
- نوح : إذا كنت عايزهم فوق معاك .. ما فيش مانع خداهم يونسوك .
- عجايب : لا .. لا .. دول صنف بطلال ما يتفغنيش ، أنا حا اطلعهم وأوديهم فى داهيه .
- بهاء : (منزعة) فى داهيه ازاي .. يا سيدنا الشيخ !! حرام عليك .
- عجايب : ما يمكنش .. انا لازم أفك بيهم .. لازم أفنيهم ، أبيدهم .

- بيبة : تفنيهم ؟ حرام .. حرام عليك (تبكى) .
- أم عبده : هوا إيه أصله ده .. إيه اللى جراك يابت ؟
- بيبة : مش سامعه يا نينه بيقول ايه ؟ .. بيقول انه حا يفتيهم .. يعنى حا يموتهم .
- قرقر : يا ستى بيبه .. بس لما يطلعهم يبقى يحلها ريتا .. هوا طلوع العفاريث بالساهل ، دول لما يتبتوا فى الشوال ما يطلعوش أبدا .. دول يطلعوا حباى عنين اللى حا يطلعهم . دول يطلعوا على جتته البلا قبل ما يطلعهم .. اسألينى انا يا ست بيبه ، دول لما يقرفصوا فى الشوال ، ما يطلعوش ولا بالطبل البلدى ، يبقوا وحشين قوى وخطرين .. يعضوا ويشنكلوا ، ويعملوا حاجات وحشه قوى .
- عجائب : اللهم احفظنا .
- قرقر : اسألونى انا عنهم ، انا اعرفهم كويس قوى ، عفاريث اللشوله دولا .
- عجائب : معلش ، ريتا يقدرنا عليهم ، اتفضلوا انتوا بقى من غير مطرود .. فضوا لنا الأوده .. خلونا تشوف شغلنا .. بس ابعتى لنا وأبور سيرتو وطاسه وحله فاضيه .
- نوح : انت حا تطلعهم ، والا حا تطبخ لهم .
- عجائب : دا شغلنا يا سيدنا لفندى .
- قرقر : على العموم هم جعائين قوى .
- عجائب : إيش عرفك ؟
- قرقر : باين كده من صوتهم .. يعنى لو طلبت لهم كام سندوتش .. حا يبقوا ممنونين خالص .
- عجائب : سندوتش ؟! الظاهر انك عمرك ما اشتغلت مع عفاريث .. سييهم لى انت بس .. أنا حا اطلعهم بالطريقه بتاعتى .
- قرقر : انت حر .

- عجائب : يا الله اتفضلوا .
- (تخرج أم عبده ووراءها بيه) .
- عجائب : وابتعوا لنا كان شوية دره عويجه .. أد حفته كده .
- قرقر : عويجه ؟
- عجائب : أيوه عويجه .
- قرقر : وليه العويجه ؟ يعنى لازم تصعبها .. ما تخليها دره عاده .. والا قمح .. يمكن يعملوه بليله ..
- عجائب : انت حا تعلمنى شغلتى ، دى صنعتى يا سى قرقر وانا اعرف الأصول كويس .
- قرقر : عدم المؤاخذه .. عويجه .. أنا مالى ، هو انا الى حاكله .. انشا الله تطلب قرطم .
- عجائب : (ملتفتا إلى نوح الذى أمسك بالعود وأخذ فى تصليحه) وسيدنا لفندى مش حا يتفضل ؟ .
- نوح : أتفضل فين ؟ .
- عجائب : شويه كده ، لغاية ما نطلع الكام عفريت .
- نوح : واتفضل ليه ؟ .
- عجائب : بس علشان الشغلانة دى متعبه شويه .. ويمكن أعصابك ما تستحملهاش .
- نوح : ما تخافش انا أعصابى تستحمل أبوها .
- عجائب : وكان عايزين هدوء تام .
- نوح : وآدى الهدوء التام (يلقي بالعود جانبا) هه ولا كلمه .. اتفضل شوف شغلك .
- قرقر : ولزومه إيه يا سى نوح افندى .. ما تسييه لوحده فى الأوده .. يمكن يكونوا العفارىت ما يبياتوش على حد غريب .
- نوح : يعنى إيه .. عفارىت حريم ؟ .

- قرقر : جايز :
 نوح : يبقى مش حا اطلع ابدا .. أنا قتيل العفاريت..أموت في العفاريت .
 عجائب : معلش .. تقدر تخليك زى ما انت ؟ .
 (تدخل عديله وهى تحمل السرتو والطاسة والحله وكوز به
 الذرة العويجة) .
 عديلة : اتفضل يا سيدنا الشيخ .
 عجائب : وحياة أبوكى ولعى لى السرتو .
 عديلة : عنيه يا سيدنا الشيخ .
 عجائب : تسلم عنيكى .
 (عديلة تولع السرتو) .
 عجائب : حطى لى عليه الطاسه ، وحطى فيها حفنة دره وقلبيه لغاية ما
 يتحمص .
 (عديلة تنفذ المطلوب) .
 (يفتح الخرج ويخرج منه بعض أوراق وكتاب أصفر وأحجية
 وبخور. يضع بعض البخور فوق الذرة ثم يضع الحجاين فى الحلة
 ويكتب فى ورقة يضع جمل ويضعها فيها) .
 الشيخ عجائب : عايزين أتر من أى حد .
 عديلة : يعنى إيه ؟ .
 عجائب : يعنى أى حته من الهدوم بتاعت أى حد من البيت .
 نوح : (يقذفه بفردة الشراب) خد الشراب ابو نقرتين ، ما بقاش
 يلزمنى .
 عجائب : (يضع فردة الشراب فى الحلة) .
 نوح : كل ده حياكلوه العفاريت ؟ دا انت متوصى بيهم قوى .
 قرقر : متوصى بيهم ازاي ! دى فردة الشراب دى حا تكون القاضيه
 عليهم . حا تموتهم نحتقا بالغازات السامه .

- عديلة : هم مين دول ؟
- قرقر : العفاريات يا ست عديله .
- عديلة : عفاريات ، يا مغيث ، يا منجى . أشتاتا أشتوت ، وهو انا اقدر على طلوع العفاريات قدامى ، عن إذتك يا سيدنا الشيخ ، أنا جتتى ما تستحملش .
- عجائب : ما تخافيش يا بنيه اطمنى خالص ، ما دام انا واقف جنبك ما تحمليش هم .
- عديلة : البركه فيك يا سيدنا الشيخ ، بس انا ركبى بترعرش .
- عجائب : اقرى آية الكرسي خمس مرات .
- عديلة : حاضر ، بس انت فاكر الحاجه اللى طلبتها منك ؟
- عجائب : فاكر قوى ، وان شاء الله حا ديكى حجاب تلبسيه ، واقول لك على وصفه تنفعك خالص .
- قرقر : هو ايه دا يا ست يا عديله !؟
- عديلة : اسكت انت دى حاجات ما تعرفهاش .
- قرقر : انتى كمان بتعملى حاجات عند سيدنا الشيخ . والله عال ربنا يجعلنا من بركاتك يا سيدنا الشيخ ، مش حا تبتدى الشغل بقى . والا عايزلك جدى أحول ؟
- عجائب : لا ما فيش لزوم ، الحكايه مش مستاهله . بس عايزك تقرب من الشوالات وتحط الحله على كفك وتمسك ودنك الشمال بإيدك اليمين .
- قرقر : حاضر ، من عينيه ، أما شوف آخرتها .
- (يضع الحلة التى على المنضدة فى كف قرقر ثم يقلب فيها الطاسه والذره والبخور ويضع عليها الغطاء ويشمر أكمامه ويخرج من الخرج كيسا صغيرا مدلى من خيط ويأخذ فى لفه بحركة دائره حول الحلة وهم يتمم بكلمات غير مفهومة) .

- فرقر : (في ملل) وأخترتها . أنا دراعى خلاص نمل .
- عجائب : (يقرأ) أينك يا زوبعه ، أينك يا لوبعه .. أينك يا صاحب الروس الأربعة . (يدفعه بكوعه) اسكت . ما تخسرش الشغل .
- فرقر : أصل الحق مش عليك ، الحق على العفاريت اللي ساكتين لك لغاية دلوقت .
- عجائب : يعنى عايزهم يعملوا ايه ؟
- فرقر : يخلوا عندهم نظر ، يشكوك مقلب والا يلطفوك مقص ، والا يعنى حا يفضلوا ساينى كده لغاية ما دراعى يتقطم . أنا مالى ، أهى حا ترسى على دماغهم .
- عجائب : (يتحرك شوال محمود فى قلقلة بطيئة حتى يقترب من أقدام عجائب ثم يدفعه فى قدميه دفعة تلقى به على الأرض) .
- عجائب : آه ، آه دماغى ، الحقونى . وسطى انقطم .
- عديلة : سلامتك يا سيدنا الشيخ ، إيه اللي جرى ؟
- عجائب : (لا يكاد ينهض متباعدا فى خوف حتى يتلقاه سيد فيدفعه فى قدميه دفعة توقعه مرة أخرى . فينهض متحاملا ثم يعدو مندفعاً خارج الحجرة بأقصى سرعة) .
- عديلة تنطلق مولولة من الحجرة . نوح افندى يتناول رشفة من الزجاجاة ثم يتناول العود) .
- فرقر : إيه يا سيدنا الشيخ ، حد يجرى كده من العفاريت ؟
- عجائب : (وهو يعدو فى الخارج) هم دول عفاريت ، دول بلطجية .
- نوح : أنا مع العفاريت ، فلتحى العفاريت ، لو منهم اتنين فى جمعية قتل الزوجات . كنت سويت بيهم الهوايل . يارب اتنين بس . زى دول .. وانا امشى بيهم ام عبده على العجين ما تلخيطوش .
- عجائب : (أم عبده تدخل مندفعه على صوت الضجة) .
- أم عبده : إيه ؟ حصل إيه ؟ هم طلعا ؟

- قرقر : إيه هم دول ؟
 أم عبده : اللي ما يتسموش .
 قرقر : لا ، ده هو اللي طلّع .
 أم عبده : هو مين ؟
 قرقر : اللي يتسمى ، الشيخ عجائب . كبير محتالى القطر .
 أم عبده : طلّع ليه ؟
 قرقر : عاد إلى قواعده ، فى السطوح .
 أم عبده : يعنى إيه ؟ مش فاهمه ؟
 نوح : (ضاحكاً فى سخرية) ودى عايزه فهم ، عاد إلى قواعده .. يعنى
 انسحب . عقب هزيمة منكروه ، ارتد بعد خسائر جمه . برضه ما
 نتيش فاهنه ، بالعرب زاع بعد ما تقحوه علقه جابت داغه .
 أم عبده : هم مين دول ؟
 قرقر : اللي ما يتسموش .
 أم عبده : ضربوه ؟ يوه ، يا مغيث ، يا ساتر يارب والعمل إيه ؟ اذا كان هو
 ما اقدرش عليهم مين حا يقدر عليهم ؟ وانت يا راجل ، قاعد
 ساكت كده ؟
 نوح : أنا مبسوط كده ، أنا مع العفاريت ، نموت وتبنا العفاريت
 (يمسك العود ويغنى) يا غائباً عن عيوني ، وما كنا فى شوالى .
 أم عبده : هوا انت فيك فايده .. وبعدين يا قرقر ؟ إيه العمل ؟
 قرقر : إيه العمل ؟ (مفكراً) إيه العمل .. أقول لك يا ستى خليها على
 الله .
 أم عبده : أخليها على الله ؟ دا اللي قدرت عليه ؟
 قرقر : أيوه خليها على الله هوا فى حد بيدبرها غيره خليها على الله ، وعلى .
 أم عبده : عليك انت ؟
 قرقر : أيوه علىّ انا .. انا حا أعرف ازاي اطلعهم لك .

- أم عبده : انت حاطظلعهم ؟! ما بقاش اللى انت يا سى قرقر .
- قرقر : يا سى يوضع سره فى أضعف خلقه .. جرى انتى حاطحس عليكى حاجه ؟
- أم عبده : طب بس انبط .. تعالى معايا نطلع نشوف الراجل جرا له إيه .. يمكن نقدر ننزله تانى ..
- قرقر : ما فيش فايده يا ست .. دى العلقه اللى خدها ، مش حاطخليه يرجع هنا أبدا ، دى نوك أوت .
- أم عبده : يادى النصيه ، وبعدين ؟
- قرقر : قتللك جريبنى .. مش عاجبك .. أعمل لك ايه ؟ جريبنى يا سى انت حاطحس عليكى حاجه ؟
- (يزوم محمود من داخل الشوال) .
- أم عبده : آه .. آه يانى .. أهم ابتدوا .
- قرقر : قتللك خلينى اجرب .. ما نتش راضيه .
- أم عبده : طب جرب .. جرب .. زى ما انت عايز .
- قرقر : أيوه .. كده الكلام .. اتفضلى انت بقى من غير مطرود خلينى اشوف شغلى .
- أم عبده : (وهى تهم بالخروج) أبعث لك شوية دره عويجه ؟
- قرقر : عويجه إيه يا ست .. أنا حاطلع عقاريت مش ككاكيت .
- أم عبده : آمال ابعث لك ايه ؟
- قرقر : تبعنى إيه ؟! إيه ... ؟
- (محمود يزوم) .
- قرقر : أيوه افكرت ، ابعنى حتة جنبه حلوم .. على طبق فول بالزبد .. على السبع بيضات اللى كنت حاطبعيتهم للشيوخ عجائب المهزوم ، وما فيش مانع تبعنى حتة القشطه وشوية غسل النحل اللى كان حاطتسمهم .

- أم عبده : ليه دا كله ؟
- قرقر : مش حاطلع عفاريت ، يمكن يطلعوا جمانين ابقى اتخليهم
ياكلوني ؟ والا اسيبهم في البيت يخربوه ويلهفوا الي فيه ؟ مش
برضه الاستحراس أحسن ؟!
- أم عبده : برضك أحسن ، حالا خابعت لك الي انت عايزه .. هي جت على
كام بيضه .. أهو بجملة .
- (تخرج أم عبده) .
- قرقر : وانت يا نوح افندى .. مش تفضل شويه . عسلشان نشوف
شغلنا .
- نوح : شغلك ؟! انت كان تاوى تطلع عفاريت ؟.
- قرقر : دانا حاطلع أبوههم ، دول ما يعصونيش أبدا ، إشاره واحده
تطلعهم .
- نوح : طيب ماتيا لله تورينا الشطاره كده .
- قرقر : بس لازم أكون لوحدى .
- نوح : بقى كده .. انت اتعلمت شغل النصب ، انا مش حاسيب
الأوده .. لازم اشوفك وانت بتطلعهم .
- قرقر : ليه بس ياسى نوح افندى .. ليه تلخبط لنا الشغل .
- نوح : ما فيش فايده .. لازم اشوفهم يعنى لازم اشوفهم .
- قرقر : حد في الدنيا .. يشوف العفاريت ؟
- نوح : كيفى كده .. أحبهم ، أنا حاسس ان انا حلاق فيهم حاجه حلوه .
- قرقر : لا من الناحيه دى .. اطمئن جدا ، ما فيش فيهم حاجه حلوه أبدا ..
دول دكرين ، زى الخنشات ، الله لا يورك .
- نوح : برضك حاشوفهم .
- قرقر : يادى الواقعه السوده .. يا سيدى قوم الله لا يسيئك ما تعطلش
شغلنا ، قوم لحسن بعدين يعملوا فيك الي عملوه في الشيخ

عجائب .

نوح

: ولو .. برضه حاقعد .

قرقر

: (بعد أن نفذ صبره) لا ، الظاهر الحكاية ما فيهاش فايده أبدا

(لنفسه) ما فيش طريقه غير انا اقول له الحقيقة ويا طابت يا اتنين

عور (لنوح) بقى اسمع يا سى نوح افندى .. انا مش حا خبي

عليك .. أنا حا قول لك على كل حاجة ، باختصار القول ..

الحكاية وما فيها ، ان اللى فى الشوالات دول مش عفاريت .

نوخ

: آمال يقوا ايه ؟

قرقر

: بنى آدمين ؟

نوح

: بنى آدمين ؟ اللى هبدوا الراجل العلقه دى كانوا بنى آدمين ؟ يا

سلام عليهم .. أحبهم .. لا يبنى عليهم ، علشان ابوسهم مسن

عينهم .. هم فين طلعمهم لى (يقذف بالعود وينهض مقتربا من

الشوالات) .

قرقر

: طب بس اصبر ما ترعقش كده ، علشان افهمك بقية الشغلانة .

نوح

: مش عايز أفهم .. أنا عايز اسلم عليهم وأهنيهم واحضنهم (بهجم

على شوال آخر غير الذى به محمود وسيد ويحضنه) أهنيك ..

أهنيك من كل قلبى ، يا سلام ، أدإيه انت فشيت غليلى ، أما مقص

الى نتشتهوله .. مش بتاع بنى آدمين ، مقص عفاريتى حقيقى ..

إنت خليتنى اتمنى انك تكون بنى آدم علشان اضمك للجمعية ..

لسه كنت بقول لقرقر ، لو منكم اتنين فى جمعية قتل الزوجات

كنت سويت بيكو الهوايل ، إيدك لما أهنيك مبروك (يفك الشوال

ويمد يده فيجد به عدس بجيه فتبدو عليه الحية) إيه ده ؟ إيه ده يا

واد يا قرقر ؟ ده بجيه ؟

قرقر

: جبه ؟ وجابها منين الجبه دى ؟ ده ما كانش لابس جبه أبدا يمكن

لبسها جوه .. على العموم معلش .

- نوح : معلش ازای ؟ بقول لك بجه ؟ یعنی لا يعرف يشنكل ولا يضرب مقصات .
- قرقر : ليه بس .. تفتكر یعنی ان الجبه حا تحوشه ، على العموم لو حاشته نبقى نقلعها له .
- نوح : هوا إيه اللي نقلعها له .. ونلبسها له .. ده عدس بجه .
- قرقر : عدس إيه ؟! ورننى كده (يحد يده) يا سيدى خضتسى انت غلطت فى الشوال .. أنا راخر بقوله ماله قاعد ساكت كده .. لا بيهرش ولا بيصرخ ، أصلهم اتين .. واحد بيهرش علشان حاجه بتاكله والثانى بيصرخ من الجوع .
- (محمود يصرخ) .
- قرقر : حالا .. دقيقه واحده ، لغاية ما يجيوا الأكل ، أكله على كيفك عمرك مادقت زيها .. كانت من نصيب الشيخ عجائب .. أهى دى اللي يقولوا عليها تكوف فى بقك وتقسم لغيرك .
- نوح : يا الله يا أخى طلعهم بسرعه علشان نعقد الاجتماع .
- قرقر : اجتماع إيه ؟ .
- نوح : الجمعيه .. هم مش حاي انضموا ؟ .
- قرقر : أيوه حاي انضموا .. بس مش كده خبط لزق . ما يصحش تاخدهم كده على مشمهم .
- نوح : یعنی إيه مش خبط لزق ؟! الحكايه مستعجله ، ولازم نشوف شغلنا ، ونعقد اجتماع عاجل سريع .. علشان نبت فى أمر أم عبده وتتخذ ضلها إجراء حاسم ، والا یعنی عاجبك الشبايك اللي مسكراها دى ؟! .
- قرقر : لا .. لا ، عاجبانى ازای .. بس انت عندك فكره عن شخصية العضوين دول .. یعنی تعرف هم ييقوا مين ؟! .
- نوح : مش عايز اعرف .. اللي أعرفه عنهم كفايه جدا ، كفايه انهم رقعوا

عجائب الكلب الهدرين الى خدhem . كفايه مهارتهم في فسن
الشنكله ، والمقصات .. كفايه ..

قرقر : مفهوم .. مفهوم .. بس انا عايز اقول لك .. ان ظهورهم هنا
مستحيل .

نوح : ليه ؟ .

قرقر : لأن البيت ده محظور عليهم .. ده يعتبر منطقهم محرمه عليهم .

نوح : علشان إيه ؟ .

قرقر : لأن دمهم مباح فيها .

نوح : مين أباحه ؟ .

قرقر : عدوك اللدود .. الست ام عبده .

نوح : وليه ؟ مالها وماهم ؟ تطاردهم ليه ؟ وتبيح دمهم ليه ؟ هسى
متجوزاهم ؟ .

قرقر : متجوزاهم ازاي يا سيدى .. بقول لك ام عبده مرات حضرتك ،
تقول لى متجوزاهم ؟ .

نوح : أصلك مخولتنى ، لأنى مش فاكرا انها بتبيح دم حد غير جوزها ،
مش فاكرا ان الخصومه المستحكمة دى تنشأ بينها وبين حد إلا اذا
كانت بينهم صلة جواز ، طيب إذا ما كانتش متجوزاهم تبقى مالها
وماهم ، لها عندهم ايه ؟ .

قرقر : أجرة الأوده .

نوح : آه .. بقى قولتنى .. يعنى هم دول الجماعه الى كانوا ساكتين
فوق ، والى استولت على عفشهم ؟ .

قرقر : أيوه ، أهم هم ، استولت عليهم ضمن العفش .

نوح : وإيه الى زنفهم الزنقه السوداء دى ؟ .

قرقر : طبت عليهم ما عرفوش يروحوا فين وكانوا متعودين ينزلوا على
المواسير ، لكن حضرتك كنت واقف فى البلكونه الى تطل على

- المواسير فخافوا منك وملاقوش حته يستخبوا فيها غير الشوالات .
- نوح : قلت لي ، طيب يا الله ، اطلق سراحهم حالا .
- قرقر : بس اصبر شويه ، لغاية ما البت عديله تجيب الأكل ، وبعدين نقفل الباب ونطلعهم يا كلوا لقمه ، والا ياخذوا الأكل معاهم ويروغوا .
- نوح : والاجتماع ؟ .
- قرقر : تبقوا تتفقوا عليه بعدين .
- (تدخل عديله وهي تحمل الصينية وعليها الفطار) .
- عديله : الأكل امة .
- قرقر : حطيه على الترايزه .
- عديله : آمال فين الشيخ عجائب ؟ .
- قرقر : تعيشى انتى .
- عديله : يعنى إيه ؟ جراه حاجه ؟ .
- قرقر : العفاريت جابوا له الكافيه . طيروه على فوق .
- عديله : آمال الأكل دالمين ؟ .
- قرقر : للعفاريت .
- عديله : العفاريت بياكلوا غسل وقشطه ؟ .
- قرقر : ما ياكلوش ليه .. عفاريت ذواتى .. مش واخدين على التقشف .
- عديله : بقى كده ؟ .
- نوح : كده والامش كده ، انتى حافتحى له محضر سببى الأكل واطلعى بره خليه يشوف شغله ، هوا حا يطلعك والا حا يطلع العفاريت .
- عديله : هو اللي حا يطلع العفاريت ؟ ياخى عفاريت لما ينططوه .
- (تخرج عديله ويفلق قرقر الباب خلفها) .
- نوح : يا الله يااعم .. يا الله قوام ، افرج عنهم حالا ، خليه يشموا نسيم الحرية ، وخلينى اشد على أيديهم وأهنيهم بعضوية الجمعية .

قرقر

: حاضر .. حافكهم ايه .. بس خد بالك من الباب كويس .

نوح

: ما تخافش ، انا حا اسنده بضهرى ، ما فيش حد حا يقدر يخش

أبدا ، أنا باعتبار نفسى مسئول عن حياتهم .. دول أعضاء جمعيتى ،

دول سندى ، يا الله بقى طلعمهم .

المشهد السادس

(يسند نوح الباب الموصل إلى بقية الغرف بظهره) .

(يسرع قرقر فيفك الشوال الذى به محمود فيقفز إلى صينية

الأكمل ويأخذ فى التهامه) .

محمود

: لو صبرت على دقيقه واحده ، كنت مت من الجوع .. أما حته

صينية يا سلام سلم ، أنا مش عارف آكل إيه واسيب ايه ، أنا قتيل

العسل النحل ده .

(يتجه قرقر إلى شوال سيد ويفكه فيخرج سيد وهو يهرش) .

سيد

: يا سلام يا هوه ، أنا أول حاجه حا انادى بيها هى المطالبه بالحرية

الخامسه ، ربنا ما يحرمش حد منها .

نوح

: إيه هى دى الحرية الخامسه ؟ .

سيد

: حرية الهرش يا أستاذ ، ربنا ما يحرمك منها أبدا .. إنك مجربتش لـ

تكون حاجه بتقرصك ونفسك تهرش وما نتاش قادر ؟ .

نوح

: لا والله ما جربتاهش .

سيد

: يعنى ما فيش حاجه قرصتك أبدا ؟ .

نوح

: لا ، بس عمرى ما قدرتش اهرش ، أنا جايب عصايه مخصوص

للهرش ، دى يمكن الحرية الوحيده اللى با اتمتع بيها فى البيت حرية

الهرش ، أما باقى الحريات فممنوعه لا حرية كلام ، ولا حرية غنا ،

ولا حرية بصبصه ، ولا حرية وساخه ، ولا حرية لخبطة .. الله لا

يوريك .. على العموم دا كله حا تحققه ان شاء الله بالجمعية يتاعتنا . بس دلوقتى تعالى كل لك لقمة على ما قسم .

(يتجه سيد إلى الصينية ويأخذ فى الأكل) .

نوح : ما تأخذوناش يا جماعة فى الأكل الطيارى الى ع الواقف ده لكن نعمل إيه فى سى قرقر ، ما دام عملكوا عفاريت .
(يتعد من أمام الباب قليلا) .

قرقر : إوعى الباب ، إوعى ، لحسن القضا المستعجل يطب ويكشف الحكاياه ، ونروح كلنا فى شربة ميه .

محمود : القضا المستعجل ؟ يا بهى ، أنا حازور .

سيد : أحسن حاجه نعمل ساندوتشات وناخدها فى جيوبنا .

نوح : ما تخافوش ، أنا سادد الباب كويس ما حدش حا يستجرى بخش ، كلوا على مهلكم ، علشان بعد كده نقدر نعقد الاجتماع على راحتنا .

قرقر : اجتماع إيه ؟ مش وقته دلوقت ، يا الله يا جماعة اعملوا كل واحد ساندوتش ، وزوغوا دلوقت ، ما حدش عارف الظروف بعد كده إيه .

نوح : والجمعية ؟

سيد : (وهو يحشو رغيفه) نتفق عليها بعدين .

نوح : بعدين ازاي ؟ المسألة مستعجلة خالص .

محمود : طيب ممكن نتفق دلوقت على حته نتقابل فيها .. أصل هنا منطقة خطر .. خطر جدا .

قرقر : أيوه خطر علينا كلنا ، دى لو طببت علينا مش حاتسينا الاقتل .

نوح : طيب نتقابل فين ؟

قرقر : اتقابلوا النهارده بعد الضهر فى القهوة الى على ناصية الشارع .

نوح : بعد الضهر كثير ، احنا عايزين نشوف شغلنا .

- محمود : طيب نخليها الظهر والا الصبح زى ما انت عايز ، بس اظن دلوقت نخرج قبل ما حد يقفشنا ! .
- قرقر : أيوه .. يا الله زوغوا بسرعه ، وانا حاخبي الشواتل الفاضية ، وانعكش الأوده .. قال يعنى حصلت بيتنا خناقه جامده ، وانا انتصرت عليكم .
- (لا يكادان يمان بالخروج حتى يفتح الباب المؤدى إلى السلم وتندفع منه زكية ولعه) .

المشهد السابع

- نوح : (صارخا في فرع) زكية ؟ إيه اللي جابك هنا دلوقت يا زكية ؟ .
- محمود : الله !! زكية !! .
- زكية : أيوه زكية ، مالكم بتصول كده زى اما يكون التقيتوا عفريت ؟ .
- قرقر : والله العفريت أهون ، أنا لسه دلوقت مطلع عفريتين بشوية عسل .. لكن انت اطلعك بإيه .. إيه اللي جابك يا ست زكية ؟ .
- زكية : اسكت انت انسديابوز الإخص .
- قرقر : حاضر ، انسديت ، حاسكت خالص ، وانا بقى عندي حاجة .. كل اللي عندي خلاص قلته .. لغاية ما طلعت العفريتين دول ، لكن انت بقى ما اظنش فيه فايده منك ، ما كنتش عامل حساني عليكى أبدا ، أنا أحسن حاجة أقعد كده واتفرج عى اللي حايجرى ، اتفضللى يا ست كبريته .
- زكية : ولعه يا روح امك .
- قرقر : ولعه ، كبريته ، أهو كله محصل بفضه ، أهى حاجة تلسع وخلاص .
- زكية : قلت لك ولعه يعنى ولعه .. يعنى مشعوطه .. بت تلعب بالبيضة (أم رتية)

والحجر .

قزقر : أنا مالى يا سيدتى العبي باللى تلعبى ييه ، أهم كلهم قد املك ، بيض على حجاره ، العبي زى ما انتى عايزه .. بس خدى بالك بقى يا ست ولعه .. ان فيه ورا الباب ده .. عاصفه .. اسمها ام عبده .. تاخذ فى وشها ميت ولعه .

زكية : وانا مالى يا عمر ، بتخوفنى والا إيه ؟ أنا ما كلش م الكلام ده .
قزقر : أنا مالى تاكلى ولا ما تكليش ، أنا حببت بس أعمل اللى عليه ، ودلوقت عن إذنكم ، أكل لقمه ، على الأقل لما يجرى لى حاجه أبقي ميت شبعان ، حضرتهم يا ست ولعه .. الأستاذ نوح ، والأستاذ محمود والأستاذ سيد .

زكية : عارفاهم يا روح ستك .

قزقر : يعنى اطلع منها خالص .. حاضر .. حاضر .. اتفضلوا .
محمود : الظاهر ان اليوم ده مش حا يفوت على خير أبدا .. أنا بافكر آخذ الرغبة بتاعى وادخل الشوال تانى ، هى حقيقى القعده مش مريحه ، لكن آهى مأمونه ، بعيد عن الخطر .. والشوال اللى تعرفه أحسن م اللى ما تعرفوش .

(بهم محمود بالدخول فى الشوال) .

زكية : رايح فين يا سى محمود افندى ، اطلع لى بره يا خويا ، أنا ليه عندك حساب .

نوح : ما ترعقش كده يا ست زكية الله لا يسيئك وطى صوتك شويه ، قولى لى بس إيه اللى جابك هنا ؟ .

زكية : (تكشف عن ساقها) رجله يا حبيبى ، وحشين ؟

سيد : هم من جهة الحلاوه حلوين ، بس يعنى جابوكى هنا ليه ؟ .

زكية : جابونى ليه ؟ علشان اصفى حسابى معاكم ، علشان اشوف لى طريقه ، علشان أرسى لى على بر .

- محمود : طيب انت مش جابه لنوح افندى ؟ عن إذلك احنا .
- زكية : اقعده هنا ، انا جايه لكم انتوا لاتنين ، لازم تشوفوا لى خلاص ،
انتوا فاكرينها إيه ؟! سايبه ، فوضى ؟!
- نوح : طيب يا زكية ياختى ، الخلاص ده ممكن نشوفه فى أى حته تانيه ..
الحكاية ما اظنهاش مستعجله أوى كده وانتى عارفه ان خالتك أم
عبد له لو دريت ..
- زكية : حا تعمل إيه يا ادلعدي ، أنا عايزاها تدرى ، لازم اجيبها على
بلاطه .. ما فيش فايده غير كده ، هو كل الطير اللى يتاكل لحمه ..
كل ما اجيلكوا من هنا تجوى من هنا .. الحمد لله اللى قششتكم هنا
مع بعض ، علشان نرسي لنا على حل .
- سيد : حل فى إيه بس يا ست زكية ، هو ادا وقته ؟
- زكية : اسكت انت واتلم بلسانك ما تداخلش فى اللى مالكش فيه (توجه
الحديث إلى نوح) هه .. قلت إيه ؟
- نوح : فى إيه بس يا زكية ؟
- زكية : ما تناش عارف فى إيه ، فى اللى فى بطنى يا عومر .
- نوح : اللى فى بطنك ؟! ماله ؟!
- زكية : عايزه له أب يا حبيبي .. عايزه له والد يا سيدنا لفندى .
- محمود : عايزه له إيه ؟!
- زكية : أب ، أب ، مش فاهم يعنى إيه أب ، زى أبوك ، وأبو أبوك .
- محمود : أيوه .. أيوه فاهم .. بس وطى صوتك .
- نوح : ومستعجله قوى ، على أبو لسلامته ، ليه ؟!
- زكية : مستعجله ليه ؟!
- محمود : أيوه حقيقى ، يعنى مش كان يبقى أحسن لو تسييه لغاية ما ينزل
ويكبر ويميز ، ويختار الأب اللى يعجبه ؟!
- فرقر : (وهو يعضغ الطعام) أى والله فكره ، أنا شخصيا ، لو خيرونى ما

كنتش اخترت ابويه دا أبدا ، كان شحات ابن شحات ، وكان شكله وحش قوى ومورى أمى الويل . لكن اعمل ايه ، طلعت لقيته الله يرحمه أبويه ، وما قدرتش اقول لهم غيروه ، لكن والله لو كان بإيدى كنت مؤكد نقيت واستد تانى .

نوح : مضبوط . لك حق ، أهى دى حرية جديده م الحريات اللى حان تطالب بيها الجمعية . حرية اختيار الآباء .

زكية : بتقولوا إيه ؟ حرية اختيار الآباء ؟ يا اخى بولما يشتحك منك له . آل يختار الأب اللى هوا عايزه آل ، خش فى عيى يا خويا خش . استكردى يا خويا استكرد ، ما اتم أصلكم فاكرينى هفيه ، لا ، أنا ما باكلش من الكلام ده . لازم اشوف له أب حالا .

محمود : ليه بس يا زكية يا اختى ؟ ليه العند ده ؟ دا مش وقته أبدا ، خيلنا بعدين ندبر المسألة سوا على رواقه .

زكية : ما كانش يتعز يا حبيبى ، غالى والطلب رخيص يا روحى ، آل على رواقه آل ، ياريت كان ممكن يا سى حوده .

نوح : هوا إيه أصله ده ؟!

زكية : ما انتش عارف أصله إيه ؟! حانعيده تانى . أصل انا عايزه أب للواد اللى جى بعد كام شهر ، عرفت بقى أصله إيه ؟ . أصل انا مش عايزاه ينزل يلاقى نفسه يا ضنايا ، من غير أب ، يعنى ابن حرام ، فهمت يا روحى ، والا افهمك كمان ؟! يعنى بالعربى واحد منكم لارم يتجوزنى حالا .

سيد : حالا ؟!

زكية : أيوه حالا ، حالا ، يعنى يطلع معايا من هنا على المأذون ، رجلى ، على رجله ، قلم إيه بقى ؟!

نوح : يا ستى زكيه ، الحكايبه ما نجيش كسده .

زكية : خلاص انتيننا ، كلمه واحده ، أنا مش حادوخ نفسى وراكم بعد

کده ، لازم اطلع من هنا بعريس . فاهمين والا لا ؟ .

نوح

: إيه هوا دا ؟ هي الحكايه ، عافيه ؟ .

زكية

: عافيه ؟ . بقى كده ؟ طيب انا حا اوريك العافيه تبقي ازاي (ترفع بالصوت) يوه .

قرقر

: (قافزا من مكانه في فزع) يا نهار اسود ، انا في عرضك يا ست

زكيه يا اختي ، أنا مفهم الست ام عبده ان العفرتين اللي حاطلعهم لاتنين دكره ، ما كانش عندي فكره أبدا انك حا تشرفي هنا كنت عملت مقدمه وقلت لها ان معاهم نتايه ، اعملی معروف وطي صوتك لحسن تطب علينا تجيب أجلتنا ، يا الله يا جماعه ، خلصونا شوفوا لنا حل قوام .

نوح

: حل ازاي بقى ؟ .

زكية

: ما نتاش عارف حل ازاي . خا نعيده تنافي ، واحد منكم يتجوز في .

قرقر

: أيوه ، واحد منكم يتجوزها ، ما فيش غير كده .

نوح

: أنا ما اقدرش ، ما اقدرش أبدا . دي ام عبده ، كانت تعلق لي المشنقه في وسط ميدان السيده ، دي كانت تاكلتني ، اتجوزها انت يا سي محمود ، انت فاضی ، وعلى كيفك .

محمود

: أنا ؟ أنا اتجوزها ؟ ده برضه معقول ؟ اتجوزها وانا مش لاق آكل ، اتجوزها وأنا لسه تلميذ ، واروح لهم في البلد بدل ما يكون في إيدي شهاده يكون في إيدي زكيه ولعه ! وياريت زكيه ولعه وبس ، الا وعلى كتفها كان ولد !! ما شاء الله ، دول كانوا يخنقوني ، لا يا عم ، أنا ماليش في الجوازه دي أبدا ، أنت راجل مقتير مبسوط ، وكان قدامك في حساب الشرع ، تلاته (إلى زكيه) خلاص يا ست زكيه ، نوح افندي حا يتجوزك ، اتجوزها يا نوح افندي .

- نوح : ما يمكنش ، ما اقدرش ، حرام عليكم يا جماعة .
- زكية : (في ملل) يا الله بقى خلصوني ، أنا مش فاضيه لكم .
- قرقر : أحسن حاجه ، نعمل قرعه .
- زكية : اعملوا اللى انتوا عايزينه ، بس خلصوني قوام ، شوفوا لى جوز حالا ، حالا دلوقت ، فاهمين والا لا .
- (يسمع صوت أم عبده من الخارج) .
- أم عبده : خلاص يا قرقر ؟!
- (يحدث هرج ومرج وهم محمود وسيد بالفرار ، فتقف زكية فى طريقهما) .
- زكية : خليك عندك منك له لحسن ازقع بالصوت .
- قرقر : (مجييا أم عبده) اصبرى على يا ست شويه ، لحسن دول معصلجين قوى ، (إلى محمود ونوح وسيد) يا الله يا جماعة شوفوا لنا حل بسرعه ، حد منكم يقول لها انه حا يتجوزها ، واخلونا ننتهى .
- زكية : يقول لى إيه يا عمر ؟! هو انا باكل من الكلام ده .. يخرج من هنا على المأذون إيده فى إيدى .. هى الحكاياه سايبه والا إيه ؟!
- نوح : (يرمى على الأريكة فى يأس) لا .. الظاهر ان أجلى قرب .. يا خنسارة الجمعيه .. يا خسارة المشروع .. يا خسارتك يا نوح افندى .
- محمود : (يمسك الشوال محاولا إدخال نفسه فيه) أنا يا عم حا ادخل جوه الشوال تانى ، ومش حا اطلع منه أبدا .
- قرقر : بقى ده اسمه كلام ؟! يعنى عايزين ام عبده تيجى تموتنى انا ؟! يعنى هى المسأله مالهش حل ؟! ما فيش حد عايز يضحى ؟!
- سيد : (بعد تفكير) أقول لكم . أنا حا اضحى . حا اضحى لكن مش علشان خاطر كم أو خاطر ام عبده ، انا حا اضحى علشان خاطر

مخلوقه واحده .. عارف انها حاتتا لم لو واحد منكم تجوز زكيه ..
 حا اضحي علشان خاطر واحده حا تتصدم لما تلاقى ابوها التجوز على
 أمها فى آخر العمر ، وحا تتصدم أكثر لو تعرف ان البنى آدم الى
 فاكراه مثل أعلى التجوز الست زكيه ولعه ، وبقي أب لابن مجهول
 الأب .. أنا حا تجوزك يا ست زكيه .. وأمرى لله لأن ما فيش حد
 حاسس بيه ولا حايز عل عليه .

زكية : (فى ذهول) انت بتكلم جد ١٩ والا عايز تلفنى .. خد بالك
 كويس انا ما يتضحكش على أبدا .

سيد : أنا ما اعرفش الف .. كل الى انتى عايزاه حا اعملهولك .. ياالله بينا
 يا جماعه .

(يهمون بالخروج عندما يسمع صوت الشيخ عجائب من وراء
 باب السلم) .

عجائب : وله يا قرقر .. ما طلعتليش الفطار ليه ١٩ انت عايزنى اموت من
 الجوع .. مش كفايه الى جرائى .

قرقر : يادى الوقعه السوده .. نعمل ليه دلوقت ١٩ حا تخرجوا منين (إلى
 عجائب) طيب يا سيدنا الشيخ اطلع دلوقت وانا اجيب لك
 الصينيه .

عجائب : (من الخارج) مش طالع الا لما تنديها إلى دلوقت .

قرقر : أعمل ليه فى اين الأروبه ده ١١ هاتوا يا جماعه الأكل الى معاكم ..
 (يحاول جمع الأكل وإخراجه من الأروقة وإعادته إلى الصينيه
 عندما يسمع صوت أم عبده من وراء الباب الآخر) .

أم عبده : واد يا قرقر .. انت حا تضيع اليوم عندك والا ليه ؟

نوح : خلاص ما فيش فايده رحنا فى داهيه .. الحصار تم من جميع
 الجهات . وقعنا والى كان كان . جالك الموت يا تارك الصلاه
 أشهد أن لا إله إلا الله .

(يقفز قرقر من مكانه وينزع أغطيه الأرائك فيضعها فوق محمود
وسيد وزكيه .. ويعطى لكل من محمود وسيد رق .. وزكيه
طيلة) .

قرقر : اسمعوا يا جماعة دى آخر محاوله .. دى آخر حاجه نقدر نفند بيها
بحمرنا .. يا تخيل عليهم يا نروح فى داهيه .. أنا حافتح لكم الباب
وانتو .. تخرجوا على بره جرى وكل واحد منكم يدق باللى فى إيده
قوى ويفقر .. وانت يا نوح افندى امسك العود بتاعك ، وتتن
لهم .. فاهمين ؟ .

(تفتح أم عبده الباب فتدهل مما تراه) .

أم عبده : (صارخة) يا حفيظ .. يا مغيث .. دول إيه دول يا واد يا
قرقر !؟ .

(يبدأ الدق ويندفع الطابور وهو يتروح إلى الخارج) .

نوح : (وهو يعزف على العود) :

ترلى .. ترلى .. ترلى .. ترلى ..

محمود : (منشدًا) أنا الولى .. أنا الولى .

سيد : (منشدًا) وأنا ابن عمه الشيخ على .

زكية : (منشدة) وأنا اللى بزف الصالحين .

(يفتح قرقر الباب أمام الموكب .. بينما هم يرددون الأنشودة
مراوا) . (عجائب لا يكاد يرى الموكب حتى يصرخ فرعا ويفر
هاربا) .

(يسدل الستار)

الفصل الثالث

(المنظر : بعد سنة . والوقت قبيل العشاء في ليلة صيف . صالة في الشقة العليا ، لمنزل أم عبده التي استأجرها سيد ومحمود . في الواجهة باب يؤدي إلى شرفة بها بعض قصارى زرع . وفي اليمين بابان أحدهما يؤدي إلى دورة المياه والثاني إلى السلم ، وفي اليسار باب يفضي إلى غرفة النوم ، وشباك يطل على منور وقد وضعت عليه صنية قفل . في الركن اليمين البعيد أريكة استامبولي . وفي الركن اليسار البعيد بعض السلالات والشوالات . في الوسط منضدة كبيرة حولها مقاعد خيرزان . في الركن اليمين القريب بوفيه وفي الركن اليسار القريب المنضدة القديمة وعليها كتب وأوراق والمرآة المشروخة .. وبجوارها غابة أشبه بسنارة الصيد في آخر الدوبارة التي بها مشبك غسيل .. يبدو سيد جالسا أمام المنضدة وقد أتم كتابة رسالة وبدا في تلاوتها لنفسه) .

المشهد الأول

(يقرأ) :

سيد

« أكتب إليك يا ساحرة وأنت منى على قيد خطوات ، أكاد لو أنصت أسمع هبة أنفاسك وخفقة قلبك .. أكتب إليك لأنى أشعر عند الكتابة بما يشبه متعة اللقاء ، وأحس أنى أنقل إليك ذوب نفسي وخلصة روحي ، وأكاد أتوهم وأنت تقرئين ما أكتب أنى طاق في الصفحات قابع بين السطور ، وأنى أمتع العين بسحر عينيك وأدق »

الروح بحر أنفاسك .

إني أحسك يا ساحرة في كل ما أحس .. أحس بك في كل زهرة ندية
وروضة بهية ، وطر شاد ونجم هاد ، وعطر زكى ولحن شجي .
أنت معي دائما .. في كل صحوة وغفوة .. أنت معي غائبة أو
حاضرة ، واصله أو هاجرة .. أنت باقية في روحي وفي ذهني وفي
قلبي .. بقاء الروح والذهن والقلب » .

المخلص محمود

(يطوى الرسالة ثم يشبكها بمشبك غسيل المربوط في السنارة
وتحين منه التفاتة إلى شكله في المرأة فتخرج منه تنيدة مريرة
ساخرة ويحدث نفسه) .

(لنفسه في المرأة) وآخرتها ؟ وايش بعد دا كله ؟ إياه آخرة الهوى
المتنكر ، والحب المقنع ده .. انت .. بخلقتك دى ، وبكيانك
ده .. مفيش فايدة منك مش حاتحبك مش حاسه بيبك ، ولا حاتحب
تحمس بيبك أبدا .. خلقتك كده .. تعمل إيه ؟ طب ما انا عارف انها
مش حاتحبني ، أنا يائس جدا من حبها ، أنا ما بعملش كده علشان
تحبني .. أنا بعمل كده علشان ما اخذ لهاش ، أنا عايز امنحها الأمل
الى انا فقدته ، واعتقد ان انا نجحت في كده .. أنا عملت كل
حاجه علشانها .. أنا كرسست جهودي وحياتي كلها علشان
اسعدھا واحقق لها أملها .. أنا قبلت اضحى بنفسى واتجاوز زكيه ،
علشان ما اصددها في محمود ، ولولا ربنا ستر ، والحكاية طلعت
لا حمل ولا حاجه .. كان زمانى جوز ست زكيه ولعه ، وأبو ابن
ربنا يعلم مين أبوه .. قبلت دا كله علشان خايف عليها لتألم ،
وفضلت ورا الحيوان محمود الله من البارات والكباريات وأذاكر له
واسهر بيه اليالى لغاية ما خلتيه ينجح وياخذ الليسانس ، وفضلت
أجرى ليل مع نهار وانط من ديوان لديوان .. واجيب في واسطه ورا

سيد

واسطه لغاية ما ربنا سهلها له وبقي موظف محترم . وقعدت أدیق
واقصد واحرم نفسي لغاية ما بقالتا شقه محترمه نظيفه عليها القيمه
بعدما كنا مش قادرين ندفع أجرة الأوده الى فوق السطوح
وخرجتنا منها الوليه على ملا وشنا محبوسين فى الشوالات ، وطول
المده دى كلها عمال اهدى فيه واحاول ان اخليه يحبها واكتب لها فى
جوابات باسمه ، وانا جيبها بلسانه .. أنا جيبها بلسانه هو ، وبقلبي
أنا .. ذا المتفد الوحيد .. الى بنفس ييه عن مشاعرى ، ويخرج فيه
حبى ، ويتلقى منها الردود بتاعتها ، اللذيذه الخسوه الهايه ..
حقيقى ، مكتوبه له .. لكن بحس منها بعزاء كبير ، بحس ان ولوانى
مش مقصود بيها .. لكن بلاقى فيها الرد على جواباتى ، وعلى
هيامى ، وعلى حبى .. أنا حاسس ان الشعور بتاعى مردود ، مش
ضايح فى الهواء .. هى حقيقى ما تحبش الشكل الظاهر ده (يشير
إلى نفسه فى المرآة) ، ولها حق .. لكن منيألى انها بتحب الحاجه
المستخبيه .. بتحب القلب والشعور ، والروح ، ودا كله أبقي
وأدوم وأحق ، (يطلق تنهيدة مريرة ساخرة) أهو كلام بنعزى بيه
نفسنا ، أمال حنقول إيه لو ما كنش كده ، كان الواحد زمانه مات
من اليأس .

(ينهض من مكانه ومعه الخطاب والسنارة والدوبارة ، ويتناول
النأى من فوق البوفيه ثم يطفىء النور ويتجه إلى الشرفة . يقف
بيها .. ويعزف برهة على النأى ، ثم يتقدم من حافتها على أطراف
أصابعه ويقذف بالرسالة ممسكا بيده طرف السنارة) .

(فى هذه اللحظة يفتح الباب المؤدى إلى السلم بفتح من الخارج
ويدخل محمود يحمل لقائف بها سندوتشات ومأكولات
وزجاجات بيره ويفتح النور ويضعها على الترابيزه ويرفع عقيرته
بالغناء) .

- محمود : ما كنش كده طبعك يا غزال ، والنبي انا مقدر على دى الحال .
 (سيد يفرع خشية أن تفضح بهية الأمر ويحاول إسكاته بإشارات من يده ، ولكن محمود لا يشعر به ويستمر فى الغناء ، فيترك السنارة مستدة على سور البلكون ويهرول إلى الداخل) .
- سيد : هس .. الله يفضحك .. زى ما حتفضحننا ، هو دا وقت غنا ؟
 محمود : (يفاجأ ويفزع) إيه ده ؟ انت طلعت منين نشفت دمي .
 سيد : هس ، وطى صوتك لحسن تسمعك .. تبقى فضيحه ، وتضيع كل تعبنا هدر . اطفى النور لغاية ما تاخذ الجواب ، والا يعنى لا منك ولا كفاية شرك .
 (محمود يطفىء النور ثم يتسلل سيد إلى الشرفة ويمد يده فيسحب السنارة) .
- محمود : (هامسا من داخل الحجرة) ها .. غمزت ؟
 سيد : (يشير برأسه بالإجابة ثم يعود متسللا إلى داخل الحجرة) كنت حا تودينا فى شربة ميه ، مالك جى عيارك فالت قوى ، وداخل فارد قلوعلك .. إيه حكايتك ؟
- محمود : (يضيء الحجرة) حكايتي انا ؟ والا حكايتك انت ؟ إيه اللي قعدك انت لغاية دلوقت .. انت مش قلت انك مسافر تحيب قرشين ومش راجع غير بكره بعد الظهر .
- سيد : دا اللي كان مفروض .
 محمود : وبعدين ؟
 سيد : ما جصلش قسمة .. الحكاياه حصل فيها الخطبه واضطربت ألغى السفر .
- محمود : (فى انزعاج) تلغى السفر ؟ يعنى مش حا تسافر ؟
 سيد : مالك بتصرخ كده !! انت مش لسه قابض ، ولا طيرت الماهيه زى عوايدك ، على العموم بكره ربنا يفرجها ويرزقه من حيث لا

- يحتسب .
- محمود : قوى .. أنا معاك خالص ، من جهة يرزق من حيث لا يحتسب
فيرزق أوى .. بي بقى يرزقه بإيه ؟ عمرك ما تعرف بمصايب ..
ببلاوى .
- سيد : بلاوى إيه اللى رزقك بيها ؟
- محمود : فيه أكثر من كده بلاوى ؟
- سيد : ما تقوللى بس إيه هى البلاوى دى ؟
- محمود : وجودك الليلة دى .
- سيد : وجودى أنا ؟
- محمود : أيوه .. كان لازم تسافر .. أنا كنت عامل حسابى على إنك تسافر
الليلة دى .
- سيد : ولما ما سافرتش حصل إيه ؟ قعدت على قلبك كنت أنفاسك ؟
- محمود : حاجه زى كده .
- سيد : يعنى إيه ؟
- محمود : يعنى بالعربى أنا عارف زكيه هنا الليلة دى .. عملت حساب انك
مسافر ، وقلت بدل ما اروح اسهر بره أهو أجيب شوية الشرب
والأكل ونقعد نمزمر هنا ، جيت انت بسلامتك حليت لى ،
وقعدت فى البيت وخسرت لى كل الشغلانة ، تبقى دى بلاوى من
حيث لا أحتسب ، والا لا ؟ إيه العمل ؟ مش تقوم تسافر احسن ؟
- سيد : انت بتقول إيه ؟! انت اتجنت ؟ زكيه جيا لك هنا فى الشقه عشان
تسهروا سوى ؟ دى آخر أنواع الفضائح اللى عايز تعملها ؟ عايز
الجيران يقولوا علينا إيه ؟ انت مش حا تستريح الا لما تودينا فى
داهيه . وبسلامتها جايه إمتى ؟
- محمود : (ينظر إلى الساعة) أهو كان نص ساعه .
- سيد : (فى فرع) نص ساعه ؟ انت مجنون ؟ انت مش عارف بعد نص

ساعة مين حايحملك هنا .

محمود : مين ؟

سيد : مش فاكرك قتللك إيه النهارده الصبح ؟

محمود : لا .. مش فاكرك .

سيد : مش فاكرك الجواب اللي قريت هولك ساعة ما صحيت من النوم ؟

محمود : أبدا أبدا .. أنا لما باصحي من النوم باقعد ييجي نص ساعه في حالة

غيوبة تامه .. أنا مش فاكرك الجواب ، أنا مش فاكرك ان انا شفتك

النهارده الصبح خالص .

سيد : يا نهارك أسود .

محمود : اسود ليه بس .. ما تقول مين اللي حاييجي وتريجني .

سيد : بهيه ؟! افكرت والاله ناسي .

محمود : بهيه ؟ وإيه اللي حاييجيها هنا ؟

سيد : يا محمود يا اخويا .. أعمل فيك إيه ، أكثر من إني اقرالك الجواب

بتاعها .. وأكد عليك انك تستناها عشان حايطلع تقابلك ،

وأترجاك انك تبقى لطيف معاها ، وانك توربها انك بتحبها ،

وتخليك رقيق وما تقلش أدبك ولا تمد يدك ، وتقول لها انك عايز

تجوزها ، وانك حايخطبها من ابوها .

محمود : إيه !! انت قلت لي الكلام ده ؟

سيد : أيوه قلت هولك .. أنا قعدت نص ساعه ألفتك الدرس واحفضك حاي

تقول لها إيه .

محمود : بس .. هي النص ساعه دي اللي اكون في حالة غيوبة فيها وقلتلك

إيه ؟

سيد : قلت لي حاضر .. حاضر .

محمود : حاضر إيه ؟

سيد : حاضر حايخطبها .

- محمود : لا .. دانا لازم كنت فى ذهول تام .
- سيد : يعنى إيه ؟ مش حاططها ؟
- محمود : أنا أخطب ! قال الله ولا فالك .. بقى انا سايك تكتب عنى جوابات حب زى ما انت عايز ومديك توكيل تصفر وتغنى باسمى وقت ما تحب .. لكن لغاية الخطوبه .. وفرمل .. ستوب .
- سيد : إيه ده ! انت مجنون ؟ أقعد اتعب التعب ده كله .. وبعدين تقول لى كده .. أقعد ارنى فيك ، وانجحك واوظفك علشان خاطرها ، والآخر تيجى تخلا بيه كده ، مش ممكن ، ما يمكنش أبدا .
- محمود : إيه هو ده اللى مش ممكن ؟ أنا ما اخطيش ولا اتجوزش أبدا . الشهاده بتاعتك خدها ، مش لازمانى ، والوظيفه كان ، أنا ما أبعش حرىتى أبدا ، ولا بالدكتوراه . لا يا خال ، دا حتى حرام عليك .
- سيد : يا محمود يا خويا ، يا حبيبى ، الله لا يسيئك ، خلينا نتكلم على رواقه ...
- (يدق الجرس ... يفرع الاثنان ويرتكان) .
- محمود : ودى تبقى مين فيهم اللى جايه بدرى ؟ اسمع يا خال :
- سيد : إذا كانت بهيه ، أرجوك تقول لها ان انا مش هنا .
- سيد : مش ممكن ، لازم تقابلها بأى طريقه ، مش ضرورى تخطبها ، قل لها كلمتين لطاف وخلاص . وبعدين يبقى يحلها ربنا ، أرجوك علشان خاطرى .
- محمود : موافق .. بشرط .
- سيد : إيه هو ؟
- محمود : إنها تنزل بسرعه .
- سيد : حاضر .
- محمود : طب وإذا كانت زكيه ؟

- سيد : حا شيلهاالك على راسى .. الى انت عايزه أعمله.أسافر لك لمدة شهر ، بس اوعى ترغل بهيه .
- محمود : خلاص اتفقنا .
- (يدق الجرس ثانية فيذهب سيد ليفتح الباب فيفاجأ بنوح افندى .. يدخل مندفعاً وهو يحمل حقيقه) .
- سيد : (فى ذهول) الله !! نوح افندى !؟

المشهد الثانى

- نوح : (وهو يضع الحقيبة على المنضدة) أسعد الله التماسى كيف الحال ؟
- سيد : الحمد لله .
- محمود : الذى لا يحمد على مكروه سواه .
- نوح : (وهو يخرج أوراق ومنشورات) الليلة دى عندنا شغل كثير ..
- خلاص ابتدينا الجد .. اقعدوا .
- (سيد ومحمود يتبادلان نظرات الحيرة والتردد ويسترقان النظر إلى الباب فى خوف) .
- نوح : (وهو يلبس نظارته ويأخذ فى ترتيب الأوراق) الطلبات نازله علينا زى النظرة .. المنشور الأول عمل مقعوله .. الظاهر ان الحال من بعضه .. ما فيش حد أبدا راضى عن حاله .. (يرفع بصره فيجد الاثنين مازالا يتبادلان نظرات الحيرة والارتباك) الله .. انتم واقفين ليه !؟ ما تقعدوا احنا ما عندناش وقت .. لازم نفحص كل الطلبات دى . ولازم نراجع قانون الجمعيه .. ونبتدى فى تشكيل مجلس الإدارة .. وتكوين الشعب .. دى كلها عايزه جهد كبير .. جلسة النهارده حاتكون جلسه تاريخيه كبرى .. إن شاء الله حاتغير وجه التاريخ .. وحاتكون أول خطوه فى سبيل إعطاء الراجل كل

حقوقه وحرياته من برائن المرأة وتحريره من قيودها .. اقعدها .

سيد

: لكن .. (يتضح) .

نوح

: لكن إيه ؟ فيه حاجة ؟ .

سيد

: لا .. ولا حاجة .. بس قصدى اقول ان .. أنا شايف ان الوقت

وخرى شويه .. والدنيا لئلت .

نوح

: لئلت ؟ .. آمال عايزنا نعقد اجتماع فى عز الضهر .. إيه ده يا أستاذ

ده ؟ دى جميعه سرية .. إنت عمرك ما اشتركت فى جمعيات

سرية ؟ الجمعيات دى ما تجتمعش الا فى ستر الليل . تحت جناح

الظلام .. ده عز وقت اجتماعها .. اقعدها بلاش تضيع وقت .. يا

الله خلينا نشوف شغلنا .

سيد

: (ينظر إلى الباب فى قلق) بس .. ما يمكنش نقدر نأجل ..

نوح

: (فى غضب) نأجل إيه ؟ هى لعب ، دى مصالح أزواج ، دى

حياه أو موت ، المسألة خطيره جدا يا أستاذ ، إذا ما كناش نلحق

نفسنا حا نروح فى شربة مية ، الوليه ام عبده ، خلاص فجرت ،

بعد ما خلت الشيخ عجائب يستوطن فى الأوده الى فوق ، وجوزته

البنت عديله ، واستولت عليه ، وطول النهار يشبش ويسحر

ويعمل احجبه ، ويطلع فى عمايل ، خلاص فضى لنا ، ما بقالوش

شغله غيرنا ، هو وراه إيه ، آكل شارب نايم ، وأشيته رضا مع

البت عديله ، يبقى وراه إيه غير خدمة ام عبده وأذيتنا لا ، لا ،

الحكاية ما تستحملش التأجيل أبدا ، اقعدها .

محمود

: اقعده بقى يا خال ، ما فبش فايده ، الليله باينه من أولها .

: (يجلس محمود وسيد ويضع نوح أمامهما بعض الأوراق) .

نوح

: دلوقت نقدر نعقد جلسه .. أنا حاتولى الرئاسة .. انت يا سيد

افتدى تتولى السكرتاريه .. وانت يا سى محمود .. عضو مجلس

الإدارة المنتدب .. (مفكرا) لكن بالطريقه دى مش حايقى فيه

(أم رتية)

- أعضاء .. لازم يكون فيه ولو عضو واحد .
- (يدق الجرس فيقفز سيد من مكانه فرعا ويجرى نحو الباب ويقف وراءه برهه مترددا) .
- نوح : (محاولا جمع أوراقه .. ناظرا إلى الباب في حذر ومتسائلا في صوت خفيض) انتوا مستنيين حد ١٩
- محمود : لا .. أبدا .. ما فيش حد .. أبدا ! .
- (يدق الجرس ثانية .. فيفتحه سيد ببطء ، ويمد عنقه من خلال الفتحة ليرى الطارق .. يسمع صوت الشيخ عجائب من خارج الباب) .
- عجائب : السلام عليكم يا سي سيد افندى .. عدم المؤاخذه .. وحياة والدك اقدر الاقى عندك قطنه بصبغة يود احطها على البطحه اللى فى دماغى .
- (سيد يفتح الباب ويدخله) .
- سي : الله .. الله .. إيه اللى جراك كفى الله الشر ؟
- (يرتقى الشيخ عجائب على الأريكة وقد بدت إحدى عينيه سوداء من أثر كدمة ووضع يده بالتمديد على جرح فى رأسه) .

المشهد الثالث

- نوح : الله .. إيه الحكاياه يا شيخ عجائب ؟
- محمود : الظاهر ان عين صابته .. حسدناك والله يا شيخ عجائب .. لسه كنا بنقول عليك آكل شارب تايم .. وأشيتك رضا مع عديله .
- عجائب : الله يخرّب بيتها بحق جاه النبى .. الحقنى يا سي سيد انا فى عرضك لحسن خلاص .. دى ساح .. إذا ما كانش بصبغة يود .. تبقى بتلقيمة بن ، بس اوقف الدم .

- سيد : حاضر .. حالا .. بس خليك كابسه بالمنديل .
- (سيد يخرج من البوفيه زجاجة صبغة يود وقطعة قطن ثم يضمده جرح الشيخ عجائب) .
- نوح : إيه اللي جراك يا راجل .. إيه اللي عمل فيك كده ؟!
- عجائب : عديله ياسى نوح افندى .. خدتنى غدر .. دشدشتنى خالص .
- نوح : ليه بس ؟! عملت لها إيه ؟!
- عجائب : ولا حاجه والله .. النهارده الصبح الوليه زهره بتاعة القول النابت فاتت علينا سابت لنا نص قدح فول .. وقالت لى ان بقالها خمس سنين من غير خلفه وان جوزها ناوى يتجوز عليها اذا ما كانتش تخلف .. وطلبت منى وصفه للحمل .. الوليه صعبت عليه قولتلها فوقى عليه آخر النهار أكون عملتلك اللازم وقعدت احضر لها فى حجاب كويس محبش ما يخيش أبدا . وقرب المغربه خبط الباب ودخلت زهره .. رحت مديها الحجاب . الوليه خدته وقلبتة فى إيديها وقول زى ما تكون استقلته .. قالت هوا دا يا سيدنا الشيخ الى حا يجيب الحبل .. قولتلها ياستى البسيه دلوقت واذا ما نفعلش نعمل واحد تانى .. برضه لقيتها موسوسه ، حببت اطمئنها .. قولتلها يا ستى ما تخافيش اطمئنى .. انا مش حاسيك أبدا الا لما تحبلى .. غلطت فى كده ؟!
- نوح : أبدا .
- عجائب : انا يدوبك خلصت كلام .. والاقيلك الباب اتفتح وحاجه كده هجمت عليه .. زى اما يكون صاروخ .. أثنى كلامى كان فى دخلة عديله .. وسمعتة وهى ورا الباب الظاهر الفار لعب فى عبا خلاها شعلت .. وهجمت عليه .. عاديك .. ما خلش فيه نفس .. ولا قدرت افهمها ولا اشرح لها ولا آخذ منها حق ولا

باطل .

نوح : ما تخافش ، بكرة حاتأخذ منها الحق والباطل ، اكتب يا سيد افتدى
بسرعه ، العضو الرابع ، الشيخ عجائب محمد عجائب ، قوم يا
شيخ عجائب قوم ، خذ محلك على الترابيزه ، قوم ، دانت ربنا
بيحك ، العلقه الى انت اترقتها دى ، حاتكون نقطة تحول فى
حياتك . حاتكون سبب فى تخليد ذكرك فى سجل الخلود ، دى
الى حاتدخلك التاريخ من أوسع أبوابه . بدال ما كنت حته هلفوت
نصاب دجال محال ماشى فى ركاب شيخة مجرمات الشرق
الأوسط ، دلوقت حاتبقى عضو مؤسس فى أكبر جمعيه سريه
عرفها التاريخ ، أكبر جمعيه حاتقضى على الطغيان والظلم
والاستبداد . قوم يا شيخ عجائب قوم .. انت امك داعيه لك ،
صدق من قال ، رب ضارة نافعه . أو كما قال ، تيجى مع العمى
طابات .

عجائب

(فى دهشة) إيه أصله ده ، أقوم اروح فين ؟

محمود

قوم ، قوم ، انت وقعت والا الهوارماك ، آل من عديله لنوح يا
قلبي لا تحزن ، قوم يا حلو ، قوم خش التاريخ من أوسع أبوابه ، قوم
لحسن المسأله مستعجله قوى .

بس مش تفهمونى إيه الحكايه ؟

عجائب

دلوقت تفهم ، بس قوم خذ محلك .

سيد

يا الله يا جماعه بقى علشان نبتدى الجلسه ، الوقت كالسيف ، أو
كأم عبده ، ان لم تقطعه قطعك .

نوح

قطيعه ، تقطع ام عبده ، وتقطع الزمن الى زمانا فى بيتها .

عجائب

فضاك كدا يا شيخ عجائب . آمال انا اقول ايه ، الى بقالى عشرين
سنه ، أم عبده مع الأشغال ، لكن معلش ، هانت .

نوح

فيا قلب صبرا إن جزعت فسرهما

هوى الزمن على رأس أم عبده بالصرم

مكسور البيت شويه يا أستاذ سيد ، معلهش ، مدام مكسور على دماغ ام عبده . يبقى الكسر حلال ، يا الله بينا يا جماعه ، فتحت الجلسة .

سيد : (ينظر إلى الساعة في قلق) احنا حانطول يا نوح افندى ؟

نوح : احنا والتساهيل ، نبتدى دلوقت نقرأ قانون الجمعيه ، انا بقالى شهر باوضع فيه ، واعتقد ان ما سبتش حاجه أبدا ما وفيتهاش حقها ، خذ يا سيد افندى باعتبارك سكرتير عام الجمعيه ، اقرا القانون .

سيد : (يتناول الأوراق ويأخذ في القراءة) خطك وحش أوى يا نوح افندى .

نوح : الله يبشرك بالخير ، دائما العظماء ورؤساء الجمعيات السريه يبقى خطهم وحش كده ، لكن على العموم شويه شويه حتأخذ عليه ، اقرا .

سيد : (يقرأ) قانون الجمعيه السريه لقتل الزوجات .
مادة ٢ — الغرض من إنشائها :

(١) وقف استبداد الزوجات .

(٢) المطالبة بالحريات السبع للأزواج وهى :

(أ) حرية البصبصه وشبرقة العينين ، شبرقه بريعه مبدئيا .

محمود : انا معترض .

نوح : علشان ؟

محمود : علشان مسألة البراءه دى ، انا ما احبهاش أبدا .

نوح : يا أخى قولنا ، مبدئيا ، يعنى تبتدى بريعه ، وبعدين يسهلها ربنا ، والا المساله هبش كده ؟

محمود : إذا كان كده معلهش ، موافق .

نوح : استمر يا سيد افندى .

سيد : (ب) حرية الفوضى المنزلية ، وتحريم جميع أنواع النظافه من كنس

ومسح وتنفيض في حضور الأزواج ولا سيما أيام الجمع والعطلات الرسمية .

محمود : (يصفق طربا) ، حلوه الفقره دى ، قلها تانى يا خال وحياة والدك ، أصل انا احب الفوضى قوى .

نوح : اقراها له تانى يا سيد افندى .

سيد : هو إيه أصله ده ؟ احنا ما ورناش وقت .

نوح : طيب كمل .

سيد : (ج) حرية الغياب عن البيت لدواعى العمل ، مع عدم الاستفسار

قطعا عما هى دواعى العمل هذه ، حتى لا يرهق الزوج في التفكير .

(د) حرية الكذب . مع عدم التدقيق في الاستجواب حتى لا يكشف الكذب .

(هـ) حرية الاحتفاظ بسرية آثار أحمر الشفاه في المناديل ، والروائح العطرية والشعرات المتصقه بالجاككات وعدم الإباحة بمصادرهما خشية الحرج .

(و) حرية التصرف في نقوده الخاصة مع تحريم وضع يد الزوج في جيب الزوج لعلها . أو لسلبها كلها أو بعضها . أو لحسابه عليها .

(ز) حرية انتقاء الخدم ، مع منع طرد الخادومات الجميلات منعا باتا ، ومنحهن حق الالتجاء إلى مجلس الدولة في حالة الطرد ، والعودة إلى المنزل بحكم مجلس الدولة .

مادة ٣ —

نوح : استنى شويه لما تاخذ رأى ، إيه رأيك في الحريات السبع دى ؟

الشيخ عجائب : ناقصين واحده .

محمود : إيه هى دى ؟

عجائب : حرية التحميل .

- نوح : حرية إيه ؟
- عجائب : حرية التحميل .
- نوح : كلام إيه ده يا شيخ عجائب .. ده كلام عيب ، ما نقلرش ننص عليه في صلب القانون .
- عجائب : عيب ؟! واللى فات دا كله مش عيب ؟
- سيد : أصل يا شيخ عجائب .. حرية التحميل .. حاجه مفروغ منها .. كل واحد له الحق فيها .. من غير ما ننص عليها .. فيه حد مالوش حق في تحميل زوجته ؟
- عجائب : زوجته ؟. زوجته إيه يا سى سيد ؟ انا قصدى زوجات الغير
- نوح : يا نهارك اسود ، عايز ننص على كده في القانون ؟
- عجائب : أيوه .
- نوح : أيوه ازاي بقى ؟
- عجائب : أيوه .. يعنى أيوه .. هى دى فيها حاجه ؟. حرية التحميل بواسطة الأحبة والشبهبة والسحر والذى منه .. يا تنصوا عليها في القانون ، يا مستقيل .. السلام عليكم (وينهض) .
- نوح : طيب اقعد بس .
- عجائب : أقعد ازاي .. مش كفاهه اللى جراالى .. انتو عايزينى اقع فيه تانى .. هوا اللى جراالى دا مش من تحت راس ان الحرية دى مش مكفوله ..
- أمال إيه بقى فائدة الجمعية سلام عليكم (وينهض) !
- نوح : طيب اقعد .. حانص لك عليها .. اكتبها عندك دى يا سيد افندى واكتب بين قوسين (خاصة بالشيخ عجائب) .
- محمود : واشمعى بقى الشيخ عجائب .. هوا فيه خيار وفاقوس ؟
- نوح : يا أخى دى حاجه تدخل في نطاق عمله .. يعنى بياكل منها عيش .. وانت لازمك ليه .. حاتعمل احجبه انت كان ؟
- محمود : مين يعرف .. حد عارف الظروف ، خليفها سايه كده من غير

تحديد .

نوح : حاضر .. خليها كده عامه ما فيش داعي للتخصيص ، اقرا المادة اللي بعدها .

سيد : مادة ٣ : شروط العضوية ...

(يدق الجرس فيقفز سيد إلى الباب ، ويدو الخوف على الجميع يفتح سيد بخذر ولكن الباب يدفع ويدخل منه قرقر لاهتا) .

المشهد الرابع

قرقر : (متدفعاً في الحديث قبل أن يرى الموجودين) الحق يا سيد افندى ... عرفت إيه اللي حصل .. مش دلوقت (يلمح نوح افندى فتصيه دهشة وفرع ويقف الكلام على شفتيه) الله .. هو سيدى نوح افندى هنا ؟!

نوح : إيه الحكاياه يا واد يا قرقر .. مالك ؟

قرقر : لا .. ما فيش حاجه .. دا انا بس .. أصلى ..

سيد : أصلك إيه ؟ فيه إيه ؟ حصل حاجه ؟!

قرقر : (يغمز سيد بطرف عينية ويقترب منه هامساً) حصل كارته .. الست ام عبده قفشت الجواب اللي كان مدلل من البلكون لأن ست بيه ما كانتش موجوده وهى اللي كانت قاعده فى البلكونه .. واستقرته .. وعرفت اللي فيه .. وعامله هيجان وحا توديكو فى داهيه .. شوفولكوا طريقه بسرعه .

سيد : (مذهولاً) طريقه ؟ طريقه ؟! دى اتنيلت خالص .

نوح : بتوشوشوا بتقولوا إيه ؟! قرب هنا يا واد يا قرقر .. قرب ؟! إيه الحكاياه ؟!

قرقر : (يقترب مرتبكاً) ما فيش حاجه .. ده موضوع كان كلغنى بيه

- سید افندی .
- نوح : طب اقعء .
- قرقر : أقعء ازای ؟
- نوح : اقعء .
- قرقر : أنا ورايا شغل .
- نوح : قلت لك اقعء یعنی اقعء .
- قرقر : والسء ام عبءه ؟
- نوح : ولا تهلك .. انت مصيرك بقى فى إيدى حسب قانون الجمعية ..
- المادة (٢) الفقرة (ز) .. للأزواج حرية انتقاء الخدم .. اقعء ..
- اكتب اسمه عندك يا سید افندی .. أهو دلوقت بقى مجلس إداره محترم .. إاحنا ممكن كان نعمله سكرتير عام مساعد .. ده يتفعلك أوى يا سید افندی .. يقدر يساعدك ، فى كنس الجمعية .. فى رشها ، برضه الأمر ما يخلاش .
- سید : (يكتب) عبد الجليل الجرجاوى وشهرته قرقر سكرتير عام مساعد لشؤون الكنس والرش .
- قرقر : ما بلاش حكاية الكنس والرش .. خليفها عايمه .. يمكن تحتاجولى فى حاجه تانيه .
- نوح : برضه أحسن ، اشطبها يا سى سید ، كمل قرايه .
- سید : المادة ٣ : شروط العضوية :
- (١) أن يكون إنسانا عاقلا محترما .
- محمود : (صائحا) إيه هوا ده ١٩ عاقل إيه ومحترم إيه ؟ الظاهر انكم مش عايزين حد ينضم للجمعية أبدا .. دى شروط معجزه .. دى هى دى الشروط اللى يجب انها ما تتوفرش فى العضو .
- نوح : ازای بقى ؟
- محمود : لأنه إذا كان عاقل .. مش حا يتجوز .

- سيد : وإذا كان محترم ؟
- محمود : مش حا يخش الجمعيه .
- نوح : طيب شيل الشرط ده .. اقرا اللي بعده .
- سيد : (٢) اتنين .
- نوح : خليها (١) واحد على طول .
- سيد : طب (١) واحد .. أن يكون زوجا تعيسا .
- قرقر : الله ؟! وإذا ما كانش متجوز زى حالاتى .
- نوح : الجمعيه تجوزه .
- قرقر : طيب وإذا ما بقاش تعيسا ؟
- نوح : الجمعيه تتولى إتعاسه .
- قرقر : ما اتتعسش ؟
- نوح : تطلقه وتجوزه واحده تانيه تتعسه .
- قرقر : برضه ما اتتعسش .
- نوح : يبقى طابور خامس .. يجب فصله .
- قرقر : وإذا ..
- سيد : إحنا مش حا نخلص واللايه ؟! بس بقى يا سى قرقر خلينا نكمل .
- قرقر : يعنى ما استفهمش ؟
- سيد : ابقى استفهم بعدين .. خلينا نخلص دلوقت ، (ناظرا إلى الباب فى قلق .. ثم إلى نوح فى استعطاف) أظن كفايه كده النهارده ؟
- نوح : كفايه ازاي .. انتوا ليه ؟ مش حاسين بخطورة الحالة .. إحنا لازم نشغل ليل نهار .. الحالة وحشه جدا . إحنا اذا ما كناش ننقذ نفسنا .. حان روح فى داهيه .
- (دقائق متواصلة من الجرس .. طرقات متوالية على الباب .. وسمع صوت أم عبده من الخارج) .
- أم عبده : افتح يا ضلالى منك له ، والنيسى لا وديكوا النياية يا خباصين

يا ملاسين .

نوح

: (قافزا من مكانه وهو يلم الأوراق في الحقيبة) يا نهار اسوددى ام عبده .. الحقونى .. لازم فيه وشايه بالجمعية ، خلاص ، روحنا فى داهيه .

(يهرول بحقيقته وأوراقه مندفعاً إلى باب الحجرة وخلفه الشيخ عجائب) .

قرقر

: جمعية إيه وبتاع إيه ؟ إيه العمل دلوقت .. حا تقولوا لها إيه على الجواب اللى بعته سى محمود م البلكونه ؟

محمود

: أنا يا أخويه ما بعتش حاجه .. حد الله بينى وبينهم ، حد فى الدنيا يحب بنت ام عبده !! يحب بنت طوريد ؟ بنت بركان !! يا سائر يارب .. أنا حا زوج يا خال واصطقل انت معاها .. أنا طول عمرى لا با احب حد ولا حد بيعبنى ..
(يتجه إلى باب المطبخ) .

قرقر

: وأنا إيه اللى يخلينى أقابلها .. هو انا مستغنى عن نفسى .. خذنى معاك يا سى محمود .. أنا مش حملها .
(يختفى وراء محمود) .

(يزداد الطرق والدق فيتجه سيد إلى الباب مرتجفا ويفتحه فى تردد فتدفعه أم عبده وتندفع نائرة إلى الداخل وفى يدها الجواب) .

المشهد الخامس

- أم عبده : هوا فین هوا ده ، الضلالی الخیاض الی ما یختشیش .. هوا فا کرها
 إیه ، سایه ؟ و کاله من غیر بواب ؟ مال من غیر صاحب .. عایز
 یلف البنت و یحبب أملها و یخسر أخلاقها ، لا یا حبیبی .. لا یا
 عومر .. إحنا مش من أهل ذلك .. إحنا ناس أحرار ، مش بتوع
 مسخره .
- سید : هدی نفسک بس یا ست ام عبده .. هو لا سمح الله حد قال علیکوا
 حاجه ؟ .
- أم عبده : بقدر .. دا انا کنت قصفت رقبتہ ، و اطلع البلاء علی جتہ .
- سید : طیب امال مزعلہ نفسک لیه ؟ .
- أم عبده : مزعلہ نفسی لیه ؟ علی الی حصل ، هوا الی حصل شویه ..
 عایزنی ارقع بالزغاریط .. عایزنی أتحزم و ارقص .. هی دی عامله
 تتعمل هوا ما فیش خشنا ما فیش حیا دا إحنا ناس أشراف .
- سید : هوا فیه حد قال انکم مش أشراف ؟ دا انتم أسیاد الناس .. دا انتم
 سمعتکم زی الجنیه الذهب .
- أم عبده : ولما انتوا عارفین کده .. بقی لزومه إیه ده (تشير بالخطاب)
 لزومه إیه المسخره و قلة الأدب . . .
- سید : یا ست ام عبده ، هوا فیه مسخره و قلة أدب ! .
- أم عبده : لا .. فیه وعظ ، حوش یا خویه الآیات الی بتنقط منه حوش ،
 حوش الأدب الی بیخر حوش ، آل فیه إیه ؟ .. فیه انت معی
 دائما ، فی کل نومه و قومه ، یاخی ان شا الله ینام ما یقوم ، معاه
 ازای الضلالی الی ما یختشیش علی عرضه .. بنت زی دی لسه عنیها
 ما اتفتحتش یقول علیها انها معاه فی کل نومه .. ازای !! دا انا اودیہ

النيابه ، دانا ايته في السجن .

سيد

: ليه بس يا ست ام عبده .. الراجل قصده برى ونينه طيه .

أم عبده

: طيه ؟! ياخي ما طاب له عيش ، آل طيه آل ، بعدما يقول لها انت
نايمه معايا دايما .. يبقى برضه طيه ، أمال كان ناقص يقول لها
إيه ؟ .

سيد

: يا ست دا قصده توريه .. يعنى في ذهنه دايما ، وهو نايم وهو
صاحي .

أم عبده

: لا يا حبيبي .. لا يا نضري .. احنا مش من بتوع التوريه ، احنا
ناس جد .. ناس أصله .

سيد

: احنا عارفين يا ست ام عبده .. احنا عارفين قيمتكم كويس
خالص ، ومحمود قصده شريف .. محمود يحب بيته ، وعزيز
يتجوزها .

(تسمع نكتة محمود من وراء باب المطبخ) .

أم عبده

: (تلين بعض الشيء) واللى عزيز يتجوز الناس يا سى سيد يقوم
يتجوزهم بالسنانير والخيال ومشابك الغسيل من الشبابتك
والبلكنات .. برضه دا يصح ، هي مالهش أب .. مالهش أم ،
افرض حد من الجيران كان شافه ، يقولوا ليه .. يقولوا البنت دايره
على حل شعرها ، يقولوا مالهش حد يلماها .. إانت عارف الناس
لسانتها وحشه ازاي يا سى سيد ، وما حدش بيقدر ولا يعرف .

سيد

: معلش يا خالتي ام عبده .. حقت عليه .. امسحها فيه انا ، محمود
برضه معذور أصله يحب بيته قوى ويموت فيها .. يتمنى التراب
الى بتدوس عليه ، والنسمه الى بتعمر بيها .. هي حياته ، هي
روحه .

أم عبده

: حيلك .. حيلك يا سى سيد ، احنا مش بتوع حاجات زى دى ..
احنا ما نعرفش الحب .. احنا ناس جد .

- سید : وهواده هزار یا سستی ام عبده ، آمال یبقی إیه الجد ؟ .
- أم عبده : الجد عندنا یعنی جواز .. إذا كان عايزها .. یجی يتقدم ومعاہ الشبكه والذى منه .. ماذا وإلا ..
- سید : وجب یا ست ام عبده .. دا برضه الی حایمعله .
- (تسمع نخبجة احتجاج من محمود وراء الباب) .
- أم عبده : أهو كده الكلام .. الحكایه مش سایه .
- سید : لأ سایه ازای .. احتانا ناس نعرف ونقدر .
- أم عبده : أنا مستیاكوا .. متأخروش .
- سید : نتأخر ازای .. الليلة دی نقرأ الفاتحة .. وبكره . نجيب الشبكه .
- أم عبده : آمال هوا فین سی محمود ؟ .
- سید : سی محمود .. آیوه .. بس وصل كده لغاية مشوار بسيط وزمانه جای .. اتفضلی انت .. وانا أول ما یجی حانزل لكم على طول .. مع السلامه .
- أم عبده : خلیتك بعافیه .. مستیاكم .
- سید : الله یعافیکی .
- (لا تكاد تقترب من الباب حتى یدق الجرس بشدة ، فیرتلك سید ارتباكاً شديداً ویسرع نحو الباب ولا يكاد یفتحه حتى یجد عذیله قد اندفعت إلى الداخل وهی تلهث) .
- عذیلة : ستی .. الحقی یا ستی .. البولیس كابس على البيت ویقولوا عايزین یفتشوا شقتنا والشقه دی كان .
- أم عبده : (تضرب على صدرها) بولیس ؟! یا ندامه .. حد عمل حاجه .. هم فین هم .. أما شوف إیه الحكایه ؟ .
- عذیلة : أهم طالعين فی رجلی یا ستی .
- (لا تكاد تم حديثها حتى یدخل ضابط مباحث ومعه اثنين من المخبرین) .

- سيد : (مذهولا) إيه ؟ فيه إيه ؟ .
- الضابط : خليكوا زى ما انتو كده .. ما فيش حد يتحرك .. فيه واحد هنا اسمه نوح افندى ؟ .
- أم عبده : (فى ذعر) ماله نوح افندى ؟ جراه إيه ؟ فيه إيه ؟ ! .
- الضابط : هوا فين ؟ .
- سيد : هوا فين ؟ .
- الضابط : أيوه هو فين ؟ .
- سيد : إيش عرفنى .
- الضابط : مش دى شقته ؟ .
- عديلة : لا يا حضرة البيه .. شقته تحت .. ودى الست بتاعته .
- الضابط : حضرتك ؟ .
- أم عبده : أيوه انا .. ماله نوح افندى ؟ مش تقوللى يا حضرة الضابط وتريجنى .
- الضابط : متهم بعمل جمعيه سرية لقلب نظام الحكم .
- أم عبده : قلب إيه ؟ ! .
- الضابط : نظام الحكم .
- أم عبده : ياخى ان شا الله تنقلب دماغه ويتوجع قلبه . هوا ده يعرف بقلب نظام حكم .. ودا مين بقى بسلامته اللى قال لك عليه الحكايه دى ؟ .
- الضابط : يا ست احنا عندنا البيانات .. إحنا مش بنهزر .. تعالوا كده شويه خلونا تفتش .
- سيد : وتفتشوا هنا ليه ؟ ! إذا كان نوح افندى مش ساكن هنا ؟ .
- الضابط : لأن المعلومات اللى عندنا ان الاجتماعات بتاعته مع أعضاء الجمعيه بيعقدها هنا .
- أم عبده : بقى كده ؟ ! نوح افندى يعمل جمعيه واجتماعات !! طيب

اتفضلوا فتشوا. ان شاء الله حاييجى نقبكم على شونه.. هوا نوح افندى
فاضى الا للبصيصه والغنا . خشوا فتشوا .. الشقة أهى قدامكم .

سيد : (مرتبكا) لكن ..

الضابط : (للمخبرين) يا الله ابتدوا ..

(يأخذ المخبران فى تفتيش الصالة ويتجه هو إلى باب الحجرة) .

الضابط : (مشيراً إلى الباب) وهنا فيه إيه ؟

سيد : (مرتبكا) هنا فيه .. فيه .. لا مافيش حاجه ، مافيش حاجه
أبدا .

الضابط : متأكد ؟ .

سيد : جدا .

أم عبده : ياخويا خش شوف وريح نفسك .. آل نوح افندى آل .. داتلقية
زمانه سطيحة فى السكر .. هوا يفوق لنفسه لما حا يفوق
للجمعيات .

(الضابط يدفع الباب فيفاجأ بنوح افندى واقفا خلفه ممسكا
بالحقيبة والأوراق فيراجع فى دهشة) .

الضابط : الله ؟! إيه ده ؟ .

أم عبده : (تضرب على صدرها) نوح افندى .. يا نهار مهيب ومنيل ..
انت بتعمل إيه هنا يا راجل ! .

الضابط : هوا دا نوح افندى .. هه .. بقى كده !! ما فيش حاجه أبدا ؟!
زمانه سطيحة من السكر !! اطلع يا نوح افندى .. اطلع .

(يدخل نوح افندى فيدور وراءه الشيخ عجائب وهو معصوب
الرأس) .

الضابط : ودا إيه كان ؟ .

عديلة : (تشهق من فرط الدهشة) الشيخ عجائب ، بيلك انت كان
بتعمل إيه هنا ؟ .

- الضابط : خش .. خش .. وانت تبقى ايه يا شيخ عجائب .. عضو مجلس إدارة متدب ؟ .
- عجائب : أبدا والله .. أنا عضو عادى .. عضو مستجد ، بقالى خمس دقائق بس ، ولولا العلقه اللى اترقعتها دلوقت ، ما كنتش دخلتها أبدا ..
- أم عبده : الله يخرب بيتك يا زهره بحق جاه النبى ، انت اللى كنت السبب .
- عجائب : يا ناس ، يا هوه ، أنا فى حلم والا علم .. نوح افندى والشيخ عجائب يعملوا جميعه ، لقلب نظام الحكم ؟ حقه بطلوا ده واسمعوا ده .
- عديلة : ياما تحت السواهى دواهى .. الواحد يشوفهم يقول عليهم غلابه وعلى نياتهم .
- الضابط : (لأحد المحبرين) خد منه الشنطه حطها على الترايزه ، وطلع اللى فيها .
- عجائب : (يهم المحبر بأخذ الأوراق والحقيه ولكن نوح يتشبث بهما) .
- الضابط : اديها له .
- نوح : ما يمكنش .
- الضابط : (فى دهشة) ما يمكنش ليه ؟ .
- نوح : ما يمكنش يطلع اللى فيها قدام الحرم دول (ويشير إلى أم عبده وعديله) .
- الضابط : ليه بقى ؟ فيها قباحه ؟ .
- نوح : وهم الستات يكرهوا القباحه ؟ .
- الضابط : أمال فيها ايه ؟ .
- نوح : بعدين اقول لك ، بس أرجوك تأمر بإخراج صنف الحرم اللى هنا علشان نعرف نتفاهم على رواقه .
- أم عبده : أنا اخرج ؟ يا اخى ان شا الله تخرج على ضهرك يا بعيد .. وايش عجب .. أنا اللى اخرج بس . أنا لوحدى من دونهم كلهم اللى (أم رتية)

تخاف منى ، أنا الى مستحملك طول العمر ، ومستحمله همك
وبلاويك .

الضابط : طب يا ست اتفصلى بره شويه ، أما نشوف آخرتها معاه .
أم عبده : أتفضل بره .. ليه عدوته ؟ ضبابه على عينه ؟ والنبي ما اخرج الا
ما اشوف إيه الحكاياه .. أنا عارفاه ، وعارفه وحايده ، المسأله لازم
فيها سر .

الضابط : يا ستى خطينا نشوف شغلنا .
أم عبده : دا بيتى . ما اخرجش ولا اتحركشى .
الضابط : طب يا سى نوح افندى ، اديله الشنطه .
نوح : (متشبثا بها بشدة) أبداً .. هوا انا مجنون اوربها الى فيها ايه .. أنا
قتيل الشنطه .

الضابط : طيب خليها معاك (للمخبرين) كملوا تفتيش ، نحش انت فتش فى
بقية الأود (يشير إلى باب المطبخ) ودإيه ؟ .

سيد : المطبخ ودورة الميه .
الضابط : وفيهم إيه ؟ .

سيد : عضو مجلس الإدارة المنتدب .. والسكرتير العام المساعد .. لشئون
الكس والرش .

(يفتح الباب .. ويخرج قرقر منفعلا) .

قرقر : ما قولنا اشطبوها دى .. سكرتير عام مساعد بس .. ما فيش لزوم
للفضايح دى .

أم عبده : يابن الصرمه القديمه .. انت كان بتشتغل فى الجمعيات السريه ؟
دى لازم جمعيه وقيع خالص .. سيهم يا حضرة الضابط سيهم
بلاش تضيع وقت .. دول جماعه مخاييل .. أنا عارفاهم كويس ..
ما فيش فيهم عاقل غير سى محمود افندى .. لو كان هنا كنا قدرنا
نعرف منه الحكاياه وما فيها .

(محمود يخرج متحنحا) .

- محمود : السلام عليكم .
- أم عبده : يا نهار اسود .. انت كان معاهم !! لا .. أنا خلاص .. برج من عقلى حاططير .. لازم اعرف إيه الحكايه ؟ إيه السر ؟ .
- الضابط : وده إيه كان ؟ .
- نوح : عضو مجلس الإدارة المنتدب .
- أم عبده : منتدب ؟ يا اخى إلهى يندبوا عليك .. يا راجل يا شايب يا عايب .. مش حاطورينى إيه اللى فى الشنطه دى ؟ .
- نوح : ما يمكنش ، أنا مجنون أودى نفسى فى داهيه .
- الضابط : انت لسه حاطودى نفسك فى داهيه .. دانت حاتروح اللومان .
- نوح : معلش لومان لومان .. برضه أهون من اللى حاطجرالى لو شافت اللى فى الشنطه .
- أم عبده : آه يا نارى .. لو اتلم على اللى فيها .. لاوريك نجوم الضهر .
- نوح : شفت .. مش قلت لك .
- الضابط : على العموم اتفضلوا قدامى كلكم .. كده بحالكم بمالككم .. اتفضلوا على المحافظه .
- نوح : يا الله بينا .
- محمود : يا الله بينا ازاي ؟ هوه إيه أصله ده ؟ .. انت عايز تودينا فى توكر .. لازم نقول لهم على الحقيقه .
- نوح : حقيقه ؟ .. انت مجنون ؟ .. دى هى دى اللى حاتودينا فى توكر .. اسكتوا انتم من فضلكم أنا الرئيس وأنا مسؤول عن كل حاجه .. يا الله بينا .. اتمسى بالخير يا أم عبده .
- أم عبده : الله لا يمسيك ولا يصبحك بالخير زى ما انت محيرى ومفرج على الناس .
- (يتجهون نحو الباب ويهم أحد التخيرين بفتح الباب عندما يندق)

الجرس فجأة) .

: (منزعجا) وده يبقى مين ده كان ١٩ .

: واحده من الفردتين .. هم اللى فاضلين .. ما بقاش حد تانى بره أبدا .

(يفتح الباب فتبدو زكيه ولعه) .

: مش قلت لك .. آدى فردة .. يبقى فاضل التانيه .

: (فى ذهول) يا نصيبتى ١٩ .. إيه الحكايه ١٩ .. إيه أصله ده ١٩ ..

جربى إيه كفى الله الشر .. إحنا جاين نتعشى ونسهر ونبسط والّا جاين تفتح محضر .

: بقى كده .. قولتولى .. يا خياصين يا هلاسين يا ولاد الصرم ..

هى دى الجمعيه السريه بتاعتكم . بقى كللكم ملمومين علشان

تقعّدوا تسكروا وتهيصوا .. وتعملوها أردغانه .. خشى ياخنى

خشى .. خشى سمى عليهم .. قبل ما يروحوا التخشيه .. هوادى

قلب نظام الحكم .. ياخنى إلهى تتوجع قلوبكم .. من أولكم

لآخركم .. بقى كللكم ملمومين علشان خاطر البت المفصوصه

دى .. اللى زى عصا عيص النقاريه .

: نقاريه مين يا حبيبى .. ما شهبش والّا إيه ١٩ دانا ولعه والأجر على

الله .

: ولعه لما تقيد فى نافوخك ونافوخهم .. اتلمى يا بت لحسن

والنبي ..

: والنبي إيه يا ادلعدى ١٩ حاتعمل فى إيه .. حاتقطعى الراتب اللى

بتجربيه عليه .. حاتحوشى عنى الخيرات اللى مفرقنى فيها بسلامته

نوح افندى .. آل اللى يفرقه العويل سيفه .

: سامع يا سى نوح .. سامع .

: كويس قوى .. كويس خالص .. بلاش نشوف شغلنا ونقف

سيد

محمود

محمود

زكية

أم عبده

زكية

أم عبده

زكية

أم عبده

الضابط

نفرج على ماتش الردح اللى بينكم . بس خلاص .. انتيينا .. فوتو قدامى كللكم .

أم عبده : يفوتوا قدامك انت ؟ .. دول يفوتوا قدامى انا .. انت لسه برضك فاكرا انهم عاملين جميعه سريره وحا يقلبوا نظام الحكم ؟! بقى بعد اللى انت شايفه ده عايز برضه تاخدهم معاك ؟! دا انت لازم على نياتك .. سيهم لى انت .. انا اشوف خلاصى معاهم .. اتفضل انت وأنا حاشوف شغلى .

نوح : إوعى يا حضرة الضابط .. إوعى تسيينا .. لو سييتنا أنا حابلق عنك . حابقى إهمال فى تأدية وظيفتك .. آدينى بقول لك ايه .

عديلة : طيب فوت انت قدامى يا شيخ قطران .

عجائب : أبدا .. انا مع نوح افندى .. الحقنى يا حضرة الضابط .

الضابط : هو إيه أصله ده .. انتم إيه حكايته ؟.

(يلقى الجرس) .

محمود : وادى الفرده الثانيه .. أهى خلاص كملت . أظن بعد كده مش حابقى فيه خوف أبدا .. وادى قعده (يجلس متربعا على الكنبه بعد أن يأخذ زجاجة بيرو ويفتحها) تاخذ لك شفته يا خال ؟.

سيد : (وهو يتجه ليفتح الباب) يا أخى احنا فى إيه والا فى إيه . أما نشوف اللى حابجرالنا .

محمود : يعنى حابجرالنا إيه اكتر من كده ؟ آل ضربوا الاعور على عينه آل خسرانه خسرانه .

(يفتح سيد الباب فتبدو به بيته) .

بيته : (فى ذهول وهى تهتم بالتراجع) الله ؟! وإيه جايكم كللكم هنا ؟.

سيد : (مرتبكا) لا مؤاخذه يا ست بيته ، أصل فيه شوية سوء تفاهم ، أنا متأسف قوى ، اتفضللى استريحى .

(تقف بيته فى الباب حائرة وجلة) .

- بهية : (وهي تنظر إلى المختبرين) ودول يعملوا ايه هنا ؟ ايه اللي شايله بابا ؟ .
- سيد : مافيش حاجة . مافيش حاجة أبدا (يتقدم نحو نوح افندى ويأخذ منه الشنطة) هات يا سى نوح افندى الشنطة بتاعتى واتفضلوا انتوا على تحت . يا حضرة الضابط ، أنا اللي مسئول عن كل حاجة ، نوح افندى كان جاي ييطالبنى بالأجره . فعرضت عليه انه يشترك معايا فى جمعيه عاملها ، اسمها جمعية قتل الزوجات .
- الضابط : قتل ايه ؟ .
- سيد : الزوجات ، الزوجات ، انت مش متجوز ؟ .
- الضابط : متجوز .
- سيد : يبقى المشروع لازم يهلك قوى .
- الضابط : (ضاحكا) بس لسه متجوز جديد .
- سيد : يبقى كان شهر واحد حا تحتاج لنا ، واتفضل شوف الأوراق علشان تصدق ، أهه اقرأ .
- (يقرأ الضابط ثم يقهقه) .
- الضابط : دى الجمعيه بتاعتكم ؟ وعلشان كده خايف تورى الاوراق للست بتاعتك يا نوح افندى ؟ .
- نوح : انا ماليش دعوه بالجمعيه ، أنا رفضت خالص اشترك فيها . أنا راجل با احب مراقى موت ، موت .
- أم عبده : ايه ؟ بقى كده ؟ .
- الضابط : طيب عن إذنكم يا جماعه ، أنا متأسف أوى لسوء التفاهم اللي حصل ، الظاهر ان المعلومات اللي جت لنا كانت مبنيه على مجرد شكوك كاذبه متأسف جدا ، سلاموا عليكم .
- (يخرج الضابط والمختبرين ويحاول نوح الخروج فى أذيالهم) .
- أم عبده : (توقفه) بس ، رايح فين ؟ .

- نوح : مش خلاص خلصنا ؟ الحكايه طلعت فشوش ؟
 أم عبده : فشوش عندهم هم ، لكن مش عندي أنا ، إنت فاكرا أنا ينطلى على الكلام ده ، أنا لسه لى حساب معاك . الست ولعه هانم إايه الى جايها هنا .. جايه لمن ؟
- نوح : أنا عارف ، هو انا صاحب الشقه .
 أم عبده : والشرب والمزه دى مين الى جايهم ؟
 نوح : أنا مالى يا ست .
- أم عبده : مالك ؟ جاك مله على جنبك ، دا انا حاسود عيشتك . ما بقاش كان غير تحيب لى النسوان الهلافيت لغاية البيت ، أنا ابقى قاعده تحت مستتيك على نار ، وانت قاعد تسكر وتبيض وتفرش مع الست ولعه (تمسك بتلايبه وتهم بضربه) .
- نوح : يا ست والله العظيم انا ما اعرف انها جايه .
 أم عبده : آمال يعنى جايه لمن ؟ (تشدد الحناق عليه) .
- محمود : جايه لى أنا يا ست أم عبده ، سيني الراجل بقى ، ده مظلوم .
 أم عبده : (تستدير إلى محمود) جايه لك انت ؟ ! وكان بتقر بلسانك يا خباص يا ضلالى . انت الى عامل بتحب وعمال تحدف جوابات الغرام من الشبايك والبلوكونات . انت الى عمال تضحك على عقول البنات . انت يا نصاب يا فلاق ، والنسى لاوديك فى داهيه . شايفه يا ست بهيه شايفه السافل اللون المجرم . الى عمال يضحك على عقلك .. شايفه الرجاله .
- سيد : (فى غضب شديد) إيه ده يا سى محمود الكلام الفارغ الى بتقوله ده ، ما تصدقهش يا ست أم عبده ، ما تسمعيش كلامه يا ست بهيه ، دا بيحبك قوى .. دا يموت فيك . دا ما ينامش الليل من التفكير فيك ، دا حا يخطبك حالا دلوقت .
- زكية : (صارحه) !؟ الحاين ، الى ما عنلوش ضمير !.

- محمود : بقى اسمع يا خال ، لحد هنا وبس ، كفايه اللخبطة اللي حصلت دى كلها ، أنا قلت لك أنا لا با احب ولا با اخطب .
- سيد : ما تصدقش يا ست بيه ، دا بيكذب .
- بيهة : (تطرق برأسها) لا ما بيكذبش ، اللي بيكذب انت .. أنا عارفه مين اللي بيحبنى ، وعارفه مين اللي يكتب لى الجوابات . أنا عارفه مين اللي يقعد طول الليل يصفر الألحان الحزينه الجميله . أنا عارفه مين اللي قلبه جميل ومشاعره رقيقه ونفسه طيبه ، عارفه كل حاجه . وحاسه بالجرح اللي سيتهولك أول مره شفتك ، وعرفت بعدها ان انا اخطأت الشخص اللي بحبه ، وابتدا شعورى يتجه اتجاهه الصحيح ، وحاولت كام مره أقول لك ان انا عارفه ، لكن كنت ما بتدنيش فرصه ، كنت بتهرب ، كنت خايف ، واطن دلوقت أحسن فرصه أقول لك فيها الحقيقه قدامهم كلهم . واقول لك كان انا مستعده انى اتجوزك .
- سيد : (مذهولا) مش معقول ، انا مش مصدق ؟! أنا ، أنا ، انتى ، انتى ؟ .
- أم عبده : ما شاء الله ، ولك عين تقولى كده قدامنا ؟ .
- سيد : يا خالتي ام عبده ، أنا مش قادر أقول إيه .. أنا ما كنتش فاكرا ان ربنا حبا يكرمنا للدرجه دى .. أنا ما كنتش متصور أبدا أن صبرى الطويل ده يتهى بتحقيق الحلم اللي كنت يائس منه .. أنا طالب القرب منك فى بنتك .. أنا طالب القرب منك يا نوح افندى .
- نوح : وجمعية قتل الزوجات ؟ .
- سيد : فلتسقط جمعية قتل الزوجات .. ولتجى الزوجات .
- نوح : واذا عملت فيك زى امها ما بتعمل فيه ؟ .
- بيهة : ما افتكرش ، ما فيش أسهل من مرضاة الزوج ، الحكاياه ما تستوجبش جهد كبير أبدا .. كل الحكاياه أن الزوجه تكيف مزاجها

على مزاج جوزها .. اذا كان ما يحبس الخروج تبقى تحاول هي انها تحب البيت ، واذا كان يكره التنظيف ، يبقى مش لازم تنظف قدماه .. ده بيته اللي يستريح فيه .. وأظن أقل ما فيها انها تبيأ له فيه الحاجة اللي ترضيه حتى ولو كانت غلط ، ومش ضرورى تضيق عليه ، وتسنكر عليه الشبايك .. لازم تديله شوية حريه ، وشوية هوا ، يخلوه بحس بقيمتها .. ما فيش داعى تشتغل له بوليس سرى ، المهم انها هي تكون كويسه . ومسيره اذا كان بيص كده والا كده انه يقارن بينها وبين غيرها ، ويحس بفضلها ويعرف ان هسى الأحسن ، وانه ما لوش غيرها ، ما فيش داعى للشبشه والسحر والكلام الفارغ .. كل ده نصب واحتيال .

عجائب : أيوه ، والله يا بتى لك حق ، أنا عمرى ما قلحت فى حاجه عملتها أبدا .. الا حاجه واحده ، اللي هي كانت طالباها بنت الصرم .. عديله .

محمود : كانت طالبة ايه ؟

عجائب : كانت عايزه اعمل لها حجاب علشان تتجوز . عملت لها الحجاب ، وبعد جمعيتين اتجوزتتى ، ووقعت انا فى شر أعمالى .
عديلة : بقى كده ، طيب بس لما تطلع فوق .. وانا اسود لك العين التانيه .
محمود : دلوقت خلاص وافقتم ؟

نوح : أنا ما عنديش مانع .

أم عبده : أما تتفق فى الأول على المهر والشبكه .

نوح : طيب ، بعدين يحلها ربنا .

أم عبده : أبدا .. دلوقت لازم ننهى كل حاجه .

سيد : أيوه برضه أحسن .. أنا مستعد لكل حاجه .

أم عبده : أنا عايزه خمسين جنيه شبكه .

محمود : خمسين إيه ؟

- أم عبده : خمسين جنيه .
- محمود : طيب خيلنا بقى لما بيعتو لنا فلوس من البلد .
- أم عبده : بلد ؟ بلد إيه يا عمر .. أنا عايزه الفلوس دلوقت حالا .
- نوح : حالا ازاي بس يا ست ام عبده .. هي الحكاياه إيه ؟ قفش !
- أم عبده : أيوه قفش .. أنا لازم اربطهم .
- سيد : بس ، وبعدين .. يا جماعة .
- (يدق الجرس) .
- محمود : ودا يبقى مين دا كان ؟
- (يفتح قرقر فيجد بالباب الشيخ زين) .
- الشيخ زين : يا ساتر .. السلام عليكم .. هي دى شقة سيد افندى الفنت ..
- قرقر : (فرحا) شيخ زين !! أهلا وسهلا .. جيت فى وقتك يا شيخ زين .. اتفضل .. اتفضل (يدخله ويجلسه على أحد المقاعد باحترام وترحيب شديد) أهلا .. أهلا .. أهلا .. اتفضل .
- (يجلس الرجل صامتا والجميع ينظرون إليه فى دهشة ويتسلل قرقر إلى المطبخ ثم يحضر مقشة غليظة ويقف وراءه ثم يهوى بها على رأسه فيختر مغشيا عليه) .
- سيد : (صارخا) إيه ده ؟ إيه إيه الى عملته ده ؟ انت اتجننت ؟
- قرقر : (يفرك يديه) بس فرجت (يدخل يده فى جيب الرجل ثم يخرج الحافظة مليئة بالنقود) عايزين كام (يعد) عشرة .. عشرين .. ثلاثين .. اربعين . خمسين .. يدوبك يكلمك (يعطى النقود لأم عبده) .
- أم عبده : إيه الى عملته ده ؟
- قرقر : خدى بس دى فلوسهم .. جايها لهم م البلد .
- نوح : طيب وما سبتوش ليه لما يديهاهم ؟
- قرقر : أسيبه ؟ هوا انا اتجننت .. حا يقعد يقول .. بعد فحص وبحث

وتمحيص وإثبات شخصيه ، وموت يا حمار لما يجيلك العليق .	
: (تهم بالخروج) طيب اخرج انا بقى .	زكية
: تخرجى ازاي ! دول هم اللى يخرجوا .. يا الله يا جماعه اتفضلوا	محمود
كلكم من غير مطرود .. يا الله يا الله .	
: يا الله بينا ، فوت قدامى يا سخام البرك ؟	أم عبده
: اتفضل يا نوح افندى .	سيد
: (يتقدم هو) ولا مؤاخذه سخام البرك .. ها يبقى انا .. نوح	فرقر
افندى يبقى هباب الطين .	
: اتفضل يا سى هباب الطين .	أم عبده
: ما فيش فايده .. اللسان الزفر .. حا يفضل طول عمره زفر .	نوح
: فلتسقط الزوجات ولتحى زكيه ولعه .	محمود

(يسدل الستار)

ختام

للمؤلف

(قصص قصيرة ١٩٤٧)	أطياف
(رواية ١٩٤٧)	نائب عزرائيل
(قصص - قصيرة ١٩٤٨)	اثنتا عشرة امرأة
(..... ١٩٤٨)	خبايا الصدور
(..... ١٩٤٨)	يا أمة ضحككت
(..... ١٩٤٩)	اثنا عشر رجلا
(رواية ١٩٤٩)	أرض النفاق
(قصص قصيرة ١٩٤٩)	في موكب الهوى
(..... ١٩٤٩)	من العالم المجهول
(..... ١٩٥٠)	هذه النفوس
(رواية ١٩٥٠)	إلى راحلة
(قصص قصيرة ١٩٥٠)	مبكى العشاق
(..... ١٩٥١)	بين أبو الريش وجنيئة ناميش
(..... ١٩٥١)	أغنيات
(مسرحية ١٩٥١)	أم رتيبة
(قصص قصيرة ١٩٥١)	هذا هو الحب
(..... ١٩٥١)	صور طبق الأصل
(رواية ١٩٥٢)	بين الأطلال
(..... ١٩٥٢)	السقامات
(قصص قصيرة ١٩٥٢)	سحار الليالي
(..... ١٩٥٢)	الشيخ زغرب
(..... ١٩٥٢)	نفحة من الإيمان
(مسرحية ١٩٥٢)	وراء الستار
(قصص قصيرة ١٩٥٣)	ست نساء وستة رجال
(..... ١٩٥٣)	هذه الحياة

(رواية ١٩٥٣)	البحث عن جسد
(مسرحية ١٩٥٣)	جمعية قتل الزوجات
(رواية ١٩٥٣)	فديتك ياليلي
(قصص قصيرة ١٩٥٣)	ليلة خمر
(..... ١٩٥٣)	همسة عابرة
(رواية في جزأين ١٩٥٤)	رد قلبي
(قصص قصيرة ١٩٥٥)	ليال ودموع
(رواية ١٩٥٦)	طريق العودة
(مقالات ١٩٥٧)	أيام تمر
(..... ١٩٥٨)	من حياتي
(..... ١٩٥٩)	لطمات ولثامات
(رواية في جزأين ١٩٦٠)	نادية
(..... ١٩٦١)	جفت الدموع
(مقالات ١٩٦١)	أيام مشرقة
(..... ١٩٦١)	أيام وذكريات
(..... ١٩٦٢)	أيام من عمري
(رواية في جزأين ١٩٦٤)	ليل له آخر
(مسرحية ١٩٦٦)	أقوى من الزمن
(رواية في جزأين ١٩٦٩)	نحن لا نزرع الشوك
(رواية ١٩٧٠)	لست وحدك
(مقالات ١٩٧٠)	من وراء الغيم
(..... ١٩٧١)	أيام عبد الناصر
(رواية ١٩٧١)	ابتسامة على شفثيه
(رحلات ١٩٧١)	طائر بين المحيطين
(قصة ١٩٧٣)	العمر لحظة

الإستاذ يوسف السباعى


- اثنا عشر رجلا
- اثنتا عشرة امرأة
- ست نساء وستة رجال
- المسقومات
- طريق العودة
- بين الأطلال
- لست وحدك
- جفت الدموع (الجزء الأول)
- جفت الدموع (الجزء الثانى)
- ليل له آخر (الجزء الأول)
- ليل له آخر (الجزء الثانى)
- هذه النفوس — هذه الحياة
- من العالم المجهول — خبايا الصدور
- ليلى ودموع — أطياف
- نفحة من الإيمان — صور طبق الأصل
- ليلة خم — من حياتى
- مبكى العشاق — فى موكب الهوى
- سمار الليالى
- هذا هو الحب

- طائر بين المحيطين
- من وراء الغيم
- ابتسامة على شفتيه
- أغنيات — الشيخ زعرب
- بين أبو الريش وجنيّة ناميش — يا أمة ضحكت
- نائب عزرائيل — البحث عن جسد
- وراء الستار — أقوى من الزمن
- أم رتيبة — جمعية قتل الزوجات
- ناديسة (الجزء الأول)
- ناديسة (الجزء الثاني)
- رد قلبي (الجزء الأول)
- رد قلبي (الجزء الثاني)
- نحن لا نزرع الشوك (الجزء الأول)
- نحن لا نزرع الشوك (الجزء الثاني)
- إني راحلة
- أرض النفاق
- فديتك يا ليلي

رقم الإيداع ٨٧ / ٨١٨٧

الترقيم الدولي ٥ — ٠٣٤١ — ١١ — ٩٧٧

مكتبة مصر
٣ شارع كامل صدقي - البحالة



دار مصر للطباعة
سعيد جوده السحار وشركاه